







Smithsonian Libraries

Gift of  
Dr. James G. Mead



















ARISTOTELIS  
DE ANIMALIBVS  
HISTORIAE  
LIBRI X.

---

GRAECE ET LATINE.

---

TEXTVM RECENSUIT  
IVL. CAES. SCALIGERI VERSIONEM

DILIGENTER RECOGNOVIT

COMMENTARIVM AMPLISSIMVM  
INDICESQVE LOCVPLETISSIMOS

ADIECIT

IO. GOTTLOB SCHNEIDER  
SAXO.

---

*TOMVS II.*

---

LIPSIAE  
IN BIBLIOPOLIO HAHNIANO  
1811.



DE ANIMALIBUS  
HISTORIAE  
LIBRI X.

GRACE ET LATINE

TEXTVM RECENSIT  
VI. CAES. SCALIGERI VERSIONEM

AVGUSTI RECESSIT

COMMENTARIUM A M. P. L. S. I. V. M.  
INDICISQUE LOCUTURUS

AVGUSTI

IO. GOTTL. SCHNEIDER

1786

TOMUS II.

LIBRI X.

IN BIBLIOTHECA MUSEI

1786



PA  
3592  
A4  
A7  
1811  
6.2  
SCNHRB

ARISTOTELIS  
DE ANIMALIBVS  
HISTORIAE

LIBRI X.

E VERSIONE IVLII CAESARIS SCALIGERI

DILIGENTER RECOGNITA

ET TEXTVI GRAECO EMENDATIORI

ACCOMMODATA.







---

# A R I S T O T E L I S

## DE ANIMALIBVS HISTORIAE LIB. I.

---

*[Quae leguntur seclusa intra haec signa ( ), aut nomina graeca sunt, aut interpretationem vocum graecarum continent, si litteris inclinatis scripta, explicationem aliquam addunt. Contra quae intra haec signa [ ] conclusa leguntur, aut scripturae varietatem continent, aut suspecta aut damnata et plane aliena sunt, praecipue, si litterae sint inclinatae.]*

### C A P. I.

Animalium partes aliae simplices sunt, quae in similes sibi particulas diuiduntur, vt caro in carnes: aliae compositae, quae in dissimiles inter se: neque enim manum in manus aut faciem in facies diuides. Harum autem quaedam non solum partes, verum etiam membra nominantur; videlicet eae, quarum hoc ipsum totum, quod efficiunt, diuersas in se partes continet [proprias,] velut caput, crus, manus, item totum brachium, et thorax. Hae namque partes et ipsae totius tum nomen tum rationem habent, et in se alias particulas continent.



- 2 Omnes autem dissimiles inter se partes ex similibus inter se particulis concretæ sunt, quemadmodum manus e carne, nervis, ossibus. Habent vero animalia quaedam partes aut easdem inter se omnes aut diuersas. Partes autem easdem vel specie intelligi volo, vt hominis nasus aut oculus specie cum naso aut oculo hominis (alterius) conuenit: item caro cum carne, et os cum osse. Quod idem de equo et ceteris animalibus, quæ specie inter se eadem esse dicimus. Vt enim totum se habet ad totum, ita partes singulæ sese ad singulas quoque habent. Vel sunt eadem quidem partes, sed excessu defectuque inter se differunt, quorum scilicet genus vnum idemque est. Intelligo genus, vt auium et piscium. Horum enim vtrumque differt tum in (suo) genere, tum si ad (alterum) genus referatur:
- 3 et complures sunt auium ac piscium species. Pleræque autem partes inter se differunt contrariis affectionibus, puta colore et figura; aliae siquidem magis, aliae minus affectæ sunt illis. Praeterea multitudine, paucitate, magnitudine, exiguitate, omnino autem excessu ac defectu. Alia namque crusta intecta sunt, alia testa. Quibusdam rostrum longum est, [vt gruibus:] quibusdam breue. Nonnulla multis, aliqua paucis pennis prædita. Quin etiam in his quoque aliae aliis partes insunt: quæ-



dam enim calcar habent, quo caetera carent: et quibusdam crista est; aliis non item. Verum, paene dixerim, plurimae partes, ex quibus tota constat magnitudo, aut eadem sunt, aut contrariorum differunt ratione, et secundum excessum ac defectum. Hoc enim quod est plus et minus, ad excessum defectumque referre possit aliquis. Quae- 4  
dam autem animalium partes neque specie eadem sunt, neque secundum excessum aut defectum, sed proportionem quadam. Quemadmodum si spinam cum osse, aut ungulam cum ungula, aut manum cum forcipe, aut pennam cum squamma compares: quod enim in aue penna, hoc in pisce squamma. Ad hunc igitur modum animalia secundum partes aut eadem aut diuersa intelligimus: praeterea etiam situ partium. Sunt enim animalium multa, quae tametsi partes easdem habent, non tamen eadem sitas ratione: siquidem mammas alia in pectore, alia habent ad femina. Particularum autem inter se 5  
similium aliae sunt molles et humidae: aliae siccae et durae. Atque humidae quidem aut omnino, aut quamdiu naturam suam obtinent, ut sanguis, cruor, adeps, sebum, medulla, genitura, fel, lac, in quibus comperiuntur; item caro et ea, quae horum sequuntur proportionem: praeterea alia ratione excrementa, qualis est mucus, (phlegma,)



alui sedimenta et vesicae. Siccae autem et duræ; cuiusmodi neruus, cutis, vena, pilus, os, cartilago, unguis, cornu: (idem enim nomen habet pars, quae figuram similem habet, et totum vocatur cornu.) item quae his proportionem respondent.

- 6 Differunt autem animalia vitae, actionum, morum, partium ratione: de quibus primum summatim dicemus; deinde de vnoquoque genere diligentius et prolixius disseremus. Sunt igitur differentiae secundum vitas et actiones et mores fere huiusmodi, ut alia sint aquatilia, alia terrestria. Et aquatilia quidem duplicis naturae: quaedam enim et in humido vitam agunt et inde cibum captant, praeterea humorem tum recipiunt tum remittunt (*respirando*;) quo si priuentur, vivere nequeunt; id quod magnae piscium parti evenit. Quaedam vero in humore quidem degunt atque inde victum quaerunt, verum aërem recipiunt (*spirando*;) non aquam: et extra eam pariunt: cuiusmodi multa sunt, cum eorum, quibus pedum solus usus est, ut lutra (*enydris*), latrax, crocodilus: tum volucra, ut mergus (*aethya*), et colymbis: tum carentia pedibus, ut hydrus. Sunt praeterea, quae in humido aluntur, neque sine eo vivere possunt, verum ea neque aërem neque aquam recipiunt (*spirando*): qualis est vrtica (*acalephe*) et ostrea. Porro
- 7



aquatilium alia sunt marina, alia fluuialia, alia lacustria, alia palustria, vt rana et cordylus. Marinorum autem nonnulla pelagia sunt, quaedam litoralia, alia saxatilia. Terrestrium autem animalium quaedam aërem recipiunt redduntque, id quod spirare et respirare vocant; vt homo, et alia terrestria, quae pulmonem habent. Alia aërem non recipiunt, et tamen viuunt, cibumque in terra capiunt; qualis vespa est et apes atque alia insecta. Dico autem insecta, quorum corpora aut in pronis (inferioribus) partibus, aut et in his et in supinis (superioribus) sunt segmentis distincta. Ac terrestrium quidem multa, vt dictum est, ex humido victum petunt. Eorum autem aquatilium, quae aquam recipiunt, de terra nullum quicquam petit ad cibum. Animalia quoque aliqua principio quidem in humido viuunt, tum autem in aliam mutata formam foris agunt vitam: quod fit in tipulis (empidibus) fluuiorum \* \* \* ex quibus asili (oestri). Ad haec animalium alia sedem mutant, alia non. Quae sedem non mutant, ea omnia in humido viuunt. Nam terrestrium quod non mutet sedem inuenias nullum. At in humido multa eiusmodi viuunt, quoniam agnata sunt: veluti concharum (ostreorum) genera complura. Videtur quoque spongia sensu esse praedita quopiam; si quidem difficillime auelli aiunt, nisi



sensim circum eam motus fiat. Quaedam vero et tanquam agnata adhaerent, et tanquam absoluta mouentur, cuiusmodi genus est vrticae quoddam: sic enim eam vocant. Absolutae enim nonnullae pascuntur noctu. Multa vero quanquam non adhaerescunt, non mouentur tamen: quales ostreae sunt et quae holothuria nominant. Porro alia natatu mouentur, vt pisces et mollia (*mollusca* Scaligero) et crusta intecta, quemadmodum locustae: alia gressu, quemadmodum cancrorum genus; quibus quanquam in aqua habitantibus natura gressum attribuit. Terrestrium autem quaedam alites sunt, vt aues et apes; tametsi haec inter se alia differunt ratione. Alia autem, quae ad motum sola terra nituntur: quorum quaedam gressilia sunt, quaedam reptilia; quaedam attractu corpus prouoluunt. Animal quod volatile tantum sit, vt piscis natatile solummodo est, nullum nouimus. Nam quae membranaceis alis praedita sunt, ingrediuntur; et vespertilio pedes habet; et vitulus marinus quoque, quanquam mutilos. Et auium quarundam pedes prauis sunt; quae propterea graece apodes, latine apedes appellantur. Quamobrem hoc auis genus valde bonis alis praeditum est; quemadmodum aliae quoque huic similes, pedum vsum debiliũ alarum compensant bonitate, vt hirundo et drepanis (latine *falcula*); quae et



moribus et pennis et facie inter se proximae sunt. Apparent autem apedes toto anni tempore, falcula vero aestate post pluuiam et conspicitur et capitur; omnino autem rara visu auicula est. Quae autem et gradiuntur et natant, multa inueniuntur animalia. Sunt praeterea tum vitae tum actiones, quibus 10 ad hunc modum differunt animalia. Partim enim gregalia sunt, partim solitaria: tam ambulatiua, quam volucra ac natatilia. Quaedam vero ambiguae vitae sunt. Gregalium quaedam ciuilem vitam colunt, alia dispersa viuunt. Gregales sunt inter alites columba, grus, olor. Vncunguium nulla. Inter natatilia multa piscium genera, quales quos vocant (*nomine communi*) cursores, (dromades) thynni, pelamydes et amiae. Homo autem vtramque obtinet naturam. Ciuiles animantes sunt, quae 11 vnum communiter exercent opus; id quod non omnes faciunt gregales. Hoc in genere homo est, apes, vespae, formica, grus. Harum autem nonnullae sub duce sunt; quaedam principatu carent; quemadmodum grus et apum genus sub duce degunt. Contra formicae aliaque plurima genera nullum habent principem. Tam vero gregalibus quam solitariis communes affectiones et non migrare et peregrinari. Sunt quae vescantur carne: sunt quibus fructus pro pabulo habeantur: sunt quae ex



omnibus escam parent. Aluntur quaedam certo pastu, velut apes et aranea. Apes enim melle et aliis quibusdam dulciariis paucis vtuntur in cibo: araneae venatu muscarum victitant. Aliae autem animantes piscatu victum quaerunt. Quaedam sane praedatrices sunt. Eo etiam differunt, quod partim recondunt cibos in vsum futurum, partim non. Quaedam domicilia incolunt; aliis tecti vsus nullus. Illius generis sunt talpa, (aspalax) mus, formica, apis. Sub diuo agunt multa insectorum genera, 12 multa quadrupedum. Praeterea locis (*habitationum*) distinguuntur: alia namque foueas subeunt, vt lacerti, angues; alia super terram agunt, sicut equus, canis. Nonnulla foramina sibi excauant; quaedam non. Alia quoque noctu victum quaerunt, alia interdiu. Sunt etiam mansuetae animantes; sunt etiam ferae: quae sane aut ita sunt semper, vt homo et mulus mansueta sunt semper: contra panthera (pardalis) et lupo semper ferae. Quaedam vero etiam celeriter queunt cicurascere, vt elephas. Alia quoque ratio est. Omnia enim genera, quaecunque mansueta sunt, etiam fera sunt, equi, boues, sues, [homines *quidam Codices interserunt.*] oues, 13 caprae, canes. Animantes praeterea aliae sonum edunt, aliae mutae, aliae vocales. Hae autem partim sermone distinguunt vocem, partim sunt illit-



teratae. Item aliae garrulae, [aliae taciturnae, aliae loquaces,] aliae cantatrices, [aliae cantus ignarae:] quibus omnibus id est peculiare, vt coitus tempore cantillent et obloquantur. Campos aliae incolunt, veluti palumbes; (phatta;) aliae montes, vt vpupa: aliae cum homine habitant, vt columba. (peristera.) Aliae in venerem sunt propensiores, vt perdix et gallinaceum genus: aliae castiores, vt coruini generis aues: raro enim admodum hae coitum exercent. Ad haec quaedam ad pugnandum aptae sunt: 14 quibusdam cauendi ingenium comparatum. Prioris generis sunt, quaecunque aut inferunt bellum ipsae, aut illatum propulsant. Cautioribus autem cautio est, ne quid capiant detrimenti. Differunt autem et his discriminibus secundum mores. Quaedam sunt mites et remisso animo neque peruicaces, vt vacca: quaedam animosae atque peruicaces et ineptae ad discendum, vt aper. Aliae cautae et meticulosae, vt ceruus et lepus, [dasypus.] [*Vulgati libri* leporem et cuniculum *nominant.*] Aliae illiberales et insidiosae, vt serpens: aliae liberales, fortes, nobiles, vt leo. Aliae generosae, feroces et insidiosae, vt lupus. Nobile enim id est, quod genere bono prognatum est: generosum, quod non est egressum e natura sua. Item aliae versutae et 15 maleficae, vt vulpes: aliae animosae, amatrices,



adulatrices, vt canis: aliae mites ac mansuescibiles, vt elephanthus. Aliae verecundae et cautae, vt anser: aliae inuidae et elegantes, vt pauo. Animantium autem omnium solus homo consilii capax est. Cum autem ceterarum complures cum memoriae tum disciplinae participes sint, nulla tamen praeter hominem potest reminisci. Sigillatim autem de omnibus generibus deque morum ac vitae ratione multo exactius postea dicetur.

## C A P. II.

Omnibus autem animantibus communes sunt illae partes, quae cibum capiunt, et in quas recipitur: haecque sunt vel eadem vel diuersae inter se iis, quibus diximus, rationibus; nempe aut specie, aut excessu (*et defectu*,) aut proportione, aut situ. Praeter has vero illas quoque plurima animalia communes habent, quibus cibi deiiciunt excrementa: neque enim omnibus eae insunt partes. Vocatur autem pars, qua cibum capitur, os; in quam recipitur, ventriculus: tertia multis nominibus appellatur. Ea vero excrementa cum duorum generum sint, quaecunque animalia eas habent partes, quae liquida excipiunt excrementa, eas quoque habent, quae sicca excipiunt: quae autem hasce habent, non omnia illas item habent. Ergo quaecunque vesicam



habent, etiam ventrem: (aluum:) quae autem ventrem (aluum) habent, non omnia vesicam habent. Nam ea pars, quae humidum excipit excrementum, vesica nominatur; quae siccum excipit, venter. (alius.)

(Vulgo C. 3.)

Reliquorum autem animalium pleraque tum has 3 partes habent, tum eam, qua semen genitale emittant. Atque ex his ea, quae animal generant, aliud quidem intra se ipsum iacit semen, aliud in alterum. Quod intra se iacit, femina vocatur; quod in hanc iacit, mas. In quibusdam tamen maris et feminae discrimen non inest. Ipsa quoque species harum partium, quae ad huiusmodi opus faciendum comparatae sunt, differt. Nam quaedam matricem habent, quaedam partem aliquam eius vicariam. Hae igitur partes, omnium maxime necessariae, aut omnibus aut plurimis animantibus sunt communes.

### C A P. III.

Solus autem sensuum tactus omnibus animantibus communis est: quapropter membrum etiam, in quo iste existit, caret nomine; quod quidem membrum est quibusdam idem; in quibusdam eius vicem aliud quid supplet. Praeterea inest unicui- 2 que animali humor; quo vel natura vel vi si pri-

vetur, interit: inest etiam aliud, in quo ille existit humor. Aliqua enim animalia habent et sanguinem et venam: aliqua aliud quid eorum loco, (haec autem imperfecta sunt,) fibram scilicet et saniem. Tactus igitur parti e particulis inter se similibus constanti insitus est; cuiusmodi caro est, aut eiusdem generis quidpiam. Omnino autem inest sanguineis partibus in eo genere animalium, quae sanguinem habent: in aliis, partibus iis inest, quae proportionem illis respondent. Omnibus autem sensum hunc repraesentari per partes similibus inter  
 3 se particulis constantes, manifestum est. Potestates autem, quae ad actiones pertinent, eae in partibus iis, quae compositae sunt e particulis inter se dissimilibus, constitutae sunt. Sic ore conficitur cibus; loco mouentur animalia pedibus aut alis aut aliis membris his similibus. Ad haec quaedam animalia constant sanguine, velut homines et equi et omnes animantes, quae aut pedibus carent, alioqui perfectae, aut bipedes, aut quadrupedes: aliae autem exangues sunt, ut apis et vespa, et e marinis sepia et locusta, denique omnia, quae plures quaternis pedes habent.

#### C A P. IV. (vulgo V.)

Sunt praeterea animantes quaedam, quae animal pariunt: quaedam ouum; quaedam vermem. Pa-



riunt animal homo, equus, vitulus marinus, (phoca,) atque aliae, quae pilos habent. Tum ex aquaticis cetacea, vt delphin; et quae cartilaginea (selache) dicuntur, veluti musteli (galei) et raiae. (bati.) Quorum illa fistulam habent, branchias vero non habent, vt delphin et balaena. (phalaena.) Habet autem delphin fistulam initio dorsi, balaena in fronte. Haec autem (*cartilaginea*) branchias detectas habent. Ouum autem vocatur foetuum perfectorum, ex cuius parte fit principio animal, quod generatur; ex altera alimentum ipsi generato. Vermis autem est foetus, ex quo, postquam fuerit totus deformatus et auctus, aliud animal totum fit. Eorum 2 igitur, (*quae animal pariunt*,) quaedam intra se (*antea*) pariunt oua, vt cartilaginea: alia pariunt intra se animal, vt homo, equus. Quae autem exeunt in lucem, aliquibus est animal, perfecto demum foetu: aliis ouum: quibusdam vermis. Quorum autem quaedam sunt testaceo putamine, et duum colorum: qualia auium. Alia molli cute et vnius coloris, velut cartilagineis. Vermes quoque alii statim mouentur, alii immobiles. Verum de his exactius postea dicemus, vbi tractabimus generationem.

C A P. V. (Scaligero VI.)

Animalium praeterea quaedam pedes habent,

quaedam non habent. Et illa quidem aut binos, vt homo, et auis sola. Alia quaternos, vt lacerta et canis. Alia plures, vt scolopendra et apes.

- 2 Omnia autem pares habent pedes. In natantium genere quae pedibus carent, alia pinnas habent, vt pisces. Quorum quidam quaternas, binas quidem in supinis (*supernis*), binas in pronis (*inferioribus*) partibus, vt aurata et lupus. Quidam duas tantum; oblongi scilicet et laeues, vt anguilla et conger. Alia vero omnino carent pinnis, vt muraena et quaecunque mari vtuntur, quemadmodum serpentes terra, qui et in aqua simili modo natant. Inter cartilaginea nonnulla pinnis carent, scilicet ea, quae plana sunt et caudata, veluti raia (batos) et pastinaca; sed ipsa latitudine natant. At vero et rana habet et alia, quorum planities non exit te-
- 3 nuis. Quaecunque vero pedes habere videntur, quemadmodum et ea, quae mollusac appellamus, et ipsis pedibus nant et pinnis, et celerius quidem versus corpus, velut sepia, loligo et polypus; quorum neutrum ingreditur, vt polypus. Quae autem duro corio operta sunt, vt locusta, cauda natant, velocissime quidem retrorsum ope pinna- rum, quae ad caudam sunt. Praeterea cordylus et cauda et pedibus natat. Habet autem caudam, qualem glanis, si magnis licet parua componere.



Volatilium autem alia pennis praedita sunt, vt 4  
aquila et accipiter: alia earum loco membranas  
habent, vt apis et scarabaeus: (melolontha:) alia  
corium habent, vt vulpes et verspertilio. Sunt au-  
tẽm tam pinnata, quam quae coriaceis vtuntur alis,  
sanguinea: quae autem membrana volant, exan-  
guia, vt insecta. Tam ea vero, quae pinnis, quam  
quae corio volant, aut binos pedes habent aut nul-  
los: aiunt enim in terra Aethiopia serpentes eius-  
modi esse. Pinnatum ergo genus auis vocatur: re- 5  
liqua duo genera vnicum nomen, quo appellentur,  
non habent. Quae volant et carent sanguine, eo-  
rum alae partim vagina teguntur; eas siquidem sub  
tegmine habent, veluti scarabaei (melolonthae) pi-  
lularii et canthari. Aliis nullum tegmen est: quo-  
rum quaedam binis alis praedita sunt, quaedam  
quaternis. Quaternas habent alas, aut quae prae-  
stant magnitudine, aut quae postrema in parte ge-  
runt aculeum: binas autem tantum, quae aut mi-  
nora sunt, aut aculeum in anterioribus gerunt par-  
tibus. Quibus vero alae vaginis munitae sunt, ea  
nullum habent aculeum: at quae binis feruntur alis,  
aculeo armata sunt in parte anteriore, vt musca,  
tabanus, (myops) asilus, culex. (empis.) Quae- 6  
cunque autem carent sanguine, ea sanguineis mi-  
nora sunt, praeter pauca marina; cuiusmodi quae-

dam e molluscis: (haec enim genera istorum maxime capiunt incrementa in locis apricis;) atque in mari potius, quam in terra, itemque aquis dulcibus. Quaecunque autem mouentur, ea aut quaternis mouentur notis, aut etiam pluribus. Quae sunt sanguinea, quaternis tantum: quippe homo binis manibus, binis pedibus. Aues autem tum alis tum pedibus binis. Quadrupedes autem et pisces, illae quidem quaternis pedibus, hi vero quaternis pinnis. Nam quae aut binis tantum praedita pinnis sunt, aut omnino nullas habent, ut serpens, (*marinus*,) ea nihilo minus quaternis mouentur notis. Etenim flexiones quaternae sunt, aut binae cum ipsis pinnis. Exanguium vero quae plures habent pedes, siue volucra sint, siue humi tantum ambulent, notis pluribus mouentur; quale animal est, quod ephemerum (*diurnum*) dicitur: quippe quatuor pedibus alisque totidem. Est autem peculiaris cuiusdam naturae non solum propter vitam, (*diurnam*,) unde et nomen habet; sed etiam propterea, quod et volucre est et quadrupes. Omnia autem tam quadrupeda quam multipeda simili mouentur modo, per diametrum scilicet. Ac reliqua quidem animalia binos pedes quasi duces habent ad ingrediendum; solus cancer quatuor.



## C A P. VI. [Scaligero VII.]

Sunt autem genera summa quaedam, quibus animalia reliqua distinguuntur. Sunt vero haec: vnum auium; alterum piscium; tertium cetorum: quae omnia constant sanguine. Est et aliud eorum genus, quae testa conteguntur, quod ostreum appellatur. Item aliud, quod molliori testa operitur, ceterum nomine vno comprehensum non est; quales locustae et cancrorum genera et gammarorum. (astacorum.) Praeterea aliud molluscorum; cuiusmodi lolligines et lollii et sepiae. Postremo insectorum quoque genus est; quae omnia carent sanguine. Tum autem quibus pedes attributi sunt, eos habent multos: quin etiam insectorum nonnulla volucris sunt. Cetera vero animalia nequaquam magnis generibus comprehenduntur: neque enim vna species multas species complectitur, sed aut ipsa simplex est, neque differentias capit, ut homo; aut capit quidem species, sed hae nomine carent. Nam quadrupedes, quae pennas non ha- 2 bent, sanguinis omnes quidem sunt participes, sed horum alia animal, alia ouum pariunt. Quae animal pariunt, [non] omnia pilos habent: quae ouum pariunt, squarras habent. Est autem squarra loco similis squammae. Ex iis, quae terrae solo vtuntur ad motum suum, et sanguine praeditus est

serpens, et natura caret pedibus, et squarroſus est. Horum genus vniuerſum ouiparum est, praeter viperam: ſola namque parit animal. Quae vero animal pariunt, ea non omnia pilos habent: nam et piſces quidam pariunt animal: quaecunque tamen pilos habent, omnia pariunt animal; ſiquidem in pilorum genere cenſendi ſunt pili ii, qui ſpinae ſpeciem prae ſe ferunt: quales erinacei gerunt et hyſtrices. Pilorum namque vſum praebent,

3 non pedum, vt echinis. In hoc autem quadrupedum genere (*ſummo*), quod animal parit, multae ſane ſpecies (*genera media*) continentur, verum (*vno aliquo communi*) nomine carent, ſed ſingula ea per ſe nominantur, vt de homine diximus, veluti leo, ceruus, equus, canis et cetera ad eundem modum. Nam ea, quae iubata ſunt, et iumenta vocamus, vnum quoddam genus habent commune, vt equus, aſinus, mulus, ginnus, hinnus: praeterea Syriae mulae, quae propter ſimilitudinem hoc nomine appellantur, ſed omnino non ſunt eiſdem ſpeciei: ſiquidem ex concubitu inter ſe gignuntur. Quare eas ſpecies neceſſe eſt ſeparatim et capere vnamquamque et earum naturam con-

4 templari. [Caput VIII. Scaligero.] Haec igitur hactenus quaſi guſtus gratia appoſita ſint, videlicet, vt, quibus de rebus et quatenus ſit tractandum,



intelligeretur: postea vero accuratius de iisdem  
disseremus; ut primum eas, quae natura insunt,  
differentias, easque, quae omnibus contingunt,  
affectiones accipiamus. Deinde horum causas in-  
vestigare conabimur. Sic enim effici potest, ut via  
rationeque docendi utamur naturae congrua, cum  
notitia singulorum antecesserit. Hinc enim mani-  
festo intelligitur, quibusnam de rebus et ex quibus  
fieri oporteat demonstrationem. Quibus igitur e 5  
partibus animalia ipsa tota constituuntur, eae pri-  
mum capiendae sunt: propterea quod secundum  
has inter se et maxime et primum differunt, iis,  
quibus diximus, modis. Quippe alia habent, alia  
aut non habent, aut non eodem situ, aut non eo-  
dem ordine, aut non eadem specie, aut non eadem  
quantitate: aut quia earum vice alias gerunt, aut  
contrariis praeditas qualitatibus. Incipiendum  
igitur ab hominis partibus est. Nam quemadmo-  
dum numos exploramus, unumquemque cum eo  
conferendo, qui nobis notissimus est: ita hoc in  
aliis quoque agendum est. Atqui homo inter om-  
nia animalia nobis notissimus est necessario. Ac  
tametsi sensui ipsi manifestae sunt partes nostrae,  
tamen ne quid ordinis praetermittatur, (et sane  
rationem cum sensu coniunctam esse par est;) de  
his quoque dicemus. Ac primum quidem de or-

ganicis, deinde de iis, quae ex similibus inter se particulis constant.

### C A P. VII. (Scaligero IX.)

Maximae igitur partes, in quas vniuersum dividitur corpus, hae sunt: caput, collum, thorax, brachia duo, crura duo. Thoracem voco alueum illum, qui a collo ad pudenda vsque pertinet. Capitis igitur pars, quae pilis tegi solet, caluaria dicitur. Huius partes duae: anterior, quae post natum hominem generatur, bregma. Omnium enim ossium, quae in corpore sunt, postremum concrecit. Altera pars posterior, occiput. Inter occipitium et bregma, vertex. Sub bregmate cerebrum: occipitium inane est. Caluaria tota rarum os, rotundum, excarni cute amictum. Habet autem suturas, in mulieribus vnam in orbem; in viris ternas, in vnum magna ex parte coeuntes. Viri tamen caput visum est sine sutura. Medullitium autem caluariae, quem diximus verticem, etiam inuolutio capillorum dicitur. Est autem in quibusdam geminum: nam ii biuertices sunt non osse geminato, sed capillorum inuolutione.

### C A P. VIII.

Quod caluariae subiacet, solo in homine vultus vocatur: in ceteris animalibus non item; ne-



quæ enim piscis aut bouis vultum dicimus. Vultus pars frons est: ea et bregmati subest, et oculos interiâcet. Hanc si quis nactus fuerit magnam, tardiore ingenio erit: qui paruum, mutabilis: quibus lata fuerit, stupidi: rotundâ iracundum indicat.

(Vulgo IX.)

Sub fronte gemina supercilia: quæ vbi recta sunt, molles indicant mores: si ad nasum inflectuntur, asperum hominem ostendunt: si ad tempora, irrisorem et dissimulatorem: demissa autem inuidum. Superciliis subiacent oculi duo, quorum partes tam inferiores quam superiores genæ dicuntur. Harum oras ambientes pili, palpebrae. Partes interiores, quæ humida est, vocatur pupilla, visionis instrumentum: quod eam circumdat, nigrum appellatur, quod extra est, album. Communis autem palpebrae pars tam inferioris quam superioris anguli, duo iuxta nasum, duo iuxta tempora. Qui si longi sunt, nequitiam significant: sin ita sint carnosi, vt pectines, (*alii Codd. vti miluis,*) prope nasum, prauitatis indicia sunt. Omnia igitur animantium genera oculis prædita sunt, præter ea, quæ testa operta sunt, et si quæ alia imperfecta. Quæ vero animal pariunt, eae omnes quoque, nisi talpa. (*aspalax.*) Verum hanc aliquo modo habere quis censere pos-

sit, omnino vero non habere. Omnino enim nihil videt, neque manifesto apparentes oculos habet. Detracta vero pellicula et oculorum sedem inuenies, et nigritiem, quae secundum locum et spatium est a natura ipsis oculis attributa, perinde quasi inchoatos pellicula extrinsecus adnata occupauerit.

(Vulgo C. X.)

- 4 Oculorum id quod album diximus, omnibus fere idem; nigrum autem variatur. Nam quibusdam nigrum sane est; aliis autem caesium admodum; quibusdam caprinum; nonnullis fuluum. Hoc et optimorum indicium morum est, et ad videndum acutissimum. [*Libri vulgati hoc de caprinis oculis praedicant.*] Solus autem animalium homo aut potissimum alio atque alio colore oculos praeditos habet: reliquis vnus color, praeterquam equis, quorum aliquibus alter oculus
- 5 caesius est. Oculi quidam magni, quidam parui, quidam modici: hi optimi sunt. Item aut extant valde, aut in profundo, aut medio spatio siti sunt. Ac profundi quidem quouis in genere animalium acutissimi sunt ad videndum. Qui vero media in regione sunt constituti, optimorum notae morum habentur. Praeterea aut nictabundi sunt, aut intenti, aut media inter hos natura. Hi optimae na-



turae sunt argumentum. Reliquorum alteri inconstantiam, alteri impudentiam designant.

### C A P. IX. (vulgo C. XI.)

Est praeterea capitis pars, qua audimus, nec spiramus, auris: neque enim Alcmaeonis sententia vera est, qui putauit capras auribus spirare. Eius pars altera caret nomine, altera *λοβός* graece dicitur: ipsa tota (*exterior*) ex cartilagine atque carne constat. Regio intima [inuoluta] cochleis similis est, extremo osse auriculam imitans, in quod tanquam in vltimum vas peruenit sonus. Neque ad cerebrum ab eo meatus vllus, sed in palatum oris: at e cerebro ad ipsum tendit vena. At oculi ad cerebrum pertingunt, et vterque super vena pusilla situs est. Omne animal, quodcunque auriculas habet, eas mouet, praeter hominem. Nam quae audiendi sensu praedita sunt, alia auriculas habent, alia non, sed meatum manifestum. Quo in genere et pennata sunt, et quae cute squarrosa conteguntur. At quaecunque animal pariunt, praeter vitulum marinum et delphinem atque alia cetacea, omnia habent auriculas; si quidem animal pariunt etiam cartilaginea. Ac vitulo quidem manifestus est meatus ad audiendum: delphin vero, tametsi audit, tamen aures nullas habet, (*neque*

- meatus manifestos.)* Cetera omnia mouent aurem:
- 3 vnus homo habet immobilem. Sitae aures sunt eadem in circumferentia, in qua et oculi, non autem supra, velut in quibusdam quadrupedibus. Aurium aliae glabrae, aliae inter vtramque naturam. Hae ad audiendum ceteris praestant. Morum hinc argumentum nullum habetur. Item aut magnae sunt aut paruae aut mediocres; atque etiam aut surrectae valde, aut nihil, aut mediocriter. Mediocris natura optimos designat mores. Magnae et surrectae stultiloquentiam et multiloquentiam.
- 4 Quod inter oculum, aurem et verticem interiacet, vocatur tempus. Faciei pars nasus est, qua spiritus com meat. Hac enim respiramus atque expiramus: hac praeterea fit sternutatio, quae est exitus spiritus conferti. Hic solus flatuum habetur sacer, atque etiam pro augurio. Verum et respiratio et expiratio, quae fit naribus, in pectus ipsum per tendit ita, vt sine ipso fieri naribus non possit, quia e pectore, non ex vlla parte capitis, procedat respiratio et expiratio per guttur. Potest autem vita etiam sine hac spiratione existere. Fit etiam per hanc partem olfactus, qui odorandi sensus est. Commode autem mouetur nasus; non vt auris pe-
- 5 culiari quadam natura immobilis. Eius partes, cum dissepiciens cartilago, tum tubi inanes. Est



enim nasus bipartitus. Elephantorum nasus cum longus tum validus est, quo etiam pro manu utitur. Namque et ipsum admouet, et eoprehendit, et ad os adducit tam cibum quam potum: id quod vni ipsi tantum contigit. Mandibulae praeterea 6 duae, quarum pars anterior *γένειον*, (*barbitium*), posterior *γένυς*. (*mentum*.) Inferiorem maxillam animalia mouent omnia, excepto aquatili crocodilo, qui superiorem tantum. Post nasum labia duo carne constant bene mobili. Quod intra maxillas ac labia continetur, os est: cuius partes palatum, et fauces, et gustus instrumentum lingua. Sensus autem saporis mucroni potissimum inest; lata pars minus sentit. Sentit autem etiam quae alia caro omnia, durum, calidum, frigidum quaque sui parte, quemadmodum et saporem. Haec 7 aut lata est, aut angusta, aut mediocris; quae est et optima et explanatissima. Aut soluta aut impedita, qualis blaesorum et balborum. Est autem lingua caro rara et fungosa: huius pars quaedam ligula (epiglottis) est. Post haec quod bipartitum est, tonsillae dicuntur; quod multipartitum, gingiua: carnea haec: intus autem dentes ossei. In recessu autem alia pars vuigera, columella, insidet venae; quae si humore concepto inflammetur, vocatur vua, et suffocat.

## CAP. X. (vulgo CAP. XII. Scaligero X.)

Collum dicitur, quod inter faciem et thoracem est: eius anterior pars guttur, posterior gula. Vocatur quoque arteria [anterior] eius pars, quae est cartilaginea, qua et vox et spiratio fit. At gula carnosae, interior loco, spinae appositae. Posterior autem colli pars, ceruix.

## [CAP. XI. Scaligero.]

Hae sunt usque ad thoracem partes. Porro thoracis aliae anteriores, aliae posteriores. Primum igitur pectus in anteriore parte sub collo est geminis mamillis: in quarum singulis papilla: qua in femellis percolatur lac. Nam mammillae rara textura est. Quanquam etiam in maribus lac aliquando gignitur, quibus sane densa caro: at mulieri spongiosa atque plena meatibus.

## (Vulgo C. XIII.)

- 2 Post thoracem (*pectus*) venter in anteriori parte: cuius radix umbilicus. Quod radici subest duplex, ilia dicuntur: quod vnicum est sub umbilico, aliud: (*abdomen*) cuius pars extrema pubes. Quod supra umbilicum est, hypochondrium dicitur: huic autem et iliis commune cholas. Partes posteriores cinctura disiungit
- 3 lumbus, qui graece *ὀσφύς* dicitur, et nomen inde



habet, quod *ἰσοφύς* est, id est aequaliter distat. Partis imae ad exitum altera pars est quasi stragulum, nates: altera, in quo vertitur coxa, acetabulum. Feminae peculiaris pars matrix. Masculo penis extat in fine thoracis; cuius partes duae. Summum quidem carne constat semper laeui, et, vt ita dicam, aequali, ac vocatur glans: ea tegitur pelle, cui nomen a Graecis impositum non est. Quae si secetur, non coit; sicuti nec gena nec palpebra. Communis pars huic pelli et glandi acroposthia. (*praeputium*.) Altera pars cartilaginea, 4 facile capiens incrementa: egreditur autem atque ingreditur contra quam in iumentis. Infra penem testes gemini, cute circumtecti, quae scrotum dicitur. Ipsi neque caro neque carnis natura procul. Postea cum hi quemadmodum sese habeant, tum de aliis vniuersis partibus diligenter dicemus. Mu- 5 liebre genitale contrario modo situm est atque masculi: nam cauum est sub pube; non quemadmodum in masculo extans. Praeterea collum habet a matrice, quasi transitum quempiam masculi semini. Vtrique autem sexui hac humida exeunt excrementa. Communis autem colli ac pectoris pars iugulum: costae et brachii et humeri, ala: feminis et aluei, inguen. Inter coxam et nates pars interior femur, exterior femur. (*hypoglutis*.) [Cap. XII.

6 Scaligero.] Thoracis igitur partes quae essent anteriores, diximus: pectoris autem posterior pars dorsum appellatur. Dorsi partes scapulae duae et spina. Infra, quae pars respondet ventri, lumbi. Communes autem tam superiori quam inferiori costae, vtrisque octonae. Nam quod aiunt, quosdam septenis esse costis, qui Ligures appellantur, nullus exploratae fidei auctor est.

C A P. XI. (vulgo XV. Scaligero XIII.)

Habet autem homo partes superas et inferas: anteriores et posteriores: dextras et sinistras. Dextrae igitur atque sinistrae partes omnes inter se similes fere atque eadem, praeterquam quod sinistrae imbecilliores. At quae ante et pone, inter se dissimilia: item quae supra et infra; quanquam eo similia, quod infera, quae ad pubem sunt, faciei respondent corpulentia aut macritudine. Crura quoque contrario situ sunt atque brachia: praeterea qui curtis ossibus cubitalibus sunt, ii coxas quoque magna ex parte breues habent: ac quibus sunt  
2 pusilli pedes, manus item parvae. [Caput XIV. Scaligero.] Membrum (*artus*) autem geminum (*geminus*) brachium est: brachii partes humerus, humerale, cubitus, vlna, manus: manus vero vola, digiti quini. Digiti quod plicatile est, nodus:



quod flecti nequit, articulus. Vnico modo pollex  
 flectitur, ceteri duobus. Introrsum flectitur omni-  
 bus tam digitus quam brachium: atque hinc qua  
 flexus fit, cubitus appellatur. Manus interior car-  
 nosa, vola; distincta linea vna aut duabus, totum  
 spatium secantibus, indicio vitae longioris: nam  
 quibus breuior, iis lineae duae praecisae. Brachii  
 manusque articulatio capulus manus dicitur. (Graece  
*καρπὸς*, *Gazae* brachiale: *Scaliger* *tentaui et-*  
*iam* manile, iugum, aptationem.) Extima pars  
 manus nervosa est, et nomine caret. [Cap. XV.  
*Scaligero*.] Membrum (*artus*) bipartitum (*bipar-* 3  
*titus alter*) alterum, crus: cuius pars anceps coxa  
 est: quae vero circa sedis locum versatilis, mola  
 (*patella*): quae gemino constat osse, tibia. Eius  
 pars anterior nomen non habet apud Latinos, graece  
*ἀντικνήμιον*: posterior, sura, nervosa venosaque  
 carne constans. Quibus cruris venter sursum sub-  
 ductus est ad poplitem, ii nates grandiores habent:  
 contra, quibus demissus. Extremum ossis maioris  
 malleolus, vtraque in tibia geminus. Tibiae pars 4  
 multis constans ossibus, pes: huius pars posterior  
 calcaneus: anterior autem qua scissa est, digiti  
 quini existunt: inferior autem carnosae, Graeci *stethos*  
 id est pectus vocant: supera vero nervosa et  
 carens nomine. Digitorum partes tum vnguis, tum

plicatura: vnguis omnibus in summo, plicatura vna omnibus inferioribus. Qui interiorem pedis partem crassam non cauam habent, ita, vt tota planta ingrediantur, versuti. Communes coxae ac tibiae genu et poples.

CAP. XII. (vulgo adhuc XV. Scaligero XVI.)

Mari ac feminae communes partes hae: quae vt positae sunt supra et infra, ante et pone, ad dextram et sinistram, videri fortasse possint notae sensui, cum sunt exteriores. Verum eadem de caussa, quam supra dicebamus, de ipsis item scribendum est; vt scilicet cum ordo absoluatur, tum, illis enumeratis, constet, quae homini ceterisque  
 2 animantibus non conueniant. Igitur si cum locis, quos natura supra infraque disposuit, superae inferaeque hominis partes comparentur, inuenias ipsum facile ceteris anteire animalibus. Ita eae ad vniuersi orbis situm atque ordinem accedunt, quemadmodum anteriores quoque et posteriores: item dextrae atque sinistrae. At alia animalia aut eas neutiquam nacta sunt, aut non ita expressas. Ac caput ipsum quidem omnibus impositum corpori suo fuit; solus tamen homo perfectus ad vniuersi  
 3 rationem, corpus habet suum. Sustinetur a collo caput: sub collo pectus ante, dorsum pone. Sequuntur illud venter, hoc lumbi; tum autem ge-



nitalia et nates: mox coxa et tibia: postremi pedes sunt. Flectuntur antrorsum etiam crura, quam in partem mouentur quoque ingressu, et pedum cum pars mobilior, tum flexus: at calcaneus pone est: malleolus autem vterque ab latere secundum aurem. Ab vtroque latere tam dextro quam sinistro flexionem exercent introrsum brachia; itaque curuatio eorum atque crurum inter se respondent, praesertim in homine. Sensus autem eorumque instrumenta, oculos, nares, linguam, eandem in partem anteriorem habet: at auditum eiusque instrumentum et aures ipsas tum ab latere statuit natura, tum ad libellam oculorum. Humani oculi minimo interstitio inter se absunt, si magnitudinem contemplare, praeut in aliis animalibus. Est homini sensuum praestantissimus tactus; deinde gustus: ceteris sensibus aliorum animalium pleraque anteunt.

## CAP. XIII. (vulgo XVI. Scaligero XVII.)

Quae hominis partes extimae apparent, tum situ tum nominibus vsitatis, eo, quo diximus, modo sic notae sunt. Contra interiores ignotae; quamobrem ad aliorum partes animantium relatas, quibuscum habent naturae affinitatem, contemplari debemus. Principio, quod ad capitis interiora spectat, cerebrum quae habent animalia,

- ea, quemadmodum et homo, in anteriore parte situm obtinent. Habent cerebrum omnia, quae sanguinem habent: adhaec mollusca: ceterum homini pro eius magnitudine inest maximum et humidissimum. Duabus autem membranis continetur, altera validiore, quae circum os est, altera minus valida, quae ipsum ambit. Bipartitum omnibus cerebrum est; eique postremum adiunctum id, quod cerebellum appellant, cum tactu tum aspectu diuersam formam habens. Capitis postrema pars omnibus inanis, et caua pro cuiusque magnitudine. <sup>3</sup> Nam quaecunque rotunda facie sunt, iis caput sane magnum, verum facies pusilla subest: quae vero maxillas praelongas habent, horum caput paruum est; quale iumentis omnibus. Exanguis omnibus cerebrum est, ac ne ullam quidem in se venam habet: tum autem suapte natura ad tactum frigidum. Habet autem in medio pusillum cauum quoddam, paucis exceptis animalibus. Est autem, qua amicitur cerebrum, membrana venosa, cutis specie. Super cerebrum tenuissima atque infirmissima capitis pars, os est, qui vertex dicitur.
- <sup>4</sup> Tres meatus ab oculo ferunt: eorum minimus, qui proxime nasum est, ad cerebrum: reliqui duo maximus et minimus ad cerebellum. Ac maximi quidem aequali inter se distant spatio, neque coeunt:



mediocres vero in vnum coeunt. Id quod in piscibus apertius agnoscitur: ii namque propiores cerebro sunt, quam magni. Minimi autem plurimum absistunt ab se inuicem, neque coeunt. [Cap. XVIII. Scaligero.] Intra collum et gula est, (quae 5 quod esset oblonga atque angusta, nomen inuenit apud Graecos,) et arteria. Ante gulam autem arteria sita est omnibus animalibus, quibus data est: data est autem omnibus, quibus et pulmo. Est autem arteria cartilaginosa natura, et sanguinis exigui, frequentibus tenuibus circumdata venulis. Ad superam partem os versus posita est e foraminum regione, de naribus ad os pertinentium, qua parte exit ab ore humor per nares, qui inter bibendum eo forte attractus fuerit. Inter haec foramina hunc 6 ad vsum habet ligulam, (epiglottin) vt arteriae ostiolum, quod ad os patet, applicatu suo queat operire. Huic coniuncta postrema linguae pars est: ex altera parte in medium pulmonis descendit sinum: inde in vtramque pulmonis scinditur partem. Solet enim pulmonis natura bipartita esse in omnibus, quibus inest. Ceterum in iis, quae animal pariunt, distantia illa haud aequae manifesta est, ac minimum vero in homine, vt quibusdam animal generantibus, in quo neque multifidus neque laevis, sed inaequalis. Quae autem oua 7

- pariunt, siue aues sint siue quadrupedes, vtraque pars longe ab altera dissita est adeo, vt duo pulmones esse videantur. Ita vna arteria in duas partita tendit in vtramque pulmonis partem. Venae quoque magnae aequae ei, quae aorta dicitur, coaptatur. Inflata autem arteria, in pulmonis sinus redundat spiritus: qui sinus cartilagineos agnatos habent tubulos, continuo tractu angustiores: a quibus foramina totum vsque per pulmonem ita dissita sunt, vt maiora semper a minoribus excipiantur.
- 8 Cor item vinculis tum pinguibus tum cartilagineis arteriae appensum est, et qua est appensum, cavum est. Vbi arteria inflatur, haud satis constat, in quibusdam animalibus, an cor subeat spiritus: at in maioribus constat. Hunc ad modum se habet arteria, isque vsus vnus eius accipiendi reddendique spiritus: non ad cibum vel siccum vel humidum comparata; quin, si quid inciderit, angit, donec tussiendo excussum fuerit. [Scaligero Cap.
- 9 XIX.] Gula superne ad os appensa est pone arteriam eique coniuncta, ac dorso membranaceis vinculis; per praecordia ad ventriculum desinit: carnea natura, quaeque in longum et in latum distendi queat. Humanus ventriculus canino persimilis est, paulo ipso intestino maior: quin latioris cuiuspiam intestini speciem prae se fert. Sub eo intestinum



est simplex, flexuosum; inde alterum satis latum. At alius inferior suillae similis: nam et ipsa lata est, et quae sub ea pars ad sedem vergit, brevis ac crassa. Omentum autem membrana pinguis est a<sup>10</sup> media pendens aluo, et super intestina expansa; idque etiam in iis animantibus, quae et supra et infra dentes habent, et vnicum tantum obtinent ventriculum. Inter intestina mesenterium est, [*membranaceum latumque; quin etiam pinguescit,*] ex vena magna et aorta aptum; perque ipsum multae frequentesque venae ad intestinorum situm a summo incipientes ad imum vsque pertendunt. Haec de gula, gutture, ventre.

#### C A P. XIV. (vulgo XVII. Scaligero XX.)

Cor autem tres habet sinus: situm est pulmone superius, qua arteria bipartitur. Habet autem membranam pinguem crassamque, qua tum magnae venae tum aortae annexum est: verum aortae prope mucronem; qui mucro pectus versum directus est omnibus animantibus, quae pectus habent. Quin omnibus similiter, cum his, tum iis, quae pectore carent, in anteriorem partem vergit cordis fastigium. Saepe vero latere potest, propterea quod in dissecando concidit. Curua autem pars superne est. Praeterea mucro ipse carnosus admodum at-

- que densus est; at in cauernis illis nerui insunt.
- <sup>2</sup> Ac cetera quidem animalia, quibus pectus est, in eius medio cor situm habent, vnus homo in partem sinisteriorem aliquanto a diuisione mamillarum: quippe laeuam mammam versus pectoris superiora obtinens. Cor neque magnum est neque longum, sed rotundius, ita tamen, vt turbinetur. Igitur, vt supra diximus, sinus habet tres: maximum in parte dextra, minimum in sinistra, in medio mediocrem. Duo minores ambo in pulmonem foraminibus feruntur; id quod in vno apparet manifeste,
- <sup>3</sup> vbi inferius annectitur. Haeret igitur appensumque est venae magnae secus sinum maximum, ad quam venam etiam iacet mesenterium: iuxta vero sinum medium aortae annexum est. Meatus autem, qui a corde in pulmonem ferunt, ii et eodem scinduntur modo, quo arteria, et arteriae fistulas totum per pulmonem assequuntur. Sunt autem in parte cordis superiore. Neque vero vnus communis est, sed inter se coaptati recipiunt spiritum, quem ad cor transmittunt. Alter enim meatuum in dextrum sinum, alter in sinistrum fertur. De magna vero vena deque aorta communi
- <sup>4</sup> commentatione suo loco postea dicemus. Eorum animantium, quae et pulmonem habent, et animal tam intra se quam extra pariunt, nullum membrum



tantum obtinet sanguinis, quantum pulmo: quippe et sua natura spongiosus est totus, et magnae venae meatus ad singulas fistulas ferunt. Nam qui putarunt, inanem ipsum esse, eo falsi sunt, quod viderent e dissectis animalibus exemptos pulmones, a quibus vniuersus sanguis statim effluxerat. Omnium autem membrorum solum cor sanguinem continet. Nam pulmo non in se, sed in venis habet; at cor in se ipso, quippe intra sinus singulos. Atque is, qui medio in sinu continetur, tenuissimus est. [Cap. XXI. Scaligero.] Pectoris se- 5  
ptum sub pulmone est; quod praecordia appellarunt, costis, hypochondriisque ac spinae connexa. Cuius quidem tractus medius tenuis ac membranaeus: ceterum venae quoque per ipsum intentae sunt. Hominis vero venae, [praecordia *alii Codices habent*,] si ad corpus spectes, crassae sunt. [Cap. XXII. Scaligero.] Sub praecordiis dextra in parte iecur, in sinistra lien est aequae omnibus, quae his praedita sunt membris. Nam in quibusdam quadrupedibus ordinem hunc mutatum esse, aliquando observatum est. Eam vero ad ventris [alui inferioris *vulgo est*,] partem appensa sunt, quae secundum omentum est. Humanus lien angustus 6  
et longus est, lienis suilli facie. Iecur magna ex parte atque in plurimis animalibus sine felle est:

in quibusdam autem habet. Est homini rotundum iecur, ac bubulo simile. Contingit autem etiam in victimis hoc, quale cum in Euboicae Chalcidis agro quodam: carent enim felle pecudes: tum in Naxo; ubi tam grande habent omnes paene quadrupedes, ut qui ibi peregrini rem faciunt diuinam, percellantur eo, quod putent ad se priuatim illud quasi ostentum, non quasi naturae institutum, pertinere. Magnae venae iecur annexum est: cum aorta nulla ei coniunctio intercedit. Transmeat enim ipsum vena a maiore illa producta, qua parte iecoris portae appellantur. Atque eodem modo in splenem altera proficiscitur a maiore, qua illi tantum appensus est. [Cap. XXIII. Scaligero.] Sub his ad spinam renes siti sunt, natura similes bubulis. In omnibus animantibus, quae renes habent, dexter sinistro et altior est et minus pinguis et siccior: id quod aequae in omnibus aliis inuenitur. Ferunt ad eos meatus a magna vena et aorta, non tamen in cauum, quod ipsi habent in medio, aliqui maius, aliqui minus. Soli vitulo marino bubulis quidem similes, ceterum solidissimi sunt. Quos diximus meatus, qui ad ipsos tendunt, in eorum corpus absorbuntur: argumentum, quod non penetrent, est, quia neque [*viua*] sanguinem intus habent, neque [*mortuis*] coagulatur. Ex eo igitur sinu, quem



pusillum dicebamus, duo tubi multae firmitatis in vesicam tendunt: item alii ex aorta validi et continui. E renum medio venae singulae cauae ac nervosae per angustias spinae tendunt: quae inde inclunes vbi peruenère, non comparent, nisi mox iuxta ipsos iterum distant. Ceterum hae venae in vesicam desinunt. Postrema enim vesica est appensa tubis, qui de renibus intenduntur ad collum, quod in vrinalem meatum tendit: paene quaquaversum tenuibus ac fibrosis alligata membranulis, quae propemodum similes sint texturae praecordiorum. Est autem humana vesica magna admodum. [Cap. XXIV. Scaligero.] Ad vesicae collum 9 appensum veretrum est, nervosum atque cartilagineum; duobus meatibus peruium, qui demum coniunguntur et coeunt in vnum foramen externum: quorum hic quidem ad testes, ille ad vesicam tendit. Ex eo dependent testes maribus: de quibus, quemadmodum se habeant, in communi partium commentatione disseretur. Modus idem penitus in feminarum quoque genitalibus, solaque matrice intus differunt: quae, quod ad faciem pertinet, e dissectionum libris et pictura nota esse poterit; quod vero ad situm spectat, iacet illa tum super intestinis tum sub vesica. Ac de matricibus

quoque omnibus communi opera postea dicendum est: neque enim omnibus similes similiterve sitae. Animantium igitur partes tum exteriores tum interiores hae et tales sunt, et hunc ad modum sese habent.

---



---

A R I S T O T E L I S  
D E A N I M A L I B V S H I S T O R I A E  
L I B E R   I I .

---

C A P .   I .

Ceterarum partes animantium aliae communes omnibus sunt, aliae generibus quibusdam peculiares. Hanc vero conueniendi differendiue rationem eo modo intelligimus, qui toties a nobis explicatus est. Quae namque genere diuersa sunt inter se, ea fere partes plurimas inter se specie differentes habent: alia vero proportionem tantum conueniunt, genere autem non: alia genere quidem sunt eadem, specie tamen diuersa. Ad haec quae partes cuiuspiam insunt, non omnibus continuo datae sunt. Igitur quadrupedes, quae animal pariunt, capite colloque atque omnibus, quae in capite insunt, particulis praeditae sunt: verum secundum figuram differunt partes inter se. Itaque leonis ceruix nul-

lis vertebrae, unico tantum osse constat: at interiora omnia similia caninis continentur. [Cap. II. Scaligero.] Habent autem quadrupedes omnes, quae animal<sup>1</sup> pariunt, brachiorum loco anteriora crura; potissimum quibus multifidi pedes sunt, iis manuum vice ad pleraque vtuntur. Quin brutorum sinistrae minus sunt absolutae; excepto elephanto, qui digitos quinque numero in pedibus minus habet expressos, et anteriora crura maiora multo; tum in posterioribus breues malleolos. Talem vero tantumque nasum habet, vt ei manuum teneat vicem. Hoc enim tum cibum potumque in os refert, tum insidenti rectori porrigit. Quin arbores extirpat ipsas. Cum per aquas vadit, hoc reflât. Eius summa pars cartilaginosa est; itaque non plicatur, [ *digitorum more* ] sed incuruatur. Soli homini vtriusque manus aequalis vsus datus est. [Cap. III. Scaligero.] Humano pectori aliquid quod respondeat, sed dissimile, animalia omnia habent. Homini enim latum est, ceteris angustum. Praeterea ei mammae in parte sunt anteriore: at illorum nulli. Nam elephanteus quanquam duas tantum, iuxta pectus potius, quam in pectore tamen

3 catur, [ *digitorum more* ] sed incuruatur. Soli homini vtriusque manus aequalis vsus datus est. [Cap. III. Scaligero.] Humano pectori aliquid quod respondeat, sed dissimile, animalia omnia habent. Homini enim latum est, ceteris angustum. Praeterea ei mammae in parte sunt anteriore: at illorum nulli. Nam elephanteus quanquam duas tantum, iuxta pectus potius, quam in pectore tamen

4 habet. [Cap. IV. Scaligero.] Crurum autem plicaturas tam anteriorum quam posteriorum et inter se ipsas et humanis aduersas habent. Quadrupedes



enim, quae animal pariunt, anteriora crura prorsum, posteriora pone flectunt. Itaque curvaturae caua inter se obuersa sunt. Elephantus autem non quemadmodum prodidere, sed et ipse tum subside, tum crura flectit. Ceterum nequit super utroque latere simul propter onus; sed reclinatur super sinistram aut super dextram, atque eo habitu quiescit. Flectit autem crura posteriora more hominis. Quae vero oua pariunt, qualis crocodilus et lacer- 5 tus atque alia eiusmodi, iis omnibus tam priora quam posteriora crura flectuntur retrorsum paulisper in latus inclinata. Similiter et iis, quae multis pedibus gradiuntur; nisi quod ultimorum crurum mediae curvaturae utram in partem vergant, in ambiguo est, sed ad latus potius curuantur. Homo autem utrasque artuum inflexiones eandem in partem versas, atque inter se contrarias habet. Namque brachia retro flectit, quanquam paulum extrorsum obliquata: crura antrorsum. At quod 6 animal tam priora quam posteriora antrorsum flectat, inuenias nullum. Omnium humeri contrario plicantur flexu, quam aut cubiti aut anteriora crura. Item suffragines contra quam coxae. Igitur homo cum e contrario flectat atque alia, ipsa quoque, quae membra haec habent, flectunt e contrario. At aues quadrupedum flexionibus similes propemodum

suas habent: quippe bipedes cum sint, crura ipsa retro flectunt: in brachiorum vero priorumque  
 7 crurum loco alas prorsum curuant. Marinus autem vitulus tanquam mutilus quadrupes est. Etenim sub armis statim pedes habet manibus similes, vel-  
 vt vrsinos: nempe quinis discreti sunt digitis; quo-  
 rum singuli ternas habent flexiones, atque vnguem  
 non [*omittunt negationem Editt. aliquae.*] ma-  
 gnum vnum. Posteriores quoque pedes numero  
 quidem et curuatura digitorum, item ipsis vngui-  
 bus similes habet prioribus, ceterum figura ad pi-  
 8 scium caudas propius accedunt. Animantium, siue  
 quatuor siue plures habeant pedes, motus ac status  
 per diametrum est. Omnibus autem initium a  
 dextra parte est. Tum leo tum camelorum genus  
 vtrumque, Bactrianum scilicet atque Arabicum,  
 pedatim ambulant: hoc est, quod sinister pes dex-  
 trum non antecedit, sed subsequitur.

### C A P. II. (vulgo adhuc I.)

Quae homini sunt in parte anteriore, ea in-  
 ferne habent quadrupedes: quae homini posteriora,  
 ea illis superne sunt. Plurima praeterea caudam  
 habent: nam vitulo quoque marino pusilla est,  
 ceruinae similis. De simiarum vero generibus post-  
 ea disceptabitur. [Cap. V. Scaligero.] Quadrupedes,



quae animal pariunt, pilosae paene omnes: non, qualis homo. Is, excepto capite, quod omnium animalium pilosissimum habet, rarum et breuem edit pilum. Quae aliorum pilosorum animalium 2 in caelum spectant partes, (pronae) eae hirtiores sunt: contra quae in terram, (supinae,) aut omnino glabrae, aut minus villosae. Homo autem e contrario. Ac palpebras homo in vtraque gena habet; tum et in alis et in pube pilos. Ceterae animantes neque in his locis neque in gena inferiore; sed sub ipsam genam et paucos et paucae. Quadrupedum 3 quae pilo integuntur, aut corpus hirtum est totum; qualis sus, vrsus, canis: aut colli partes omnes aequae hirtiores, sicuti quae iubatae sunt, quomodo leo: aut colli superior tantum pars, quae a capite ad armos pertinet. Quo in genere capronata sunt, velut equus et mulus, et ex feris cornutis bonassus. Habet item equiceruus in summis armis iubam, et ea fera, quae pardium appellatur: ac praeterea a capite ad armos tenuem vtrumque. Ad haec peculiaris equiceruo pendet ad guttur barba. Vtrum- 4 que animal, bonassus et equiceruus, cornigerum et bisulcum; nisi quod equicerua cornibus caret. Magnitudo ei cerui: nascuntur in Arachotis, sicut et feri boues; qui a cicuribus eo differunt modo, quo ab apris sues. Niger eis color, robur validum:

nasi tractus subaquilinus, cornua resupinatiora:  
at equiceruis sunt qualia capreis. (dorcadibus.) In-  
ter quadrupedes elephantis minime hirtus est. Se-  
quuntur autem cum pilosi tum glabri corporis ra-  
tionem caudae, modo magnitudinem quampiam  
sortitae sint: nam quibusdam pusillae admodum  
5 sunt. [Cap. VI. Scaligero.] Camelis peculiare in  
dorso gibber est, quo cetera carent animalia. Hoc  
et inter se differunt. Namque Arabici vnum tan-  
tum habent, Bactriani geminum. Habent praeterea  
inferne gibbum alterum simile superiori, quo re-  
liquum fulcitur corpus, vbi genua summittit. Pa-  
pillae ei quaternae, quot et vaccis: cauda asiminae  
similis: genitale pone. In vnoquoque crure genu  
vnum, neque plures plicaturae, vt aiunt quidam:  
verum tot videntur propterea, quod alio subducta  
sunt. Similis bubulo talus, sed deformis magis ac  
6 pro corporis ratione paruus. Bisulcum est, et su-  
perioribus carens dentibus: bisulcum vero hunc  
ad modum: posteriores pedes ad secundam vsque  
digitorum flexionem, anteriores ad primam vs-  
que digitorum flexionem leuiter diuisi in extrema  
parte in duas partes vel digitos; explet autem fissu-  
rarum interualla tale quid, quale et anseribus:  
pedis planta carnosae, velut vrsis. Itaque in bello-  
rum expeditionibus carbatinis calciant, cum dolore



afficiuntur. [Cap. VII. Scaligero.] Omnes quadru- 7  
pedes ossea crura habent, et neruosa, et macra:  
omnino vero etiam alia omnia animalia, quibus  
pedes sunt, praeter hominem. Natibus quoque  
carent illa, qua parte aues etiam sunt strigosiores.  
Contra homo prae cetero corpore nates fere habet  
carnosissimas, ac praeterea et coxas et tibias: nam  
quae sura dicitur, carnosissima est. Quadrupedes quae 8  
sanguine concretae sunt et animal pariunt, aliae  
multifidos pedes habent, quemadmodum homo et  
manus et pedes. Sunt enim quaedam multidigi-  
tae, ut leo, canis, panthera. Aliae bifidos, quibus  
unguium loco ungulae sunt: qualis ovis, capra,  
ceruus, equus fluuiialis. Aliae continuos, ut so-  
lipedes, velut equus et mulus. In utroque genere  
inuenias suam: namque apud Illyrios et Paeonas  
aliisque in locis unicum tantum habet ungulam.  
Igitur bisulcae bifidos habent pedes et anteriores  
et posteriores, solipedes autem eosdem continuos  
habent. Sunt etiam partim cornigeræ, partim non. 9  
Cornigerarum maxima pars bisulca suapte natura  
est, veluti bos, ceruus, capra. Solidungula et  
bicornis nulla visa est. At unicornes et solidungulae  
paucae, ut asinus Indicus. Unicornis autem et  
bisulca, oryx. Idem asinus Indicus talum quoque  
habet solus omnium solidungulorum: nam sues,

cum in genere utroque recenseantur, ideo talum  
10 foedum habent. At bisulcorum talum habent  
multa: multifidorum nullum, sicuti neque homo.  
Tantum lynx semitalo simile quiddam: tum leo  
anfractuosum, labyrinthi, ut fingunt, modo.  
Quibus talus est, eum omnia posterioribus in cru-  
ribus habent; eumque rectum in suffragine ita, ut  
anterior pars extrorsum, posterior autem introrsum  
spectet: et quae coa dicuntur, intus inter se ob-  
versa: quae appellantur chia, foris: quae antennae  
nominantur, superne. Qui situs ad hunc modum  
omnibus est. Quae vero bisulca sint et iubam ge-  
rant, tum bina habeant cornua in se inflexa, ali-  
qua sunt animalia: qualis bonassus, qui apud  
11 Paeonas atque in terra Maedica gignitur. Sane  
omnes animantes cornigeræ quadrupedes sunt,  
nisi si quid per translationem ac verbi gratia cor-  
nutum dicatur; quemadmodum Thebanis serpen-  
tibus Aegyptii aiunt extare a capite quiddam quasi  
vice cornuum. Cornua vni ceruo tota solida sunt:  
aliis maiore parte caua, ad extremum solida. Caua  
igitur pars e corio nata est: quam subit pars solida  
ex osse enata: qualia bubula sunt. Solus ceruus  
a bimatu quotannis amittit cornua; tum renascun-  
tur. Aliae animantes nisi vi mutilentur, nullae  
amittunt.



## CAP. III. (vulgo adhuc I. Scaligero VIII.)

Ceterae animantes cum mammillarum tum eorum membrorum, quae ad veneris vsum comparata sunt, rationem non solum inter se diuersam ipsa, sed etiam cum homine si conferantur, habent. Quibusdam enim aut in pectoris parte anteriore aut secundum pectus mammae sitae sunt duae, duaeque papillae, quot et homini, quot et elephanto, quemadmodum supra quoque dictum est. Habet enim elephantus mammas duas ad axillas. Quae etiamnum ipsi feminae perpusillae sunt, si corporis spectes magnitudinem, adeo vero, vt ex obliquo vix oculis deprehendi possint. Vrsa autem quaternas. Quaedam duo habent in feminibus vbera totidem- 2 que papillas, vt ouis. Quaedam papillas quaternas, veluti vacca. Nonnullae neque in pectore neque in feminibus, sed in ventre, easque plures, neque omnes aequales; vt canis et sus. Plures igitur mammas aliae: at panthera (pardalis) quatuor, leaena duas; vtraque in ventre. Sunt et camelo duae mammae, papillae quatuor, quemadmodum et vaccae. Quibus est vngula solida, in iis mares papillas habent nullas, nisi si qui matribus similes extiterint: id quod equorum naturae contigit. [Cap. IX. Scaligero.] Maribus genitale 3 membrum quibusdam extat, vt homini et equo et

aliis multis: quibusdam intus conditum est, ut delphino. Quibus extat, alia ipsum in parte habent anteriore, velut ea, quae supra diximus: alia in posteriore. Atque horum partim sunt quae et genitale et testes explicatos habent, velut homo: ad ventrem cum hoc tum illos. Neque vero aequae omnibus explicantur, sed alii plus, alii minus: non  
4 enim equo et apro similiter. Elephante equino simile veretrum habet, sed paruum neque pro corporis ratione. Ceterum testes neutiquam foris in aperto, sed intus circa renes: quo fit, ut coitum celeriter absoluat. At feminae vulva est ea in parte, ubi oui vbera. Itaque coitus tempore eam sursum attractam foras vertit. Quocirca facilis fit masculo coitus. Illius autem os late admodum patet. Maxima igitur animalium pars genitalia sic pote habet. Nonnulla vero urinam retrorsum reddunt, ut lynx, camelus, lepus. Ac mares quidem, sicuti dictum est, membra haec aduerso inter se situ habent: femellae autem omnes retro urinam reddunt. [*Nam et in genere elephantorum femella genitale suum sub feminibus habet, quemadmodum et*  
5 *ceterae.*] Nec eadem omnibus natura veretris: valde enim differunt. Aliis cartilagineum et carnosum, ut homini: atque ea pars, quae carnosae est, non turgescit; quae vero cartilaginea, auge-



scendi facultatem habet. Aliis neruaceum, vt ceruo et camelo: aliis osseum, vt vulpi, lupo, viuerrae, (ictidi) mustelae: nam haec quoque tale habet. [Cap. X. Scaligero.] Adhaec homo, vbi 6 iusto est absolutus incremento, superiores partes inferioribus minores (*breviores*) habet. Reliquae animantes, modo sanguine concretae sint, e contrario: superiores intelligo, quae ab ipso capite ad exitum excrementi vsque pertinent; reliquas autem inferiores. Eorum igitur, quae pedes habent, posteriora crura sunt inferior pars magnitudinis totius: at in iis, quae carent pedibus, caudarum genera omnia, atque alia talia. Atque haec quidem, postquam sua explerint incrementa, talia sunt: at inter augescendum diuerso modo sese habent. Homo namque dum adolescit, maiora habet superiora, quam inferiora; vbi vero auctus est, in contrarium mutatur habitum. Itaque solus quoque animalium non eodem incedit modo, cum tener est, et cum adultus. Per initia enim, dum infans est, repit quadrupes. Alia vero per proportionem pro- 7 cessus incrementi faciunt, vt canis. Quaedam primum maiora habent inferiora, quam superiora; tum inter crescendum superiora euadunt maiora: veluti veterinorum genus. His enim quantum est ab vngula ad femur, nihil postea crescit. [Cap. XI.

- 8 Scaligero.] Est quoque dentium discrimen multum in ceteris animantibus, tum si inter se, tum etiam si cum homine comparentur. Nam quae pedibus quatuor praeditae sunt, modo sanguine concretae animal pariant, dentes habent cunctae. Primum igitur quaedam supera inferaque maxilla dentatae sunt, quaedam non: etenim cornigera in altera tantum dentes habent: carent enim primoribus maxillae superioris. At non omnia, quae dentibus istis carent, continuo cornuta sunt: ut camelus. Quedam exertos habent dentes, ut sues mares:
- 9 quaedam non. Quedam vero serratos, sicut leo, panthera, (pardalis) canis. Alia aequatos, ut equus et bos. Nam serratos habere dicuntur, qui dentes acutos mutua insertione utrinque coeuntes habent. Quae cornua et exertos simul gerat dentes, animantem nullam inuenias, neque quae serratos, et illorum alterutrum (*habeat, vel cornu vel dentem exsertum.*) Pars tamen maxima primores acutos habet, interiores autem latos. At marinus vitulus vniuersos serratos habet; quippe qui cum natura piscium suam commutet, quorum genera
- 10 paene omnia talia sunt. Quod duplici dentium ordine praeditum sit, nullum horum generum est. Nam si Ctesiae credimus, non deest genus tale. Scribit ille, apud Indos bestiam esse nomine marti-



choram, trina in singulis maxillis dentium serie, leonis modo magnam atque hirtam, pedibusque similibus, hominis tum facie tum auriculis, caesiis oculis, colore cinnabarino, terrestris scorpio-  
nis cauda cum aculeo, ac spiculis agnatis missilibus: voce fistulae tubaeque sonum imitari, celeritate nihilo quam ceruum segniorem: feram praeterea esse, atque humana carne vesci solitam. Amittit <sup>11</sup> homo dentes; amittunt cetera animalia, equus, mulus, asinus: verum homo primores tantum: maxillares nullum animal: sus nullum.

[Vulgo C. II.]

Canes an amittant, dubitatum est; quidam negarunt, vllum ipsis mutari: alii caninos tantum abiici. Verum deprehensi sunt mutare, sicut et homo: latuit autem id, propterea quod non prius abiiciunt, quam alii pares illis intus subnascantur. Id quod in aliis quoque animalibus, quae fera sunt, <sup>12</sup> euenire par est, quippe quae dicuntur amittere caninos. Canum aetates pro dentium ratione exploratas habent: iunioribus namque et candidi et acuti, vetulis nigri atque obtusi.

[Vulgo C. III.]

Dentium natura contrario sese habet modo, si equos cum ceteris compares animalibus: illa enim affecta aetate nigriores habent, equus candidiores.

13 Latos ab acutis disterminant ii, quos caninos vocant, vtrorumque figurae participes: ima enim in parte lati sunt, in summo acuti. Sunt maribus plures quam femellis, tam in hominibus quam in pecore tum ouium tum caprarum tum porcorum. Nam in aliis nondum observatum est. Quibus plures sunt, eorum magnae parti vita longior: quibus pauciores aut rari, breuior.

[Vulgo C. IV.]

14 Omnium postremi oriuntur maxillares illi, quos genuinos vocant, vicesimo vitae anno tam viro quam mulieri: quanquam octogenariis feminis aliquot, item viris orti sunt olim in sedibus vltimis maximo cum dolore. Hoc autem, quibus in iuuenta nati non fuerint, euenire solet.

[Vulgo C. V.]

15 Elephanto quaterni vtrinque sunt, quibus in farinae modum quasi mola cibum conficit. Praeter hos habet alios duos illos magnos; mas quidem magnos et sursum auersos, femina paruos et contrario situ, quam mas; deorsum enim spectant. Statim natus dentes habet; sed grandes illos nondum conspicuos per initia.

[Vulgo C. VI.]

Linguam vero paruam admodum atque in recessu, vix vt cerni queat.



## CAP. IV. (vulgo VII. Scaligero XII.)

Oris quoque magnitudine differunt animalia: aliis hiatus vastus, vt cani et leoni et serratis aliis. Nonnullis paruus, vt homini. Quibusdam mediocris, vt generi suillo. Aegyptius autem equus fluuiialis iubam habet instar equi, estque bisulcus, vt bos, et facie simus: habet etiam talum bisulcorum more, et subexertos dentes, caudam suis, equi vocem; magnitudine asinina est, talique crassitudine corii, vt ex eo hastae torrentur. Interiora vero habet similia equo et asino.

## CAP. V. (vulgo VIII. Scaligero XIII.)

Inter hominem quadrupedumque genus natura quaedam media, atque vtrique communis est: quales simia, cebus, caniceps. (cynocephalus.) Est autem cebus simia caudata. Caniceps communem cum simia formam habet, nisi quod et maior et robustior est, faciemque habet caninae propiorem. Tum moribus existunt efferationibus; dentes quoque caniniores atque robustiores. Simiae partes, 2 quae caelum spectant, vt pilosae sunt, propterea quod quadrupedum generi adscribuntur, ita quae ad terram deurgunt, quoque; quia hominis speciem referunt. Nam in homine et quadrupedibus hoc contrario se habere modo supra dictum est.

Ceterum simiis crassus pilus ac praedensus vtraque in parte est. Eius vero facies multis modis humanae similis: quippe tum nares tum auriculae, item dentes tam primores quam maxillares sunt prope-modum tales, quales et homini. Quinetiam quadrupedes ceterae cum in vtraque gena neutiquam palpebras habeant, ipsa habet, sed tenues admodum: tenuiores vero inferiores atque perpusillas; 3 quibus carent quadrupedes aliae. Et sunt in pectore papillae duae paruarum mammarum. Ad haec hominis brachia, nisi hirta essent: quae etiam sicut et crura hominis modo inflectit: nam et horum et illorum curvaturas inter se habet contrarias. Tum manus, digitos, ungues quasi humanos: verum haec omnia ferinam ad naturam potius vergunt. Suus quidam modus pedibus ac peculiaris: etenim quasi manus quaedam magnae sunt: quippe et digiti in iis, veluti manuum, medio longissimo. Et planta manui similis, volam manus referens; quanquam porrectior ad extremum usque: cuius postremum callosius (durius) est, inepta atque inexplanata calcanei similitudine. 4 Pedum vsus et pro manibus et pro pedibus: flectit enim eos manuum modo. Brachium et coxa brevia, si ad ulnae et tibiae magnitudinem referuntur. Umbilicus non prominet, sed durum quiddam ibi in-



venias. Superae partes inferis maiores, quasi si quinarium cum ternario conferas. Hoc autem tum ex quadrupedum natura tum propterea, quod pedes et manibus similes habet, et quasi ex pedum manuumque constitutione compositos. Nam calcanei postrema pedem, ceterae partes manum repraesentant. Habent enim digiti id, quod volam 5 appellamus. Quadrupedis statu et prona plus temporis degit quam erecta: caretque natibus, ut quadrupes; neque caudam habet, quoniam bipes, sed perpusillam omnino illam, et notae tantum gratia. Feminae genitale muliebri specie est: maribus canina potius quam humana.

## [Vulgo C. IX.]

Cebi, sicut diximus, caudati sunt. Vniuerso generi viscera similia humanis. Igitur quae animal pariunt, partes extimas ad hunc habent modum.

## C A P. VI. (vulgo X. Scaligero XIV.)

At quadrupedes, quae oua edunt et sanguine constant, (neque enim vllum terrenum animal concretum sanguine est, quin idem aut quatuor aut nullis pedibus fultum sit,) eae caput habent et collum et dorsum, et quae caelum spectant partes corporis et quae terram: item crura tum anteriora tum posteriora: praeterea aliquid vice pectoris, sic-

vti et quadrupedes illae, quae animal pariunt. Plurimae quoque caudam gerunt longiorem, paucae breuem: ceterum omnes multidigitae ac multifidae existunt. Partes etiam sentiendi officio destinatas ac linguam quoque omnes habent, praeter Aegyptium crocodilum: is namque piscium quorundam naturae propior est. Piscibus enim omnino spinea atque inexplicata lingua est. Quidam etiam laeuem atque indiscretum locum habent penitus, vt, nisi labra vehementer diducantur\*\*\* Auriculas quoque nullas, sed ad audiendum meatus tantum habent omnia: neque mammas neque genitale neque testiculos manifestos, sed intus: neque pilos, sed omnia corio squarroso teguntur. Omnibus serrati dentes. Fluuiales crocodili suillos habent oculos, dentes magnos et exertos, ungues validos, corium impenetrabile, squarrosum. Sub aqua obscure, extra acutissime vident: maximam igitur diei partem in terra agunt, noctu sub aqua; propterea quod ea tepidior sit, quam (serenus) aer.

## C A P. VII. (vulgo XI.)

Chamaeleontis totum corpus lacerti specie est: costae [*vtrunque*] coeuntes descendunt vsque ad infimum ventrem, sicut in piscibus. Dorsum quoque piscium modo eminet: facies simillima ei ge-



neri simiarum, quod rostrum prae se fert porcinum. (choeropitheco.) Prolixam valde caudam habet, paulatim extenuatam, atque multum conuolutam, lori modo. Excelsiore statu est a terra, quam lacertus: crurum flexiones, vt illi. Singuli 2 pedes bipartiti eo inter se sunt situ, quo pollex noster ad reliquam manum obuersus est. Harum partium vtraque in digitos quosdam breues aliquatenus discreta; priorum pedum pars interior in tres, exterior in duos; posteriorum interior in duos, exterior in tres: in quibus vnguiculi vnci. Cutis 3 cuiusmodi crocodilo, (*terrestri*) aspera. Oculi in cauo praegrandes ac rotundi: eos operit cutis reliquae similis, modice in medio pertusa, quavisum transmittat: neque vnquam coit ad tegendum. Vertit oculos in orbem transfertque visum, quoquouersus intueri velit. Mutat colorem, vbi inflatur: namque suapte natura niger est nec assimilis crocodilo, sed pallore lacerti, et perinde atque pantherae (pardalia) nigrore variatus. Mutatur vero color toto corpore: nam et cum eo oculi quoque atque etiam cauda. Mouetur valde segni- 4 ter, nihilo sane expeditius quam testudo. Palescit moriens; qui color etiam defuncto durat. Gulae gutturisque situs, qualis et lacerto. Carne caret penitus, praeterquam in capite et maxillis

pauxillum carnis, atque etiam circa imam caudae radicem. Sanguinem circum cor atque oculos, partes eas, quae supra cor sunt, et iis in venulis, quae ab illis tendunt, tantum, atque in ipsis quo-  
 5 que exiguum admodum. Paulo supra oculos cerebrum, quibus etiam continuatur. Adempta ab oculis cute continetur intus fulgidum quiddam, tenuis annuli aenei simile. Toto paene corpore distenduntur membranae (*pulmones membranacei*) multae ac validae, longeque quam in ceteris firmiores. Spirat etiam dissectus totus longo post tempore, pauxillo etiamnum motu durante cordis; ac praeclare contrahit non solum latera, verum etiam ceteras corporis partes. Lienem, qui quidem videatur, nullum habet. Latet lacertorum more.

C A P. VIII. (vulgo XII. Scaligero XV.)

Aves quoque partes quasdam similes habent iis, quas diximus, animantibus: quippe caput, collum omnes et dorsum, et eas quae terram spectant, quaeque pectoris vicem gerunt. Potissimum autem omnium animalium bipedes sunt, vt homo; quam retrorsum curuant crura quadrupedum modo, quo supra diximus. At manus pedesue anteriores habent nullos, sed alas, peculiare sibi praeter ceteras animantes. Ad haec femur simile coxae,



longum, ad medium vsque subiectum atque affixum ventrem: quod cum solutum est, coxam putes. At coxam habet inter hoc et tibiam, aliam quamdam partem. Vncungues aues et maximas (*crassissimas*) habent coxas et pectus aliis robustius. Auium 2 pedes multis vnguibus praediti sunt, sed et multifariam discreti quodam modo omnibus: plurimis namque digiti diuisi sunt. Quae autem natatu victum quaerunt, etsi sunt palmipedes, dearticulatos tamen et seorsum habent digitos. Quae volatu sublimes feruntur, omnibus quaterni digiti; tres in anteriore parte, vnus pone pro calcaneo plurimis. Paucae binos ante, totidem post habent: qualis ea, quam torticollam (*iyngem*) vocant. Paulo maior quam fringilla est, vario colore, peculiari tum digitorum natura, tum lingua, quam serpentum modo ad trientis porrectam longitudinem arbitrato suo intro contrahit. Praeterea cetero corpore immobili collum circumagit in tergum, quemadmodum et angues. Magni ei vngues, et quales colliis; (*picorum generi viridi;*) vox stridula. Peculiare habent os: nam neque labia ipsis sunt 3 neque dentes, sed rostrum. Neque auriculae, neque nares sunt, sed meatus horum sensuum ad odorandum in rostro, ad audiendum in capite. Oculos similiter atque aliae animantes duos sine

palpebris. Conniuent inferiore gena grauiores: nictant ab angulo (*lacrimali*) coeunte membrana omnes: noctuinum genus etiam superiore. Id quod lacerti quoque faciunt aliaeque eiusmodi species squarrosa contectae cute. Conniuent enim inferiore omnes: non omnes tamen eo, quo diximus, nictant modo. Praeterea neque squarrosam cutem  
4 neque pilos habent, sed pennas. Pennae autem omnes etiam caulem habent. Pro cauda habent quod Graeci vropygium appellant; ac breue quidem eae, quibus aut crura longa aut pedes palmati sunt. At quibus contrario modo eae sese habent partes, longum. Atque hae ad ventrem contractos in volatu pedes habent: contra quae longum vropygium habent, porrectos. Linguam item omnes, sed diuersam: aliae longam, aliae breuem. Auium quaedam praeter cetera animalia, homine excepto, litteras sono exprimunt; quales potissimum eae sunt, quae latam linguam habent. Ligulam, (epiglottin) quae gurgulioni imposita sit, nulla habet ouipararum; sed apertione atque contractione ita meatum temperant, vt prohibeant, ne quid gra-  
5 vioris in pulmonem demittatur. Quibusdam etiam calcaria sunt. Vncungues vero simul et calcarigerae nullae. Sunt autem vncungues volucres: calcarigerae, humiles. Praeterea quaedam cristam



habent surrectis constantem pennis: solus gallus peculiarem sibi, quae neque caro sit, neque a natura carnis aliena.

C A P. IX. (vulgo XIII. Scaligero XVI.)

Inter eas, quae aquas incolunt, animantes piscium genus solum ab aliis multarum ambitu formarum distinctum est. Habet enim caput et eas partes, quae caelum spectant: tum eas, quae deorsum vergunt, vbi venter atque intestina existunt: postremoque corpori caudam continuatam atque indiuisam, alii aliam. Collo carent omnes et brachiis et cruribus. Testes quoque vel extantes vel reconditos habent nullos: ac ne mammas quidem. Ac mammas quidem neque aliud eorum vllum, quae animal non pariunt; neque animal parientia omnia, sed ea tantum, quae intra se, non ex ovo prius genito, verum animal concipiunt statim. Nam quod delphinus animal concipit, idcirco mammas habet duas, non in parte superiore, sed prope genitalia. Quanquam non extant papillae, quemadmodum quadrupedibus, sed quasi riuulos habet duos, vtrinque singulos ab latere; qua lac effluat: quod sugitur ab assectantibus catulis. Id quod a nonnullis palam spectatum est. At pisces, 2  
vt dictum est, neque mammas habent, neque ge-

- nitalium meatum vllum extus manifestum. Branchiarum quoque natura peculiaris est eis. Ore enim exceptam aquam reddunt illis. Pinnae plurimis quaternae longis, quales anguillae sunt, binae prope branchias. Totidem et mugilum generi, quod in Sipharum stagno est: item ei, quae vitta (taenia) appellatur. Quidam longorum nullas, vt muraena, qui branchias ipsas quoque minus habent explicatas. Branchiae aliis tectae operculis sunt, aliis non, vt cartilagineis omnibus. Quibus tectae sunt, eas ab latere habent. At in genere cartilagineo quae lata sunt parte inferiore, vt torpedo, raia: (bato:) longa autem ab lateribus, vt mustelacea omnia: rana (*marina*) quanquam a lateribus, non tamen spineo tegumento, sicut pisces ii, qui cartilaginei non sunt, sed cutaceo opertas.
- 4 Praeterea aut simplices sunt aut duplices: extrema tamen, quae versum corpus est, simplex omnibus. Item alii paucas habent, alii multas, aequali tamen vtrunque numero. Vnam ex vtroque latere, eamque duplicem, qui paucissimas, vt aper. (caprus.) Alii vtrunque binas, alteram duplicem, alteram simplicem, vt conger et scarus. Alii quaternas vtrunque simplices, vt elops, synagris, muraena, anguilla. Alii quaternas quidem, at duplices omnes praeter vltimam, vt turdus, perca, glanis,



cyprinus. Mustelaceum genus vniuersum duplices  
vtrinque quinas. Gladius octonas item duplices.  
Atque is numeri in branchiis piscium modus est.  
Habent et aliud, praeterquam branchiarum, discrimen 5  
pisces. Neque enim pedestrium more animan-  
tium viuipararum pilis teguntur, neque obducun-  
tur squarrosa cute, quemadmodum ouipararum  
quadrupedum quaedam: neque pennas habent,  
sicuti auium genus: sed ipsorum plurimi squam-  
mati sunt: pauci asperi: paucissimi laeues. Car-  
tilagineorum quidam asperi sunt, quidam laeues.  
Congri et anguillae et thunni laeues. Excepto scaro,  
serratis omnes sunt dentibus iisque acutis. Non-  
nullis quoque eorum ordine multiplici, atque etiam  
in lingua. Duram vero linguam ac spineam, atque  
adhaerentem adeo, vt nullam aliquando habere  
videantur. Oris hiatum vastum eorum quidam;  
quemadmodum quaedam quadrupedes, quae vi-  
vum animal pariunt. Sentiendi instrumenta, velut  
audiendi atque odorandi, neque ipsa habent, neque  
eorum meatus conspicuos: exceptis oculis. Oculi  
quoque carent genis, cum tamen duri non sint.  
Vniuersum sane piscium genus sanguine concretum  
est. Eorum aliqui ouum, aliqui animal pariunt.  
Squammati omnes oua; cartilaginei animal, praeter  
ranam.

## C A P. X. (vulgo XIV. Scaligero XVII.)

Reliquum est inter animalia sanguine concreta serpentum genus. Est autem vtriusque particeps naturae: maxima etenim pars terrestris est: pauciores ex aquaticis in aquis dulcibus degunt: nam in mari quoque reperiuntur, terrestribus cetera similes praeter caput, quod congris habent propius. Genera (*species*) marinorum multa sunt, et colore omnis generis: in locis valde profundis non gi-  
 2 et pisces. Scolopendras quoque saxosis locis mare fert, terrestribus similes, sed paulo minores atque rubicundiores: pluribus item pedibus cruribusque gracilioribus: quae, sicuti de serpentibus diximus,  
 3 in profundis locis non proueniunt. Est autem pisciculus saxatilis quidam, quem nonnulli echeneidem nominant; quo vtuntur aliqui tum ad amatoria tum ad lites; inutilis ad vescendum. Non defuere, qui falso ei pedes adscripserint, decepti pinnis, quae pedum prae se ferunt speciem. Tot igitur talesque sunt animalium sanguineorum partes extimae, atque rationes, quibus ipsae inter se differunt.

## C A P. XI. (vulgo XV. Scaligero XVIII.)

Nunc vero interiores primo loco in iisdem generibus quonam modo se habeant dicendum est.



Hoc enim differunt summa genera ab aliis animalibus, sanguine aut concreta esse aut carere. Sunt autem eiusmodi tum homo, tum eae quadrupedes, quae animal et quae ouum pariunt: item auis et piscis et cetus, et siquid aliud nomine caret, propterea quod nomine non complectatur, sed simplex species in indiuiduis ipsis, vt serpens et crocodilus. Quadrupedes omnes quaeque animal et quae oua 2 pariunt, item aues, denique quodcunque aeris receptione respirat et expirat, gulam arteriamque (*asperam*) atque etiam pulmonem habent. Quin etiam tum gulae tum arteriae similem dispositionem: quanquam horum membrorum species inter se sint differentes. Pulmonem autem neque similem, neque simili situ. Quae sanguinea natura concreta 3 sunt, cor habent omnia et septum transuersum, quae praecordia appellant: verum in minutis animalibus propter tenuitatem atque paruitatem id obscurius est. Sed in corde proprium est cuidam bouum speciei, (neque enim omnes boues id habent) os gerere. Atque in equorum quoque corde os est. Non omnia animalia pulmonem habent: non enim 4 piscis nec aliorum quicquam animalium, quae branchias habent. Omnibus quoque iecur inest, quibus et sanguis. At lien maiori tantum parti sanguineorum: eorum autem, quae non animal

sed ouum pariunt, multa exiguum habent, adeo vt sensu percipi paene non possit. Maxima sane auium pars talis est, vt columba, miluus, accipiter, noctua. At aegocephalus (capriceps) omnino non habet. Eadem natura quadrupedum, quae oua pariunt, vt pusillus admodum sit, veluti testudini, lutariae, (emydi) rubetae, (phrynae) lacerto, cro-  
5 codilo et ranae. Fel animalia quaedam habent ad hepar, quaedam non habent. Nam in quadrupedum genere, quae animal pariunt, neque ceruus, neque dama, (prox,) neque equus, neque mulus, neque asinus, neque marinus vitulus, neque suum (*alii Codices* murium) species quaedam. At cerui qui achainae cognominantur, in cauda videntur habere. Quod autem sic autumant, est fellis quidem colore, verum concretius et lieni similis,  
6 quod attinet ad partes interiores. Vermes in capite viui habent omnes sub linguae concauitate, circa vertebram, cui commissum caput est; pares iis, qui vel maximi putribus in carnibus enascuntur, ad viginti numero consertos atque complicatos. Felle igitur, quemadmodum diximus, carent cervi: ceterum eorum intestinum adeo amarum est, vt ne comedere canes quidem velint, nisi ceruus  
7 ipse valde pinguis sit. Elephanti autem iecur felle quidem caret, at ea parte dissecta, qua fel inesse



aliis consuevit, fluit felleus humor exiguus, interdum etiam largior. Inter ea quae mare recipiunt, atque pulmonem habent, delphin felle caret: at aues et pisces omnes habent: praeterea ouiparae quadrupedes: denique, vt absoluiam, aut plus aut minus. Ceterum pisces ad iecur, vt mustelorum genera, et glanis, squatina, laevis raia, torpedo: et ex longis anguilla, acus, zygaena. Callionymus autem in iecore vel omnium piscium maximum pro portione. Ceteri ad intestina extantum ab iecore meatibus quibusdam admodum tenuibus. Amia ad intestinum porrectum fel habet pari cum intestino longitudine: saepe vero etiam replicatum. Alii ad intestina partim longius partim propius, vt rana, elops, dentex, (synagris) muraena, gladius, [hirundo et passer: *omittunt meliores Codices.*] Frequenter in eodem genere vtrumlibet deprehendas, vt conger alius ad hepar, alius infra appensum habet. Idem modus in auibus quoque est: quaedam enim ad ventrem, aliae ad intestina fel habent, vt columba, coruus, coturnix, hirundo, passer: nonnullae superius ad iecur et ad ventrem, vt capriceps: reliquae ad hepar et ad intestina simul, vt accipiter et miluus.

8

## C A P. XII. (vulgo XVI.)

Renes autem et vesicam quadrupedes omnes

habent, quae scilicet animal pariunt. At ouiparorum nulla: neque enim aut auis aut piscis; praeter vnā quadrupedem testudinem marinā, magnitudine ceteris respondentem membris, similitudine bubulos renes repraesentantem. Sunt enim bubuli quasi e multis renunculis compositi. Habet autem bonassus quoque omnia interiora bubulis similia.

[Vulgo C A P. XVII. Scaligero XIX.]

- 2 Quod vero ad situm pertinet, quae animalia partes hasce obtinent, simili modo dispositas habent. Tum cor in medio, praeterquam homo, cui in sinistriorē parte est, quemadmodum supra diximus. Praeterea cordis mucro omnibus prorsum spectat; quanquam aliter in piscibus videri potest. Neque enim ad pectus, sed ad caput et os prostat mucro, et summum eius propendet ad medium, ubi laeuae dextraeque branchiae committuntur. Alii quoque ex corde meatus in vnā quamque branchiam protenduntur maiores minoresque, pro corporum portione. Ceterum in magnis piscibus valde crassus tubus est et albus is, qui in summo
- 3 corde est. At gulam pauci piscium nacti sunt, quippe conger et anguilla, sed et hi exiguam. Animantes quae iecur continuum habent, iis in dextra parte totum situm est. At quae statim ab summo fissum obtinent, maior portio in dextra iacet. In



quibusdam enim vtraque pars appensa est, non ipso coniuncta principio: quale inter pisces habent musteli, et leporum genus quoddam, cum alibi tum ad paludem Bolbam, in regione circa oppidum Sycas: eos namque credideris bina habere iecora, propterea, quod fibrae longe coeant: cuiusmodi auium pulmones videmus. Lien quoque omnibus 4 in sinistra parte legibus naturae situs est. [*Tum renes quae habent animantes, eis omnibus aequae iacent.*] Ac fuit quidem cum aperta quadrupede inventus est lien in dextra parte, iecur in sinistra: id quod ostenti loco habitum est. Tendit arteria (*aspera*) omnibus in pulmonem; cuius rei modum postea explicabimus. At in quibus gula est, in iis demittitur ad ventriculum per transuersum septum. Neque enim pisces, praeter paucos, quemadmodum diximus, gula praediti sunt, sed illico ori ipsi ventriculus aptus est; atque ob eam causam maioribus piscibus procidit in os ventriculus, cum minores insectantur. Habent quae diximus ventrem 5 omnia, similique situ positum: iacet enim sub praecordiis statim continuatumque intestinum desinit ad cibi exitum, quae pars anus dicitur. Ceterum absimiles ventres habent. Principio cornigeræ quadrupedes, quae animal pariunt, alteraque tantum maxilla dentatae sunt, eiusmodi sinus quater-

- nos habent; quae ruminare quoque dicuntur. Ab ore enim incipiens gula ad inferiora tendens iuxta pulmonem, pertransit a praecordiis in ventrem magnum, qui intus aspera atque rugosa est superficie.
- 6 Huic ventriculo, qua parte ei gula applicatur, committitur id quod reticulum dicunt a similitudine: namque extrinsecus ventriculo, intus plicatis reticulis simile est: magnitudine tamen longe minus ventriculo est. Huic continuatur omasum, intus asperum et plagulis cauum, magnitudine proximum reticulo. Post hunc est, quem Faliscum ventrem latine vocant, omaso quidem minor, sed prolixior, refertus multis sinubus grandibus ac laeuibus. Ab his deinceps iam intestinum est. Quae igitur cornuta dentes altera tantum maxilla gerunt, ad hunc modum ventrem habent. Differunt etiam inter se figura et magnitudine, ac praeterea quod alii ad medium ventrem, alii ad eius latus gula pertinet.
- 7 At vero vtraque dentata maxilla vnicum ventriculum habent, vt homo, sus, canis, vrsus, leo, lupus. Quin etiam thoes (lupi ceruarii *Gazae*) omnia viscera lupo similia obtinent. Omnia igitur vno ventriculo praedita sunt, a quo intestinum: verum quibusdam maior est, vt suillo pecori et vrsis: tum autem suillus ventriculus modicis laeuibus rugis plagulatus est. Aliis minor est, neque excedens



magnitudine intestinum, vt cani, leoni, homini. Aliorum quoque species ad horum relatae ventriculos differunt: quaedam enim tum maiores, tum minores in genere animalium, suillo, quaedam canino similem habent. Differunt etiam magnitudine et figura et crassitie et tenuitate; ad haec situ gulae, qua committitur ingressa ventriculo. In animan- 8  
tibus, quae altera tantum, et quae vtraque maxilla dentata sunt, diuersa est natura intestinorum magnitudine, crassitudine, replicationibus. Illis maiora omnia, quippe maioribus et ipsis: pauca enim parua sunt: cornigerorum enim, quod omnino exiguum sit, inuenias nullum. Sunt quibusdam appendices intestinorum: neque recta intestina vlli, quod vtraque maxilla dentatum non sit. Elephanti intestinum tam connexum sibi et coalitum est, vt ei quatuor ventriculi esse videantur: huc etiam cibus recipitur: seorsum autem non habet receptaculum. Viscera quoque suillis similia sunt, praeter iecur, quod bubulo maius est quadruplo, sicut et alia. Solus lien longe minor quam pro corporis ratione. Eadem ventriculi ratio naturaeque intesti- 9  
norum in quadrupedibus animantibus, quae oua pariunt, vtraque testudine, terrestri marinaque, vtroque crocodilo, lacerta, atque omnibus omnino eiusmodi: simplicem enim habent vnicumque ven-

- triculum, partim suillo partim canino similem.
- <sup>10</sup> [Cap. XX. Scaligero.] Serpentum genus omni paene ex parte lacertis simile est, ex iis quae humi agitant et oua pariunt, si longitudinem attribuas, pedes adimas. Namque et squarrosa cute opertae sunt, et partes tam superas quam inferas proxima natura habent. Testibus carent tamen; quorum loco meatus duos, quemadmodum et pisces, vnum in locum concurrentes obtinent: tum autem vulvam longam et bifidam: cetera omnia eadem cum lacertis. Ceterum quod viscera et praeangusta et praelonga sint, propter corporis angustiam ac prolixitatem, sensum fallunt figurarum dissimilitudine. Arteria enim valde longa est, sed gula longior.
- <sup>11</sup> Arteriae initium ad os ita est, ut ei subiacere lingua videatur: verum propterea, quod lingua contrahitur, neque ut in aliis constat, imminere ei arteria videtur. Est lingua serpentum tenuis, longa, nigra, porroque admodum exseritur. Hoc quoque habet in genere atque lacertis peculiare, quod bisulca est in summo; sed fissa magis serpentibus atque usque
- <sup>12</sup> ad pilorum tenuitatem. Vitulo quoque marino lingua fissa est. Serpentis ventriculus intestino assimilis est laxiusculo, canini specie. Tum intestinum longum, tenue vno tenore usque ad exitum. In gutture cor pusillum oblongum renunculi figura:



quam ob causam fit aliquando, vt credatur mucronem ad pectus non intendi. Praeterea pulmo simplex fibraceo meatu directus, longus valde, valdeque procul appensus a corde. Iecur longum et simplex: lien longus et teres, qualis in lacertis: fel quemadmodum in piscibus. Hydri namque ad iecur habent: magna aliorum pars ad intestina. Serpentum generi vniuerso serrati sunt dentes; costae tot, quot in mense dies, triginta scilicet. Nonnulli memoriae prodiderunt, communi naturae eis atque hirundinis pullis esse comparatum, vt expuncti oculi renascantur. Nam tum lacertorum tum serpentum caudae abscissae redintegrantur. [Cap. XXI. Scaligero.] Similis est et in piscibus 13 ventriculi atque intestinorum natura. Vnum quippe habent ac simplicem, figura tantum diuersum. Quibusdam namque alterius formae [*alii Codices* intestini forma] est, vt scaro, quem solum ex piscibus putant ruminare. Intestinum quoque, quantum quantum est, simplex est atque implicatum, quod replicatum in vnum resolui potest. Piscibus auiumque parti maximae peculiaris appendicum natura est: verum auibus inferne et paucae; piscibus [*plures ac*] superne circa ventriculum. Item quibusdam multae, vt gobio, mustelo, percae, scorpio, citharo, mullo, scaro (*alii Codices* sparo):

sed mugili altera ex parte ventriculi multae, altera vna tantum. Quibusdam paucae, vt iecorino (hepato) et glauco et auratae. Differunt autem et inter se eodem in genere. Aurata enim alia plures, alia pauciores habet. Sunt etiam genera, quae omnino his careant, vt maxima cartilagineorum pars. Ceteri partim paucas, partim multas habent appendices; iuxta ventriculum omnes. [Cap. XXII.

14 Scaligero.] Auium interiora et inter se et ab aliis differunt animalibus: quibusdam namque praeiacet ventriculo ingluuies, vt gallo, palumbae, (phassae) columbae, perdici. Est autem ingluuies corium cauum amplumque, in quod receptus cibus per initia incoctus est. Illico ab gula angustius, deinde laxius, tum autem, qua ad ventriculum demit-

15 titur, rursum arctius. Plurimae auium ventriculum carnosum atque compactum habent, pelle interiore robusta, quae a carnosâ separari atque auferri potest. Quaedam, quae ingluuie carent, eius vice habent gulam capacem ac latam, aut totam, aut qua iungitur ventriculo: quales monedulae, corui, cornices. In coturnice gulae ima pars latior est: capaciuscula quoque in capricipite; item noctuae. Anas, anser, gauia, (larus,) mergula, (catarractes,) tarda, gulam amplam et latam to-

16 tam, quemadmodum multae aues aliae. Aliis



ventriculi pars ingluuiei similis est, vt tinnunculo. (cenchreidi.) Sunt quae neque gulam neque ingluviem amplam, sed ventriculum longum habent: quale genus auicularum hirundo et passer. Paucae, quibus neque ingluuies neque gula ampla est, sed valde longa: sane quibus collum item longum est, qualis porphyrio. Hae fere liquidius prae ceteris excrementum deiiciunt. Coturnici peculiare praeter 17 ceteras ingluuies simul, et prae ventre gula ampla latitudine. Tum ingluuies ab gulae parte, quae ventris est, multum distat pro magnitudine. Sunt auium plurimae tenui intestino, eodemque simplici, si explicetur. Appendices auibus sunt, quemadmodum diximus, paucae, neque superne, vt piscibus, sed in ima parte ad extrema intestini. Non omnibus tamen sunt, sed maximae parti. Talis est gallus, perdix, anas, nyctieorax, [localus *meliores Codices omittunt*,] ascalaphus, anser, olor, [*Codices duo cyclaminus habent*,] tarda, noctua. Easdem etiam in minuscularum genere auicularum inuenias, sed admodum pusillas, vt in passere.

### CAP. XIII. (vulgo Libri III. CAP. I.)

De interioribus partibus deque earum numero, qualitatibus, mutuisque differentiis hactenus. Reliquum est, vt de iis, quae ad animantium gene-

rationem pertinent, disseramus. Hae enim feminis omnibus insunt: in maribus autem compluribus iisque diuersis constant rationibus. Quae enim sanguine constant animalia, partim testibus carent, partim habent, sed intus. Atque horum quidem aliis siti sunt ad lumbos circa renum regionem, aliis vero ad ventrem. Partim habent extra. Atque his quidem genitale partim ventri appensum cohaeret, partim demissum est, quemadmodum et testes. Quin alio modo iis, quae antrorsum, et alio iis, quae retrorsum vrinam reddunt, cohaeret ventri. Piscium igitur nulli testes, neque si quid praeterea branchiis praeditum est. caret quoque serpentum genus vniuersum. Omnino vero animantes omnes, quibus a natura pedes dati non sunt, nisi si qua  
2 animal in se ipsis concipiunt. Aues autem testibus praeditae sunt, sed eos intus ad lumbos habent: quemadmodum et quadrupedes oua parientes, lacerta, testudo, crocodilus: et inter eas, quae animal pariunt, erinaceus. Quibus testes intus sunt, iis ventri haerent, vt inter ea, quae pedibus carent, delphino, inter quadrupedes, quae animal pariunt, elephanto. Aliis in aperto sunt. At quo modo, quoque loco siue ad ventrem siue prope eum appensi sint, iam dictum est. Quibusdam enim pone continenter haerent, non pendent, quemadmodum



suillo generi: aliis penduli sunt, vt homini. Pisces 3  
 igitur atque serpentes, quemadmodum supra di-  
 ctum est, testibus carent; sed praecordiis appen-  
 sos ad latus vtrumque dorsi, ad excrementi vsque  
 exitum de superiore loco inter se in vnum commis-  
 sos meatus habent duos. Intelligo locum superio-  
 rem eum, qui spinae adiacet. Ii meatus coitus  
 tempore genitali semine turgent, vnde candida ge-  
 nitura attritu eliciatur. Eorum autem diuersam na-  
 turam tum ex dissectionum ratione contemplari  
 oportet, tum a nobis dicetur, cum quid cuique natura  
 peculiariter comparatum sit, sigillatim exactius  
 disseremus. Oviparis animantibus, siue bipedibus 4  
 siue quadrupedibus, omnibus ad lumbos sub septo  
 siti sunt testes; aliis candidiores, aliis pallidiores,  
 tenuibus admodum ambitu venulis: quorum ab  
 vtroque singuli meatus in vnum coeunt, quemad-  
 modum et piscibus, supra exitum excrementi. Id  
 vero genitale est; quod in minusculis non apparet:  
 in maioribus, cuiusmodi anseres atque aliae similis  
 magnitudinis sunt, manifestius extat, cum recens  
 inierint. Meatus autem tam his quam piscibus ab 5  
 natura annexi sunt in lumbis sub ventre et intestinis,  
 inter venam magnam: de qua intenduntur meatus  
 ad vtrumque testium. Quemadmodum autem pi-  
 scibus coitus tempore et semen inest, et meatus

- conspicui valde sunt, post id vero tempus etiam meatus ipsi interdum nulli apparent; sic autem quoque testibus usu venit. Nam antequam coeant, partim earum exiguos, partim omnino minime manifestos habent. Cum autem coeunt, valde magnos obtinent. Planissime autem hoc in palumbis atque perdicibus deprehendas. Quamobrem ne ullos quidem esse per hiemem ipsis quidam sunt arbitrati.
- 6 Quibus testes in anteriori parte siti sunt, horum nonnullis haerent intus ventri, ut delphino; aliis extra ad extremum ventrem palam. Atque his sane cum cetera conueniant, tum hoc differunt, quod illis per se ipsi haerent testes, in iis autem, quibus
- 7 extra sunt, sibi scroto continentur. In omni genere animantium, quae humi agitant atque animal pariunt, sic testes sunt constituti. Meatus venarum specie ab aorta ad utriusque testis caput tendunt: tum alteri duo ab renibus; sed sanguinem hi continent, illi de aorta nullum. A testis capite meatus est illo densior atque nervosior, qui testi ipsi adhaeret, atque utroque in teste reciprocatur rursus ad caput: a quo capite uterque in unum coit prorsum
- 8 ad genitale. Atque ii meatus, quos reciprocare diximus, et ii qui testibus applicantur, eadem membrana ambiuntur, adeo, ut nisi membranam disiungas, unus meatus esse videatur. Is meatus,



quem applicatum diximus, etiamnum sanguinolentum continet humorem, licet minus, quam ii, qui aorta demittuntur: vt in iis, quos reciprocare ad tubum genitalis indicauimus, candidus humor continetur. A vesica quoque meatus dirigitur coitque ad superiorem tubi partem: circa quem quasi putamen est, quod vocamus genitale. Perspiciatur sane meatuum horum ratio ex subiecta pictura sic: Initium de aorta ibi, vbi est A: testium capita at- 9 que ipsi meatus descendentes eo, vbi est B: meatus qui ab ipsis applicantur testibus, vbi sunt CC: meatus reciproci, quibus humor candidus continetur, vbi sunt DD: genitale, vbi est E: vesica, vbi est F: testes, vbi sunt GG. Exectis ablatisque testibus retrahuntur sursum meatus. Testes aut corrumpuntur tenelli, dum franguntur; aut etiam firmiore aetate exsecantur. Euenit aliquando, vt taurus castratus illico admissus et inierit et impleuerit. [Lib. III. Cap. II. Scaligero.] Haec de animalium 10 testibus. Quae autem vteros habent, eos non solum non eodem sitos modo, sed etiam diuersos nactae sunt; et tam in iis, quae animal, quam in iis, quae oua pariunt, inter se differunt. Qui vteri ad genitale positi sunt, ii geminos sinus habent, alterum in dextra, alterum in laeua parte: ceterum principio vno, vnoque ore constant quasi ceruice, ea-

que carnosae valde atque cartilaginosa maximae parti earum, quae notabili sunt magnitudine. Eorum partes aliae vocantur matrix atque vteri; unde fratres vterini quoque dicti sunt: aliae vulvae, cervix  
11 ipsa scilicet atque os vterorum. Tam bipedes quam quadrupedes, quae animal pariunt, omnes infra praecordia vteros habent, homo, canis, sus, equus, bos; et cornigeris omnibus ratio eadem. Vterorum extrema, quae cornua vocantur, maxima pars convoluta habet. Quae vero ova edunt, non omnibus ratio eadem; sed aves ad septum transuersum, pisces infra obtinent, quemadmodum bipedes quadrupedesque quae animal pariunt, nisi quod tenuiores sunt illis et membranacei atque oblongi. Quamobrem in piscibus minutis utraque vteri pars vnum ouum esse videtur. Nam omnes hi pisces, quorum ouum esse dicitur arenosum, duo ova habent: at enim vnum non est, sed numerosum; ideoque in  
12 multa soluitur. Avium matrix infra habet cervicem carnosam atque compactam: at quae pars septo adhaeret, membrana tenui admodum constat, ut putare possis, extra matricem ova sita esse. Verum in grandioribus avibus cum percipitur facilius sensu membrana, tum vero, si per cervicem insuffles, tumet et sinuatur: at in minutis obscuriora omnia haec. Eadem ratio et in oviparis quadrupedibus, testu-



dine, lacerta, rana atque eiusmodi. Cervix ima in parte singularis et carnosiuscula, diuisio autem et oua superne ad septum. Animalia autem pedibus <sup>13</sup> carentia, quae ex ouo intra se concepto animal edunt, cuiusmodi musteli et reliqua quae cartilaginea vocantur, (ea scilicet, quae pedes non habent, et branchias habent et animal pariunt,) geminam diuiso sinu matricem obtinent: haec eodem quo in auibus situ ab ima parte orta ad septum transuersum tendit: tum ibi media inter duos sinus suprema in parte ad originem septi oua generantur, quae postea in ampliorem demissa regionem euadunt animalia. Quemadmodum vero tum inter <sup>14</sup> sese tum ab aliis piscibus differant horum vteri, exactius in figuris, quae ex dissectis corporibus comparantur, contemplari possis. Serpentum genus et ab his et inter se differt. Nam cum alia genera oua pariant, sola vipera (echis) ex ouo, quod intra sese prius conceperit, postea parit animal. Qua de caussa earum vterus et cartilagineorum similes sunt. Serpentum matrix pro corporis modo longa, [*et duplex*] exorsa infra vno continua meatu ex utroque spinae latere specie gemini meatus vsque sub septum ipsum tenditur; atque in ea oua seriatim conformata, nec singulatim, sed inter se cohaerentia eduntur. [*Quae animal intra se con-* <sup>15</sup>

*ceptum pariunt, matricem habent supra ad ventrem; ouipara infra ad lumbos. At quae ex ovo intra se concepto animal edunt, utramque naturam sortitae sunt. In his namque matricis inferior pars ad lumbos est, ubi ova insunt; pars altera ad exitum supra intestina sita est.]* Est et aliud matricum discrimen. Nam cornigera altera tantum dentata maxilla acetabula in matricibus habent, cum praegnantia sunt: ac praeter haec inter illa, quae utraque dentata sunt maxilla, lepus, mus, vespertilio. Alia autem utraque dentata, quae animal pariunt et pedibus praedita sunt, omnia laeuem habent vterum; neque foetus per acetabula sed ipsam matricem annexus est. Hactenus de partibus animalium, quae dissimilibus inter se particulis constant, tam interioribus quam exterioribus.

---



---

A R I S T O T E L I S  
D E A N I M A L I B V S H I S T O R I A E  
L I B E R I I I .

---

CAP. I. (vulgo CAP. II. Scaligero III.)

Partium autem e consimilibus particulis constantium communis maxime animalibus omnibus sanguine praeditis sanguis est, atque ea pars, in qua ipse suapte natura continetur; quae vena vocatur: deinde si qua horum vices gerunt, vt sanies (cruor) et fibrae: item caro, quippe quae maxima ex parte sane animalis corpus est ipsum, et quod carnis vicem in singulis gerit: et os eiusque vicaria pars, vt spina et cartilago: praeterea cutis, membrana, nerui, pili, ungues, et quae horum sequuntur rationem: adhaec adeps, seuum: tum excrementa, vt stercus, pituita, bilis flaua et nigra. Cum igitur sanguinis venarumque natura videatur obtinere principii vicem, primum de his dicendum est;

praesertim cum prisci auctores aliquot minus vera prodiderint. Ac sane hoc vt ignorarent, fecit obscura rei difficultas. Nam potissimae cuiusque venae natura latet in corporibus vita functis, propterea quod eae praeter ceteras exeunte sanguine subsidunt illico: quippe ab illis tanquam de vase effunditur vniuersus. Neque enim vlla animalis pars per se ipsam sanguinem possidet; tantummodo quiddam in corde pusillum efficit, ne omnis in venis contineatur. At in viuentibus quemadmodum insit, nullo deprehendi pacto potest, idcirco, quia eius natura abdita est. Quare qui in dissectis cadaueribus scrutati sunt, maxima principia non sunt assecuti. Qui autem in hominibus macie attenuatis vehementer, venarum origines ex

3 illis, quae tunc apparebant, determinarunt. Syennesis quidem, medicus Cyprius, sic scripsit: Crassae venae ita a natura constitutae sunt. Ab oculo prope cilium [ab vmbilico circa lumbos *Codices quidam*] per dorsum, iuxta pulmonem sub mammillas; dextra in laeuam, laeua in dextram: sinistra per iecur in renem et testem: dextra in lienem et

4 renem et testem, atque inde in genitale. Diogenes autem Apolloniata haec scripsit: Venae in homine sic habent. Duae maximae tendunt per ventrem iuxta dorsi spinam, altera laeuorsum, altera dex-



trorsum ad sibi propinquum vtraque crus, et sursum ad caput per iugulum iuxta clauiculas. Ab his vniuersum per corpus ad suum quaeque latus venae ducuntur. Duae maximae ad cor circa dorsi spinam: alterae paulo altius per pectus sub axillam, vtraque ad manum proximam sibi. Altera lienaris dicitur, altera iecoraria. Earum summitates scinduntur ita, vt partim ad pollicem, partim ad palmam (tarsum) prodeant: atque inde tenues frequentibus ramis in reliquam manum ac digitos. Aliae autem tenuiores a primis venis tendunt a dextra in iecur, a laeua in lienem ac renes. Quae vero ad crura pertinent, finduntur ad coagmentum, (iuncturam,) ac per totam coxam intenduntur: quarum maxima pone coxam crassior extat: altera, paulo minus crassa, interiore coxae parte. Deinde, quemadmodum illae in manus, ita hae praeteruectae genu, in tibiae, atque inde in plantam, (tarsum,) postremo in digitos diducuntur. Multae aliae tenues venae ab illis in ventrem ac costas diffinduntur. Quae autem caput per iugulum petunt, apparent in collo magnae, et prope aures, qua terminantur. Multae ab ipsis in caput scinduntur, et dextrae in sinistram, et sinistrae in dextram. Est et altera vena prope maiorem, sed paulo ea minor in vtroque ceruicis latere; in quam plurimae a ca-

pite contendunt ipso, atque hae iugulum subeunt. Inde ab vtraque sub scapulam atque in manus tendunt. Apparent etiam prope lienarem et iecorariam aliae paulo minores, quas si seces, operae pretium est, cum quid morbi sub cute est: at in ventriculi  
7 aegritudinibus iecorariam et lienarem. Ab illis aliae etiam in mammas vergunt: aliae ab vtraque tenues per spinalem medullam in testes: aliae sub cute per carnem in renes; quae in viro testibus, in femina vteris terminantur. Quae venae primae a ventriculo veniunt, latiores sunt: deinde attenuantur, donec commutent sedem, vt a dextra sinistrorsum, atque indidem in dextram. Hae seminales appellantur. Sanguis crassissimus a partibus carniformibus exugitur: qui vero in haec redundat loca, tenuis et calidus et spumusus fit. Haec igitur Syen-  
8 nesis et Diogenes tradiderunt. Polybus autem sic: Venarum iuga [genera *alii Codices*] quatuor sunt: vnum pone caput per collum extrinsecus, iuxta dorsum hinc atque hinc, ad nates vsque et crura: deinde per tibias ad malleoli exteriorem partem et ad pedes. Quare in doloribus dorsi et coxendicum de poplitibus ac malleolis extimis venas secant. Aliae venae a capite prope aures per collum, quae nominantur iugulares: intus per dorsum vtraeque porrectae in testes ac femora per lumbos, et per



interiorem poplitis partem ad crura et malleolos interiores ad pedes: de quibus idcirco mittunt sanguinem in poplite atque malleolo, cum lumbi et testes male habent. Tertium par venarum a temporibus per ceruices sub scapulis in pulmonem deueniunt, dextrae sinistrorsum sub mammam, et in lienem ac renem; sinistrae dextrorsum a pulmone sub mammam et iecur et renem. Ambarum finis in teste [ano *meliores Codices*] est. Quartus ordo ab anteriore capitis parte atque oculis sub collum et clauiculas, et inde per brachiorum summa loca ad cubitos: postea per vlnas ad manus commissuram et digitos; et per deuexam brachii partem sub axillas; ac per costas superne, vsque dum altera ad lienem, altera ad iecur demittatur, tandemque ambae super ventre desinant ad genitale.

#### CAP. II. (Textus et vulgo III. Scaligero IV.)

Haec fere sunt, quae ab aliis accepimus. Sunt vero nonnulli, qui, cum de natura scriberent, ad venarum tamen naturam diligentius explicandam animum suum minime appulerunt: verum omnes similiter cum in capite atque cerebro venarum statuunt initia, non recte sentiunt. Quamuis autem sit, vt antea diximus, difficilis inspectio et contemplatio, tamen si quis operam velit impendere, satis

percipere potest in corporibus, quae antea fuerint in maciem attenuata et necata suffocatione. At venarum natura sic sese habet. Duae in pectore venae intus apud spinam sitae sunt; altera in anteriore parte maior, altera pone illam minor. Maior dexterioris sedis plus occupat, minor sinisterioris: cuius partes nervosae cum etiamnum in cadaueribus  
2 perspicerentur, aortam appellarunt. Vtriusque principium a corde est. Nam ubicunque per alia viscera tendunt, totae transeunt, nec mutantur, sed toto tractu continuo venarum naturam seruant. At cor quasi earum pars est, ac certius maioris eius, quae in sede est anteriore, quoniam supra infraque hae venae sitae sunt, in medio earum existente corde. Habent corda omnia intra se sinus; sed in minoribus animalibus maximus sinus vix percipitur; in mediocribus etiam alter; in maximis vniuersi tres. Cordis mucro anteriorem in partem prostat, quemadmodum diximus supra. At maximus sinus suprema in parte cordis dextera, minimus in sinistra, mediocris inter vtrumque: at  
3 ambo ii longe minores maximo sunt. Ac peruo aditu pulmoni committuntur omnes: in vno tantum id deprehendas; in aliis propter meatuum paruitatem non item. Igitur magna vena de maximo sinu illo, quem diximus esse suprema in parte dex-



teriore, pendet: mox per medium sinum intenditur rursus, quasi eius pars sinus ille sit, in quo stagnat sanguis. At aorta a medio quidem sinu, verum non eodem modo, quo vena. Namque magna eius pars angustiore fistulam occupat: praeterea vena per cor, atque a corde in aortam sese induit. Magna vena membrana cuteque compacta est: aorta cum angustior, tum nervosior: et porro distenta et ad caput et ad membra inferiora, vbi et strictior et nervosa omnino euadit. A 4  
superiore cordis parte venae magnae portio magna ipsa quoque vnoque tenore ad pulmonem scandit: quo loco aorta quoque committitur. Tum inde scinditur bifariam ita, vt partim pulmonem subeat, partim ad spinam postremamque colli vertebra adeat. Cum igitur pulmo bipartitus sit, quae in eum sese dat vena, bifariam quoque scinditur primum; deinde omnibus fistulis omnibusque occurrat foraminibus vnus cuiusque aequans magnitudinem aut paruitatem; adeo vt nullam partem deprehendas, in qua tum foramen tum venula non sit: quanquam extrema propter exiguitatem sensum fugiant, totusque pulmo videatur esse plenus sanguinis. His autem meatibus, qui a vena diducuntur, subsunt fistulae, quae ab arteria tendunt. 5  
Quae vero ad spinam et colli tendit vertebra,

rursus per spinam porrigitur: de quo in suo poemate Homerus ita scripsit: *totam venam abscidit, quae per spinam currens continuo tractu ad ceruicem peruenit*. Ab ea ad costas singulas singulasque vertebrae pusillae venae deducuntur: bifariam autem scinditur ad vertebrae, quae ad renes pertinet. Maioris venae portiones sic par-  
6 tiuntur. At superiori in parte, ea quae a corde tenditur, tota in duo diuiditur loca: etenim ad latera et clauiculas, atque inde per axillas hominibus in brachia, quadrupedibus in crura anteriora, auibus in alas, piscibus in pinnas pronas (superiores) contendunt. Hae venae quâ ramescere incipiunt primum, vocantur iugulares; sed ubi de magna vena partitae subeunt collum, iuxta pulmonis arteriam tendunt. Has interdum si quis extrinsecus intercipiat, concidunt homines, sensu priuati genisque clausis, etiamsi non vehementius  
7 angas, ut suffocentur. Sic vero tendentes atque in medio sui recepta arteria feruntur usque ad aures, qua maxillae capiti commissae sunt. Tum vero ab eo loco rursus quadripartitae sunt: quarum una reflexa per collum atque humerum descendit, et coniungitur cum priore venae ramo ad brachii curuaturam: altera autem pars in manu ad digitos terminatur. Altera ab utroque aurium loco in cere-



brum tendit, atque ibi in membrana, qua cerebrum amictum est, (meninga Graeci vocant) in paruas et minutas venas spargitur. Ipsum vero cerebrum 8 omnibus sanguinis expers est, neque tantillum venae cuiusquam recipit. Ab hac vena reliqui proficiscuntur rami: alii caput circumplectuntur; alii tenuibus venulis ad loca sensibus destinata atque ad dentes ipsos desinunt. Idem ramorum modus minoris quoque venae, quam aortam appellamus. Maioris enim venae ramos comitantur; verum tubuli et venulae minores sunt. Quae supra cor venae sunt, sic se habent.

CAP. III. (Textus et vulgo IV. Scaligero adhuc CAP. IV.)

At infra cor maioris venae pars suspensa transmeat septum transuersum, haeretque tum aortae tum spinae tubulis membranaceis atque laxis. Hinc fertur ad iecur vna brevis, sed lata; a qua multae minutaeque in iecur intentae venae occultantur. Ab hac per iecur tendente vena duo rami proficiscuntur; quorum alter in transuersum septum seu quae dicuntur praecordia desinit: alter rursus reversus per axillam ad brachium dextrum concurrit cum aliis venis, secundum curvaturae partem interiore. Quare hunc secantibus medicis certi ie-

- 2 coris morbi soluuntur. Ab laeua eius parte brevis vena sed crassa ad lienem pergit, quo in loco exiguae venae, in quas illa spargitur, occultantur. Altera pars eodem modo de latere sinistro magnae venae exiens ad sinistrum adscendit brachium. Sed illa eadem est, quae ad iecur vadit; haec diuersa ab ea, quae lienem subit. Sunt aliae quoque a vena magna proficiscentes: quippe quaedam in omentum, quaedam in membrum, quod pancreas Graeci vocant. Tum ab hac multae venae per intestinale (mesenterium) sparguntur. Eae vero omnes in vnam venam magnam desinunt, quae iuxta totum intestinum ac ventriculum ad gulam vsque porrigitur. Atque circa membra haec multae mittuntur ab his venae. Vtraque igitur vena, tam magna quam aorta, ad renes vsque perpetuo tenore progreditur: ibi vero spinae magis adhaerescunt, findunturque bipartito velut in litteram lambda aut V inuersam; sed vena maior pone aortam aliquanto recessu redacta est. Adhaerescit aorta minutis venulis nervosis spinae potissimum
- 4 circa cor. Est aorta, vbi de corde deducitur, bene valde capax; at inde progressa tum angustior tum nervosior. Ab aorta quoque veniunt ad intestinale (mesenterium) venae, sicut a vena maiore, quanquam longe minores; quippe angustae et fibris



similiores; tenuibus enim et variis fibraceisque venis terminantur. Neque ad iecur neque ad lienem ab aorta vlla vena pertinet. Venae vtriusque ramī vtrumque femur subeunt, atque in os ipsum induunt sese. Ad renes quoque de vena magna deque aorta feruntur venae, quae, vt eorum caua non subeunt, ita in ipsorum renum corpus absorbuntur. Ceterum ab aorta duo alii meatus robusti 5 atque continui in vesicam demittuntur: item alii ex renum cauo nihil habentes cum magna vena commercii. Ex vtriusque renum medio vena caua atque neruosa demittitur secundum spinam per venas deducta. Eae primum vtramque in natem subeunt, deinde rursus extare perspiciuntur iuxta nates extentae. Fines earum desinunt in vesicam et in genitale masculorum, in feminis autem in vulvas. De maiore vena nulla deducitur ad vteros 6 vena; de aorta magnae ac frequentes. De aortae et maioris venae ramis feruntur multae, partim quidem in inguina primum, magnae ac cauae, deinde per crura in pedes ac digitos desinunt: partim per inguina et coxas delatae permutant inter se tractus rationem. Quippe ab sinistra parte in dextram, et ab dextra in sinistram; atque eae ad poplites aliis cum venis sese coniungunt. De venis earumque ortu haec. Ac venarum quidem initia 8

venaeque adeo magnae ipsae in omnibus, quae sanguine constant, animalibus eadem se habent ratione. At venae reliquae non eadem: nam neque modus neque numerus partium idem omnibus est: quin nec in omnibus aequae apparent, sed tantum in iis, quae et magnitudine corporis et sanguinis multitudine constant. Nam quae minora sunt et paucillum habent sanguinis, aut propter naturam, aut propter corporis obesitatem haud aequae conspici possunt; si quidem meatus horum confusi sunt, quemadmodum riuuli quipiam largiore limo. Ac sunt animantium quaedam, quae et paucas, et fibras potius quam venas habent. Sola vena magna in omnibus prae ceteris conspicua est, etiam in paruis.

#### CAP. IV. (Textus et vulgo et Scaligero V.)

Neruorum nunc rationem prosequamur. Horum quoque ortus a corde est. Habet enim intra se in sinu maximo neruos cor; et aorta neruosa vena est; omnino autem eius extrema nerueae naturae: neque enim caua sunt, atque eodem modo intenta, quo nerui, qua desinunt ad ossium flexiones. Ceterum non est vnum principium, vnde nerui continenter, quemadmodum venae, deducantur. Venarum enim idem modus in habenda totius corporis figura, qui spectatur in pictis (*pa-*



*rietum*) canabis. Quare in corporibus emaciatis tota moles extantium venarum frequentia differta videtur. Idem enim locus est venarum in macilentis et carnis in crassis. At nerui per artus diuulsi 2 perque ossium sunt flexiones. Qui si essent continuati, apparerent sane in corporibus extenuatis. Neruorum maximae portiones his locis continentur: in eo, qui vocatur poples, quae pars ad saltum certam propriamque habet facultatem. Item alter neruus geminus (*cervicis*) graece *τένων* vocatus, latine tendinem possis. Praeterea epitonus et humerarius, qui ad robur corporis momentum afferunt. Ceteri, qui ad ossium flexuras sunt, nomine vacant. Ossa namque omnia, quae flectuntur, 3 aut inter se apta sunt, nervis colligantur, et circa omnia ossa neruorum multitudo adest. In capite tamen nullus neruus est, sed ossium suturae componunt et continent ipsum. Est nerui natura per longitudinem scissilis; transuersa non item: intendi quoque valde potest. Circa nervos humor est mucosus, albus, glutinosus, quo aluntur, et ex quo videntur generati. Vena quoque ignem (*cauterii*) pati potest; neruus autem igni corrumpitur: quin etiam incisus non consolidatur. Quae 4 pars corporis nervis caret, ea nunquam stupore afficitur. Plurimum neruorum est circa pedes, costas,

scapulas, ceruicem, brachia. Quaecunque constant sanguine, nervis praedita sunt omnia: verum quae flexionibus carent, itemque manibus ac pedibus, tenues eos atque obscuros habent; quare in piscibus circa pinnas euidentiores sunt.

CAP. V. (Textus et Scaligeri VI.)

Fibrarum natura inter venam neruumque media est. Quaedam quoque ipsarum humorem nactae sunt, nempe saniem, et pertinent a nervis ad venas, et ab his ad nervos. Est et aliud fibrarum genus, quod in sanguine gignitur, quanquam non in omnibus. Iis fibris exemptis, non coit sanguis: non exemptis, coit. In plurimorum animalium insunt sanguine; in cerui, damae, (procos,) bubali, aliorumque quorundam non insunt; quorum propterea haud perinde coit sanguis, sed tam ceruini quam leporini non est firma concretio, quemadmodum aliorum, sed fluctuans, quasi lactis, si quis iniciat coagulum. Bubalinus plus densatur; neque enim minus, quam ouillus, aut non multo. Haec de nervo, vena et fibra.

CAP. VI. (Textus et Scaligeri VII.)

Nunc de ossibus dicendum est. Ossa cum ab uno dependent omnia, tum inter se sunt continuata,



quemadmodum et venae: segregatum os nullum inuenies. Eorum omnium initium ab spina est. Componitur spina e vertebrae, tenditque a capite ad femora vsque; ac vertebrae quidem omnes perforatae sunt. Supremis vertebrae os capitis, quae dicitur caluaria, impositum est; cuius serrata pars sutura. Eius ossis ratio alia aliis. Quaedam enim 2 caluariam habent vnico osse compactam, vt canis: quaedam compositam, vt homo. Nam femina circularem suturam habet, mas tres in summo triquetra figura coeuntes. Quanquam fuere, qui viri quoque viderint caput sine suturis. Senis igitur, non quaternis componitur caput, singulis vtrinque circum aures paruis, si cum ceteris conferantur. Quae deinceps ossa protenduntur, maxillae sunt. 3 Earum inferiores omnia mouent animalia, excepto fluuiali crocodilo, qui solus mouet superiorem. Dentium genus in maxillis est, os partim solidum, partim pertusum. Solum ossium scalpi non potest. A spina, quae fibulae officio fungitur, sunt et cla- 4 ves; tum costae; quarum quae coeunt, in his pectus est; aliae non coeunt: nullius enim animalis venter osse tegitur. Tum ea quae in humeris sunt ossa et quae scapulae dicuntur, et his haerentes artus brachiorum, atque quae sunt in manibus. Postremo idem modus etiam in animalibus, quibus

5 sunt crura anteriora. Qua ima spina desinit, acetabulum post coxam est; inde crurum ossa, cum femoris tum tibiae: Graeci colenes vocant: quarum malleoli partes sunt, sicut malleolorum calcarea; videlicet in iis, quae habent malleolos: post haec in pedibus conferta ossa sunt. Quae animalia constant sanguine, et pedestria animal pariunt, eorum ossa non admodum diuersa sunt inter se, sed magis teneritudine aut duritie aut magnitudinis proportionem distant. Praeterea eodem in animali ossa quaedam medullam intus habent,  
6 quaedam non. Tum nonnulla animalia omnino nullo in osse medullam habere videri possint, propter eius scilicet tum exiguitatem tum tenuitatem, atque pro eo, quod paucis in ossibus reperiatur. Talis leo est: habet autem etiam in femoribus et brachiis; adeo vero dura eius ossa praeter cetera animalia sunt, ut ab eorum duritie, si collidantur, perinde atque de silicibus, ignis excussus emicet. Delphinus quoque ossa, non spinam (*piscium instar*) habet. In aliis vero animalibus, quae constant sanguine, ossa partim inter se non multum differunt, ut in auibus, partim proportionem quadam sequuntur ossium rationem, ut in piscibus. Nam quae animal pariunt, in iis ossa sunt media inter spinam et cartilaginem, cuiusmodi quae Graeci



σελάχη (cartilaginea) vocant. At ouipara spinam gerunt, quae est quasi os tergi in quadrupedibus. Proprium in genere piscium quorundam inter car- 7 nem separatas spinulas tenues haberi. Serpentum quoque natura piscibus similis est; quippe qui spinam pro tergi osse gerant. Maiores quadrupedes ouiparae hanc partem ossi habent similiorem, minores autem spinae. Omnia autem animalia, 8 quae sanguine constant, sub tergo aut os aut spinam habent: aliis autem ossibus quaedam carent, quaedam non. Fit hoc pro membrorum ratione, ut ossa quoque eorum obtineant. Nam quae carent cruribus aut brachiis, his ossium arundines (colenes) quoque desunt. Sic illa etiam, quibus eadem membra sunt, si non sint similia, secundum plus et minus, aut proportionem respondent.

## CAP. VII. (Textus et Scaligeri VIII.)

Quemadmodum ossa se haberent, declaratum est. Cartilago autem eiusdem naturae est, nec nisi latitudine differt. Illud quoque utrique commune est, non crescere, si abscindatur. Sunt in terrestribus animantibus, quae et sanguine constant et animal pariunt, solidae cartilagineae, neque intus ullam, velut ossa, continent medullam. At cartilagineis piscibus planis (*in parte superiori?*) loco

spinae cartilago est pro ossibus, atque in ea humor medullaris. Quibus per humum tantum motus datus est, si animal pariunt, circum nares et aures atque ossium extremâ quaedam cartilaginee sunt.

#### CAP. VIII. (Textus et Scaligeri IX.)

Sunt et alia genera partium quibusdam in animalibus, neque eiusdem cum his naturæ, neque procul tamen: ut ungues, ungulae tam continuæ quam fissæ, cornua: adhaec rostrum, quale auium est. Haec enim et flecti apta et scindi: os autem nullum flexile aut fissile est, sed frangi tantum potest. Cornuum quoque et unguis et utriusque ungulae color colorem cutis atque pilorum sequitur. Quibus enim corium atrum est, iis etiam nigra cornua et ungulae, siue eas continuas siue fissas habeant. Sic et candidis candidae, et mediis in coloribus eadem ratio. Ungues quoque eodem modo colorantur. At dentes in ossium natura sunt. Quare Aethiopum atque aliorum eiusmodi dentes atque ossa candida sunt, ungues nigri, qualis et cutis vniuersa. Cornuum pars maxima ab radice caua sunt, et adhaerent circa os capitis, quod, qua exoriuntur, ambiunt: mucro autem et solidus et simplex. Sola ceruorum cornua penitus solida et ramosa. Ceterae animantes, quae cornua gerunt,



nullae mutant: soli ceruo decidua sunt quotannis, nisi castratur. De castratis postea dicemus. Cornua 3 corio potius haerent, quam ossi: quam ob rem cum in Phrygia tum alibi boues sunt, qui cornua sicut aures moueant. Quibuscunque digiti sunt, ea omnia ungues habent. Habent autem digitos, quae pedes quoque habent, praeter elephantum: huic enim digiti indiuisi ac vix distincti, iique sine unguibus. Quae ergo ungues habent, partim iirecti sunt, vt homini; partim adunci, vt inter pedestria leoni, inter volucra aquilae.

## CAP. IX. (Textus et Scaligeri X.)

De pilis autem, deque iis, quae ipsorum gerunt vicem, atque etiam de cute, nunc dicendum est. Quae humi tantum mouentur atque animal pariunt, omnia pilis teguntur; in eodem genere quae oua pariunt, cute squarrosa sunt; pisces autem soli squammis muniuntur, qui ouum arenaeum edunt. Nam in genere longorum conger eiusmodi ouum non gignit, neque muraena: anguilla vero etiam nullum. Pilorum crassitudo, tenuitas, magnitudo, locorum differunt ratione. Interest enim, quam corporis partem qualemque cutem nacti sint. Namque in crassiori cute magna ex parte pili duriores atque crassiores; sed in locis

cauis atque humidioribus tum frequentiores tum  
prolixiores, modo sane locus ille a natura institu-  
2 tus sit ad habendum pilos. Eandem et in squar-  
rosis et in squammosis inuenias rationem. Quae  
igitur molliori pilo sunt praedita, si laetiore pabu-  
lo vtantur, duriores obtinebunt: contra quae du-  
rum habent, tum molliorem tum rariorem. Dif-  
ferunt et locorum inclinationibus calidiorum aut  
frigidiorum: veluti hominis capillus in calidis re-  
gionibus durus, in frigidis mollis est. Recti molles  
3 sunt, intorti duri. Pilus suapte natura fissilis est.  
Pili inter se differunt intensiore natura aut remis-  
sione: quidam etiam paulatim duritiae excedunt,  
vt non iam pilis, sed spinis similes videantur: cu-  
iusmodi erinaceorum. Id quod etiam vnguibus  
euenit: nam quibusdam animalibus vngues ob du-  
4 ritiam ab ossibus nihil distant. Cutem inter omnia  
animalia tenuissimam homo habet, si cum eius  
conferas magnitudine. Inest in omni cute mucosus  
humor, sed in quibusdam paucus, in aliis vberior,  
vt in bubulo corio; ex quo glutinum fit; quod et-  
iam ex piscibus alicubi conficiunt. Cutis cum se-  
catur sola, non sentit, praesertim in capite: pro-  
pterea quod inter eam et os nihil sit carnis. Vbi  
sola cutis est, si secatur, non coalescit; veluti te-  
nuis pars malae, et praeputium et palpebra. Omnia



animalia cutem perpetuo tractu continuam ita habent, ut locum det tantum meatibus naturalibus ad exhalandum; tum ubi os est et ungues. Igitur animalia, quae sanguinem habent, cute omnia teguntur; at pilis non omnia teguntur, sed prouti supra distinximus. Senescentibus animalibus co- 5  
lores mutant pili, atque cani fiunt in hominibus. In aliis quoque hoc idem fit, verum obscurius, praeterquam in equo. Canescere incipiunt pili a suprema parte. Plurimi statim oriuntur cani. Quare manifestum est, canitiem non esse arefactionem: nihil enim statim aridum nascitur. At in illo genere efflorescentiae cutis, quam vitiliginem dicimus, omnes cani gignuntur. Iam vero aegrotantibus quibusdam euenit, ut cani fierent; quibus recepta pristina valetudine cum illi defluxissent, nigri de integro suborti sunt. Frequentius operti pili quam aperti ventis canescunt. Hominum tempora prima canitiem sentiunt, et anteriores partes prius quam posteriores: postrema autem pubes. Inter omnes animantes solus homo pilos 6  
habet alios congenitos, alios pro aetatum temporibus adnascentes. Congeniti sunt in capite, palpebris, ciliis: qui postea gignuntur, sunt hi: primum pubes, deinde in axillis, tum ad mentum. Itaque par locorum numerus et congenitorum et

postea adnascentium. Deficiunt atque defluunt per aetatem pili, et maxima ex parte et primum capilli; sed ex anteriore parte tantum. Nam posteriora caluescunt nunquam. Verticis glabritia, caluitium dicitur: in ciliis depilatio. (anaphalantiasis graece.) Neutrum euenit ante vsum veneris.

- 7 Sed neque puer neque mulier caluescunt; ac ne spadones quidem. Quin si, antequam caluescant, castrentur, posterigeni pili non gignuntur: sin post pubertatem, eos omnes amittunt, praeter pubem. In mulieris mento non gignuntur pili, praeterquam pauci iis, in quibus menstrua non fluunt, et in Caria antistitis: quod pro indicio infortunii futuri agnoscunt. Alii autem pili innascuntur, sed pauciores. Qui pili posterius oriri solent, eis tam viri quam feminae ab ortus principiis nonnulli carent, sed simul et generandi facultate, quando etiam pube
- 8 deficiuntur. Pili lege quadam naturae nonnulli plus minus crescunt: plurimum capilli, proxime barba. Sane qui sunt tenuiores, valde augentur: sed etiam supercilia multis affecta aetate in tantum, vt attondeantur. Id ideo fit, quod ibi gignuntur, vbi ossa committuntur: quo in senectute diductis ossibus transmittitur plus humoris. At palpebrarum pili non excrescunt. Eorum defluuium incipit post veneris vsum, eiusque frequentia augetur.



Sed sero omnium maxime canescunt. Dum crescimus, pili si euellantur, renascuntur; post id aetatis, non item. Habet autem omnis pilus lentam humiditatem ad radicem; itaque simul atque euulsus est, si quid leuiusculi attingat, trahit. Subest ab initio cutis concolor variis et versicoloribus animalibus, itemque linguae cute versicolore sunt. Mentum ac labii spatium superioris sunt qui barbatur habent: nonnulli ibi nullos pilos, sed malas hirsutas habent. Minus saepe videas caluere eos, qui laeui et glabro mento sunt. [Vulgo est: *qui mento sunt bipartito*: vel cum negatione: *qui m. non sunt bipartito*.] Crescunt pili et in aegrotis quibusdam, praesertim tabe laborantibus; et in senibus. Crescunt etiam in cadaueribus: tum fiunt duriores. Hoc etiam euenit vnguibus. Pili congeniti potius defluunt vsu venereo: qui autem, postquam homo natus est, nasci solent, citius oriuntur. Varicosi minus caluere: tum calui aliqui varicibus capti, rursus capillati facti sunt. Pilus praecisus non crescit, sed ab imo nascens fit maior. Quin etiam piscibus, qui aut macescunt aut senescunt, squammae fiunt et crassiores et duriores. Senescentibus quoque quadrupedibus vel pilus vel lana crassior (*Gazae* prolixior) fit, sed infrequentior. Vngulae quoque tam continuae

quam bisulcae in senecta aetate fiunt maiores: item auium rostra. Crescunt ungulae sicut et ungues.

[Vulgo C. XII.]

- 11 Quod autem ad animalia alata spectat, auis secundum aetates nulla mutat pennas praeter gruem: nam haec in senecta nigrescentes, antea cinereas pennas habet. Euenit autem pro temporum ratione, quemadmodum contentiore frigore, vt si qua sit vnicolor puta aut nigra aut fusca [*aut albida,*] albescat aliquando, vt coruus, passer, hirundo: at quae albae sunt, eae non sunt animaduersae nigrescere. Quin etiam anni statis partibus mutantur multarum auium colores adeo, vt, nisi sis per-
- 12 ritus, decipiaris. Pilorum colores in animantibus cum aquarum quoque mutatione mutantur ipsi: alibi candidi, alibi nigri fiunt. Id praecipue fit tempore coitus: sunt enim eiusmodi aquae multis in locis, quae si initus tempore potentur a pecore, ac mox coëant, nigros agnos efficiant; vt in Chalcidica terra Thraciae fluuius Psychrus vocatus faciebat: et in agro Astyrite et in Antandria quoque terra duo flumina sunt, quorum alterius potu oves nigrae, alterius candidae gignantur. Videntur autem e Scamandro rufae prouenire: quam ob causam putant ab Homero eum fluuium pro Scamandro
- 13 Xanthum, id est rufum, appellatum. Ceterae



animantes intus nullos habent pilos: nec in artuum aduersa vel prona parte, quanquam in dorso eorum habeant, praeter leporem (*dasypodem*,) qui solus pilos habet et in bucca intus et sub pedibus. Mus inter cete [*vulgo mysticetus, Plinio musculus marinus*] quoque dentium loco pilos habet suillis setis similes. Pili igitur praesepti non ab summo sed ab radice crescunt: pennae autem neque ab imo, neque a summo, sed excidunt. Quaecunque pennas (alas) continuas habent, ut apes et alia eiusmodi, iis penna (ala) si auellatur, non renascitur: neque si aculeum amittat apis, alius subnascitur, sed ex illo tempore perit ipsa.

#### CAP. X. (*vulgo XIII. Textus et Scaligeri XI.*)

Sunt etiam membranae in animalibus, quae sanguine concretae sunt. Est autem membrana similis cuti densae et tenui, sed tamen genus aliud est. Nam neque fissilis est neque tensilis. Amicta sunt omnia tum ossa tum viscera membranarum genere tam paruis quam maioribus animalibus: quanquam in minoribus obscuriores sunt propter vehementem et tenuitatem et exiguitatem. Maximae omnium membranarum duae sunt, quae cerebrum ambiunt: quarum altera, quae sub circuitu ossis est, robustior et crassior est, quam quae ob-

ducitur cerebro. Deinde quae operit cor. Praecisa membrana sola non coalescit. Nudata ossa membranis suis siderantur.

[Vulgo C. XIV.]

- 2 Est praeterea omentum membranae genus. Habent autem omentum omnia animalia, quae sanguine concreta sunt, alia pinguius, alia macrius. Eius initium a medio ventre in iis, quae animal pariunt, atque vtraque maxilla dentata sunt; cui parti appensum est, vbi eius sutura quoque quasi quaedam extat. Quae autem superioris maxillae primores non habent dentes, in iis a maiore ventre oritur eodem modo.

[Vulgo C. XV.]

- 3 Membranacea quoque vesica est, quanquam alio genere membranae: distendi enim potest. Quae animal pariunt, ea sola vesicam habent; cetera nullam, praeter vnā testudinem ex ouiparis. Praecisa vesica non coalescit, nisi ad ipsa principia ceruicis, nisi raro omnino: nam sane aliquando euenit hoc. In defunctorum vesicas nihil humoris demittitur: in viuīs etiam siccae fiunt concretiones, ex quibus calculi morbos faciunt. Aliis eiusmodi materia constitit, quae nihil videretur a testacea differre. Venarum neruorumque ac cutis naturam, tum quid esset fibra atque membrana, praeterea



de pilis, vnguibus, vngulis vel continuis vel bisulcis, cornibus, dentibus, rostris, osse, cartilagine, et quicquid horum vice fungitur, superiore narratione explicuimus. Nunc vero de carne disseramus.

CAP. XI. (vulgo XVI. Textus et Scaligeri XII.)

Caro carniq̃ue proximam quaecunq̃ue naturam gerunt, in omnibus insunt animantibus, quae sanguine concreta sunt, eaque fusa inter cutem et ossa ossiumq̃ue vicarias partes. Nam qua ratione refertur spina ad ossa, ita inter ea, quae os et spinam habent, eande ratione pulpa illa carniformis ad carnem refertur. Est autem caro apta ad secandum quoquouersus, non in longum tantum, quemadmodum nerui et venae. Animalia cum macescunt, abit caro, et venulae extant ac fibrae: largius autem cum aluntur, in carnis locum gignitur pinguedo. Carnosioribus minores sunt 2 venae, sanguis rubentior, viscera et venter paruius. At quibus venae maiores, sanguis nigrior, viscera magna, venter magnus, carnis minus. Pinguiore carne sunt qui ventrem paruum habent.

CAP. XII. (vulgo XVII. Textus et Scaligeri

CAP. XIII.)

Adeps autem et seuum inter se differunt. Seuum quauis parte fragile est et siccatum densatur: at a-

deps liquidus, neque aptus cogi. Itaque iuscula de adipalibus seu pinguibus non concrescunt, vt ex equo et sue: de iis, quae seuum habent, concre-  
scunt, vt ouis et caprae. Locis quoque differunt. Adeps namque intra cutem et carnem gignitur: se-  
uum non ibi, sed ad extrema carniū. (*extra car-*  
*nes.*) At omentum adipe praeditis, adipaceum est;  
seuo pinguibus, seuaceum. Quae vtraque ma-  
xilla aequē dentata sunt, adipem habent: quae den-  
2 tibus primoribus superioribus carent, seuum. Qui-  
busdam in animalibus ex visceribus iecur pingue-  
scit adipe, vt inter pisces cartilagineis: namque ex  
iis colliquatis faciunt oleum: ipsa vero cartilaginea  
omnium minimum adipem vel in carne vel separa-  
tum per ventrem habent. Quaecunque pinguedi-  
nem separatam non habent, minus pingua sunt ad  
ventrem et omentum, vt anguillae: exiguum enim  
seuum habent circa omentum. Maxima tamen pars  
pinguescunt secundum ventrem, praesertim otiosa.  
3 Adipalium cerebella pingua, vt suis: eorum, quae  
seuum habent, sicca. Quod ad viscera attinet,  
quae loca circum renes sunt in animalibus, eua-  
dunt pinguiissima: sed dexter minus pinguis est.  
Ac quanquam praepingues fuerint, tamen aliquid  
in medio est semper vacui. Animalia quae seuo  
pinguescunt, morbosa fiunt, quoties renes vnde-



quaque pinguedine obruuntur; maxime omnium ouis, adeo, vt etiam intereat. In caussa est pabuli vbertas, qualis in Leontino agro Siciliae. Itaque non nisi vbi appetit serum diei, educunt pecudes in pascua, quo minus capiant cibi.

[Vulgo C. XVIII.]

Commune est animalibus cunctis loca circa pupillam habere seuacea, quaecunque scilicet partem hanc vel similem in oculis habent, nec oculos duros. Omnium animalium tam mares quam feminae prouti pinguiore ita minus foecundae sunt. Aetate prouectiores plus pinguescunt, quam iuniores, praesertim cum in latum longumque iusta creuerunt magnitudine, atque inde in profundum excrescunt.

CAP. XIII. (vulgo XIX. Textus et Scaligeri  
CAP. XIV.)

Sanguis omnibus animantibus, quae sanguine sunt concretae, maxime est cum necessarius tum communis. Neque enim aduentitius est, sed per principia ab natura subministrata inest omnibus, modo ne sint corrupta. Omnis autem sanguis inest in vasis, quas venas appellamus; praeterea nusquam, nisi in corde tantum. Non sentit sanguis tactus vlllo in animali: quemadmodum neque excrementa alui: quin neque cerebrum, neque

medulla. Quacunque viam sed incorruptam carnem secueris, exit sanguis. Suapte natura sanguis succo dulcis est, modo sit sanus: et colore ruber, nisi qui aut natura aut morbo deterior est: is enim nigrior est. Neque valde crassus, neque valde tenuis optimus est, si non sit vel morbo vel natura  
2 vitiatus. Ac tantisper calidus et liquidus, dum in corpore viuo est: foris autem concrescit omnium, praeterquam cerui et damae, (procos,) et si quid eiusdem naturae est: ceterorum omnium spissatur, nisi eximantur fibrae. Taurorum sanguis celerrime coit. In genere sanguine concretorum quae intra se conceptum animal edunt, plus habent sanguinis, quam ea, quae eodem in genere oua pariunt. Quae natura aut instituto vitae bene valent, neque multum valde habent, quod statim a potu (*hostiis*) euenit; neque paucum, quod contingit valde pinguibus. Pingua vt purum, ita parum habent: et quo magis pinguescunt, eo minus habent sanguinis. Exangue enim pingue est. Pingue nihil putrescit: at sanguis et sanguinea ipsa celerrime putrescunt, horum quidem praecipue ea, quae  
3 circum ossa sunt. Hominis sanguis tenuissimus atque purissimus eorum, quae animal pariunt: tauri et asini crassissimus et nigerrimus. Et in partibus inferioribus quam in superioribus crassior fit et



nigrior. Palpitat omnium similiter animalium sanguis in venis. Solus humorum perpetuo et toto in corpore animantium inest, quamdiu vitam agunt. In corde animalium primum sanguis gignitur, atque adeo priusquam corpus ipsum dearticuletur. Si plusculum exeat sanguinis, quae eo priuantur, anima deficiuntur; si multum nimis, animam amittunt. Si nimis eliquescat, aegrotant: namque in cruorem serosum abit adeo, ut quidam cruentum sudarint sudorem. Ita cum effluxit aliquibus, aut omnino non concreuit, aut aliqua tantum pars ab aliis partibus separata. In somno corporis partes extimae minus obtinent sanguinis: itaque si pungatur dormiens, haud aequae fluit sanguis. Ex perfectis ichoribus fit sanguis; e sanguine adeps. Vitiato sanguine fit fluxio, quam Graeci vocant haemorrhoida, ut e naribus, et in mariscis, et ad varices. Putrefactus sanguis fit pus: ex hoc autem id quod Graeci porum, nos possumus dicere tofum aut callum. Feminarum sanguis a virili differt: crassior enim ac nigrior est, aequalibus et valetudinibus et aetatibus inter se comparatis. Et in summo corpore minus habent sanguinis feminae, intus plus. Inter femellas animantes mulier plurimum habet sanguinis, plurimaque ei menstrua fluunt. Is sanguis, si vitietur, vocatur profluuium.

- 5 Alioqui eo genere morborum minus tentantur mulieres: paucae enim varicibus aut mariscis laborant: paucis profluit e naribus: atque his incommodius menstrua soluuntur. Secundum aetates quoque tum multitudine tum specie differt sanguis. In infantibus dilutior est et largior: in senibus crassus, niger, paucus: aetate stata, mediocris. Item senilis sanguis cito concrecit, etiam in corporis superficie: iunioribus autem nequaquam. Cruor (ichor) sanguis incoctus est, aut quia nondum percoctus, aut quod in seri modum dilutus fuerit.

CAP. XIV. (vulgo XX. Textus et Scaligeri

CAP. XV.)

Nunc de medulla: nam ipsa quoque vna ex partibus liquidioribus inuenitur in quibusdam animalibus, quae sanguine constant. Quae liquida suapte natura sunt in corpore, omnia vasis continentur, sicut sanguis in venis, medulla in ossibus: alia in membranis et cutibus et sinubus. Creatur autem in iuueniculis medulla omnino sanguinea; senescentibus autem [alba, et quidem] adipalibus adiposa, seuaceis seuosa. Neque vero quouis osse medulla continetur, sed cauis tantum: ac ne his quidem omnibus: namque leonis ossa partim nihil omnino, partim parum omnino habent. Quae fuit



caussa, vt nonnulli dicerent, leones medulla carere penitus, quemadmodum supra dictum est. Tum in suillis ossibus minus est medullae: in quibusdam autem eius nihil est penitus. Atque haec quidem liquida sunt, quae congenita animalibus ferme semper in eis existunt.

C A P. XV. (vulgo adhuc XX. Textus et Scaligeri C A P. XVI.)

Ea autem quae post genitum animal oriuntur, lac et genitura. Quorum alterum quidem tum, cum existit, secretum per se inest omnibus, lac videlicet; alterum non in omnibus inest secretum, sed nonnullis tantum, veluti quos in piscibus Graeci vocant thoros. Quae lac habent, ea omnia ipsum in mammis continent. Mammās autem habent quaecunque et concipiunt animal et pariunt, qualia sunt pilis praedita omnia, vt homo et equus: praeterea cete, vt delphin, vitulus marinus, balæna: quibus omnibus et mammae sunt et lac. At <sup>2</sup> quae ouum aut edunt aut intra se excludunt, vt edant animal, neque mammae neque lac habent; vt piscis et auis. Omne lac habet succum aquosum, qui dicitur serum; et alterum corpulentum, qui vocatur caseus. Plus crassum lac plus habet casei. Quibus autem primores superiore maxilla dentes

non sunt, eorum lac coit: quare greges habentur domiti ad caseum faciendum. Quae vtramque maxillam integro numero dentatam habent, non coit: quemadmodum ne adeps quidem. Est autem et tenue et dulce. Tenuissimum est candidum; deinde equae; tum tertio loco asinae: crassius bubu-  
3 lum. Frigore non coit lac; quin in serum potius soluitur: contra ab igni concrescit et crassescit. Raro prouenit lac animalibus, nisi prius conceperint: ac praegnantibus ingeneratur; sed tam primum quam vltimum inutile. Et cibus quibusdam factum est, vt etiam non praegnantes aliquae lac exiguum habuerint. Quin etiam fuere mulieres seniores, quibus, cum sugerentur, prouenerit lac; et nonnullis quidem tanta vbertate, vt etiam infantem lactarent. Qui circa Oetam montem pascunt, capellarum, quae maris initum non admittunt, vberibus vrticas affricant, idque violenter, vt dolorem faciant: primum igitur lac cruentum emulgent; deinde sub-  
4 purulentum, postremo iam lac, nihilo minus quam ex iis, quae foetae sunt. Vniuersus sexus masculinus tam ceterarum animantium quam hominis magna ex parte lacte caret. Quanquam quibusdam hoc euenit, vt haberent: quemadmodum contigit in Lemno insula, vt hircus, quae bina illi habent vbera prope genitale, tantum lactis daret ad



mulctram, vt ex eo caseoli fierent. Tum eius initu  
 hoedum generatum idem euentus est consecutus.  
 Sed haec pro prodigiis interpretantur: quippe ora-  
 culum illi consulenti Lemnio responsum est, fore,  
 vt pecus ampliore foetura suppleatur. Viris qui-  
 busdam post pubertatem exprimitur aliquantulum:  
 quin nonnullis, cum contentius sugerentur, etiam  
 multum prodiit. Inest in lacte pinguedo, quae in 5  
 concreto oleosa fit. In Sicilia ac sicubi capellarum  
 maiores sunt greges, ouillo caprinum miscent.  
 Coit facillime, non solum quod casei habet pluri-  
 mum, sed etiam quod siccissimum habet. Quae-  
 dam igitur plus habent lactis, quam quantum ex-  
 igitur ad alendam sobolem. Vtilissimum ad con-  
 ficiendum caseum, qui seruetur, ouillum lac; de-  
 inde caprinum; tum bubulum. Equinum autem  
 et asininum admiscetur Phrygio caseo. Est plus  
 casei in bubulo quam in caprino. Pastores nam-  
 que ita aiunt, ex quadrantali caprini fieri caseolos  
 obolares vno minus viginti: ex bubulo tricenos.  
 Quae vero non plus quam alendae proli habent, in-  
 vtile eorum lac est ad caseationem: cuiusmodi ea  
 sunt, quibus plures duabus sunt mammae. Nam  
 ab his neque copiam habent, neque casei vsum.

[Vulgo C. XXI.]

Cogitur lac succo ficulneo et coagulo. Succo 6

lana imbuta modico lacte abluitur, quod mistum lacti ipsum cogit. Coagulum autem lac est reper-  
tum in lactentium ventre, in se caseum (*vulgo*  
*ignem*) habens: fit autem ex calore animalis con-  
cocto lacte. Ruminantia omnia coagulum habent:  
at ex iis, quae vtraque maxilla omnes dentes ha-  
bent, lepus. (*dasypus*.) Quanto vetustius coagulum  
est, tanto praestantius: confert enim tum maxime  
alui profluuiis; quod etiam leporinum facit: sed  
7 praestantissimum est hinnuli coagulum. Mulgetur  
lac plus minusue et secundum proceritatis propor-  
tionem, et pro differentia pabulorum. Etenim in  
Phaside terra pusillae buculae sunt, e quarum sin-  
gulis multum lactis habetur. Ab Epiroticis autem  
vaccis illis praegrandibus e singulis quadrantal la-  
ctis ac semis ex vtraque mamma. Mulget pastor  
rectus aut paululum inclinatus, propterea quod, si  
sedeat, attingere manu non quit. Namque ea in  
terra cum aliae quadrupedes praeter asinum magnae,  
tum maximi et boues et canes: pabuli vero egent  
vberioris, tanta cum sint: atque ea regio sane et  
multum sufficit, et quouis anni tempore commoda  
ad id loca habet. Cum igitur vasti boues sunt,  
tum oues Pyrrhicae; quod cognomentum ab rege  
8 Pyrrho traxere. Lac certo pabulo deficit, vt herba  
Medica, praesertim ruminantium. Alio augetur,



vt cytiso et eruuo: verum cytisus, dum floret, inutilis est; inflammat enim: at eruuum foetis adeo incommodat, vt partus reddat difficiliores. Omnino quadrupedes voraciores vt ad foeturam meliores, ita largiore pabulo largius mulgentur. Plurimum lactis creant quaedam flatuosa, si praebeantur in cibum; veluti faba affatim [*vulgo* paucula] praebita oui, caprae, boui, capellae, distendit vber. Futura lactis copia deprehenditur demissione vberis ante pariendi tempus. Pergunt habere lac diu omnia, quae habent lac, si neque coeant, et bene tractentur: ac praeter ceteras quadrupedes oues: octo namque mensibus ad mulctram eunt. Omnino autem quae ruminant, et multum lactis habent, et ad caseorum confectionem vtile. Ad Toronam vaccis paucis diebus ante partum deficit lac, ceterum perpetuo habent. Liuidius lac muliebri praestantius candido alendis infantibus. Et fuscarum mulierum salubrius est quam candidarum. Maxime quidem nutrit, quod plurimum casei, sed salubrius infantibus est id, quod minus habet.

CAP. XVI. (vulgo XXII. Textus et Scaligeri  
CAP. XVII.)

Semen genitale emittunt, quaecunque sanguine concreta sunt. Verum quid quoque modo conferat

ad generationem, alio dicetur loco. Plurimum pro corporis modo emittit homo. Quae animalia pilos habent, iis semen viscidum est, aliis non item. Candidum omnibus est; at Herodotus falso scripsit, Aethiopum genituram atram esse. Omnis genitura, si sana sit, exit candida et crassa: ubi vero exierit, attenuatur et nigrescit. Neque frigore concrevit, sed tum color tum crassities penitus in aquae diluitur tenuitatem. At a calore cogitur et crassescit. Sic etiam cum aliquanto post tempore e matrice elapsum est, exit crassius: interdum etiam siccum atque contortum. Foecundum semen in aqua subsidit, infoecundum dissolvitur. Falsum et id est, quod scripsit Ctesias de elephanti genitura.

---



---

A R I S T O T E L I S  
DE ANIMALIBVS HISTORIAE  
LIBER IV.

---

C A P. I.

Sanguine concretorum partes animalium quae vnicuique generi essent cum communes tum propriae, vel e similibus vel dissimilibus inter se particulis constantes, et interiores et exteriores, superioribus libris enarratae sunt. De iis igitur animalibus, quae non sunt sanguine constituta, deinceps dicendum est. Eorum genera plura sunt: vnum, quod appellant mollusca. Eiusmodi sunt, quae cum careant sanguine, extrinsecus habent carni-forme corpus, intus autem firmum, quemadmodum ea quoque, quae sunt sanguine composita: quale est sepiarum genus. Alterum est crustato- 2  
rum: haec firmas partes suas extimas habent, intus autem carneam mollitiem. Partes quoque illae

- firmae non potius frangi quam elidi dici debent: eiusmodi sunt locustae (*marinae*) et cancri. Tertium testaceorum est: his intus est carnacea pars, foris firma. Quae et flexu frangi et ictu rumpi, at elidi non possunt: quale genus concharum et
- 3 ostrearum est. Quartum genus insectorum est, quo multae species et dissimiles [*vulgo* sine nomine] continentur. Insecta sunt, quae, ut nomen indicat, secturas habent aut partibus superioribus aut inferioribus aut vtrisque: quaeque nec carnea neque ossea seorsim disposita parte quapiam constituta sunt, sed media quadam natura constant. Eorum namque corpus intus forisque aequè durum est. Eorum quaedam sine alis sunt, ut iulus et centipeda; (scolopendra;) quaedam alata, ut apis et scarabaeus, (melolontha,) et vespa. (sphex.) Idem quoque genus et alatum est et alis caret, ut formica et cicindela: namque ex his quaedam volant, quaedam alas nullas habent. [Cap. II. Scaligero.]
- 4 Molluscorum partes exteriores hae sunt: una quidem, quam vocant pedes: altera, quae his haeret, caput: tertiam appellant alueum, quo interiora continentur. Hoc minus recte nonnulli (*e Graecis*) caput appellarunt. Hunc alueum pinnulae circumpositae sunt. Conuenit omnibus molluscis, inter
- 5 pedes et ventrem ut caput situm sit. Pedes octonos



omnes habent, gemino acetabulorum in singulis ordine, excepto vno genere polyporum. Priuatim habent sepiae et loligines et lolii duas proboscides longas, quarum extrema gemino acetabulorum ordine aspera sunt; quibus admotis ad os cibum capiunt; iactisque ad saxum quasi anchoris, coorta tempestate in salo fluitant. Pinnulis, quas circum alueum dicebamus, nant. In pedibus insunt acetabula omnibus. Polypus brachia sua ad officium 6 cum manuum tum pedum accommodat: namque duobus, quae supra os habet, admouet ori cibum. Postremo autem omnium, (est hoc inter cetera acutissimum et solum aliqua parte candidum in dorso: vocatur autem dorsum pars brachii laevis, a qua prorsum acetabula collocata sunt: et in extremo bifidum,) hoc igitur ad coitum vitur. Ante alueum supra brachia fistula caua est, qua mare alveo receptum reddunt, cum quippiam ore assumerint. Mouent autem eam cum in dextram tum in sinistram: ea etiam semen (thorum) emittunt. Nat 7 obliquus, tendens pedes versus id, quod caput appellatur; itaque fit, vt, quia oculos in vertice habet, quae ante sunt, prospiciat, os autem pone sit. Caput, quamdiu viuit, durum et quasi inflatum habet. Prehendit autem et retinet brachiis resupinatis, (incuruatis *Scaliger*) atque ibi membrana,

- quae inter pedes est, tenditur vniuersa. Quod si in arenam inciderit, impotens fit ad retinendum.
- 8 Differunt polypi et alia quae diximus genera molluscorum. Polypis alueus paruus, pedes longi sunt: ceteris alueus grandis, pedes breues; quo fit, vt iis vti nequeant ad ingrediendum. Haec autem inter se quibus discrepant. Nam loligo e longioribus, sepia e latioribus est. At loliginibus lolii qui dicuntur longe maiores sunt: grandescunt enim vsque ad quina cubita. Euadunt etiam sepiae aliquae bicubitales: et polyporum brachia ad
- 9 eandem vastitatem, atque etiam maiora. Loliorum genus infrequentius est. Differunt etiam figura lolii a loliginibus: namque loliorum mucro latior est: totus quoque alueus continuata pinnula ambitur; loligini minus integra. Altum mare colit, vt loligo. Post pedes caput omnibus in eorum medio est, atque ipsi pedes etiam brachia vocantur. In capite os est; in ore dentes duo; supra hos oculi grandes totidem. Inter eos exigua cartilago pusil-
- 10 lum continens cerebrum. In ore paruum quiddam est carnosum, quo pro lingua vtitur, qua totum genus hoc caret. Post caput aluei partes extimae videntur. Est eius caro fissilis non directo, sed orbiculariter; atque ea omnibus cute tegitur. Ab ore habent gulam longam et angustam: continentem



deinde ingluuiem amplam, rotundam et similem illi, quam aues habent. Cui venter continuatur omasi facie, similis figura buccinorum anfractibus. Hinc rursum fertur ad os intestinum tenue quidem sed gula laxius. Viscera non habent praeterquam mytin vocant, supra quam atramentum, quod in sepiis et plurimum et maximum est. Atque hoc emittunt omnia, cum perterrefiunt, praesertim sepia. Mytis est sub ore sita: per hanc transit gula: qua vero intestinum reflectitur, infra atramentum, atque meatum suum eadem membrana obductum habet cum intestino. Idem quoque meatus est, qui effundit atramentum et deiecit excrementa. Insunt etiam in corpore villorum specie quaedam. Sub dorso firma pars sepiae, loligini ac lolio continetur: illius sepium, (*os sepiae*,) horum gladium vocant. Ea tamen inter se differunt: sepium namque firmitus et latius, media concretionem inter spinam (*piscium*) et os continens quandam friabilem raritatem. At gladius loliginum tenuis ac magis vergens ad cartilaginis naturam. Figura autem, quemadmodum et aluei, inter se differunt. At polypi firma illa parte intus carent: sed circa caput (alueum) cartilagosum quiddam habent, quod durescit demum, cum quis eorum consenuerit. Differunt etiam inter se sexus ipsi.<sup>13</sup>

Mares meatum habent sub gula a cerebro ductum ad inferna alvei: ibi qua parte desinit, res est papillae similis. Femellis vero bina sunt haec, et parte superiore sita. Vtrisque autem pusilla corpuscula quaedam rubra subiuncta adsunt. Polypi ouum (*ouarium*) vnum, inaequali superficie, grande, intus humorem continet vnicolorem totum ac laeue, tanta copia, vt complere possit vas ipso  
 14 polypi capite (alueo) maius. Sepia duos habet alveos atque in his oua numerosa, grandini similia candidae. Verum haec sigillatim quo se habeant pacto locoue, videre licet ex dissectarum partium picturis. Mares omnes in hoc toto genere a femellis differunt; praeter cetera sepiae. Nam dorsum alvei nigrius habet quam imam planitiem; et asperiora omnia habet et virgata; et extremum corporis  
 15 mucronatius. Verum polyporum plura sunt genera. Vnum genus est frequentissimum, (vulgare,) quod et maximum est: ex hoc qui littora accolunt, longe sunt maiores, quam qui in alto degunt. Aliud genus paruorum; ii vario sunt colore, nec esitantur. Item alia duo: nam eledona cum peculiari crurum longitudine differt, tum molluscorum sola singularem acetabulorum ordinem habet, cum binos alia habeant omnia: alterum alii vocant bolutaenam, alii ozolin. (*latine dicas sterculeam et*



*olentiam seu putiliam.*) Postremo alii duo in 16  
 conchis: vnus a quibusdam nautilus [et nauticus],  
 ab aliis ouum polypi vocatus. Testa istius refert  
 pectunculum concauum non connexum in latere.  
 Is prope terram pascitur saepenumero: quare a  
 fluctibus eiicitur in terram, vbi delapsa testa, qua  
 ambiebatur, capitur et in terra perit. Hoc genus  
 et pusillum est et simile bolitaenis. Alter in testa  
 tanquam cochlia: is ex ea nunquam exit, sed in-  
 haeret cochlearum modo; interdum tamen brachia  
 exeat.

### C A P. II. [Scaligero III.]

Haec de molluscis dicenda erant: nunc de iis,  
 quae teneriore testa muniuntur. Horum vnum ge-  
 nus locustarum: alterum eorum simile, qui di-  
 cuntur astaci, (*gammari*), qui differunt a locustis,  
 quod non habent forcipes atque alias differentias  
 pauculas. Tertium squillarum: quartum can-  
 crorum: sed tam horum quam squillarum genera  
 plura sunt. Nam squillae quaedam sunt, quas  
 gibbas vocant: aliae dicuntur crangones. Tertia  
 species minutiorum est, quae nunquam grande-  
 scant. Cancrorum genus maiorem in modum va- 2  
 riatur, neque adeo facile recenseri potest. Maxi-  
 mum eorum genus, quas maias vocant. Proximum  
 magnitudine paguros et Heracleoticos cancos com-

plectitur. Post hos fluuiatiles. Alii minores, ne-  
 que villo nomine insignes. Ad Phoenicem littorales  
 sunt cancri, tanta celeritate, vt aegre eos, cum in  
 cursu sunt, captatores consequantur. Idcirco vo-  
 cant equites. (*alii Codd. equos.*) Verum aperti re-  
 periuntur intus inanes esse, (*intus nihil esculenti*  
*habent,*) inopia pabuli. Sunt etiam qui magni-  
 tudine cancris aequales sunt, facie autem astacis si-  
 3 miles. Omnibus his igitur, quemadmodum dixi-  
 mus, pulpamentum interius vice cutis firmitudine  
 testacea munitur. At supinae (*inferiores*) partes  
 plagulis frequentiores habent, in quas edunt oua  
 feminae. Pedes locustae quinos vtrinque habent  
 vltimis connumeratis, qui sunt forcipati. Cancris  
 quoque eodem modo vniuersi sunt decem, si for-  
 cipes annumeres. In genere squillarum gibbae  
 vtrinque quinos habent; qui ad caput vergunt,  
 acutos; et ad ventrem vtrinque totidem, mucrone  
 latiore: dorso similes sunt locustis, auersa vero  
 4 parte subtus plagulas nullas habent. At crangones  
 e contrario; primores enim quaternos vtrinque [*la-*  
*tos,*] deinde consequentes alios ternos vtrinque sub-  
 tiles: cetero corpori pedes nulli insunt. Flectun-  
 tur omnium pedes in latus, quemadmodum etiam  
 insectorum. Forcipes quae habent, ea introrsum  
 flectunt. Habet locusta etiam caudam et pinnulas



quinque. [*vtrinq̃ue.*] Etiam squilla gibba tum caudam tum pinnulas quaternas: etiam crangonis cauda pinnis neutro latere vacat. Earum medium spinæ naturam prae se fert vtroque in genere, sed crangoni latum est, gibbae acutum. Solus cancer huiusmodi animalium cauda caret: et cum locustarum squillarumque corpus oblongum sit, cancerorum est rotundum. Differt mas locusta a femina; quoniam feminae primus pes bipartitus est, illi continuatus vno vngue. Femina quoque pinnulas, quae subtus sunt ad collum (*caudam*), magnas habet, et mutua implicatione coeunt: mas autem minores, nec inuicem coeunt. Maris quoque pedibus postremis quasi calcaria quaedam sunt, eaque cum magna tum acuta: feminae eiusmodi pars parua et laevis. (*inoffensa.*) Aequè autem vtrisque cornua bina ante oculos eminent magna et aspera, et alia cornicula pusilla sub illis laeua. Horum omnium 6 oculi sua duritie praediti sunt, quos mouent introrsum et extrorsum ad latus: quales etiam cancerorum plurimis sunt, quin etiam mobiliiores. Astacus colorem habet subalbidum, sed nigritia inspersum. Pedes inferiores ad grandes vsque octo habet: ab his grandes ipsos duos, multo maiores et mucrone latiore quam locusta, sed inaequales. Dextri namque summum latum, oblongum, tenue

est; sinistri crassum et teres: vtriusque vero bipartitum, ac quasi mandibula, cum dentibus infra supraque. Quanquam dextro dentes minores et serrati sunt omnes; sinistro primores serrati, at medii tanquam molares: inferiorum ordo quaternis continuis, superiorum ternis non continuis expletur. 7 Mouent partem superiorem vtrique, et ad inferiorem premunt: ac valgii quidem sunt situ, tanquam a natura destinati adprehendendum et premendum. Supra hosce magnos duo alii hispidi paulo infra os; mox paulo infra partes branchias referentes circum os multae et hispidae, quas assidue motat. Flectit atque adducit, (*cum cibum capit*,) duos illos hispidos pedes ad os: hi pedes, qui ori praesto sunt, extantibus quibusdam tenuibus 8 barbulis asperantur. Dentes duos habet, ut locusta: supra hosce cornicula longa, sed breuiora ac tenuiora quam locusta: tum alia quatuor eadem specie, sed breuiora et tenuiora: super his oculos pusillos breues, non autem, ut locusta, grandes. Prominet pars, cui subsunt oculi, acuta et aspera quasi frons, maior quam locustis. Omnino facies acutior, pectus autem latius, totumque corpus carnosius ac mollius quam locustae. 9 Octo pedum quatuor in extremo bifidi, quatuor non. Quod collum appellatur, quinque in partes diuisum est



extrinsecus: tum est sexta pars lata, quinque constans plagulis. Intus autem feminae quatuor hirta quaedam habent, in quae oua pariunt. A partium dictarum singulis prodit extrorsum spina brevis et recta: vniuersum vero corpus atque etiam pectoris partes laeues habet; non locustae modo asperum; nisi quod maiorum pedum exteriora spinis obsita maioribus. Mas feminaque nulla nota insigni differunt inter se: nam vtriusuis vtramlibet forcipem maiorem deprehendes, certe vtramque aequalem neutri. Mare omnia haec recipiunt iuxta 10 os: sed exceptum cancri et locustae emittunt paulatim iuxta barbulas branchias aemulantes, quas numerosas locustae habent, dum illam partem (*orificium*) obturant. Ceterum commune his omnibus est habere dentes duos: nam et locustae duos illos primores habent: et in ore carnosum quod pro lingua: deinde ventrem ori protinus continuatum: locustae tamen gulam minorem ante ventrem habent: a ventre intestinum, quod recto tractu terminatur ad caudam, vbi excrementa reddunt, et oua edunt, tam in genere locustarum quam in squillis. Cancris autem ad medium cooperculi, (*caudae ventri applicatae*,) exitque eam in partem, qua item oua pariunt. Praeterea feminae 11 ipsorum iuxta intestinum locum habent ouorum;

et id quoque, quod cum mytini tum meconae (*papaver*) appellant, plus minus habent omnia. Iam singulorum generum differentiae contemplandae sunt. Locustae igitur, quemadmodum dicebamus, duos habent dentes magnos cauos: in quibus humor est mytidi similis. Inter dentes autem caruncula linguae specie. Ab ore autem brevis gula membranaceo ventri continuatur; cuius ventris ostio dentes tres insunt: duo committuntur inter  
 12 se, tertius infra eos est. Ad ventris latus intestinum simplex est, et toto tractu aequali crassitudine usque ad exitum excrementorum. Has igitur partes communes habent omnia genera, locustae, squillae et cancri: [*nam et cancri dentes duos habent.*] Praeterea locustis meatus pectore dependet usque ad exitum excrementi: is pro vulva feminis est, genitale vero semen continet in maribus. Iacet autem in concauo carnis, ita ut interiaceat caro. Nam intestinum ad partem curuam situm est, meatus ille ad cauam, non alio modo quam in quadrupedibus, continetur. Neque vero id alia specie est in masculo atque in femella, sed utrisque et tenues et candidi, ac pallidum continent humo-  
 13 rem: et utrisque eadem origo a pectore. Eodem modo et ouum et anfractus squillae habent. Distinguitur a femina mas duabus particulis candidis,



quas ipse peculiare habet in carne pectoris, sed ab ipsa discretas, cum colore tum concretione similes sepiarum promuscidibus. Vorticossae hae sunt, quemadmodum buccini anfractus, quem Graeci mecona, id est papauer, vocant. Oriuntur eae ab acetabulis, quae sub extremis sunt pedibus. Est [etiam] in hoc (*pectore*) caro rubra, sanguinis colore, tactu viscida, neque similis carni. Ab eo meatu, qui in pectore buccini refert speciem, alia est sinuatio funiculi crassitudine, sub qua (quibus *est in graeco*) duo quaedam sunt appensa intestino arenacea, genitali semini destinata. Atque haec mas habet: at femina oua ibi, colore rubra, quae annexa ventri, atque vtrinque ad latus intestini ad carnosas vsque partes, membrana tenui continentur. Hae sunt partes, quot cum intus tum extra habent.

### C A P. III. (Scaligero adhuc III.)

Euenit autem, vt eorum partibus interioribus, quae sunt sanguine constituta, omnibus nomina indita sint: at in sanguine carentibus nulli: neque enim viscera omnia habent; sed communia tam his quam illis omnibus venter, gula, intestinum. Quod quoque modo cancri haberent et forcipes et pedes, iam dictum est. Vnum maxima eorum pars

- dextrum forcipem et grandiore et robustiore habet. Diximus etiam de oculis, oblique eorum plurimos intueri. Corporis alueus vnus et indiscretus est, itemque caput, aliaque si qua pars est.
- 2 In parte suprema statim sub cuppa habent oculos: quidam ad latera longe dissitos; quidam in medio, modico interuallo, vt Heracleotici et maiæ. Sub oculis os; et in eo dentes duo, vt locustæ, ceterum non rotundi, sed longi. His adstant valuulæ instar operculorum duæ, inter quas est quiddam,
- 3 quale locustæ ad dentes habent. Aquam igitur recipit iuxta os, repellens opercula: reddit autem meatibus supra os sitis, occludens valuulis eam partem, qua ingressa fuerat. Sunt autem meatus hi statim sub oculis. [Atque vbi recepit humorem, occludit os valuulis ambabus, et deinde sic mare expuit.] Continuatur gula dentibus adeo brevis, vt illico videatur subesse venter ori; tum venter cum ea bipartitus, a cuius medio intestinum simplex, angustum, quod terminatur sub operculo (*cauda reflexa*) extimo, quemadmodum supra dictum est.
- 4 [Habet autem inter opercula talia quaedam, qualia locusta ad dentes.] Intra cuppam pallidus humor est, atque in eo extant quaedam candida oblonga, et alia rufa maculosa. Differt mas a femina, quod et grandior et latior



est, et operculum (*caudam reflexam*) maius habet femina, et tumidius et barbulis magis differentum, sicut et in feminis locustis. Atque hic modus est partium eorum, quae crusta integuntur.

#### C A P. IV.

At quae testaceo tegmine muniuntur animalia, ut limaces, (cochleae,) vmbilici, (cochli,) et quaecunque ostracea (ostrea) dicuntur, ad haec echinorum genus, quaecunque carne praedita sunt, eam intus habent, quemadmodum et crustacea: testam enim foris, intus autem duri nihil. Ipsa vero multis modis inter se diuersa sunt, vel testarum ratione vel interioris pulpae differentia. Quaedam namque nihil habent carnis, ut echini: quaedam tametsi habent, tamen operta tota est, neque praeter caput conspicuum quicquam est, ut terrestribus limacibus, (cochleis) et quae a quibusdam coccalia appellantur, et ex maritimis purpurae, buccini, (ceryces,) vmbilici, (cochli,) atque alia turbinata. Alia quaedam biualuia sunt, quaedam 2 vniualuia. Biualuia intelligo, quae duabus testis circumdantur: vniualuia, quae vnica: haec carnem habent in superficie, ut patella. Biualuium quaedam sunt apertili natura, ut pectines et muscoli: haec enim omnia altero latere connexa sunt, ab

altero dissoluta. Quare et claudunt et aperiunt se. Quaedam tametsi binis testis praedita sint, tamen vtrinque conclusa sunt, vt solenes. Sunt quorum caro tota ambitur testa, neque quicquam nudi extra  
 3 est, vt quae vocantur tethya. Ipsae quoque inter se differunt testae: quaedam enim laeues sunt, sic vt solen, musculi et conchae quaedam, quae galaces ab aliquibus appellantur: aliae scabrae, quemadmodum ostreae, (*limnostrea i. e. ostreae lacustres*), pinnae, buccini, et conchae nonnullae. Atque horum quaedam virgata (*striata*) sunt, vt petunculi et concharum genus. Differunt etiam tenuitate et crassitudine testarum, cum tota in testa, tum eius partibus, quemadmodum ad oras: (*labra*;) quibusdam enim subtiles sunt, vt muscu-  
 4 lis, nonnullis crassae, vt ostreis lacustribus. Praeterea sunt ex iis, quae mouentur, vt pectines. Hos namque etiam volare argumento probant, quod e piscatorum instrumento capti exiliant saepenumero. Quedam non mouentur, sed sedi suae affixae haerent, vt pinnae. Turbinata omnia mouentur et repunt: absoluitur etiam patella in pastum. Omnibus communis est interior laeuitas  
 5 testae. Carnosa pars vel singulis vel binis valuis intectorum testis ipsis adhaeret ita, vt non nisi vi abstrahi queat: turbinatis autem potius absoluitur.



Quibus illud peculiare, testam imam a capite in verticem (volutam) intorqueri. Praeterea cum suo quaeque operculo omnia nascuntur. Omnia turbinata e genere testaceorum dextra sunt, et moventur non secundum vorticem, sed in contrarium. Sic igitur horum animalium partes exteriores inter 6 se differunt. Interiores autem quodammodo similem naturam nactae sunt omnes, praesertim turbineorum: magnitudine enim distant et aliis affectionibus, quae excessu comparantur. Haud multum inter se diuersa sunt etiam uniuersalia et bivaluia clausilia: quippe quae parum inter se differant; magis autem discrepant ab immobilibus; id quod post haec planius fiet. Igitur natura [*turbinate*] omnibus eadem erat, nisi alterum ab altero aliquo modo excederetur: quaedam enim, quae maiora sunt, suas quoque partes conspectiores habent, minora autem minus. Similiter duritiae, mollitiae, et quae sunt aliae eiusmodi affectiones, discrepant. Nam quae caro summa e testae ostio 7 maxime exerta est, eam omnia firmam habent, quaedam magis, alia minus. Ex eius medio caput est et cornicula bina; in maioribus proceriora, in minoribus minima. Exerendi capitis eadem omnium ratio, et perterrefacis contrahendi. Habent quaedam os et dentes, ut limax acutos, mi-

8 nutos, tenues. Quaedam etiam muscarum more  
 habent proboscidem linguae specie. Haec dura  
 (compacta) est buccinis et purpuris, veluti tabanis  
 (myopibus) et asilis (oestris), qui tergora quadrupe-  
 dum pertundunt, imo etiam robustior, ita, vt esca-  
 rum (*conchyliorum*) testas perforant. Subest ori  
 statim venter similis auium ingluuiei, in vmbilicis:  
 (cochlis:) infra duo candida quaedam, firma, specie  
 mammillarum; qualia in sepiis etiam inueniuntur,  
 9 sed haec solidiora. A ventre gula simplex longa  
 ad papauer vsque, quod in fundo est. Quae om-  
 nia perspicui possunt in vortice (voluta) testarum  
 tam purpurarum quam buccinorum. Quod gulae  
 iungitur, intestinum est, aqua continuo tractu fertur  
 totum simplex vsque ad exitum, incipiens a vor-  
 tice papaueris, atque inde laxius: (est autem papa-  
 ver fere quasi excrementum [*ventriculi*] in omni-  
 bus crustaceis:) inde intestinum reciprocans rursum  
 ascendit ad carnosas partes, atque iuxta caput ter-  
 minatur, qua emittitur excrementum, omnibus  
 10 turbinatis tam terrenis quam maritimis. In ma-  
 ioribus vmbilicis a ventre cum gula contextus est  
 media membrana meatus longus et albus, colore  
 similis caruncularum, quas supra dicebamus mam-  
 millarum speciem gerere. Habet autem incisuras,  
 quemadmodum locustarum (*marinarum*) ouum;



sed hoc candidum est, illud rubrum. Huic vero per nullum meatum exitus patet, sed in membrana tenui continetur, sinum angustum in se habens. Ab intestino infra continuo tractu porriguntur quaedam nigra et aspera, qualia etiam in testudinibus, sed minus nigra. Marini (*vulgo est alii*)<sup>11</sup> quoque vmbilici haec habent, et candida, sed minores minora. Biualuia autem et vniualuia partim his similia sunt, partim dissimilia. Caput namque et cornicula et os habent, et id quod pro lingua gerunt; sed quaedam in minutioribus ob earum paruitatem obscura sunt: quaedam autem etiam in exanimatis aut etiam quiescentibus manifesta sunt. Papauer quoque omnibus inest, sed neque eodem loco, neque eadem quantitate, neque eodem modo apparet: siquidem patellae imo in fundo: (in solo *Codices alii*) biualuia autem in parte proxima commissurae. (ginglymo.) Capillamenta (*branchias?*)<sup>12</sup> quoque habent omnia haec in orbem disposita, vt pectines. Quodque ouum appellatur, id ea, quibus a natura datum est vt habeant, eo tempore cum habent, in altera (*dextra*) parte orbis circumferentiae, quemadmodum et albae carunculae vmbilicis. Similis enim in his haec est pars. Ceterum hae partes omnes, quemadmodum dictum est, in maioribus manifestae sunt, in minoribus

aut nulla, aut vix extant: quamobrem planissime in magnis pectinibus percipiuntur. Hoc eorum genus est, qui alteram e valuis planam habent, 13 quasi operculum. Excrementorum exitus in aliis quidem ab latere est: nam ei via data est extus, qua progreditur: [*si quidem papauer excrementum quoddam est omnibus in membrana.*] At quod ouum dicitur, in horum nullo ei datus exitus est, sed e carne protuberat: neque in eadem parte cum intestino situm est, sed ouum ad dextram, illud ad sinistram. Ceteris igitur huiusmodi exitus excrementi est: at patellae, quam feram aliqui, alii auriculam maris nominant, ad fundum testae foramen est ad excernendum. Apparet in hac etiam venter post os, et partes ouorum specie: quorum omnium situm ex dissectionibus perspicere 14 potes. Is autem, quem cancellum vocant, communis et crustaceis et testaceis est. Nam si naturam spectes, similem locustarum generi inuenies; atque ipse nascitur nulli testae iunctus. Cum autem et subeat testam et vitam agitet in ea, hoc similis est testaceis; quae rationes sunt, vt ad vtrumque genus referri possit. Faciem autem, vt simpliciter dicam, aranei gerit, nisi quod cum capitis tum pectoris inferiorem partem maiorem habet. 15 Praetenduntur cornicula duo tenuia, rufa; sub-



sunt iis oculi totidem oblongi, surrecti, qui neque intro recedunt, neque inclinantur, perinde atque cancerorum. Sub his os, quod capillamenta quaedam copiosa circumstant. Haec sequitur situs pedum duorum furcatorum, quibus cibum admo-  
vet: tum aliorum vtrunque totidem: postrema ter-  
tii pusilli accessio est. Quae pars pectori subditur,  
tota mollis est; intra quam, si aperiatur, pallida  
materia. Ab ore meatus ad ventrem vsque vnus: 16  
at excrementi via nulla apparet. Pedes autem et  
pectus durum quidem, sed minus quam cancris.  
Cum ipsa testa neque connatus est, neque haeret  
ei, quemadmodum purpurae et buccini, sed facile  
exuit atque egreditur. Oblongiores sunt, qui in  
turbatis degunt, quam qui in neritis. Diuersum 17  
autem genus est eius, qui cum nerite degit: fur-  
catum enim pedem dextrum habet pusillum, sini-  
strum grandem; quo etiam frequentius vtitur ad  
gressum: cetera aliorum similis est. Simile huic  
deprehenditur etiam in conchis quiddam, quod  
cyllarum (*vulgo* scyllarum) appellant, qui more  
reliquorum (*conchis*) adhaeret. Nerites testam lae-  
vem habet, grandem, (*Codd. alii* nigram,) orbi-  
cularem, faciem autem buccino similiorem: pa-  
pauer tamen non vtile ad nigrum, sed rubrum  
habet: ad medium autem firmiter annexus est.

18 Tranquillis diebus soluta haec pascuntur: coortis  
 ventis recipiunt se ad saxa cancelli, atque ibi qui-  
 etem agitant. Neritae autem adhaerent more pa-  
 tellarum, et earum, quas haemorrhoides (apor-  
 rhaides *vulgati Codices*) Graeci vocant, et cetera  
 horum genera omnia. Haerent autem saxis recl-  
 nato operculo, quod quasi tegumentum esse vide-  
 tur. Quem enim vsum ambae valvae biualuibus,  
 hunc praestat altera tantum pars turbinatis. Intus  
 19 pulpa carnea, inque ea os. Modus hic idem hae-  
 morrhoidibus (aporrhaidibus *vulgo*) et purpuris et  
 ceteris talibus. Quae autem grandioremem habent  
 pedem sinistrum, neritis insunt, strombis (*turbi-  
 nibus*) non insunt. Quodam in genere cochlearum  
 (cochloorum *i. e. umbilicorum vulgo*) inuenias  
 quaedam animalia minoribus gammaris (astacis)  
 fluuiatilibus similia; sed differunt mollitudine par-  
 tium, quae subeunt testam. Eorum autem faciem  
 in picturis dissectionum discere potes.

C A P. V. (Scaliger continuat C A P. IV.)

Echini ne carneum quidem hoc habent, sed  
 hoc illis peculiare est, vt carne intus omni priuati  
 careant: nigra autem illa habent omnes. Echino-  
 rum genera plura sunt: vnum esculentum, in quo  
 quae oua appellantur grandia atque vsui vtilia sunt,



aeque in maioribus atque in minoribus. Nam etiam ab initio statim parui ea habent. Alia genera 2  
 duo, alterum spatangorum, alterum bryssorum: ii in alto degunt, atque infrequentiores sunt. Praeterea echinometrae omnium maximae. Ad haec aliud genus pusillum, spinis magnis ac duris, gigni solitum in profundo multis orgyiis mari, quo ad vrinae destillationes vtuntur nonnulli. Ad Toro- 3  
 nem echini sunt tum testis tum spinis atque etiam ouis albis: sed cum longiores ipsi, tum spinae breuiores, neque satis firmae, sed molliores. Nigrae autem particulae, quae ori applicatae sunt, plures: eaeque vt ad exitus meatum copulatae, ita inter se disiunctae sunt: namque his echinus quasi disseptus et dispartitus est. Motu maxime et agili et frequenti mouentur esculenti: cuius rei argumentum praebent, quod aliquid semper spinis sublatum gerunt. Habent oua omnes, sed quidam 4  
 minima et cibo inepta. Contigit autem a natura echinis, vt quod in ipsis caput dici solet itemque os ima in parte subtus habeant, excrementi autem exitum in suprema: idque euenit cum turbinatis omnibus tum patellis. Pascuntur enim ab humo: ergo os quidem ad pastionem inuersum fuit, excrementi exitus in summi calicis partibus coelum spectantibus. Habet autem echinus dentes quinque 5

cauos intus, atque inter eos corpus carniforme pro lingua. Huic continuatur gula; deinde venter in quinque diuisus partes excrementi plenus: conueniunt autem sinus eius omnes in vnum ad exitum excrementi, qua testa perforata est. Sub ventre in altera membrana oua quae appellantur continentur, 6 aequae singulis quina, quippe imparia. Supra haec nigrae partes illae ab radice dentium ortum habent, prae amaritudine cibo ineptae. Simile corpus aliquod, aut quod proportionem ei respondet, in omnibus animalibus adest; quippe in testudine et rubeta et rana et turbinatis et molluscis reperitur, quanquam colore diuersum. Praeterea haec esui accommodata non sunt: tametsi alia plus, alia minus. Echini corpus ab initio ad finem vsque perpetuum est; superficies autem dissita: similis namque laternae, cui praetenta nulla membrana sit. Spinis autem utitur quasi pedibus: his enim innixus et mouetur et mutat locum.

CAP. VI. (Scaliger continuat CAP. IV.)

Quae tethya vocantur, natura sunt quadam maxime diuersa: his enim solis est vniuersum corpus in calice, cuius natura est inter corium et testam media: quare secari potest tanquam tergus durum. Haeret autem saxis haec testae species,



duosque habet meatus, ab se inuicem distantes,  
 angustos, ac difficulter qui videri queant; quibus  
 excipit humorem ac reddit. Nihil enim excrementi  
 habet, quod visu percipi possit, quale inter cetera  
 ostracea (ostrea) vel echinus, vel quod papauer ap-  
 pellatur. Dissecanti ea tibi occurret primum mem- 2  
 brana nervosa crustaceo corpori obducta: hac enim  
 corpulentum tethyi continetur, idque ab ceteris  
 omnibus dissimile; suo tamen in genere tota sibi  
 similis haec caro est. Adhaeret hoc duobus locis  
 et membranae et corio ab latere; quaque adhaeret,  
 vtraque parte angustius est: quibus partibus tendit  
 ad meatus ipsos, qui protinus per ipsum calicem  
 extrorsum ducunt; atque hac emittit atque excipit  
 tum cibum tum humorem, perinde atque si hic os  
 sit, ille autem exitus excrementi. Atque horum  
 alter crassior est, alter tenuior. Intus autem vtra- 3  
 que in parte sinus dissepiti media continua re qua-  
 dam: in eorum altero humor inest. Ceterarum  
 partium vel organicarum vel ad sensuum officium  
 pertinentium, ac ne excrementa quidem cuiusquam  
 modi, qualia in aliis sunt, quicquam habent. Co-  
 lor autem tethyorum alius luteus, alius ruber.  
 [Cap. V. Scaligero.] Vrticarum etiam genus pecu- 4  
 liare est: saxis enim adhaerent, quemadmodum  
 quaedam testaceorum. Absoluuntur tamen inter-

dum. Carent autem testa, totoque corpore carnosae sunt. Sensum vero habent, atque admotam manum corripunt continentque, sicut polypus brachiis, tanta vi, ut carnem in tumorem tollant. Habent os in medio, atque ab saxo tanquam a testa (ostreo) viuunt. Tum si quid pisciculorum casu quopiam allabatur, comprehendunt, sicut et manum. Sic etiam esculenti quippiam si adpellatur, deuorant. Genus etiam quoddam absoluitur, ac quodcunque nactum fuerit, vel echinos ipsos vel  
 5 etiam pectines, conficit. Nullum omnino inuenitur in iis excrementum; qua ratione plantis similis est. Sunt autem vrticarum genera duo: minores, quae etiam inter cibos saepius recipiuntur; et maiores eaeque duriores, cuiusmodi ad Chalcidem oriuntur. Hieme igitur carnem compactam habent; quo propterea tempore et captantur et esitantur: aestate fiunt deteriores: euadunt enim fluidae, attractaeque soluuntur cito, ita ut integrae auelli non possint. Tum aestu laborantes penitiora subeunt scopulorum. Quae igitur molluscorum, crustatorum et testaceorum partes essent exteriores interioresque, diximus.

#### C A P. VII. (Scaligero VI.)

Nunc de insectis eodem instituto scribendum est. Multas continet in se species genus hoc: quo-



rum quaedam, tametsi inter se congeneres sunt, tamen communi nominis coniunctione non explicantur, vt ap<sup>is</sup>, crabro, (anthrena,) vespa, (sphex,) et alia similia; itemque quaecunque alas munitas vagina habent, quemadmodum scarabaeus, (melolontha,) fullo, (carabus,) cantharis, et reliqua eiusmodi. Omnium igitur communes partes sunt tres, caput, alueus ventrem continens, et tertia, quae inter has sita est, cuiusmodi aliis pectus dorsumque dicitur. Hoc in multis vnicum est: sed iis, quae longa multipedaeque sunt, multiplex aequat numerum incisurarum. Insecta omnia etiam 2 praecisa vitam retinent, nisi si qua aut vehementer fuerint frigefacta aut ob paruitatem celeriter calorem amittant. Nam sane vespae quoque diuisae viuunt. Igitur cum media illa parte vel caput vel venter viuit: sine ea autem non viuit caput. Longorum autem et quae multis mouentur pedibus partes praecisae diu viuunt mouenturque ad vtrumque extremum, ac tam ad praecisuram quam ad caudam tendunt; vt quae scolopendra appellatur. Oculos vero habent omnia: ceterarum autem partium, quae sunt a natura sensuum ministerio attributae, nullam, quae sane appareat, praeter linguae speciem quaedam. Qua etiam testacea omnia praedita sunt, qua et gustant et attrahunt

- 3 intra se cibum. Ea autem in quibusdam mollis, in aliis robusta valde, vt purpuris: tabani quoque atque asili praeualidam eam habent, et alia paene plurima. Quaecunque enim ad postremam alui partem aculeum non gerunt, iis haec pro telo data omnibus est. Atque haec quidem dentibus carent, praeter pauca quaedam: si quidem muscae quoque ea admota sanguinem cient, et culices (conopes)
- 4 sua pungunt. Habent quaedam aculeum, eumque aut in se ipsis conditum, vt apes et vespae, aut extantem, vt scorpius. Is solus insectorum longam habet caudam; itemque pedes forcipatos, quemadmodum etiam scorpiunculo simile insectum, quod in libris nascitur. Ea quae volucra sunt, praeter ceteras partes alas quoque habent; quorum aliis binae sunt alae, vt muscis; aliis autem quaternae, vt apibus: nulli enim binae tantum, quod aculeum postrema alio habeat. Quorundam quoque alae teguntur munimento quodam, vt melolonthae: alia eo carent, vt apis. Nulli ad volandum cauda officio est. Ala autem eiusmodi est, vt neque tu-
- 5 bis neque diuisuris constet. Praeterea cornicula prae oculis, vt papiliones et carabi. Quae ad saliendum sunt instituta, iis crura posteriora maiora sunt, atque ipsa postrema, quibus saliant, retroflexa, quemadmodum et quadrupedibus. Omnium



partes quae subtus sunt, a superis differunt, vt etiam reliquis animalibus. Corpus autem eorum 6 neque testaceum est, neque quale in testaceis continetur: neque carnosum, sed medium inter haec. Quare neque spinam habent neque os, nec quicquam sepiarum ossi simile, neque testa amiciuntur: se ipsum enim suapte duritia tuetur corpus, neque alterius eget fultura. Ac cutem quidem sed praetenuem habent. Exteriores igitur partes hae sic se 7 habent. Intus autem statim post os intestinum est maximae parti eorum rectum simplexque ad exitum vsque; paucis autem inflexum est. Neque viscus vllum, neque adipem habent insecta, sicuti ne alia quidem sanguine carentia. Nonnulla etiam ventrem habent, atque ab eo reliquo tractu intestinum aut simplex, aut flexuosum, vt locustae. Sola non modo horum sed etiam animantium omnium cicada ore caret; sed quiddam eius specie, quod in pone aculeatis simile linguae est, longum, consertum, non diuisum; per quod rore solo alitur. In ventre autem nullum retinet excrementum. Cicadarum genera multa sunt, ac differunt magnitudine ac paruitate. Quae canorae (achetae) appellantur, ad praecincturae locum diuisae (*apertae*) sunt, membranamque habent conspicuam: cicadastrae (tettigonia) autem non habent. [Cap. VII.

8 Scaligero.] Supersunt notis generibus animalia  
 9 quaedam in mari, quae propterea quod rara sunt,  
 nequeunt ad genera referri. Nam piscatorum pe-  
 ritiores narrare alia alii soliti sunt: vidisse sese in  
 mari trabeculis similia, teretia, aequali crassitu-  
 dine, colore nigra. Alia clypeorum specie, rubra,  
 frequentibus pinnulis: nonnulla cum figura tum  
 magnitudine veretri humani, nisi quod testium  
 loco pinnae haberent duas; haesisseque olim ad  
 summum instrumenti, quod multis hamis conser-  
 tis constat. Partes igitur animantium omnium cum  
 interiores tum exteriores, quae singulis generibus  
 aut propriae aut communes essent, hoc quo dixi-  
 mus modo sunt constitutae.

### C A P. VIII.

Nunc de sensibus dicendum est. Neque enim  
 omnibus omnes praeditae sunt; sed quibusdam  
 pauciores sunt. Sunt autem plurimum quinque  
 numero; praeter quem nullus seorsum alius videa-  
 tur: visus, auditus, olfactus, gustus, tactus.  
 Homo igitur, et quaecunque sola humo ad motum  
 utuntur, atque animal pariunt; quin omnia, quae  
 e sanguine concreta sunt, modo animal pariant,  
 videntur omnes habere sensus: nisi si cui generi  
 2 intercepta perfectio est, cuiusmodi sunt talpae. Hi



enim visu carent: neque enim oculos conspicuos habent; sed ablata cute, quae crassiuscula ad exteriores luminum orbes capiti obtenta est, intus oculi sunt conspicui, constantes partibus iisdem, quibus veri quoque praediti sunt. Nam et continent nigredinem ipsam, atque in ea quam pupillam vocant; et ipsum circulum; ac minora quidem haec omnia, quam sint in iis, qui detectis sunt oculis. Verum horum indicium nullum extat propter corii crassitudinem, quasi in generationis principiis defecta fuerit natura. Sunt enim a cerebro, qua coniungitur cum medulla, meatus nervosi duo validi, qui ad ipsas oculorum sedes tendunt, terminanturque ad superiores exertos dentes. Cetera 3 autem et colorum et sonorum et odorum et saporum sensum habent. Quintum autem sensum, quem tactum vocant, etiam reliqua omnia obtinent animalia. In quibusdam igitur et sensuum instrumenta manifestissima sunt, potissimum vero visionis; definitum enim habent locum oculorum: deinde auditus; in quibusdam enim auriculae sunt, in nonnullis apparent foramina. Similis ratio in olfactu: quaedam enim nares habent; quaedam meatus ad olfaciendum; cuiusmodi avium genus est. Lingua quoque ad percipiendos sapores praedita sunt. At inter aquatilia qui pisces appellantur, 4

ad gustus officium linguam habent, sed incertam  
atque obscuram, quippe osseam et cohaerentem.  
Quin nonnullis eorum palatum carnosum est: cu-  
iusmodi cyprini inter fluuiatiles. Itaque non ex-  
acte inspectantes id linguam esse putant. Quod  
autem gustando sentiant, patet: multi enim pecu-  
liaribus saporibus delectantur. Nam et amiam et  
pingues pisces praeter ceteras escas inprimis appe-  
tunt; propterea quod eiusmodi escarum gustu ac  
5 cibo gaudeant. Auditus autem atque odoratus nul-  
lum habent instrumentum manifestum. Nam etsi  
id videri cuipiam possit, quod ad loca narium est,  
non sane transit ad cerebrum; sed partim non est  
peruium, partim ad branchias fert. Eorum tamen  
tam auditus quam olfactus manifesta sunt: visi  
enim sunt fugere strepitus grauiiores, quales sunt  
triremium remigia, adeo vt in diuerticulis suis fa-  
6 cile comprehenderentur. Nam tametsi extra aquam  
sonus exiguus sit, sub aqua tamen qui audiunt,  
his difficilis magnusque atque etiam grauis esse vi-  
detur. Id quod euenit etiam cum delphinos ve-  
nantur: nam vbi eorum agmen lembis cinxerunt,  
strepitu inde in mari excitato, cuncti faciunt, vt  
impetu capto fugiant, atque exiliant in terram,  
vbi prae sonitu caput grauati capiantur. Et tamen  
delphinis nullum apparet auditus instrumentum.



Ergo in piscatibus qui sunt, maxime cauent, ne 7  
quid soni aut remi aut retium cieatur: verum vbi  
eorum greges quopiam in loco deprehendere, capta  
coniectura tanto interuallo demittunt retia, vt ne-  
que remi sonitus, neque scalmo facta maris cri-  
spatio ad eos peruenire possit. Itaque imperant  
omnibus remigibus, vt quam maximo silentio pro-  
moueant naues, vsque dum obsessi intelligantur.  
Interdum etiam, cum eos palantes volunt congre- 8  
gare, idem faciunt, quod, cum delphinos venan-  
tur: obstrepunt enim in saxis, vt perterrefacti  
vnum conueniant in locum, vt possint retibus cir-  
cumueniri. Sed antequam conclusi sint, vt dixi-  
mus, strepitu abstinere: cum circumdedere, tum  
iubent clamorem tollere, et strepere: sonitu enim  
ac tumultu consternati feruntur in retia. Sic etiam 9  
piscatores, cum e longinquo speculati obseruarint  
eorum greges, tranquillo ac tepido mari summo  
fluitantes, capiuntque consilium explorandi, quam  
grandes cuiusue generis sint. Si sine strepitu ad-  
eunt, ibi latent illos, deprehenduntque etiamnum  
fluitantes: quod si quo sonitu forte praeueniantur,  
illi in conspectu omnium fugiunt. Ad haec in flu-  
viis pisciculi quidam sunt, cottos vocant: ii sub  
saxis degunt. Eorum igitur capturam ita instruunt:  
silicibus saxa ea percutiunt. Itaque inde excussi

feruntur ex sonitu, quem audiuerint, capite gravati. Eorum igitur auditionis haec argumenta sunt.

10 Quin non defuere, qui acerrimo auditu pisces esse dicerent omnium animalium, idque auctoribus maris accolis et piscatoribus, qui id experientia frequenti profitentur. Praeter ceteros pisces acutissimus auditus mugili, [chremps *omittunt optimi Codices*] salpae, chremidi, et aliis huius generis: ceteris minus acutus: itaque ad maris fundum po-

11 tius degunt. Eadem et olfactus ratio est: cum enim piscium maxima pars non nisi ad recentem escam appetunt, alii vero minus quam hi; tum non omnes eadem esca capiuntur; sed sibi quisque quod expetat, dignoscit olfactu. Quibusdam enim male olentes pastus placent, vt salpae stercus. Multi quoque pisces in specubus latent: eos captantes piscatores vbi elicere volunt, specus oras salsamentariis odoribus oblinunt, ad quorum odorem ce-

12 riter prodeunt. Quin anguillam quoque ad hunc modum venantur, salsamentariis apposis fictilibus, quorum orificiis indunt id quod colum vocant. Denique omnes ad nidorem potius feruntur: itaque sepiarum frustula, eaque odoris comparandi gratia ambustulata obiiciunt: prodeunt enim libentius. Sic et polypos assatos in retia non ob aliam quam

13 nidoris causam indere aiunt. Praeterea pisces, qui



rhyades appellantur, effusa vel piscium sorde vel sentina, ab eius odore retro fugiunt. Sanguinem item suum illico sentire dicuntur, vt, quem in locum sparsus sit, inde procul migrent. Certe putida esca in nassam imposita, non appropinquant, nedum vt ingredi velint: contra recentis cibi nidore illecti protinus etiam de longinquo feruntur atque subeunt. Haec autem omnia vel in delphinis<sup>14</sup> plane videntur: qui cum neque auditus neque olfactus habeant euidens instrumentum, et capitis tamen grauedine a sonitu accepta laborantes capiuntur, et acute odorantur. Igitur sic patet haec omnibus esse praedita sensibus. Quod vero attinet ad reliqua genera animalium, quorum multitudo quatuor in genera digesta iam fuit, mollusca, testacea, crustata, insecta: ex his mollusca et<sup>15</sup> crustata et insecta sensus habent omnes; si quidem vident, odorantur et gustant. Omnia enim insecta etiam porro sentiunt, siue alata sint, siue alis careant, velut apes, et formicae paruae, rubrae, (cnipes) mel percipiunt olfactu etiam e longinquo; sulphuris quoque halitu multa intereunt. Quin formicae si aspergantur origani et sulphuris pulvisculo, caui sui sedes relinquunt. Iam ceruini cornus maxima fugit pars, sed pessime oderunt styracis suffitiones. Postremo cum sepiae, polypique ac<sup>16</sup>

- locustae capiantur escis, polypique adeo pertinaciter comprehensam teneant, ut prius praetruncari sese quam auelli patiantur: tum si quis pulicariam (conyzam) admoueat, tum ex eo odore aiunt illico escam amittere. Eodem modo se habent in gustu: alia enim aliam escam persequuntur, neque omnia saporibus iisdem delectantur. Apes enim ad nihil putridi assident, sed ad dulcia: culices (conopes) autem nihil dulce appetunt, sed acida.
- 17 Tactus autem sensus omnibus, ut supra dictum est, inest animalibus. At testa intacta olfactum quidem ac gustum habent: id quod e cibis deprehenditur. Nam purpura ita putridis inescatur, ut etiam e longinquo ea sentiat et appetat. Nam quae ex odoribus iudicant appetenda, eorum quoque saporibus
- 18 gaudent singula. Praeterea quae ore praedita sunt, saporum tactum vel gratum vel ingratum habent. De visu autem atque auditu nihil certi est: nihil enim valde manifestum est. Videntur tamen solenes et subire et penitus fugere, ubi senserint ferrum admoueri. Namque eorum exigua pars extat, ceterum corpus quasi latibulo conditur. Tum pectines, si digitum admoueas, hiscunt; mox comprimunt se, quasi videant. Quin neritarum captatores secundo flatu adeunt, cum venantur eos ad escam: neque loquentes, sed taciti, quasi illi et
- 19



odorentur et audiant: quod si loquantur, aiunt eos subterfugere. In genere testaceorum quae mobilia sunt, echinus, ex iis, quae non mutant locum, tethya et glandes, (balani,) olfactum minime habere videntur. De sensuum igitur instrumentis animalium sic statuendum est.

## C A P. IX.

Deinceps autem de voce videamus. Differt a sono vox, et ab his sermo. Nullum ergo animal alia parte quam gutture vocem edit. Quam ob rem quae pulmone carent, eadem voce quoque. Sermo autem est vocis dearticulatio per linguam. Vocales igitur a voce et gutture emittuntur: mutae autem a lingua et labiis; ex quibus sermo est constitutus. Idcirco quae linguam non habent, aut non habent solutam, neque vocem edunt, neque sermonem serunt, sed si quem sonum edunt, hoc aliis partibus effici potest. Igitur insecta neque vocem ne- 2  
que sermonem edunt, sed interiore spiritu sonant, non exteriori; siquidem eorum nullum spirat, sed partim murmurare dicuntur, vt apes et alia alata; partim canere, vt cicadae: quae omnia sonum cient membrana, quae obtenta est ad praecincturae aperturam, quemadmodum cicadae aliquae attritu spiritus. Muscae quoque et apes atque alia omnia

alas inter volandum attollunt, ac mox contrahunt; sonus enim interioris spiritus attritu fit. Locustae autem saltatoria crura affricantes (*alis*) sonum faciunt. Neque molluscorum quippiam neque crustaceorum aut vocem ullam aut sonum naturalem  
3 emittit. Pisces quoque muti sunt: neque enim aut pulmonem aut arteriam aut guttur habent; sonos tamen edunt quosdam et strepitus ii, quos aiunt vocales esse, vt lyra et chromis: hi namque veluti grunnitum edunt. Sic et aper Acheloi fluvii incolae: praeterea chalcis (*chalceus id est faber Codices meliores*) et cuculus: nam illa (ille) sonum edit similem stridori, hic autem similem cuculo; vnde et nomen obtinet. Quae tamen omnia hoc quod videtur vox emittunt partim attritu branchiarum: ea quippe loca spinea sunt; partim e partibus circa ventrem. Horum enim singula (*genera*) habent spiritum, quo attrito atque commoto sonus  
4 cietur. Etiam quaedam e cartilagineis strepere videntur: verum horum sonus potius quam vox debet dici. Nam pectines etiam, cum summam radunt aquam, quo dicuntur volare, strident. Sic vt et marinae hirundines; quae similiter supra mare ita volant, vt aequor non attingant: pinnae enim latas ac longas habent. Sonus igitur quasi volantium auium, non vox est: sic ne aliorum



quidem. Delphin quoque stridet ac gemit, cum in aerem exit; sed alia quam illi ratione. Quippe et vocem et pulmonem et arteriam habet; sed cum lingua ei soluta non sit, et labiis careat, inarticulatam vocem edit. At quae oua pariunt, siue 5 sint quadrupedes, siue humi solius per superficiem mobilia sint, vocem quidem emittunt, sed imbecillum tamen. Quorum alia sibilum emittunt, ut serpentes: alia autem exilem vocem et infirmam: alia autem sibilum breuem, ut testudines. Diuersam ab aliis ranae habent linguam: mucro namque qui in ceteris absolutus est, ipsis cohaeret piscium more; quod autem gutturi affine est, et solutum et applicatum est, quo suam vocem solent emit-tere. Vlulatum (ololygonem) autem, quem in aqua cient masculi ranarum, efficiunt, cum ad venerem femellas inuitant. Sunt enim unicuique ge- 6 neri animantium certae voces attributae ad consuetudinem et congressum, ut suibus, hircis, ouibus. Edit autem vlulatum, cum, inferioris mandibulae labio ad summam aquam coaequato, super aqua obducit superiorem. Intentis igitur maxillis, atque idcirco perlucetibus lucernarum speciem praebent oculi: frequens enim noctu coitus fieri solet. Auium genus vocale est; potissimumque loquuntur eae, quibus aut mediocris linguae lati-

tudo, aut ipsa lingua tenuis est. Quarundam igitur vox eadem tam mari quam feminae; in aliis diuersa. Cum multa voce, tum maiore loquacitate praeditae sunt minores quam maiores. Hoc autem earum cuilibet euenire maxime solet coitus tempore. Quaedam quoque inter pugnandum vocem edunt, vt coturnix; aliae, cum pugnam ineunt, prouocantes, [vt perdix:] nonnullae etiam victoriam canunt, vt galli. Maris feminaeque cantus in quibusdam idem est, vt luscinae: silet tamen femina, quamdiu incubat pullosque educat. Sunt in quibus potius canat mas quam femina, vt in genere gallinaceo et coturnicum: feminae enim non canunt. At quadrupedes, quae animal pariunt, vocem emittunt, sermonem nullum edunt; hominis enim is proprius est. Quaecunque igitur sermonem habent, etiam vocem habent; non autem e conuerso. Qui surdi nati sunt, postquam adoleuerunt, vocem quidem omnes emittunt, at sermonem nullum. Infantes autem, quemadmodum ceterorum membrorum impotes sunt, ita linguae quoque per initia: imperfecta enim his est, atque serius soluitur: itaque blaesi balbique sunt plerumque. Differunt autem cum voces tum sermones locorum ratione. Vocis differentiae notissimae graue et acutum, sed genera nulla specie



discreta sunt. Dearticulatio autem, quam quasi sermonem dicat quispiam, cum in aliis animalibus tum in eodem genere locorum ratione differt. Nam perdices aliae dicuntur caccabare, aliae trissare. (*titubare.*) Auiculae quoque aliam a parentum voce vocem edunt, si alibi quam ab ipsis educuntur, atque alias aues audiant canentes. Iam id quoque observatum est, lusciniam instruere pullos ad canendum, argumento, sermonem non perinde, ac vocem, a natura proficisci, sed fingi posse. Quippe homines vocem quidem eandem emittunt, at eodem non loquuntur modo. At elephante ore ipso sine naribus edit spiritum magis quam vocem, tanquam homo, cum suspirans ingemiscit; simul cum naribus autem raucam tubae asperitatem imitatur.

#### C A P. X.

Quod attinet ad somnum et vigiliam, ea quae humo sola nituntur, ut mutant locum, eademque sanguine concreta sunt, haec omnia et dormire et vigilare sensu ipso percipimus. Quaecunque enim palpebris praedita sunt, ea conuiuent omnia, dum somnum capiunt. Somniant quoque non solum homines, verum etiam equi, canes bouesque, adhaec oues capraeque, vniuersumque genus animalium, quae animal pariunt, et quadrupeda sunt.

Indicium sumitur a latratu canum. An vero quae  
oua pariunt somnient, incertum est; sed manife-  
2 stum est, ea dormire. Aquatilia quoque dormire,  
palam est, pisces, mollusca, crusta intacta, ut lo-  
custas, et eiusmodi. Breui tamen somno utuntur  
omnia haec, sed manifesto. Ac quanquam ex ocu-  
lis id deprehendi non potest: palpebris enim ca-  
rent: tamen e quiete intrepida coniiciunt. Nisi  
enim pediculis et iis quos pulices vocant, infesten-  
tur, capiuntur pisces immobiles adeo, ut manu fa-  
cile comprehendi possint. Quod si [in retibus] in-  
clusi moram fecerint, ii quos diximus, pediculi  
pulicesque maximo agmine nocturno inuecti eos  
3 deuorant. Eorum ortus in profundo maris est,  
tantaque frequentia, ut escam, si e piscis pulsa-  
mento constet, si diutius iaceat in terra, absu-  
mant. Itaque circum eam conglobatos saepe tra-  
hunt piscatores. Inde quoque de eorum somno  
coniectura capi potest. Saepenumero enim euenit  
superuentum piscatorum non sentire, sed aut manu  
ipsa capi, aut ictu praeueniri: quo sane tempore  
profunda quiete capti nihil nisi caudam placide mo-  
uent. Manifestus somnus eorum fit et ex impetu,  
quem capiunt, si quid, dum quiescunt, mouea-  
4 tur: feruntur enim velut e somno excitati. Prae-  
terea noctu, ad ignem [*vulgo* in saxis] dum dor-



miunt, capiuntur. Thynnorum quoque speculatores retibus cingunt dormientes, quos vident capi posse, per quietem cum albuginem oculorum semiapertam ostendunt. Nocte potius dormiunt, quam interdiu, adeo vt ne ad ictum quidem moueantur. Maxima pars quiescunt aut in arena aut in terra, aut lapidi cuiuspiam haerentes in imo maris fundo, aut saxum quodpiam aut etiam sabulum (littus) subeuntes. Latī pisces in arena, in qua eorum figurae vestigia apparent: idcirco fuscina icti prae-  
 dae sunt. Quin lupi et auratae et mugiles et alii eiusmodi saepe etiam interdiu sopiti fuscina icti capiuntur: alioquin horum nullus fuscina capi posse existimatur. Cartilaginea vero interdum ad- 5  
 eo sopiuntur, vt etiam manu ipsaprehendantur. At delphini balaenaeque ac cetera omnia, quae fistulam habent, ea ab aequore extante dormiunt, per quam respirant, leniter motis pinnis. Delphinum quoque stertentem nonnulli audiuerunt. Dormiunt et mollusca eodem modo, quo et pisces; et crustacea, vt mollusca. Quod autem insecta quoque somnum capiant, his indiciis colligi potest. Nam ita quiescunt, vt immobilia penitus sine controuersia appareant. Id quod in apibus planissimum est: per noctem enim quietem agitant, neque murmur ullum edunt. Patet autem hoc ex his,

quae ante oculos nostros quotidie versantur. Neque enim propterea abstinere motu in tenebris, quia hebeti tam visu sint: omnia enim quibus oculi duri sunt, obscurius vident; sed eadem admoto lumine  
6 nihilo minus quiescere videmus. Plurimum omnium animantium homo somniat. Infantibus adhuc, tum primore pueritia etiam modo constitutis, insomnia nulla fiunt, sed paucissimis ante annum quartum aut quintum incipiunt. Fuerunt etiam et viri et mulieres, quibus nullum vnquam somnium obiectum fuerit. Horum aliqui cum forte aetate prouectiore somniassent, valetudine mutata, partim morte partim morbo affecti sunt.

#### C A P. XI.

De sensibus, vigilia et somno hactenus. At sexus differentiae masculi et feminae insunt aliquibus animalium, quibusdam non insunt, sed per similitudinem dicuntur, vt parere et praegnantesse. Tum in animalibus, quae non mutant locum, tum in iis, quae testa operta sunt, nullum est maris feminaeque discrimen. In molluscis autem et molli testa intectis tam mas quam femina est: item in iis, quae solius humi beneficio mutant locum, tum bipedibus, tum quadrupedibus, denique omnibus iis, quae ex coniugio aut animal aut ouum



aut vermem pariunt. In ceteris igitur generibus 2  
 simpliciter aut inest aut non inest sexus: nam in  
 quadrupedum genere vniuerso tum marem tum fe-  
 minam inuenire est. In testaceis autem non inest,  
 sed quemadmodum plantae quaedam frugiferae  
 sunt, aliae steriles, ita et in his. At in genere in-  
 sectorum et in piscibus sunt quae omnino neutram  
 in partem hac ratione distinguantur, velut anguilla.  
 Cum enim neque mas neque femina est, tum ex  
 sese nihil generat. Quanquam piscatores, cum ea- 3  
 rum nonnullis deprehenderent capillari tenuitate  
 adnatos quasi lumbricos, neque obseruarent, qua  
 corporis parte ii essent, imprudenter loquuntur.  
 Nam hoc in genere nullum inuenias, quod non ex  
 ouo animal pariat. At ouum habere nulla vnquam  
 visa est. Praeterea quae animal pariunt, ipsum in  
 vtero atque adhaerens, non autem in ventre gerunt:  
 concoqueretur enim, sicut et cibus. Postremo  
 quam allegant quidam differentiae notam maris fe-  
 minaeque in anguilla, quod mas capite grandiore  
 oblongioreque sit, femina autem paruo et depres-  
 siore, non quod maris ac feminae, sed quod ge-  
 neris intersit, aiunt. Sunt etiam pisces, quos epi- 4  
 tragias (*ab hirco cognominatos*) Graeci vocant;  
 cuiusmodi inter fluuiatiles cyprinus et balagrus:  
 [barinus *vulgo*.] in his neque ouum neque humor

genitiuus vllus est: sed qui solida et pingui carne constant, exiguum intestinum habent, et maxime commendantur. Inter pisces quoque, quemadmodum in testaceis et in plantis, aliqui pariunt tantum et generant, at qui ineat, non est: cuiusmodi passerum (psettaram) genus est, et rubellorum (erythrinorum) et hiatulæ: (chanae:) oua enim in  
5 eiusmodi omnibus reperiuntur. Igitur eorum, quae sanguine concretæ animantes solius humi solo mouentur, nec oua pariunt, plerumque maiore corpore longioreque vita sunt mares quam feminae, excepto genere mulino: longæuiiores enim et proceriores mullæ. Inter ea vero eorum, quae aut ouum aut vermem pariunt, cuiusmodi et pisces et insecta sunt, maiores sunt feminae quam mares, vt serpens, phalangium, stellio (ascalabotes), rana. Et ex piscibus cartilaginea illa, quae suapte natura parua sunt: et plerique eorum, qui gregatim de-  
6 gunt, et saxatiles omnes. Quod autem diutius feminae quam mares in genere piscium viuant, eo deprehensum est argumento, quod grandiores natu feminae capiuntur. Marium partes tam superiores quam anteriores præstantiores et validiores et lateribus firmiores sunt: at in feminis eae, quae aut quasi posteriores aut inferiores dici solent. Hoc tum in homine tum in aliis animalibus eodem modo



se habet, modo eorum motus per humum solam fiat, et animal generent. Omnis item femina nervorum et artuum minore firmitate: et quibus pilus est, iis quoque tenuior inuenitur; sicuti quae pilum non habent, id quod eius loco a natura est institutum. Fluxior quoque caro feminae est, et genua magis incurua, et surae tenuiores, et pedes elegantiores eo in genere, quod haec membra aptum natum est habere. Vox quibus natura data fuit, 7 exilior feminis et acutior, praeterquam vaccae: boves autem grauius mugiunt, vaccae vero grauius etiam quam boues et tauri. Quae partes animantibus velut arma a natura datae sunt, vt tam ceteri dentes quam exserti, ad haec cornua ac calcaria, aliaque id genus, quorundam generum maribus omnibus oriuntur, feminae autem carent. Cerua enim cornua non habet, sicut inter aues calcaribus praeditas feminae nulla habent; et suibus feminis exserti dentes nulli sunt. In quibusdam tamen tam mas quam femina gerit, sed praestantiora multo maribus sunt, vt cornua taurorum quam vaccarum firmiora.

---

---

A R I S T O T E L I S  
D E A N I M A L I B V S H I S T O R I A E  
L I B E R V.

---

C A P. I.

Hactenus de omnium animantium partibus tam interioribus quam exterioribus: adhaec de sensibus et voce somnoque: postremo in quibus generibus sexuum discrimina inuenirentur, dictum est. Deinceps eorum generationes persequamur: ac de primis primum. Sunt autem multae multaque discretae varietate, quanquam partim dissimiles, partim modo quopiam inter se conuenientes. Igitur cum initio partiti simus genera ipsa, in praesentia quoque idem institutum tenere conandum est: tametsi ibi partes contemplaturi ab homine exorsi sumus. Nunc de eo postremo loco agendum est, propterea quod sit ipse omnium animalium operosissimus. Itaque ab iis, quae testa conteguntur, incipiendum



est; deinde de crustatis ceterisque ad eundem modum atque ordinem, molluscis scilicet atque insectis; tum piscium genere, tam quod animal, quam quod ouum parit; postea de auibus; tandem de iis, quorum motus humi tantummodo cietur, dicendum est. Ac dicendum quidem, quae animal, quaeque ouum pariunt. [*Igitur quadrupedes nonnullae et bipedum solus homo animal parit. Gaza vt aliena omisit et damnauit Scaliger.*] Comuni autem natura fuit comparatum, quemadmodum in plantis, ita in animalibus, vt sicuti plantae partim ab aliarum plantarum semine, partim, vbi certa principia similia constiterunt et coaluerunt, sponte prodeant, ac, quemadmodum in doctrina plantarum diximus, aliae de terra capiant alimentum, nonnullae in aliis innascantur plantis: sic et animalia quaedam per formae cognationem ab animalibus generentur, nonnulla sponte, non a congeneribus: quorum aliqua ex putrida vel terra vel trunco; quod insectorum magnae contingit parti: alia in ipsis animalibus [,atque] ex eorum partium excrementis oriantur. Ergo quae a congeneribus procreantur, in his si et mas et femina reperitur, e coitu generantur. At genera quaedam sunt in piscibus quibusdam, in quibus neque marem neque feminam inuenias: qui genere quidem

cum ceteris piscibus iidem sunt, specie autem differunt. Alii quoque priuatim omnino naturam quandam nacti sunt. Nam feminae sunt sine vlllo mari. Itaque ex his generantur talia, qualia in auiibus irrita, quae Graeci hypenemia, quasi a vento concepta, dicunt. Haec igitur, quae ab auiibus eduntur, inutilia ad generandum omnia sunt: natura enim sola oui absoluendi circumscribitur potestate: nisi alio quopiam modo maris vis communicetur: qua de re exactius in sequentibus dicitur. Euenit autem, vt ex piscium quorundam ouis, sine maris opera natis, partim sine maris quoque, partim non sine maris opera animalia generentur: cuius rei item modum postea declarabimus. Similis enim paene horum atque auium ratio est. Ex iis autem, quae sponte aut in animalibus aut in terra aut in plantis aut horum partibus oriuntur, marique atque femina discreta sunt, gignitur quidem aliquid, sed non idem atque imperfectum; vt ex pediculis lendes, e muscis et e papilionibus (paulicibus *vulgo*) ouorum specie vermes: ex quibus neque parentum genus instauratur, neque aliud animal, sed talia duntaxat existunt. Primum igitur de coitu dicendum est, et quaenam genera coeant: deinde de aliis, quae aut proprias aut communes naturas nacta sunt.



## C A P. II.

Coeunt igitur ea, in quibus mas et femina est. Coitus neque similes omnibus sunt, neque similem in modum aguntur. Quae enim animal pariunt et terrae solo nituntur ad motum suum et sanguine concreta sunt, horum mares habent instrumenta, quibus dent operam soboli procreandae: non omnes tamen eodem coeunt modo. Sed quae retro urinam reddunt, admotis inter se clunibus, ut leones, lepores, lynces. Leporum quoque femina marem saepe prior conscendit. Aliis autem, quae plurima pars est, idem modus coeundi, vulgaris ille scilicet, qui in maxima parte quadrupedum cernitur, ut marem femina tergo accipiat. Omniaque avium genera coeunt uno hoc tantum modo. Sed sunt in avibus quoque discrimina quaedam: 2  
nam aliis subsidentes feminae in terram mares excipiunt, ut tardae et gallinae. Quaedam non se submittunt: nam stantem feminam gruem mas stans, momentoque temporis passerum more coitum perficit. Ex quadrupedibus ursae decumbentes eodem genere coitus utuntur, quo aliae stantes, admissio maris ventre in tergus suum. Erinacei recti, ventribus commissis. Inter ea, quae animal pariunt, 3  
et grandiora sunt, neque ceruae cerui initum nisi perraro sustinent, neque tauros vaccae propter

veretri rigiditatem, sed cedendo excipiunt feminae genituram: quod certe in ceruis [elephantis *Codex aliquis habet.*] cicuribus obseruatum est. Eodemque quo canes modo coeunt lupi. Feles a tergo non ineunt, sed mari stanti substernit se femina. Sunt sane hoc in genere natura salaces ipsae, adducuntque mares ad coitum, et inter coeundum clamitant. Camelus mas feminam sedentem (*decumbentem*) complexus init non clunibus aduersis, sed more ceterarum quadrupedum, totamque diem vterque transigit concubitu: per tempus secedunt in solitudines: neque licet cuipiam interuenire nisi armentario. Cameli genitale eiusmodi nerui natura constat, vt etiam ad arcus vsum pro funiculo interpolent. Elephanti quoque deserta loca petunt, vbi coeant, inprimis secundum flumina, quibus sane in locis versari consueuere: feminam summissis clunibus et pedibus diuaricatis mas superinit. Coit vitulus marinus sicut ea, quae retro vrinam reddunt, haerentque diu canum more; grande est maribus genitale.

## C A P. III.

Quibus solam per terram motus datus est, quadrupedes ouiparae simili modo coeunt: quaedam enim initu, eorum more, quae animal pariunt; vt testudo tam marina quam terrestris. Habent



etiam quo meatus coaptari possint, et quo inter  
 coeundum cohaereant, vt pastinacae [*nomen vi-*  
*tiosum*, rubetae *substituit C. Gesner.*] et ranae et  
 reliqua genera eiusmodi. [Vulgo et Scalig. Cap. IV.]  
 Quae pedibus carent et longa sunt animalia, vt ser- 2  
 pens et muraena, circumplexa aduersis ventribus:  
 adeoque serpentes conuoluuntur inter se, vt vnus  
 serpentis biceps corpus totum videatur. Lacerta-  
 rum generi in coeundo modus idem similisque cir-  
 cumplicatio.

#### C A P. IV. [Vulgo et Scaligero V.]

Pisces autem omnes praeter latos cartilagineos  
 admotis inter se ventribus peragunt rem. At lati  
 caudati, vt raia (batos), pastinaca et alia talia, non  
 solum mutuo admotu, sed etiam ineunte a tergo  
 mare feminam, quibus scilicet grandior cauda im-  
 pedimento non est: at quibus est, vt squatinae,  
 attritu perficiunt, ventribus inter se commissis.  
 Sunt qui dicant, sese animaduertisse cartilaginea  
 quaedam, quae auersa inter se canum more cohae-  
 rerent. Cartilagineorum feminae grandiores sunt 2  
 quam mares: id quod fere in ceteris etiam piscibus  
 euenit. Porro cartilaginei sunt tum hi, tum bos,  
 lamia, aquila, torpedo, rana, et mustelina genera  
 omnia. Omnes igitur cartilaginei deprehensi sunt  
 a multis his coeuntes modis: diuturnior enim com-

plexus eorum omnium, quae animal, quam quae  
ouum pariunt. Delphini quoque et omnia cetacea  
eodem modo planis admotis partibus inter se, ne-  
que parum neque multum temporis in coitu po-  
3 nunt. Cartilaginei nonnulli mares duo quaedam  
appensa habent ad exitum excrementorum, quibus  
a feminis, quod eae his careant, distinguuntur.  
Patet hoc in mustelorum generibus, quorum nulli  
ea desunt. Testes igitur neque piscis neque aliud  
quippiam pedibus carens habet; meatus tantum  
duos tum serpentes tum pisces mares, qui genitali  
succo tempore coitus implentur; omnesque lacteum  
humorem emittunt. Porro horum vterque in vnum  
(*membrum*) coeunt, quemadmodum etiam auibus.  
Aues namque intus habent testes, ceteraque omnia  
et quae ouum pariunt et pedibus praedita sunt.  
Illud igitur (*membrum*) continuatum extenditur et  
4 pertingit in femellae locum et receptaculum. Est  
autem pedestribus, quae animal pariunt, idem et  
geniturae et humidi excrementi meatus exterior,  
intus autem diuersus, quemadmodum supra dixi-  
mus in partium differentiis. At quae vesicam non  
habent, idem etiam sicci excrementi ductus est ex-  
terior: interius enim [ duo ] proximi inter se sunt.  
Neque mas et femina eo inter se differunt: carent  
enim vesica, nisi testudo: at hoc in genere feminae



*marinae*?) singularis meatus est, licet vesicam habeat. Et tamen testudines sunt ex ouiparis. At 5 piscium ouiparorum coitus incertior est: quo factum est, ut crediderint plurimi, feminas impleri deuorata marium genitura. Id enim euenit saepe-numero, ut videretur. Coitus namque tempore feminae secutae masculos hoc agunt, oreque eorum ventres subtus tundunt, atque illi et celerius et largius profundunt. Partus autem tempore mares feminas sequentes foetarum oua edita carpunt: nam pisces iis, quae reliqua sunt, generantur. Circa 6 Phoenicen instituunt venationem alterno sexu: nam subductis maribus feminarum greges, et ostensa femina mares circumretiunt. Quare cum saepe id sit animaduersum, fecit opinionem eiusce coitus generis. At hoc idem faciunt etiam quadrupedes coitus tempore: maris enim ac feminae ab genitalibus destillat aliquid, easdemque partes inter se odorantur. Perdices quoque feminae, ex aduerso 7 mares si constiterint, ex ea parte vento excepto, concipiunt. Saepe etiam voce duntaxat audita, si per id tempus pruriant: etiam superuolantibus illis, ita ut feminas afflent. (*alii Codd.* ut aura ab his afflet.) Hiant autem tum mas tum femina, ac linguam exerunt coeuntes. At verus ouiparorum piscium coitus rarius est animaduersus, propterea quod ven-

tribus admotis congressi celeriter dilabuntur. Nam modo antea dicto hi etiam coire visi sunt.

C A P. V. (vulgo et Scaligero VI.)

Mollusca eodem modo coeunt, polypus, sepia, loligo. Os enim ori, brachia brachiis componunt. Polypus cum eo, quod vocant caput, in terram verso nitens brachia explicauerit, alter passis item flagellis adaptat sese ita, vt acetabula inter se continuentur. Aiunt nonnulli, marem habere non nihil simile genitali in vno ex brachiis, quod duo maxima acetabula continet; id protendi quasi neruosum vsque in medium brachium, atque totum in narem  
2 feminae inseri. Sepiae autem et loligines complexae, commisso inter se vtrunque ore et brachiis, contrariis natatibus simul feruntur. Aptant etiam nares quae vocantur naribus: natant autem altera prorsum, altera rursus. Edunt oua per tubum, quem physeterem Graeci, fistulam Latini vocant, qua parte etiam coire dicuntur a quibusdam.

C A P. VI. (vulgo et Scaligero VII.)

Crusta contexta, vt locustae et gammari et squillae atque eiusmodi, eorum modo coeunt, quae retro vrinantur, vt, cum alter supinam inuertat caudam, ei suam interponat alter. Coeunt ineunte



vere iuxta terram, vt saepe est obseruatum: alicubi etiam, vbi fici maturescere incipiunt. Idem modus etiam gammaris et squillis. Cancri autem anterioribus partibus inter se coniunguntur, compositis mutuo applicatu caudis plicatilibus. Prius cancer qui minor est a tergo inscendit, mox alter maior in latus se (*et in dorsum*) inuertit. Ac sane a mare femina nihil differt, nisi quod ei cauda illa ad ventrem replicata et maior est et distantior, ac barbulis plurimis differta, in quam illae edunt oua, et qua excrementum reddunt. Pars autem, quae alteri inseratur, neutri data est.

#### C A P. VII. (vulgo et Scaligero VIII.)

Insecta primo congressu coeunt auersa inter se; deinde conscenditur a minore maius: minor enim mas est: in quem inserit surrectum sursum meatum suum femina, non, quemadmodum in aliis, in eam mas. Atque ea quidem pars in quibusdam videtur maior quam pro totius corporis ratione, cum illa admodum parua sint; in aliis autem minor. Hoc autem videtur, si coeuntes muscas disiunxeris: vix enim absoluuntur ab se inuicem: nam horum coniunctio diuturna est. Exemplo quoque familiari hoc deprehenditur, vt in muscis et scarabaeis, (cantharidibus,) quae eodem modo coeunt, sicut et ce- 2

tera omnia, vt sphondylae, et phalangia, et alia generis eiusdem, quae coire solent. Phalangia ea, quae telam texunt, sic coeunt. Femina distentae telae e medio fila cum traxerit, vicissim mas trahit contra. Hoc cum saepe fecerint, tum congregiuntur atque clunibus aduersis copulantur. Conuenit enim is coeundi modus illis propter ventris habitudinem orbicularem. Coitus igitur omnium animalium hoc modo fit.

CAP. VIII. (vulgo adhuc VIII. Scaligero IX.)

Coeundi autem tempora atque aetates sua cuique praescripta sunt. Igitur natura vult plurimorum coitum animalium per idem tempus agitari, cum hiems cum aestate commutatur; tunc enim ver est: quo tempore maxima et alitum et terrestrium et natantium pars impetum capit ad eiusmodi coniunctionem. Nonnulla tamen et coeunt et pariunt tum autumnio tum hieme, vt ex aquatilibus et ex volucris quaedam. Homo autem potissimum per omne tempus, multaque eorum, quae humi tantum mouentur, atque homini sunt familiaria, tum propter teporem tum ob victum largiorem. Atque haec sanè haud multum temporis vterum gerunt: cuiusmodi sus et canis est: e volucris autem ea, quae frequenter pariunt. Multa



etiam facta coniectura temporis, quo foetum suum educare debent, opportuno tempore coeunt. Stimulatur ad coitum homo mas hieme potius, femina autem aestate. Maxima auium pars, quemadmodum dictum est, verno tempore atque aestate appetente et coire et parere instituit, praeterquam alcedo: parit enim circa brumam. Idcirco tempus id cum est tranquillum, alcedonii dies vocantur, ante brumam septem et totidem post. Id quod etiam Simonidis carmen testatur: *vt cum per mensem hibernum Iupiter bis septem dies temperauit: quod tempus mortales obliuionem ventorum, sacram nutricem pictae alcedonis vocant.* Eua-  
dunt autem tranquilli, cum euenit, vt Vergiliarum occasum aquilonium austrina bruma excipiat. Aiunt septenis diebus nidum aedificare, septenis alteris pullos et parere et educare. Atque in his sane locis non semper apparent alcedones hiberno aequinoctio; at in mari Siculo paene semper. Pariunt autem ad quinque oua.

## [Vulgo C. IX.]

Mergi autem et gauiae (aithyiae et lari) in maritimis cautibus duo aut tria numero: verum gauia aestate, mergus autem statim a bruma ineunte vere; et superdormit (*incubat*) aliarum more auium. Neutra harum latet. (*conditur.*) Rarissime venit in

conspectum alcedo: fere enim circa Vergiliarum occasum apparet tantum; atque vt in portu primulum quantum nauigium circumuolarit, euolat illico. Idcirco Stesichorus ad hunc modum de ea meminit.

5 Parit luscinia quoque aestatis initio quinque sexue: latet autem autumnno ad veris vsque tempus. [Cap. X. Scaligero.] Insecta quae non conduntur hieme, per id quoque tempus coeunt: id quod euenit tranquillâ et austrina tempestate. Sic muscae et formicae. [Cap. XI. Scaligero.] Siluestrium animalium bona pars semel in anno pariunt, modo ne superfoetent, vt lepus.

C A P. IX. (vulgo adhuc IX. Scaligero XI.)

Sic etiam plurimi piscium semel, vt qui chyti a Graecis, a nobis fusanei dicuntur, ii nempe qui retibus circumueniuntur, thunnus, pelamis, mugil, chalcis, coliae, [*optimi Codd. addunt collaenae,*] chromis, passer, et alia eiusmodi, praeter lupum. Is namque ex his solus bis; ac foetus quidem posterior imbecillior est. Trichias autem et saxatiles bis. Solus mullus ter; quod ex foetura deprehenderunt: trinam enim circa quaedam loca

2 obseruarunt. Scorpio autem bis, etiam sargus bis, vere et autumnno. Salpa autumnno semel. Thunna autem semel: nam propterea bis parere credita est,



quia partim tempestius, partim cordus eius foetus est. Nam prior soboles exit circa mensem Posideonem a bruma, posterior vere. Differt a femina thunnus mas pinnula, quam illa sub ventre habet, ipse non habet; aphareum vocant. [Cap. vulgo X.] Sola e cartilagineis squatina parit bis, initio autum- 3  
 tumni et circa occasum Vergiliarum, sed commodiore vtitur autumno. Parit autem septena octonaue circiter. Putarunt quidam, mustelorum aliquos bis parere in mense, vt asteriam; (*stellatum*;) quod contigit propterea, quod non omnia simul ova perficiuntur. Quaedam autem omni tempore 4  
 pariunt, vt muraena. Parit haec multa ova, quae e paruis celeri incremento adollescunt, sicut et hippuri foetus, qui e minimo grandissimus celerrime euadit. At muraena omni parit tempore; hippurus vere tantum. Differt a muraena myrus. Muraena enim [valde] varia et imbecillior: ille vnicolor et validus et pini (pityos) arboris colore similis. Dentes quoque habet intus extraque. Aiunt, quod etiam in ceteris, hanc esse feminam, illum marem. Egrediuntur in siccum, ac saepenumero capiuntur. Fere omnibus igitur piscibus commune est, vt ce- 5  
 leriter crescant; maxime autem omnium inter parvos coracino accidit. Parit is prope terram algosis in locis et opacis. Orphus quoque cito e pusillo

grandis fit. Pelamides autem et thynni in Ponto tantum neque alibi pariunt. Mugiles, auratae, lupi, potissimum qua fluuii influunt. Oreynes autem et scorpides (*Codd. alii scombrides*) aliaque  
6 genera multa in alto mari. [Cap. XI. vulgo.] Pariunt plurimi piscium tribus mensibus, Munychione, Thargelione et Scirrophorione: (*Martio, Aprili, Maio:*) autumno pauci, salpa, sargus et similia quaedam: paulo ante aequinoctium torpedo et squatina. Pariunt quidam etiam hieme, etiam aestate, quemadmodum antea quoque dictum est. Per hiemem lupus, mugil, acus: per aestatem mense Hecatombaeone (*Iunio*) thynna circa solstitium folliculo simile, in quo oua minuta multa continentur. Item rhyades aestate pariunt. In mugilum genere chelones (*labeones*) incipiunt foeti esse mense Posideone; (*Decembri;*) item sargus et myxo (*muco*) et cephalus; (*capito;*) gerunt vterum dies tricenos. Mugiles non omnes e coitu generantur, sed aliqui  
7 oriuntur e limo et arena. Igitur maxima pars vere foeta est. Quanquam autem aestate aliquot et hieme et autumno, vt dictum est, non tamen aut similiter aut simpliciter, aut cuius generi contingit; quemadmodum illis qui in vere; neque numerosis partibus alio tempore frequentantur. Illud autem omnino non debet latere nos, quemadmodum et



plantae et quadrupedes pro locorum diuersitate variantur, neque solum secundum corporis felicem habitudinem, sed etiam coitus partusue frequentia: sic regionum ratione pisces ipsos alios atque alios fieri non solum magnitudine et nitore, verum etiam foetura et coitu; ita vt eodem in genere alibi saepius alibi spissius pariant.

CAP. X. (vulgo XII. Scaligero adhuc XI.)

Vere pariunt etiam mollusca, et cum primis marinorum sepia, quae tamen omni etiam tempore parit, effoetaque fit die demum quinto decimo. (*Athenaeus* parturit dies 15.) Vbi oua ediderit, ea mas assecutus e physetere vocato aspergit atramento, (*alii Codd.* genitura,) atque inde solidescunt. Degunt coniugatim. Est autem mas varius quam femina magis, dorsoque nigriore. Polypus hieme coit, vere parit. Duos circiter latet menses. Edit ouum quasi cirrhum, simile albae populi (vitis *Guilelmi versio*) fructui. Foecundum sane animal est: nam ex eo quod ediderit, infinita multitudo provenit. Differt a femina mas capite (*sic vocato*) oblongiore, et id quod genitale vocant piscatores, habet in brachio candidum. Quae peperit, incubat; quo tempore deterrimi sunt: neque enim tunc in pastum eunt. Nascuntur purpurae verno tempore, 2

et buccini hieme affecta. Omnino quae testa operiuntur tum vere tum autumno inueniuntur plenariis, quae oua appellantur, praeter echinos esculentos. Nam quanquam ii quoque per haec tempora illa habent, tamen ne alias quoque vnquam carent; praecipue autem pleniluniis et tepidis diebus. Ceterum qui in euripo Pyrrhaeorum degunt, per hiemem magis commendantur: minutiores sunt ii, sed pleni ouorum. Per idem tempus (*veris*) vmbilicos omnes quoque praegnantem aequae esse constat.

C A P. XI. (vulgo XIII. Scaligero XII.)

Siluestrium auium plurimae, quemadmodum dictum est, semel coeunt et pariunt. Hirundo autem bis, et merula; sed eius foetum priorem hiems necat: maxime enim mature omnium auium parit. Alterum autem posteriorem educat, quoad perficiatur. Quae autem cicures aut per se sunt aut fieri possunt, eae frequentius, vt columbae tota aestate; et gallinae: coeunt enim tam mas quam femina in genere hoc semper ac pariunt, praeterquam per brumam. Columbini generis multae sunt species. Est enim diuersa liuia (pelias, *Scaligero* turrilia) a columba, ac minor quidem hac, mansuescit autem citius columba. Tum autem liuia siue turrilia nigra ac parua pedibusque et ru-



bentibus et asperis. Ergo nullus eam alere instituit. Maxima harum omnium palumbes, (phatta,) proxima rupilia; (oenas, *Gazae* vinago;) siquidem haec paulo maiuscula est quam columba: minima autem turtur. Pariunt vero columbae toto anni tempore, atque etiam educant, si et loci tepidi et eorum, quae opus habent, vrantur commoditate. Sin autem desint haec, aestate tantum. Pulli verni et autumnales meliores: aestiui, aut aestu infestis diebus qui oriuntur, pessimi.

#### C A P. XII. (vulgo XIV. Scaligero XIII.)

Differunt autem inter se aetatis ratione ad coitum animalia. Principio non est plerisque idem initium et excernendi seminis et facultatis generandi; sed haec postea accedit. Omnia namque animalia prima aetate aut nihil generant, aut generant sobolem tum imbecilliolem tum minorem. Id quod planissime apparet et in hominibus et quadrupedibus, quae animal pariunt, et in auibus. Illorum enim proles, horum oua minima sunt. Aetas autem ad coitum accommodata suo cuique in genere per idem fere tempus plurimis euenit, nisi quippiam occupet aut ex prodigio, aut ex naturae nocumento. Igitur in homine indicio est tum vocis 2 mutatio, tum genitalium et magnitudo et facies,

atque etiam mammae, potissimum autem ortus pubis. Incipit ferre semen circa bis septem annos, sed prolificum ter septenos annos circiter. Ceteris animalibus pubes nulla oritur: nam quaedam pilis omnino carent: quaedam autem aut nullos habent in partibus inferioribus, aut pauciores quam in supernis. Vocem autem in aliis mutari, manifestum est: in aliis autem aliae corporis partes indicant initium tum seminis copiae tum foecunditatis. Habent omnino feminae fere vocem acutiorem, et iuniores quam seniores. Nam cerui quoque mares grauiorem quam feminae vocem emittunt. Mares edunt vocem coitus, feminae autem metus tempore. Feminae breuior vox, mari prolixior. Et senescentibus canibus ingrauescit. Equorum quoque voces diuersae sunt: statim enim natae femellae vocem edunt tenuem atque exiguam: pulli autem, etsi pusillam, maiusculam et grauiusculam tamen: procedente autem tempore plenior. Bimatum autem ubi attigit mas, et inire inceperit, magnam tum ac grauem, femina autem maiorem et clariorem quam antea; idque ad vicesimum vsque annum fere. Post id temporis tamen infirmior emittit tum mares  
3 tum feminae. Magna igitur ex parte, vt diximus,  
4 vox grauior a mare quam a femina emittitur fere, quorum scilicet vox cum productione emittitur.



Neque tamen id in omnibus animalibus, sed in quibusdam e contrario fit, ut in bobus. Horum enim feminae grauiorem vocem edunt, quam mares: et vitulis grauior, quam adultis. Quo fit, ut, si castrantur, in contrarium mutant vocem, siquidem in femineam. Aetatum autem tempora in animalibus sic se habent. Oves capraeque anniculae et ineuntur et vterum gerunt, sed caprae potius: mares autem quoque eodem tempore. Verum quae ab his maribus et quae ab aliis generantur, differunt. Namque mares cum altero anno meliores fiunt, quam ubi senescunt. Sues coeunt tam mas quam femina non ante octauum mensem: sed non nisi annicula parit femina; ita enim tempus foetificationis congruit. At mas ab octauo mense ad duodecimum vsque generat, sed vitiosa. Verum, quemadmodum diximus, locorum ratione aetates variantur. Est enim, ubi sues quadrimestres tam mas quam femina coeant, atque adeo, ut altero inde mense et gignere et educare queant. Alicubi autem apri etiam decimo incipiunt coire mense, durant autem vsque ad triennium. Canis vtriusque sexus anniculus coit; quanquam aliquando etiam octauo mense: sed hoc saepius contingit maribus quam femellis. [*Vulgo contrarium dicitur.*] Fert vterum diebus non paucioribus sexagenis, vno

- alteroue aut ad summum tertio adiecto: citra illud tempus quod editum fuerit, non potest educatione perfici. A partu non ante sextum mensem coitum repetit. Equi mares et feminae bimi coire incipiunt, atque etiam generare: at pulli qui per id tempus concipiuntur, minores sunt et imbecilliores. Verum plurimi, vt tertio anno coeunt, atque inde ad vicesimum vsque annum in dies semper fiunt ad generandam sobolem praestantiores. Admissarii ad tertium vsque et tricesimum vtilis sunt: equae autem ad quadragesimum. Quo fit, vt paene toto vitae tempore coeant. Viuit enim fere mas annos circiter quinque et triginta, femina autem excedit etiam quadragesimum. Iam vero etiam
- 7 iam septuaginta quinque vixit equus quidam. Asinus asinaque tricesimo mense coit; verum raro generant nisi trimi aut etiam sex mensibus grandiores. Quanquam etiam annicula et gessit et educauit. Iam vero et bucula annicula et peperit et educauit foetum, qui ad eam adcreuit magnitudinem, quam par erat adipisci, nec amplius. Haec sunt tempora, quibus animalia haec incipiunt generare.
- 8 Viro septuagesimus annus, mulieri quinquagesimus meta vltima est generandi. Hoc tamen raro paucisque euenit, his vt aetatibus liberos procrearent; sed virorum plurimi quinto et sexagesimo



cessant, mulieres autem quinto et quadragesimo. Ovis vsque ad annos octo parit; quod si bene tractetur, ad vndecimum vsque. Paene autem toto vitae tempore tam mas quam femina coit. Hirco praepingues minus sunt habiles ad generandum: a quibus vites steriles hircescere dixerunt Graeci. Qui si paulo graciliores fiant, eorum coitus proficit ad generandum. Ineunt arietes grandissimas natu primum; iuenculas autem non appetunt. Pariunt autem, quemadmodum supra diximus, agnae minores soboles quam adultae oves. Apri coitus utilis ad tertium annum perfectum vsque; grandiorum soboles deteriores: neque enim inde proficit, robore destitutus. Inire solet satur, et ubi prius alterum non inscenderit: alioqui et celerius absolvunt, et foetus crescunt minus. Minimos vero edit sus primipara; altero autem partu viget; senescens nihilo minus parit, sed marem tardius admittit. Quintum ac decimum natae annum cessant parere atque efferantur. Quo largius aluntur, eo citius tum iuniores tum vetulae ad coitum sollicitantur. Praegnantibus si valde pinguescant, foetu edito minus habent lactis. Quod pertinet ad aetatem, a vegetis parentibus praestantissimi foetus eduntur; quod ad anni partes spectat, qui ineunte hieme generantur; deterrimi aestivi. Pusilli hi et exiles et

soluti. Mas si bene tractetur, quouis tempore vel interdiu vel etiam noctu init; sin minus, potissimum mane. Ac senescens quidem deterius semper, vt dictum est. Saepenumero qui aut per aetatem aut ob impotentiam nequit expedite absoluere coitum, cum femina stando fessa decubuit, concumbens init. <sup>12</sup>Concipit scrofa maxime postquam subans aures demiserit; sin minus, quando iterum subat. Canes non quamdiu viuunt, sed quamdiu vigent, marem admittunt; ita vt fere tum coeant tum vterum gerant ad duodecimum annum. Quamquam tam mari quam feminae et coitus et generatio contingit anno duodeuicesimo, atque etiam vicesimo. Atque his quidem et generandi et pariendi facultas tollitur etiam senectute, sicut et aliis. Camelus retro mingit, et initur, vt supra dictum est. Coitus tempus in Arabia mense Maemacterione; (Septembri;) fert menses duodecim; vnum parit: vniparum enim est. Incipit tum femina tum mas in trimatu; foetu edito, ante annum exactum non <sup>13</sup>repetit venerem. Elephas femina coit, cum citissime, anno aetatis decimo; cum tardissime, quinto decimo; mas autem quinto sextoue decimo: verno sane tempore: tertio post anno coitum repetit. Quam impleuerit, non amplius attingit. Fert annos duos: vnum parit: est enim vniparum animal.



Pullus editus aequat bimestris aut trimestris vituli magnitudinem. Atque hic modus est coeundi animalibus, quae coitu generantur.

C A P. XIII. (vulgo XV. Scaligero XIV.)

Nunc de generatione tam eorum, quae a coitu, quam quae sine eo proueniunt, dicendum est. Ac primum quidem de iis, quae testa teguntur: solum enim, vt ita dicam, genus hoc totum coitus expers est. Purpurae igitur verno tempore eundem in locum congregatae faciunt id quod vocant fauaginem: est enim faui specie, sed minus expolita, quemadmodum si ex folliculis alborum cicerum multis quiddam compactum. Nullus his patet exitus, neque inde fiunt purpurae, sed tum illa tum testacea alia ex limo et putredine proueniunt: illud autem est quasi purgamentum purpurarum, vt et buccinorum: nam buccini quoque fauificant. Generantur igitur haec quoque fauificantia, quemadmodum cetera testacea, facilius tamen, si qua subsint principia referentia genus suum. Cum enim incipiunt fauificare, emittunt lentorem quendam mucosum, ex quo folliculi concrescunt illi. His igitur omnibus solutis, effluit in terram ichor (*humor*), quem continebant. Atque eo in loco purpurillae minutae oriuntur atque concrescunt, quae haerentes pur-

puris capiuntur, aliquot etiam inchoatae tantum.  
 Quod si ante partus tempus capiantur, in ipsis sto-  
 reis non temere pariunt, sed in eundem locum  
 conuentu facto, quemadmodum etiam in mari;  
 sed propter cratium angustias racemi speciem ca-  
 3 piunt. Sunt autem purpurarum genera multa:  
 nam quaedam grandes, vt ad Sigeum et Lectum;  
 aliae paruae, velut in Euripo et ad Cariam. Tum  
 quae in alto mari degunt, magnae sunt atque sca-  
 brae: quarum plurimae florem illum suum atrum  
 habent, aliquae rubrum exiguum. Ex magnis sunt,  
 quae etiam minam pendunt. Quae in littoribus et  
 circa oras [petras *Codices alii*] maris oriuntur,  
 paruae quidem sunt, sed flore rubro. Praeterea in  
 aquiloniis tractibus nigrae, in austrinis rubrae fere  
 4 sunt. Capiuntur vere, quo tempore fauos facere  
 incipiunt; sub canicula autem non pascuntur, sed  
 tum sese condunt ac latent. Florem continent in-  
 ter papauer et collum, quorum contextus [*conne-  
 xio?*] densus est. Speciem habet membranae can-  
 didae, quam auferunt; qua pressa, manus flore  
 tingitur. Per eum transit tanquam vena; hoc ipse  
 flos esse videtur. Reliquus contextus quasi alumi-  
 nis. Cum fauos faciunt, deterrimus flos est. Par-  
 vas cum testis suis tundunt; neque enim facile au-  
 feruntur: at maioribus testa exutis florem detra-



hunt. Ergo collum cum papauere separant, quo-  
 rum in medio flos est, supra eam partem, quam  
 ventrem vocant: quare dum is aufertur, necesse est  
 diuidi. Dant operam, vt viuentes tundantur:  
 nam antequam frangantur, simul atque moriuntur,  
 florem euomunt. Quamobrem congregatas in nas-  
 sis asseruare solent, donec otium nacti fuerint. Ve- 6  
 teres adiunctas escae nassas non demittebant; eue-  
 niebat itaque saepenumero, vt iam extractae reci-  
 derent. Nostra aetate alligant nassas, ne, si de-  
 cidant, amittantur. Facile autem, cum sunt plenae  
 (*grauidae?*), delabuntur, at inanes (*non graui-*  
*dae?*) etiam difficulter auelluntur. Atque haec  
 sunt, quae priuatim ad purpuras pertinent. Modus  
 idem, idemque tempus generationis buccinorum,  
 sicut et purpurarum. Coopercula [quoque] eodem 7  
 modo habent tum horum vtraque tum cetera tur-  
 binata, secum simul nata omnia. Prodeunt in pa-  
 stum lingua sub operculo (*rostro tubulato?*) ex-  
 serta: cuius linguae magnitudo digito maior est,  
 qua pascuntur, et pertundunt conchas, atque etiam  
 sui testam generis. Tam purpura quam buccinum  
 diu viuunt: purpura enim ad annum sextum vsque.  
 Manifestum quotannis deprehenditur incrementum  
 ex vorticis in testa interuallis. Fauificant et my- 8  
 tuli; (*myes;*) at in coeno consistunt principia gene-

rationis ostreorum, quae lacustria dicuntur. Conchae et chamae et solenes et pectines in sabulosis constitutionem suam nanciscuntur. Pinnae autem surrectae e fundo enascuntur in sabuletis et coeno. Habent intra se custodem aut squillam aut cancellum, quo amisso celerius pereunt. Omnino omnia testacea sponte e limo proueniunt, alia ex alio: ostreae in coenoso; conchae et quae supra diximus, in sabuloso; circa saxorum caua tethya et glandes, et quae per summa adhaerent, vt patellae et neritae. Omnia igitur huiusmodi celeriter crescunt: celerrime autem et purpurae et pectines: anno enim  
9 primo perficiuntur. In quibusdam autem testaceis cancri albi, admodum minuti, innascuntur, potissimum in mytulis limosis: deinde in pinnis ii, qui dicuntur pinnotherae; tum autem in pectinum genere et ostreis lacustribus. Neque ad vllam notabilem crescunt magnitudinem: ferunt piscatores, eos cum ipsis nasci. Latent aliquo tempore in arena pectines, sicut et purpurae. Nascuntur igitur ostrea, (biualuia) quemadmodum diximus; verum alia aliis locis. Alia vadis, alia littoribus, partim lutosi, quaedam duris atque asperis, nonnulla arenosis. Ac quaedam mutant loca, quaedam non.  
10 Quae non mutant, partim radicibus affixae sunt, vt pinnae; partim sine radice permanent, vt solenes



et conchae, quae auulsa viuere nequeunt. Quae stella appellatur, adeo calida est natura sua, vt quicquid assumserit, si statim eximatur, discoctum reperiatur. Aiunt autem ab hac peste Pyrrhaeorum Euripum magnopere incommodari. Facies eius stellas pictas repraesentat. Nascuntur sponte ii quoque, qui pulmones nominantur. Concha (ostreum), qua pictores vtuntur, longe praestat crassitudine, floremque suum extra testam habet additum; plurima adiacentibus Cariae locis. Can-<sup>11</sup> celli autem primordia generationis e terra et limo sunt; inde concham inanem subit. Vbi creuerit, ampliorem in testam transmigrat, puta neritae, turbinis aliorumque eiusmodi. Saepe etiam in buccina parua sese induit, quod etiam circumfert, et in quo rursus alitur: auctus tamen iterum in aliam ingreditur capaciore testam.

#### C A P. XIV. (vulgo XVI. Scaligero XV.)

Idem modus generationis eorum quae testa carent, qui et testaceis: cuiusmodi sunt et vrticae et spongiae, quae haerent saxorum cauernis. Vrticarum duo genera: quaedam cauis haerent petris neque absoluuntur: aliae autem laeuibus et planis, quae absoluunt se, et sedem mutant. [*Quod etiam patellae faciunt, vt abscedant et alio migrent.*]

In spongiarum cauis pinnophylaces (*pinnarum custodes*) insunt; caua autem obducit velut aranearum tela, qua vel diducta aut contracta pisciculos venantur; ingressuris enim aperiunt, ingressis occludunt. Spongiarum genera tria sunt, rarum, densum, et tertium quod Achilleum vocant. Tenuissimum hoc et densissimum et validissimum, suppositum galeis et ocreis facit, vt ictuum sonitus leuior sit: rarum sane inuentu. In genere densorum quae spongiae durae sunt vehementer atque asperae, hirci vocantur. Aut ad saxa aut ad littus oriuntur omnes: aluntur limo: quod animaduersum est, cum eo plenae captae sunt. Idem vero accidit ceteris plantis, vt qua parte adhaerent, alimentum capiant. Minus validae sunt densae, quam rariae, propterea quod minus adhaerent. Sentire quoque eas hoc argumento deprehensum ferunt. Nam si sese auulsum iri praesenserint, contrahi adeo, vt haud facile auferantur. Id quod etiam facit vehementi spirante vento et vndabundo mari, ne decidant. Sed sunt, qui hac de re dubitent, atque inter hos Toronenses. Alunt intra sese animalia, vt lumbricos aliaque eiusmodi, quae, cum illae extirpatae sunt, vna cum radicum reliquiis a saxatilibus pisciculis deuorantur. Si autem abrumpantur, ex eo quod relictum est, renascuntur et



complentur. (*Variant libri narrationem. Vide annot.*) Spongiarum maximae igitur rarae illae et 4  
frequentissimae circa Lyciam; molliores densae;  
compactissimae Achilleae. Omnino quae in pro-  
fundis et tepidis locis sunt, mollissimae: vento enim  
et frigore, sicut et alia plantarum genera, indu-  
rantur, atque crescere prohibentur. Quare Helles-  
ponticae asperae sunt et densae: denique molliores  
durioresue, prout vltra citraue Maleam oriuntur.  
Quanquam ne aestu quidem vehementi opus ha- 5  
bent: puterent enim, sicut et plantae. Itaque quae  
nascuntur ad littora, si profunda sint, praestantissi-  
mae: temperantur enim ad vtrumque (*frigus et*  
*aestum*) ipsa profunditate. Nisi lauentur, dum  
viuunt, sunt nigrae. Haerent neque vna tantum  
parte, neque omnibus; interuenientibus scilicet fi-  
stulis inanibus; atque ambiuntur ad radicem quasi  
membrana; pluribus tamen partibus haerent. Mea-  
tus autem superiores nulli sunt peruii, praeterquam  
quatuor aut quinque: quae fuit caussa, vt dicerent  
aliqui, his eas cibum capere. Est et aliud genus, 6  
quas aplysias nominant, propterea quod elui ne-  
queant. Hae magnas quidem illas fistulas habent,  
at cetero corpore denso sunt, dissecto vero den-  
siore lentioreque spongiis aliis, atque omnino pul-  
monem magis referente. Igitur hoc genus prae-

cipue consentiunt et sensu praeditum esse et diu vivere. Discernuntur etiam in mari spongiis, quoniam spongiae insidente limo candicant, aplysiae semper atrae sunt. Spongiarum igitur et testaceorum generatio talis est.

CAP. XV. (vulgo XVII. Scaligero XVI.)

In genere crustatorum locusta post coitum impletur, et continet oua circiter menses tres, Scirrophorionem, Hecatombaeonem et Metagitnionem. (*Maium, Iunium et Iulium.*) Deinde edita sub ventre ad plicaturas immatura exponuntur, vbi crescunt, quomodo solent vermiculi. Id quod commune est et molluscis et piscibus ouiparis, vt  
 2 omnium oua crescant. Locustarum igitur ouum est solutile in arenae modum, octo in partes partitum. Singulis enim cooperculis, (*segmentorum caudae lateribus productis*) quae in lateribus sunt, cartilagineum quiddam (*appendices ramosae et pinnatae*) additum est, circum quod haerent oua cumulata specie rami. Vnumquodque enim horum cartilagineorum in plura scinditur. Quod deprehendas, si diducas; sin procul intueare, vnum corpus concretum putes. Grandissimum quodque non est ad foramen, sed ad medium: postrema autem minima. Minimis magnitudo



quanta fici granulo. Neque continuo ipsi meatui 3  
 haerent, sed medio. A cauda namque ad pectus  
 duo, singula vtrunque, sunt potissimum interualla.  
 Sic enim cooperacula ipsa disposita sunt. Ipsae  
 igitur per se partes laterales (*caudae*) non possunt  
 comprehendere (*oua*), sed adducto extremo (*cau-*  
*dae*) omnia conteguntur, atque ita fit velut opercu-  
 lum. Videtur autem parturiens producere oua ipsa 4  
 ad illa cartilaginea fine caudae lato applicato. Ap-  
 primens enim illam et sese curuans parit. Carti-  
 laginea ista hoc tempore augescunt ita, vt ouorum  
 ipsorum capaciora esse possint. Nam ad cartila-  
 ginea pariunt, sicut sepiae ad malleolos aut alia  
 quae in aqua fluitant. Is est pariendi modus. Con-  
 coquit autem ibidem potissimum vicens diebus:  
 tum abiicit cuncta simul consistentia, sicut, cum  
 eiecit, videntur. Inde ex his locustae oriuntur die  
 fere quinto decimo; capiunturque saepenumero  
 minores digito. Ante Arcturum oua immatura  
 pariunt: post Arcturum amittunt oua. E squilla- 5  
 rum genere gibbae circiter quatuor menses vterum  
 gerunt. Locustae in asperis et saxosis, astaci in  
 locis laeuibus nascuntur: in lutosi neutrum genus.  
 Idcirco in Hellesponto et circa Thasum astaci, ad  
 Sigeon et Athon locustae. Discernuntur a pesca-  
 toribus loca vel aspera vel lutosa oris littoralibus,

aliisque id genus indiciis, cum volunt ipsi in alto piscari. Vere et hieme propius terram, aestate in alto versantur. Captant enim aliquando calorem, 6 aliquando frigus. Quae vrsae vocantur, simili tempore atque locustae pariunt. Itaque et hieme et antequam pariant vere, maxime commendantur: ubi pepererunt, deteriores sunt. Quemadmodum verno tempore serpentes exuunt cutem, quam appellant senectam, ita et locustae et cancri tam recens nati, quam post, crustam suam. Locustis omnibus vita longa est.

CAP. XVI. (vulgo XVIII. Scaligero XVII.)

Mollusca ex coniugio et coitu ouum gerunt album, quod processu temporis in arenae modum con-  
crescit, quale etiam in genere crustatorum. Deponit polypus aut in cauernis aut in testis alioque cauo  
loco simile quiddam labruscae cirrhulis et candidae populi fructui, quemadmodum supra dictum  
est. Edita oua dependent ab ambientibus specuum  
parietibus tanta copia, ut exemta vas impleant  
longe maius quam caput ipsius, in quo ipsa conti-  
2 nebantur. His quinquagesimo demum die disruptis,  
pusilli polypi generantur, et magno agmine serpunt  
phalangiorum more. Ac quanquam non omnibus  
membrorum singulorum natura conspicua est, tota



tamen apparet forma. Multi autem propterea, quod et minuti sunt et inualidi, pereunt. Adeo vero aliquando exigui reperti sunt, vt nihil haberent discretum, ceterum contacti mouerentur. Sepia 3  
 piae edunt similia myrti baccis nigris grandioribus, quae ita racematim cohaerent, vt cuncta vni cuiuspiam (*corpori*) nexu agglomerata non facile separari possint. Superinfundit enim mas humorem quendam mucidum, qui viscidam illis naturam impertitur. Inde oua increscunt, quae primum edita candida sunt: affuso vero atramento (*semine alii Codices*) et grandiora et nigriora euadunt. Ergo vbi ex albumine tota sepiola intus generata est, obrupta cute exit. Principio id quod femina 4  
 primum emisit grandinis specie constat; atque ex eo sepiola facta exit in caput, quemadmodum aues, ventre annexa; qualis autem annexio haec ab umbilico sit, nondum constitit, nisi quod crescente sepia decrescit albumen semper; tandemque vt in auibus luteum, sic in his album deficit. Oculi primum 5  
 grandissimi extant in hoc genere, sicut et in aliis. Pingatur ouum, vbi est A; oculi, vbi B, C; sepiola, vbi D. Vere vterum gerit; parit diebus quindecim: edita oua totidem diebus sequentibus euadunt quasi acini racemorum, sed minores: quibus obruptis exuunt sese inde sepiolae. Quod si quis membranulam cir-

cumsecare occupet, quae sunt iam perfectae sepiolae, stercus emittunt, mutatoque colore ex candidis  
6 rubrae fiunt ob metum. Crustata quidem suppositis sibi incubant ouis; at polypus et sepia et cetera eiusmodi cum ediderint oua, vbicunque ea adhaeserint, fouent, praesertim sepia, cuius prope terram extantem alueum saepenumero obseruare licet. Polypus autem femina interdum ouis incubat, alias cauernae ostio assidet brachio superposito. At sepia iuxta terram parit, circum algam et arundineta aliudue quippiam, quod a mari eiectum sit, vt materia, sarmentum aut lapides. Itaque piscatores sternunt malleolos studiose, ad quos parit oblongum quasi cirrhum ex ouis cohaerentibus compositum.  
7 Parturit autem et emittit paulatim (*oua*) repetitis vicibus, propterea quod laboriosus eius nixus est. Loligines in alto pariunt oua conserta vt sepiarum. Tam loligo quam sepia non diu viuunt: neque enim annum alterum explent, praeter paucos. Sic et polypi. Singulis ex ouis singulae produnt sepiolae, quemadmodum et loligines. Differt lolius mas a femina, quoniam capillos (*branchias*) si diducas, intus corpuscula duo rubra mammillarum specie deprehendes, quibus mas caret. In sepiarum genere tum femina hoc discrimen habet, tum mas varius magis quam illa, vt supra dictum est.



## CAP. XVII. (vulgo XIX. Scaligero XVIII.)

In genere insectorum quemadmodum mares essent feminis minores, easque a tergo inirent, quoque modo et coirent, et a coitu sero absisterent, iam dictum est. Hoc igitur in genere quae ineuntur, ab ipso coitu maxima pars cito parit. Pariunt autem omnes vermem praeter papilionum genus quoddam, quod edit durum quiddam, cnechi (*cartami*) semini simile cum humore (medulla *Scaliger*) intus. E verme autem ita fit animal, ut non ex eius parte, sicut ex ovo, sed totus crescat et dearticulatum animal euadat. Generantur eorum 2 quaedam ex animalibus congeneribus, veluti phalangia et araneae ex phalangiis et araneis, et bruchi (attelabi) et locustae et cicadae. Quaedam autem non ex animalibus, sed sponte. Nam quaedam errore, qui super folia deciderit, naturae quidem instituto per ver, diuturniore autem serenitate austrina etiam hieme saepenumero. Alia in coeno aut fimo putrescentibus. Quaedam in lignis aut plantarum aut iam aridis. Alia inter pilos animantium: alia autem in carnibus animalium aut in excrementis, vel iam excretis, vel quae adhuc in animalibus continentur, quales sunt lumbrici. Quorum genera tria sunt, qui lati appellantur, et 3 qui rotundi, et qui dicuntur ascarides. Atque ab

his quidem nihil praeterea procreatur, nisi quod  
lati haerent quidem intestino, pariuntque quid-  
dam simile semini cucumerino; quo indicio iudi-  
4 cant medici, id genus inesse. Fiunt papiliones ex  
erucis; hae autem fiunt in foliis virentibus potissi-  
mum brassicae. Primum milio minor est; deinde  
minuti vermes, tum crescentes; tertio die erucae  
pusillae; posthaec auctae nullum motum edunt,  
ac formam mutant, chrysallidesque vocantur, cru-  
staque dura continentur; atque si attingantur, mo-  
tum edunt. Meatibus (*filis*) araneosis adhaerent,  
(*vulgo* obducuntur) neque os habent, neque par-  
tem ullam aliam manifestam. Crusta non multo  
post tempore obrumpitur tandem, unde alata ani-  
5 malia euolant, quos vocant papiliones. Initio  
igitur, dum sunt erucae, et aluntur, et deiiciunt  
excrementum: factae autem chrysallides, neque  
quicquam gustant neque excernunt. Idem modus  
etiam ceterorum animalium, quae e vermibus fiunt,  
siue ex animalium coitu vermes seu sine coitu ori-  
antur. Apum autem et crabronum (anthrenarum)  
et vesparum (sphecum) recens nati vermiculi et ci-  
bum capiunt et stercus habere videntur; cum au-  
tem e vermium figura in aliam transeunt, qua  
nymphae tunc vocantur, neque vllum capiunt ci-  
bum, neque amplius excrementum habent; sed



conclusae tantisper motu cessant, dum creuerint. Tunc pertuso eo, quo oblitus locus vel fauus occludebatur, egrediuntur. Fiunt quoque penia et 6 hyperae e quibusdam erucis, cuiusmodi sunt, quae fluctuatim ambulant, et progressae altera parte curuata subsequuntur. Vnumquodque autem, quod inde nascitur, colorem refert suarum erucarum. Ex verme autem quodam magno, qui tanquam cornua habet, et ab aliis differt, mutato primum fit eruca, deinde bombylius, ex eo necydalus. Sex menses has omnes formas mutat. Ex hoc animali bombycina mulieres quaedam excolunt deglomerantes, atque inde texunt: cuius rei auctorem ferunt extitisse in Co insula Pamphilam Platis filiam. E vermibus, qui in arido ligno oriuntur, fiunt ca- 7 rambii (cerambyces? *vulgo* carabi) eodem modo: primum enim vermes immoti iacent, deinde obrupto putamine exeunt carambii. E brassicis fiunt [*crambides vocatae*,] quae et ipsae sunt alatae: [*ex porris vero*] porricidae. (prosocurides.) Ex pusillis animalibus, quae fluminum aequor supercurrunt, asilus generatur: quare asilorum frequentia maxima, vbi et aquae et talia animalia. Ex nigris erucis, quae pilosae neque magnae sunt, primum fiunt cicindelae, (pygolampades,) non volucres istae: eae rursus in aliud animal alatum mu-

- 8 tantur, quos vocant cirrhos. (bostrychos.) Empides ex ascaridibus fiunt; ascarides autem in limo puteorum et quocunque aquae, subsidente concretione terrena, confluunt. Principio limus ille putrescens colorem capit candidum; deinde nigrum; postremo sanguineum. Tum ex ea quaedam perexigua rubra oriuntur, algae pusillae specie; ea aliquamdiu haerentia mouentur, postea abrupta feruntur ab aqua, et vocantur ascarides. Diebus haud multis post tollunt sese rectas ab aqua, neque mouentur et sunt durae: tandem obrupto putamine eulex superinsidet, donec sole aut flatu moueatur, vt inde auolet.
- 9 Omnium aliorum quoque et vermium et ex vermibus erumpentium animalium generationis (*motus?*) principium videtur esse aut a sole aut a vento. Frequentius autem et maturius proueniunt ascarides, vbi subsidit promiscua materies, quemadmodum in terrae Megaricae aruis: putrescunt enim haec citius. Autumno magis nascuntur; quo sane tempore humor plus deficit. Ricini e gramine oriuntur. Melolonthae (*scarabaei aurei?*) e vermibus ortis  
 10 in fimo bubulo et asinorum. At canthari (*scarabaei pilularii*), quod volutant sterco, in id con-  
 dunt sese per hiemem, vermesque pariunt, vnde proles prodeat. In leguminibus gignuntur vermiculi, e quibus fiunt volueria animalia, quemad-



modum ea, quae iam diximus. Muscarum ortus fit e vermiculis in fimo, quem agricolae seorsum a stramentis separarunt. Quare ii, qui in hoc opere sunt, contendunt secernere reliquum ster-  
coris, quod sincerum non est, ibique aiunt fimum confici. Vermiculorum autem principia exigua. <sup>11</sup>  
Primum enim in his quoque rubor subit, atque ex immobilibus proficiunt ad motum, tanquam adhaerentia. Deinde vermiculus euadit immobilis; tum demum motus; rursus mouere se cessat, atque ex ea musca perficitur, moueturque flatus solisue superuentu. Tabani (myopes) e lignis oriuntur. Orsodacnae mutatis vermiculis, qui in brassicae caulibus nascuntur. At cantharides e ficariis crucis, aut quae in piris, pinis et canino rubo, (cyanacantha,) quibus omnibus oriuntur vermes. Appetunt autem olida, propterea quod tali ex materia ortae sunt. Culices (conopes) autem ex vermi- <sup>12</sup>  
culis, qui ex aceti faece oriuntur. Animalia namque etiam in iis, quae putrefieri minime posse putant, videntur nasci: quemadmodum in vetustaniue vermes. Qui propterea et rubri sunt, et hirsuti, quia nix vetus quoque rubra est. At in niue Mediae terrae candidi et grandes. Omnes autem torpidiores sunt. In Cypro autem insula, vbi chalcites lapis iniectus pluribus diebus excoquitur,

ibi in igne oriuntur bestiolae grandibus muscis paulo maiores, alatae, quae per ignem ambulant et  
 13 saliunt. Moriuntur autem tam illi, si ex niue, quam hae, si ex igni eximantur. Fieri autem posse, ut ne quorundam animalium constitutiones igni soluantur, salamandra indicio est. Haec enim, ut  
 14 aiunt, per ignem incedens eum extinguit. Ab Hypani fluuio, qui in Bosporum fluit Cimmerium, sub solstitio deferuntur quasi folliculi, acinis maiores, quibus ruptis exit animal alatum quadrupes. Viuit hoc volatque ad serum diei vsque: inclinato sole tabescit, cumque occidente occidit, die vnico transacta vita. Vnde etiam ephemerum vocant, quasi diarium dicas. Maxima eorum pars, quae ex crucis aut e vermiculis oriuntur, prius araneaceis telis retinentur et firmantur. (*Vulgo erat: involuta continentur.*) Haec igitur sic generantur. [Vulgo Cap. XX. Scaliger continuat Cap.  
 15 XVIII.] Vespae autem, quae ichneumones appellantur, atque aliis sunt minores, ab se interfecta phalangia ferunt ad parietinas aut alio, vbi foramen sit, lutoque oblito ibi pariunt, vnde ipsae generentur. Quaedam eorum, quae alas vagina tectas habent, paruaque sunt et sine nomine, ex luto tubulos (nidos) extruunt paruos aut ad sepulcra aut ad parietinas, in quibus vermiculos suos



pariant. Maximae paene horum parti generationis 16 tempus ab initio ad finem vsque ternis quaternisque mensuratur septimanis. Vermes enim et vermibus similia pleraque tertia absoluuntur septimana: ouipara autem quarta plerumque. Post coitum namque haec diebus septem concrescunt; reliquis ter septenis incubant atque excludunt quae generarint, vt araneus et alia eiusmodi. Mutantur autem plurima ternis quaternisque diebus; quemadmodum etiam in morbis eueniunt dies iudiciorum. (*critici*) Insecta igitur sic generantur. Intereunt autem ru- 17 gatis membris, quemadmodum senectute maiora animalia: alata vero etiam alis contractis autumni tempore: tabani (*myopes*) vero oculis aqua suffusa turbatis.

C A P. XVIII. (vulgo XXI. Scaligero XIX.)

Quemadmodum autem apes generentur, non omnibus eadem sententia est. Quidam enim negant eas et parere et coire, sed ferre prolem, vel, vt quidam dicunt, a callyntri, (*Gaza et Scaliger cecyrinthae*,) alii ab arundinis, alii ab oliuae flore. Cuius rei argumentum sit, quod vbertate oliuarum plurima prodeunt examina. Sunt qui affirmant, fucos ab ipsis ferri de aliqua materia supradictarum; at apiculis parentes esse reges, eosque parere. Regum autem genera duo; praestantior rufus: 2

alter niger et varius magis. Regis magnitudo tanto altero maior, quam operariae apes; quique infra cincturam locus est quam reliquum corpus cum maxime dimidio longior. Vocantur ab aliquibus matres, quasi quae pariant. Dicunt indicio esse, quod fucorum foetus innascantur etiam, ubi reges absint, apum autem non innascantur. Alii aiunt  
 3 coire eas: mares esse fucos, apes feminas. Atque aliarum quidem generatio in cauis fauorum est, reges autem oriuntur infra ad (*extremos*) fauos, seorsum collocati, seni septeniue, [*protuberantes?*] contra quam cetera foetura. Aculeum apes habent, fuci non habent. Reges et duces habent quidem, sed non figunt; quare quidam eos carere arbitrantur.

#### C A P. XIX. (vulgo XXII.)

In genere apum praestantissima quae parua, rotunda, varia: alterum genus est oblongum et vespae (*anthrenae*) simile: tertium furem vocant: niger is, aluo lata. Quartus fucus, omnium maximus, sine aculeo, ignauus. Quamobrem obtexunt aliquid circa aluearia, qua apes ingredi queant, fuci, quod sint grandiores, nequeant.  
 2 Regum genera quot diximus, duo. Sed in singulis aluearibus plures sunt, non vnus solus. Nam sane perit examen, nisi satis intus regum sit; non



propterea quod principe careant, sed quia, ut aiunt, conferant ad apum generationem; sicut etiam, si multi sunt, distrahunt. Vernum tempus 3 si sero appetat et squallente coelo, itemque et rubigine, foetura infrequentior fit; sed sicco tempore plus mellis operantur; pluuio foeturae student. Itaque simul est et oliuarum et foetus copia. Construunt igitur primo fauos, deinde foetum induunt ore editum, ut aiunt, qui aliunde ferre ipsum tradunt; deinde ita mel, quo alantur, tam aestate quam autumnno. Autumnale vero praestantius est. Fauos e floribus conficiunt, melliginem ex arborum 4 lacrima. Mel autem ex aere cadit, praesertim siderum ortu, atque ubi incubuerit coelestis arcus. (*alii sirius.*) Neque enim ante ortum Vergiliarum mel fit. Ceram igitur, ut diximus, faciunt ex floribus: mel autem non faciunt, sed id quod decedit legunt tantum. Cuius rei argumentum est: vno enim aut altero die apiarii cellas inueniunt melle plenas. Praeterea autumnno flores sunt, et tamen nullum fit mel, si castrentur. Castratis igitur alueariis, cum aut inedia apes aut penuria laborant, operarentur sibi mel, si ex floribus conficeretur. Maturitate spissatur mel: nam per initia 5 dilutae aquae modo diebus aliquot liquidum est. Quo tempore etiamsi exprimatur, crassum non est.

Vicesimo demum die concrescit. Prodit se statim sapore: differt enim et dulcedine et crassitie. Legit apis ab omnibus quae in calice flores habent, et ab aliis, quae dulcia sunt, nullum laedens fructum. Sed horum sapes lingua illa sua exceptos fert.

- 6 Aluearia castrantur, cum caprifici fructus apparuerit: soboles eae praestantissimae sunt, quae, cum mellificant, procreantur. Ceram autem et erithacen in cruribus gerunt. Mel ore vomunt in cellas. Vbi foetum peperit, auium more incubat. In fauo igitur vermiculus pusillus ad latus iacet; tum ipse sese erigit atque alitur: neque enim fauo ita adhaeret vsquam, vt inniti possit. Apum fucorumque foetus aequè candidus est. Ex quo vermiculus generatur, qui postea crescens fit apis aut fucus. At regum foetus colore subrufus, tenuitate mellis crassioris, magnitudinem statim habet, quantum id quod ex eo generatur. Ceterum non fit inde vermiculus primum, sed statim, vt aiunt, apis exit. Vbi peperit, in fauo e regione loci illius mel situm
- 7 est. Cum fauus desuper oblitus fuerit, foetus capit pedes atque alas; vbi vero absolutus fuerit, obrupta membrana euolat. Quamdiu vermiculus est, sterminus emittit; postea nullum, nisi cum egressus fuerit, vt diximus. Quod si quis eorum capita amputarit, priusquam alas habeant, eos apes



ipsae deuorant: quemadmodum, si fucum ademitis alis emiseris, ceterorum ipsae erodent alas. Vivunt annos sex quaedam vel septem. Quod si durat examen nouem decemue, bene actum secum putant. In Ponto genus apum valde candidum, quae bis in mense mellificare solent. In Themiscyra ad Thermodontem fluium tam in terra quam in alueis fauos construunt, in quibus pauca cera admodum, mel crassum, fauus laevis atque aequalis est. Hoc tamen non semper faciunt, sed hieme tantum. Hedera enim his locis multa, a qua per id tempus florescente mel legunt. E superioribus (*interioribus* vel *mediterraneis*) locis in Amisum defertur mel candidum et inprimis crassum, quod apes operantur sine fauis in arboribus: quale etiam in Ponto alibi quoque est. Sunt etiam apes, quae in terra triplices condunt fauos; in quibus mel quidem inuenias, sed vermem nullum. Verum neque omnes faui tales, neque omnes apes id faciunt.

CAP. XX. (vulgo XXIII. Scaliger continuat CAP. XIX.)

Crabrones vespaeque (anthrenae et spheces) favos exaedificant pullis suis, si ducem habeant nullum, eumque palantes quaerant: ac crabrones quidem in sublimi loco aliquo, vespae in foraminibus.

Quae ducem habent, sub terra. Horum item faui sexanguli, quemadmodum et apum, compositi non e cera, sed ex corticea materia atque araneosa. (*alii Codices* arenacea.) Crabronum operosiores quam vesparum. Ad cellae latus apum more deponunt foetus subs guttae magnitudine, qui parieti adsiti sunt. Non omnibus in cellis tamen simul foetus est, sed in quibusdam adeo grandes, vt etiam volare possint: in aliis nymphae; in aliis vermiculi adhuc. Quibus solis adest stercus, sicuti etiam in apum genere. Ac quamdiu nymphae sunt, non mouentur, et fauus occlusus est. In cella autem fauorum, qui a crabronibus instituuntur, ex aduersum foetus quasi mellis gutta inest. Foetificant non vere, sed autumnò; atque pleniluniis potissimum crescunt. Soboles non in cellae fundo iacet, sed lateri applicatus.

C A P. XXI. (vulgo XXIV.)

Quaedam ex bombycum genere ad lapidem aut tale quid construunt e luto metae figuram sale quasi quodam oblitam. Crassum hoc durumque: lancea enim vix diuidi potest. In eo pariunt, vnde fiant vermiculi candidi nigra in membrana; seorsumque a membrana ceram in luto, quae longe est pallidior quam apum cera.



[Vulgo XXV. Scaligero XX.]

Coeunt etiam formicae et pariunt vermiculos 2  
 [ouorum specie *addit Plinius,*] qui nulli rei an-  
 nexi sunt. Ii initio e paruis et rotundis crescendo  
 fiunt oblongi, atque in membrana debita discer-  
 nuntur. Horum ortus vere est. [Cap. XXVI. vulgo,  
 XXI. Scaligero.] Pariunt etiam terreni scorpiones 3  
 vermiculos ouorum specie multos, atque incubant.  
 Ii vbi sunt perfecti, expellunt parentes atque inter-  
 ficiunt; quod etiam in araneorum genere fit. Saepe  
 ad yndecim numero generantur.

C A P. XXII. (vulgo XXVI. Scaligero XXII.)

Vniuersum genus araneorum coit quo diximus  
 modo. Parit vermiculos pusillos primum. Totius  
 enim mutatione fiunt, non ex parte: alioquin ro-  
 tundi per initia sunt: (*vt ouorum speciem prae-*  
*bere possint.*) Cum peperit, incubat ac figurat  
 tribus diebus. In tela pariunt omnes, sed partim  
 in tenui et breui, partim in crassiore: et alii in si-  
 nu orbiculato: nonnullis etiam aliqua tantum ex  
 parte circumdantur a tela. Non omnes araneoli  
 simul generantur: statim nati et saliant et filum  
 emittunt. Humor idem in vermiculis attritis et in  
 iuueniculis araneolis, quippe crassus, candidus.  
 Pratenses aranei pariunt in tela, cuius dimidium 2

applicatum ipsis matribus est, alterum dimidium foris extat. Atque in ea tamdiu foetum fouent, quoad animal perficiatur. Phalangia crassi quali speciem texunt, in quam pariant atque incubent. Ac venustioribus quidem araneis foetus infrequentior, phalangiis autem numerosa proles. Quae ubi adulta fuerit, circumsisit matrem, atque interfectam eiicit; saepe etiam patrem, si comprehenderit. Vna enim fouet ille quoque interdum cum coniuge. Vni phalangio ad trecentos numero circumfusi visi sunt. Aranei circiter quater septenis diebus e paruis absoluti fiunt.

C A P. XXIII. (vulgo XXVIII. Scaligero XXIII.)

Locustae aliorum insectorum more coeunt, in-scendente minore maius. Minor enim mas est. Pariunt autem in terra, impacta fistula, [*alii Codd. et Plinius* caule] quam ad caudam habent ipsae: mares non habent. Simul cuncta pariunt, eundemque in locum deponunt, ita vt quasi fauus fiat. Deinde ubi pepererint, ibi nascuntur vermes, oui specie, qui comprehenduntur a terra quadam tenui quasi a membrana, in qua maturescunt. Foetus adeo molles edunt, vt solo tactu elidantur: neque in terrae superficie, sed paulo infra. Tum



excoctae et maturatae emergunt ex terreo illo tegmine locustillae minutae ac nigrae: postremo circumrupta cute euadunt grandiores. Pariunt affecta aestate, simulque effoetae intereunt. Circum nam- 3  
que earum collum innascuntur vermes tunc. Eodem tempore etiam mares pereunt. Exeunt desubtus terram vere. Locustae in terra montana aut squalida (*exili*) non oriuntur, sed in campestri atque hiante. In rimis enim pariunt oua sua: e quibus, transacta in terra hieme, proueniunt e superstitibus foetibus locustae ineunte aestate. [Cap. XIX. vulgo, XXIV. Scaligero.] Simili modo bruchi (attelabi) 4  
et pariunt et post partum moriuntur. Corrum-  
puntur eorum oua autumnis, cum multi imbres ingruunt. At sicciore tempestate prouentus eorum maior, haud perinde corruptis ouis, propterea quod eorum interitus neque certo ordine et fortuito fieri videtur.

#### C A P. XXIV. (vulgo XXX. Scaligero XXV.)

Cicadarum genera duo: vnum paruum, quod primum apparet, postremum interit. Alterum maius canorum tum posterius oritur, tum prius perit. Quae canunt, siue e maiorum siue e minorum genere sint, ad praecinctum secturam habent. Quibus autem continua ea pars, eae non canunt.

Maiores canoras vocant nonnulli achetas, minores autem cicadellas: (tettigonia:) quarum quae diuisuram habent, etiam aliquantulum cantillant. Loca arboribus vacua non ferunt cicadas. Itaque in agro Cyrenaico nullae sunt: at ad urbem ipsam frequentes. Praesertim ubi oliuae crescunt, proueniunt, utpote quae non multa opacent umbra. Nam cum frigidis locis non nascantur, ne in opacis quidem lucis reperiuntur. Ineuntur maiores similiter atque minores supinae inter se copulatae. Immittit in feminam mas, non (*Negationem omittunt Codices.*) ut alia insecta. Habet femina scissum genitale; femina intelligitur ea, in quam mas suum immittit. Pariunt in aruis cessantibus, sicut et bruchi, quorum partus in ipsis item fit, perforantes mucrone illo, quem ad clunes habent. Quamobrem in agro Cyrenensi large nascuntur. Pariunt etiam in arundinibus, ex quibus facta sunt vitibus pedamenta, et in squillae caulibus. Qui foetus in terram decidunt. Magnus earum prouentus per imbres. Cum in terra creuerit vermiculus, fit tettigometra: quo tempore sunt in cibo suauissimae, antequam calix dirumpatur. Appetente autem solstitii tempore, noctu prodeunt statim rupto cortice; atque ita ex tettigometris cicadae fiunt, nigrae quidem ac statim duriores et maiores: et iam canunt.



In utroque genere quae canunt, mares sunt; reliquae feminae. Ac primum quidem mares suauiores; a coitu vero feminae: habent enim ova candida. Cum excitatae auolant, emittunt humorem 5 aquae specie: eo agricolae putant ipsas mingere, perinde atque excrementum roris, quo alantur. Si quis digitum mouens appropinquet, ita ut a summo articulos paulatim incuruet et rursus extendat, securiores manent, quam si derepente extendat, et transcendunt in digitum, quasi in folium motum, propterea quod obscure cernunt.

## CAP. XXV. (vulgo XXXI. Scaligero XXVI.)

Insecta quae carniuora non sunt, sed viuorum corporum succum depascuntur, cuiusmodi pediculi et pulices et cimices, e coitu generant omnia ea, quae lendes vocantur. Ex his aliud nihil gignitur rursus. Horum generatio talis est. E minima putredine pulices; ubi fimus aridus sit, ibi concresecunt. Cimices ex vapore, qui consistit in cute animalium: pediculi e carnibus. Nam cum prope est ut enascantur, extant veluti pustulae pusillae sine pure, quas si acu aperias, prodeunt pediculi. Euenit quibusdam exuberante humore plurimo, ut pediculari morbo capiantur: interemtis etiam nonnullis iam ad hunc modum, velut Alcmanem

- 2 poetam et Syrium Pherecydem narrant. Et in quibusdam morbis pediculi proueniunt. Pediculorum genus est, quod ferum vocant. Durius hoc quam quod in multis gignitur; nec facile a corpore auelli possunt. Puerili aetate pediculis plus scatent capita; virili minus: item feminis plus quam viris. Quibus caput pediculis frequens est, iis minus saepe dolet. Proueniunt etiam pediculi aliis in animalibus; habent enim et aues. Quin etiam phasiani qui vocantur, ab iis necantur, nisi puluerentur: item et aliae, quarum pennae caulem habent. Et ea animalia, quae pilis teguntur, excepto asino, qui neque pediculis neque ricinis infestatur. At boues vtrumque habent. Oues et caprae ricinum, pediculum non. Item sues grandibus pediculis durisque laborant. Canibus autem generantur, quos cynoraïstas vocant. Pediculi ex ipsis animalibus fiunt, in quibus generantur. Quae animalia et lauantur et solent pediculos generare, ea tum pluribus infestantur, cum aquas, quibus se
- 3 lauant, mutant. In mari qui pediculi infestant pisces, non ex ipsis fiunt piscibus, sed e limo proueniunt. Eorum facies similis asellorum, qui multis pedibus praediti sunt; nisi quod caudam habent latam. Omnibus his vnum genus, et vbi-que proueniunt, maxime autem in triglis. (*Vulgo*



circa foramina.) Omnia autem haec insecta et exanguia sunt, et multis praedita pedibus. In nonnullis thynnis circa pinnas inuenitur asilus (oestrus) scorpionis figura, aranei magnitudine. In mari, quod inter Cyrenen et Aegyptum interiacet, delphini comes quidam piscis est, pediculum vocant. Is omnium maxime pinguescit, propterea quod e delphini venatu largissimo impletur cibo.

C A P. XXVI. (vulgo XXXII. Scaligero  
C A P. XXVII.)

Nascuntur et alia pusilla animalia, quemadmodum antea dictum est: nonnulla in lanis et lanificiis, quales tineae, quae tum magis proueniunt, cum puluerulentae lanae sunt: maxime vero, cum aranea conclusa fuerit. Exucto enim, si quis intus, humore, siccat. Vermiculus is tunica quadam amicitur. In cellis apum quoque vetustis non secius gignitur quam in arido ligno animal candidum, quod omnium animalium minimum videtur esse; et vocatur acari. In libris quoque gignuntur animalcula quaedam vestiariis tineis similia, alia scorpionibus, sine cauda, pusilla valde. Omnino in omnibus fere et aridis, si humescant, et humidis, si exsiccentur, si quidem viuant. (*vel vitam sustentare possint.*) Est vermiculus quidam, quem 2

- xylophthorum (*Gaza ligniperdum*, *alii Codd. xylophorum, id est lignigerum*) vocant Graeci, non minus his absurdum animal. Extra folliculum caput varium extat, et in summo pedes, vt aliis vermiculis: in tunica autem araneorum telae simili ceterum corpus, quod a festucis continetur, ita vt, cum ingreditur, ei haerere videantur. Haec con-nata ipsi sunt tunicae: ac quemadmodum testa cochleis, sic totum hoc vermiculo: neque exuitur, sed auellitur tanquam adnatum. Tunica detracta moritur, atque perinde inutilis fit atque cochlea exenita testa. Procedente tempore fit chrysalis, erucarum more, vivitque sine motu. Verum quid inde alati animalis fiat, nondum perspectum est.
- 3 In fructibus caprificorum culices generantur, quos Graeci psenes vocant. Vermiculus initio, deinde cute dirupta atque coram relictā euolat subitque ficos immaturos, quos pertusos facit ne decident. Itaque applicant caprificorum poma ficis agricolae, et circumserunt ficos caprificis.

C A P. XXVII. (vulgo XXXIII. Scaligero

C A P. XXVIII.)

Quadrupedes ouiparae, quarum concretio constat sanguine, vere generant: quanquam non omnes eodem coeunt tempore, sed partim vere, partim



aestate: circa autumnum aliae, vt cuique foeturae subeuntis temporis ratio commodior sit futura. Testudo (*terrestris*) ouum parit, cuius cortex durus est, et bicolor, quale etiam auium. Edita defodit atque impositam terram pauit: tum frequenti incubatu fouet insidens, atque altero anno excludit. Emys (*testudo palustris*) egressa ex aqua parit excavata scrobe in dolii modum; vbi quod pepere- rit, relinquit per dies triginta: tum effodit ac mox excludit, ac continuo in aquam educit foetum. Maritimae quoque testudines in terra pariunt oua, qualia cortales aues; defossis noctu incubant: numerosa ouorum foetura, quippe ad centena. Tam 2 lacertae, quam crocodili vel terreni vel etiam fluuiatiles in terram pariunt. Ex ouis lacertarum sponte foetus excluditur in terra: neque enim annum viuunt lacertae, sed, vt aiunt, menses tantum sex. Fluuiialis crocodilus parit oua multa, cum plurima circiter sexaginta, colore candido. Sexagenos dies incubat; viuit enim diu. Ex minimis autem ouis maximum animal fit: neque enim eius ouum anserino grandius est: ac foetus quidem pro oui quantitate. At vbi creuit, decem et septem cubitorum explet magnitudinem. Quidam putant, quamdiu viuit, crescere.

C A P. XXVIII. (vulgo XXXIV. Scaligero  
C A P. XXIX.)

In serpentum genere vipera, concepto intra se ouo, animal parit: eius ouum vnicolor ac molle membrana amictum, vt piscium. Superextat pullus ab summo: neque ouum testaceo ambitur cortice, sicut neque in piscibus. Parit viperillas exiguas in membranis, quae tertio die circumrumpuntur. Fit aliquando, vt catuli ex vtero erosio membranarum ipsi egrediantur. Sigillatim parit: absoluit vno die, interdum plura viginti. Ceterae serpentes oua edunt inter se continua cohaesione, ad muliebris monilis modum: quae cum pepererint, deponunt in terram; atque ibi fouent, excluduntque anno altero.

---



---

A R I S T O T E L I S  
D E A N I M A L I B V S H I S T O R I A E  
L I B E R VI.

---

C A P. I.

Serpentium igitur insectorumque, atque etiam quadrupedum ouiparorum tales sunt generationes. Aues autem omnes quidem oua pariunt, at coitus partusque tempora non eadem omnibus. Quaedam namque fere omni tempore et coeunt et pariunt, ut gallina et columba. Gallina siquidem toto anno praeter menses brumales duos. Generosae ante incubationis tempus etiam sexagena pariunt; quanquam hae minus sunt foecundae quam plebeiae. Adrianicae gallinae parvae sunt quidem, quotidie tamen pariunt: feroces autem et morosae sunt, et pullos interimunt saepe suos: ac sunt versicolores. E domesticis nonnullae etiam bis die pariunt. Iam vero etiam quaedam ob ingentem

- 2 foecunditatem breui interierunt. Gallinae igitur, vt dictum est, continenter pariunt. Turrilia autem (pelias) et palumbes (phatta) et turtur et rupilia (oenas) his tantum pariunt, columbae autem decies. Plurimae aues (*semel et*) verno tempore pariunt; sed earum quaedam multiparae. Atque hoc quidem duplici ratione: nam aut multum, vt columbae, aut multa, vt gallinae. Quibus vngues vnci sunt, paucos pariunt omnes, praeter tinnunculum: (cenchridem:) in eo enim genere plurima parit. Iam et quatuor visa sunt oua; verum etiam plura parit. Ceterae in nidis pariunt; at quae minus volacia sunt, non, vt perdices et coturnices, sed in terra adstructis festuculis abscondentes. Sic
- 3 et alauda et tetrix. Hae igitur omnes vento auersos nidos construunt. Quem Boeotii aeropem vocant, vnus omnium terrae cauernas subit nidificandi gratia. Turdi in excelsis arboribus e luto, sicut hirundines, nidos faciunt, serie quadam inter se cohaerentes, ita vt serti speciem praebeant. In eo genere auium, quae per se solae nidificant, sola ypupa nullum sibi aedificat, sed ingressa in arborum stipites cauos, ibi parit, nihil eo congerens. Cuculus autem (*Versio antiqua habet pro vitioso nomine kirhus*) in domiciliis vel in saxis. Tetrix illa, quam Athenienses vragem vocant, neque in



terra, neque in arboribus, sed in humilibus fruticibus.

### C A P. II.

Oua omnium auium similia inter se putaminis duritia, si eius generatio non corrumpatur. Mollia enim nonnullae gallinae pariunt. Duo colores in ouis auium, ambiente luteum albumine. Fluvia-tilium et palustrium differunt multa oua ab iis, quae in sicco degunt. Aquatiliū namque exceditur albumen a luteo praeter modum. Quorum co- 2  
lores etiam alii aliis auium generibus: nam quarundam alba sunt, vt columbae et perdicis: aliis pallida, vt palustrium: alia punctis distincta, vt meleagridum et phasianorum: tinnunculi rubra, quasi minium. Differunt inter se oui partes, haec acutior, illa latior. Egreditur autem latior pars prior. Ex oblongis et acutis feminae generantur, ex iis quae rotunda sunt et mucronem obtusum habent, mares. Excluduntur igitur auium incu- 3  
batu; verum etiam sponte sua in terra perficiuntur, quemadmodum in Aegypto. Defodiant enim in fimo. Et Syracusis prodiderunt potatorem quendam, ouis sub storea humo stratis, tamdiu potare, nunquam opera intermissa, solitum esse, dum oua excluderentur. Iam vero etiam indita in vasis tepidis eo concocta sunt, vt exirent sponte pulli.

- 4 Auium genitura omnium candida, qualis etiam aliorum animalium. Concipit femina inita superiore loco, qui subest praecincturae. Ac primum quidem exiguum et candidum videtur: deinde rubrum et sanguineum: vbi creuit, luteum et flauum totum. Iam amplius auctum discernitur, atque intus quidem luteum exteriore albumine ambitur. Cum vero perfectum fuerit, absoluitur atque ita exit, tempore procedente e molli mutatum in durum. Cum enim egreditur, nondum induruit: simul atque prodiit, spissatur ac durescit, nisi morbo quopiam praeuentum sit. Editum etiam aliquando fuit ouum tale, quale quodam tempore est ouum omne; lutea enim similiter sunt, qualis postea fit vitellus. Hoc etiam colore in dissecta gallina iam visa sunt sub praecincturae loco, vbi illae ova continent, specie quidem lutea, at magnitudine tanta, quanta sunt ova; quae in prodigii loco deputare
- 5 consueuerunt. Qui aiunt hypenemia (*irrita ova*) reliquias eorum esse, quae antea e coitu generata sunt, haud recte sentiunt. Nam compertum fuit, in gallinarum et anserum genere eiusmodi ova edita esse a nouellis sine vlllo coitu. Eorum ouorum magnitudo minor, minusque suauia et liquidiora quam ea, quae apta sunt ad generationem, sed plura numero. Si aui subiiciantur, liquor ille non



crassescit, neque aut luteum aut candidum a pristina mutatur natura. Eduntur irrita a multis, gallina, perdice, columba, pauone, ansere, vulpansere. Incubatu aestiuo quam hiberno celerius 6 excluduntur: per aestatem enim gallinae duodevicesimo die absoluunt; hieme interdum ad quinque et viginti. Sane ipsae quoque aues inter se differunt, quod aliis aliae incubationi aptiores. Coelo tonante quae fouentur oua, corrumpuntur. Quae autem cynosura et vrina ab aliquibus dicuntur, per aestatem magis oriuntur. Vocantur etiam a nonnullis hypozephyria ea, quae hypenemia diximus, propterea, quod verno tempore excipere auras aues solent. At hoc ipsum faciunt etiam, si certo tempore attrectentur. Quemadmodum irrita euadunt vtilia ad generationem, sic etiam quae iam e coitu sunt constituta, transeunt e suo genere in genus aliud, si, quae irrita habet, ineatur, priusquam luteum in candidum mutetur, aut quae vtilia ad generandum oua concepit, cum alterius generis aue coeat. Atque ita et irrita fiunt genitiua, et genitiua suscipiunt maris formam, qui posterior inierit. Quod si iam in album facta sit mutatio, 7 ipsa non mutantur, neque vt irrita fiant genitiua, neque semine concepta vt in genus transeant ineuntis. Praeterea cum adhuc parua sunt, si coitus

intermittatur, non crescunt ea, quae antea inerant: repetito autem coitu celeriter ad suum perficiuntur incrementum. Luteum ouorum atque albumen contrariam naturam obtinent; non solum colore, sed etiam potestate. Luteum enim a frigore densatur, albumen non densatur, sed magis liquescit. Contra ab igni spissatur albumen, luteum non spissatur, sed molle permanet, nisi peruratur. Et elixando quam assando plus concrescit atque siccat-  
8 tur. Vtrumque autem seorsum a se inuicem in membrana disseptum est. Quae ad principium lutei grandines haerent, nihil conferunt ad generationem, quemadmodum quidam suspicantur. Duae eae sunt, altera in imo, altera in summo. Euenit autem, ut cum quis vitellos atque albumina multa exemta, inque patinam indiderit collecta, atque elixarit igni molliore remissioneque (*lento*), lutea tota massa in medium coeat, alba autem huic circumfundatur. [Cap. III. Scaligero.] Gallinarum nouellarum partus primus ineunte statim vere est: ac plura edunt quam vetulae, sed minora sunt, quae ab his pariuntur. Omnes aues, si non incu-  
9 bant, corrumpuntur atque aegrotant. A coitu inhorrescunt, et excutiant sese, ac festuca saepenumero lustrant; id quod etiam a partu faciunt aliquando. Columbae caudam attrahunt; anseres



autem aquas subeunt. Tum foetus tum irritorum  
 ouorum conceptio euenit plurimis auibus repen-  
 tina: quemadmodum perdici, cum in venerem so-  
 licitatur. Si enim affletur vento a mare veniente,  
 concipit, continuoque fit inutilis aucupiiis. In-  
 signi namque odoratu praeditus perdix esse vide-  
 tur. Tam oui post coitum, quam ex ouo incu-  
 bato pulli generatio non eodem omnibus temporis  
 contingit spatio, sed pro ratione magnitudinis pa-  
 rentum euenit. Gallinarum ouum consistit a coitu  
 perficiturque saepissime decem diebus, columbi-  
 num paucioribus. Columbae etiam in dolore par-  
 turiendi ouum continere possunt; si quid enim  
 molestiae interuenerit aut circa nidum, aut penna  
 euulsa, aut aliter vexata, aut aegre quippiam tu-  
 lerit, continet, et partum differt. Coiturae co-  
 10 lumbae illud quoque habent peculiare: ante enim  
 quam mas ineat, inter se osculantur: aliter marem  
 non admittunt. Ac primo quidem coitu senior  
 osculans, postea etiam sine osculo init. At iunio-  
 res nunquam sine osculo coeunt; id quod etiam  
 femellae faciunt. Absente enim mare post mutua  
 oscula, masculorum more, vicissim se conscen-  
 dunt, nihiloque inuicem immisso seminis genitalis,  
 pariunt oua plura, quam quae e semine concepta

sunt; e quibus nullus foetus oriatur; sed omnia talia irrita sunt.

### C A P. III. [Scaligero IV.]

Auium omnium generatio eadem. At perfectionis tempora alia aliis, quemadmodum dictum est. In gallinis igitur generationis indicia extare incipiunt post dies tres totidemque noctes: in genere auium, quam hae sunt, maiorum serius; minorum citius. Per id tempus ascendit iam vitellus ad superiorem partem oui acutiorem, vbi et  
 2 principium oui est, et foetus excluditur. Corque ipsum apparet in albumine sanguinei puncti: quod punctum salit et mouet sese instar quasi animatum. Ab eo meatus venarum specie duo, sanguine pleni, flexuosi, qui crescente foetu feruntur in vtramque tunicam ambientem. Ac membrana sanguineas fibras habens eo tempore albumen continet (circumdat) a meatibus illis venarum. At paulo post discernitur corpus, perpusillum initio et candidum, capite conspicuo, atque in eo oculis maxime turgidis: qui diu sic permanent. Sero enim tandem parui fiunt, ac considunt. In parte autem corporis inferiore nullum extat membrum per initia, quod  
 3 respondeat superioribus. Meatus autem illi, qui



a corde prodeunt, alter ad circumdantem membranam tendit, alter ad luteum, officio vmbilici. Pulli igitur origo ex albumine est: alitur enim luteo per vmbilicum. Decima vero die iam pullus pullique partes omnes conspicuae. Sed et caput toto corpore et oculi capite sunt grandiores, nulla adhuc pupilla praediti. Quippe tunc eminent magnitudine fabis grandiores ac nigri: a quibus detracta cute humor exit candidus ac frigidus, vehementer ad lucem praefulgens, solidi vero nihil inest. Oculi igitur ac caput sic sunt. At eodem 4 tempore viscera quoque iam apparent, et quae ad ventris intestinorumque pertinent naturam. Iam vero venae, quae a corde tendunt, nunc vmbilico applicantur. Ab vmbilico autem tenditur vena vna ad membranam, qua vitellus continetur, qui eo tempore liquidior iam et fusior est, quam qui natura sua constare solet. Altera autem ad membranam, qua et tota membrana foetum ambiens et vitellum interiacensque humor continetur. Crescente enim paulatim pullo vitelli pars supra, pars infra est; albumen autem in medio liquidum. Sed et sub inferiore vitelli parte illa albumen item est, quemadmodum et antea suberat. Decima vero die albumen subsidit totum, (fit extremum,) exiguum iam et viscidum et crassum et subluteum. Ordo

5 enim ac situs singulorum sic se habet. Prima postremaque ad testam membrana oui est, non testae membrana, sed sub ea: atque in hac albumen inest candidum: deinde pullus inest, et eum continens membrana atque ita separans, ut ne in liquore illo sit foetus ipse. Sub pullo autem vitellus, in quem tendebat altera vena illa, altera autem in circumpositum albumen. Totum autem hoc ambitur a membrana, in qua est humor saniosus. Deinde membrana alia circum ipsum iam formatum foetum, quemadmodum diximus, separans eum ab humore. Sub eo autem luteum membrana altera circumdatum, in quod tendit umbilicus a corde et magna vena ferens; ita ut  
6 foetus in neutro sit humorum. Circa vicesimam autem diem iam vocem emittit, et aperto ovo si quis eum moueat, mouet se: atque inde plumis vestitur, cum ultra vicesimum diem ovo exiit. Tenet autem caput supra dextrum crus ad ile sub ala. Atque eo tempore apparet tum membrana secundarum matricularum vicem gerens, quae sub ultima testae membrana est, ad quam tendebat alter ex umbilicis. Iam tum pullus in eo totus est. Atque etiam videre est alteram membranam secundam, qua ambitur luteum, quo alter tendebat umbilicus: quorum vterque erat a corde et a



magna vena. Tunc etiam vmbilicus is, qui ad extimas secundinas tendit, concidit et soluitur ab animali: qui vero ad luteum fertur, cum pulli tenui intestino connectitur; atque intra pullum multum lutei subit, et sedimentum luteum reperitur in aluo pulli. Quo tempore etiam emittit excrementum 7 ad extremum chorion: quin etiam habet in aluo; et excrementum tam externum quam internum est album. Tandem luteum decrescit; procedenteque tempore totum absumitur in ipsum pullum, cuius in corpore comprehendatur, ita vt decimo post die, quam exclusus est pullus, si dissecetur, etiamnum ad intestinum paulum vitelli reliquum inueniatur. Ab vmbilico autem absolutus est, nec quicquam intermedium relinquitur interea, sed totus absumtus est. Ante hoc tempus dormit pullus; quod si moueatur, experrectus et respicit et mouetur et vocem edit: et tum eius cor quasi spirantis simul cum vmbilico reflat. Aues igitur ex ovo sic generantur. Pariunt autem ipsae etiam oua aliqua sterilia, et- 8 iam quae ex concubitu orta sint: e quibus ne per incubatum quidem excluditur quicquam. Id quod potissimum in columbis est animaduersum. Gemellifica oua binis vitellis praedita sunt, quae in aliquibus tenui albuminis dissepimento separantur, quo minus inter se confusa sint. In aliis nullum

est, sed inter se contingunt. Ac gallinae quidem nonnullae sunt, quae omnia gemellifera pariunt, in quibus, quod euenire vitello diximus, perspectum est. Duodeuiginti enim aliqua cum peperisset, exclusit geminos, nisi quae irrita fuerunt. Reliqua genitalia gemellos dederunt, ita tamen, vt ex gemellis alter maior esset, alter minor, postremus autem etiam monstrosus.

#### C A P. IV. (Scaligero V.)

Generis columbacei omnes aues bina oua pariunt, veluti palumbes et turtur magna ex parte, cum plurima, terna palumbes et turtur. Columba domestica, quemadmodum dictum est, omni anni tempore. Turtur et palumbes vere non saepius quam bis: Iterum autem pariunt, vbi priora perierunt: id quod a pluribus auibus fieri solet. Atque pariunt quidem, vti diximus, interdum terna; verum nunquam educant plures binis pullos: aliquando vero vnum tantum. Reliquum autem ouorum semper irritum est. Aues non fere generant anniculae: at vero omnes, postquam semel parere coeperint, natura fert vt paene semper oua habeant: sed interdum propter exiguitatem haud facile deprehenduntur. Columba domestica fere  
2 marem et feminam parit: ac marem quidem priorem,



ac frequenter die interiecto alteram parit. Incubant ambo vicissim, mas interdiu, noctu femina. Quod ouum prius editum fuerit, intra vicesimum diem et absoluitur et excutitur a pullo. Pertundunt ouum pridie quam excludatur pullus. Atque ad certum tempus prolem fouent ambo, eo modo quo etiam oua. Femina tantisper, dum pullos alit, infestior est quam mas: quemadmodum cetera quoque animalia post partum. Pariunt in anno decies, aliquae etiam vndecies: in Aegypto etiam duodecies. Intra annum (*quo natae sunt*,) tam mas quam femina coeunt: namque etiam semestres coeunt. Palumbes et turtures aiunt quidam et 3 coire et gignere etiam tertio aetatis suae mense, argumento sumto ab earum copia. Gerunt vtero quatuordecim dies: totidem incubant: tantundem temporis ponunt plumescendo, eo vsque vt ne facile prehendi possint. Viuit palumbes, vt aiunt, etiam annos quadraginta. Perdices plus sexdecim. Emisso priore foetu columba domestica iterum intra diem tricesimum parit.

## C A P. V. (Scaligero VI.)

Vultur in saxis inaccessis nidum ponit; quo fit, vt raro visus sit vulturis nidus et pulli. Ac propterea Herodorus Brysonis sophistae pater ait,

vultures aduenire e terra altera ignota nobis, eo argumento, tum quod nemo vulturis nidum conspexerit, tum quod magno numero repente apparent sequentes exercitus. Verum quanquam difficile est ad deprehendendum, tamen perspectum aliquando est. Pariunt autem bina. Ceteras omnes aues, quae carniuorae sunt, non plus quam semel anno parere, obseruatum est: hirundo magis, quam ceterae eius generis aues, bis nidificat. Eius pullis etiamnum iuueniculis si quis oculos pupugerit, conualescunt, atque iterum visum recipiunt.

C A P. VI. (Scaliger continuat VI.)

Aquila autem tria oua parit: excluduntur tantum e duobus pulli: id quod in carminibus, quae Musaei nomine circumferuntur, scriptum est:

*Terna parit, binis exclusis educat vnum.*

Atque hoc quidem fere ita euenit: nam tres quoque pulli eius conspecti sunt. Vbi creuere pulli, eorum alterum eiicit prae taedio nutriendi. Quo sane tempore etiam ineptam ad praedam aiunt eam fieri, ne ferarum catulos rapiat. Paucis igitur diebus eius ungues deprauantur, pennaque albescent; quare iniquiore ea vtuntur pulli. Eiectum  
 2 autem excipit atque educat ossifraga. (phene.) Incubat autem dies circiter triginta. Nam id temporis



aliis etiam grandioribus auibus exigitur ad incubationem, vt anseri et tardae: mediis satis sunt viginti, vt miluo et accipitri. Parit autem miluus fere bina; interdum etiam ternos educat pullos. Aegolius (aetolius *alii Codices*) autem qui dicitur, aliquando etiam quaternos. Parit etiam coruus non solum bina, vt aiunt quidam, sed etiam plura. Circiter viginti dies incubat, pullosque nido eiicit; id quod aliae quoque aues faciunt. Nam quae plura pariunt, saepenumero vnum eiiciunt. Non 3 omnia aquilarum genera aequae erga pullos suos afficiuntur; sed et pygargus morosa est. Nigrae propensiores educandis pullis sunt suis. Alioqui omnes quae vncis vnguibus praeditae sunt, vbi pulli volare queunt, eiiciunt pulsantes e nido; quod, quemadmodum dictum est, aliarum quoque maxima pars facit: cumque enutriti fuerint, nullam praeterea eorum gerunt curam, excepta cornice. Ea enim aliquanto etiam tempore suis studet adeo, vt propter sese volantes ipsa etiam volans pascat.

#### C A P. VII. (Scaligero adhuc VI.)

Cuculum putarunt quidam ex accipitre mutato fieri, propterea quod ille, cui similis ipse sit, eo tempore non apparet. Ac fere aliorum quoque accipitrum nullus nisi paucis diebus videtur, cum

canere cuculus incipit. Conspicitur vero paruo tempore per aestatem; hieme autem nuspiam. At vero est accipiter vncis vnguibus: cuculus non est. Neque capite illi similis est; sed vtrisque partibus potius columbae: colore tantum accipitrem repraesentat. Quamquam accipitres maculis linearum specie sunt, cuculus quasi punctis potius variatur.

- 2 Magnitudo tamen et volatus similis minimo accipitri, qui per id tempus fere non comparet, quo cuculus videtur. Nam sane iam ambo visi sunt. Quin perspectum est, cuculum ab accipitre deuorari. Atqui nullo in genere auium congenerum hoc euenire solet. Cuculi pullos negant a quopiam conspectos. At ille parit quidem, sed nidum nullum construit; verum in minorum auium nidis, deuoratis illorum ouis, deponit ipse sua, potissimum vero in palumbis nido, deuoratis ipsius ouis. Singula fere parit, raro bina. Parit autem in currucae (hypolaidis) quoque nido; atque illa et excludit et educat. Quo maxime tempore et pinguis est et carne suaui ad vescendum: quemadmodum accipitrum quoque pulli sunt et pingues et suaui carne valde. Eorum genus quoddam praeruptis atque longinquis in saxis nidificare solet.

C A P. VIII. (Scaligero VII.)

Auium magna pars incubat, quemadmodum de



columbis diximus, feminae mare succedente: quidam mares tamdiu saltem, dum abest femina sibi cibum quaerens. At anseres feminae solae incubant atque perpetuo insident, postquam id agere instituerint. Lacustres aues propter palustria atque herbida loca: quamobrem nullo negotio etiam in ipso incubatu possunt sibi cibum capere, neque omnino inedia laborare. Cornices quoque feminae solae fouent perstantesque in opere non intermittunt: at eas mares alunt, allato atque dato ex ore cibo. Palumba ab sero diei incipiens totam noctem usque ad ientaculi tempus incubat: reliquum temporis palumbus. At perdices bina ouorum cubilia faciunt; in altero femina, in altero mas incubat: suos vterque exclusos enutrit. Quin etiam cum educit, primum pullos eos init.

#### C A P. IX.

Pauo autem quinque ac viginti annos viuit: trimus potissimum generat: quo tempore etiam versicolores eius pennae fiunt. Tricenis aut paulo pluribus excludit diebus: semel duntaxat in anno parit. Ouorum numerus ad duodecim aut non multo pauciora. Interiectis binis ternisue diebus pariendi officium intercipit. Primiparae octona circiter. Edunt etiam irrita. Vere coeunt: statim

- 2 a coitu pariunt. Amittit pennas cum casu foliorum, atque cum eorum ortu replumescit. Gallinis pauonina oua subiiciunt ad incubandum pastionibus praefecti, propterea quod mas fouenti feminae aduolans atterat. Quae causa est, ut siluestrium quoque volucrum quaedam fuga facta clam mariibus et pariant et incubent. Gallinis subiiciunt cum plurimum bina: tot enim duntaxat fouendo educere possunt. Student vero, ne abscedens relinquat incubationem, esca apposita. Auium testes coitus tempore grandiores extant; ac salacioribus quidem et semper coitum exercentibus insunt manifesti, ut gallinaceis et perdicibus: qui vero vernerem intermittunt, minus. Ad hunc igitur modum gestant aues et pariunt.
- 3

## C A P. X. (Scaligero VIII.)

At pisces non omnes oua pariunt, ut dictum est: cartilaginei namque animal edunt, ceterum genus oua. Edunt autem illi animal, postquam prius intra se et pepererint ouum, ibique dato incremento excluderint praeter ranam (*marinam*). Ac quemadmodum supra dictum est, matrices alii alias pisces habent. Nam qui oua edunt, et bipartitas et inferiore parte sitas, at cartilaginei potius ad auium naturam vergentes habent: ceterum ab



illis hoc differunt, quod quibusdam non sub praecinctura consistunt oua, sed in medio secundum dorsum: quo ex loco, cum creuerunt, in alium transferuntur locum. Piscium ouum non duobus coloribus (intus), sed vno praeditum est: ac candidius quam luteum, tum ante, tum vbi iam in foetum mutatum est. Non eodem autem modo pisces 2  
hi auesque ex ouo generantur. In piscibus enim non est vmbilicus ille alter, qui ad membranam, quae testae subest, ducit. At qui in auibus meatus ad luteum tendit, e duobus vnum hunc habent. Reliqua vero generationis ratio ex ouo tam auium quam piscium eadem tota est. Nam et in eius summo fit, et venae similiter tendunt a corde primum: item caput atque oculi partesque superiores maximae, vt in illis, per initia. Crescente autem foetu decrescit semper ouum, ac tandem subducitur ab oculis, atque induit se in pisciculum, quemadmodum vitellus in auiculam. Agnatus quoque annectitur vmbilicus paulo infra corporis ventrem; ac per initia quidem longus est vmbilicus, auctis autem minor: tandem vero pusillus, vsque dum subeat, quemadmodum in auibus dictum est. Amb- 3  
itur autem et foetus et ouum communi membrana, sub qua altera item est, qua priuatim foetus continetur. Inter membranas autem est humor: ac

quemadmodum in auiculis, ita in pisciculorum aluo continetur cibus, in illis luteus, in his candidus. Qua vero facie matrix sit, dissectorum corporum picturis compertum habeto. At vero etiam inter se differunt: nam neque inter se, neque cum latis conueniunt genera mustelaceorum. Quidam enim ad matricis medium circa dorsi locum adhaerentia habent oua, sicut antea dictum est. Huiusmodi sunt caniculae: aucta autem vtrunque descendit. In binos enim partita sinus matrix cum sit atque sub praecinctura constituta, qualis etiam in eiusmodi generibus aliis, abscedunt in circumstantem vtramque partem. Habet autem tum horum tum aliorum mustelaceorum matrix paulo infra praecincturam quasi mammas albas: quas, si foetus non insint, non inuenias. Caniculae (scylia) et raiae (batides) testacea illa nota gerunt, in quibus oui specie humor insit: testae facies similis tiliarum ligulis. Atque in ea insunt meatus capillamentorum tenuitate. Atque eo in genere caniculorum, quos (*ab hinnuli similitudine*) nebras appellant, disrupto et exuto cortice exeunt catuli: raiae cum ipsa testa pariunt, quae deinde rumpitur; atque ex ea prodit foetus. At mustelus spinus (acanthias) sub praecinctura continet oua supra mammas; vbi vero ouum descendit, in eo



fit catulus superne, cum iam absolutum fuerit. Quomodo etiam vulpes generantur. In medio ma- 5  
 tricum oua continent laeues musteli, quemadmo-  
 dum et caniculae: vbi vero circumstetere, in vtrum-  
 que matricis sinum descendunt, et euadunt ani-  
 malia annexa per vmbilicum ad matricem, ita vt  
 absumtis ouis non alio modo quam quadrupedes  
 habere foetus videantur. Annexus est longus vm-  
 bilicus ad matricis partem inferiorem, vnusquisque  
 tanquam appensus acetabulo, et ad foetus medium,  
 qua iecur habet. Quem si seces, intus alimentum  
 quasi ex ouo deprehendas, etiam cum amplius ouum  
 non est. Ceterum secundae membranaeque, sua  
 cuique foetui, more quadrupedum. Foetus per in- 6  
 itia caput in superiore habet parte: adultus autem  
 atque perfectus deuexum. In laeua mares gene-  
 rantur, in dextra feminae: quin eadem in parte si-  
 mul tum femina tum mas. Dissecto foetu, quot  
 habet viscera, ea magna sunt, puta iecur, et quae  
 sanguinem continent, sicut in quadrupedibus. Om-  
 nes cartilaginei pisces eodem tempore et superiore  
 parte ad praecincturam oua continent cum maiora  
 tum minora multa, et inferiore iam exclusos foetus.  
 Quo fit, vt huiuscemodi pisces crediti sint eodem  
 mense saepe et parere et coire, propterea quod non  
 omnia simul edunt, sed saepenumero ac diu. In-

7 terea quae in ima sunt matrice, et concoquuntur et perficiuntur. Cetera vero mustelorum genera et emittunt et admittunt intra se catulos: item squatinae et torpedines. Iam vero deprehensa est grandior torpedo, quae ad octoginta contineret in se foetus. Solus mustelorum spinus non recipit propter spinam: e latioribus neque pastinaca neque raia ob caudae asperitatem: ac ne rana quidem foetus suos recipit, tum ob capitis magnitudinem, tum ob spinas: quin ne animal quidem parit haec sola hoc in genere, quemadmodum antea dictum est. Quo igitur differant inter se, quoque generentur ex ouis, is modus est.

[Vulgo C A P. XI. Scaligero IX.]

8 Mares autem tempore coitus meatus habent geniturae plenos, adeo ut expressis exeat inde candidum semen. Sunt ii biuii, a vena magna et praecinctura orti. Tunc igitur conspicui sunt in maribus meatus illi, comparati cum utero femineo: (*Scaliger* adeo, ut ad feminarum matrices respondeant proportionem:) alio tempore minus deprehendi possunt, nisi a peritis. Omnino enim quibusdam certo tempore nulli apparent, sicuti de auium testibus dictum est. Seminales meatus et matriciales inter se differunt, eo etiam, quod hi quidem haerent lumbis, feminis autem bene mobiles sunt, te-



nuique membrana adstricti. Marium meatus ut se habent, spectare poteris in picturis dissectorum animalium. Superfoetant cartilaginei pisces, ac 9 ventrem gerunt menses cum diutissime sex. Qui dicitur stellaris (asterias) e genere mustelorum, saepissime parit; quippe bis in vno mense: coire incipit Maemacterione mense. (Septembri.) Ceteri musteli bis in anno pariunt, praeter caniculam, (scylium,) quae semel in anno tantum. Partim vere pariunt; squatina autem cum vere primum, tum etiam autumnio iterum brumali occasu vergiliarum: qui posteriores foetus feliciores. (*alii Codd.* infeliciores.) Torpedo autem circa autumnum parit. Ex alto ac profundo terram repetunt, ubi pariant cartilaginei, tum captantes teporem, tum catulis metuentes. Aliorum piscium nullus visus est extra 10 genus suum coire: sola squatina et raia hoc facere videtur. Est enim piscis, qui squatinoraia (rhinobatus) appellatur. Caput is partesque anteriores raiae habet, posteriores squatinae, quasi compositus ex utroque. Igitur musteli et mustelacei, ut vulpecula et canis, (cyon,) item latiores, ut torpedo, et raia, et laeuraia, (leiobatus, *vulgo erat rhinobatus,*) et pastinaca eo quo diximus modo ex conceptis ovibus animal edunt.

## C A P. XI. (vulgo XII. Scaligero X.)

Delphin autem et balaena aliaque cete, quaecunque non branchias sed fistulam habent, animal gignunt: item pristis et bos. Horum enim in nullo inuenta oua sunt, sed statim foetus: ex quo dearticulato animal generatur, quemadmodum homo et quadrupedes, quae pariunt animal. Delphin vnum fere parit; interdum etiam duos. Balaena vel duos, atque id adeo frequenter, vel vnum. Similis lex phocaenae cum delphino; siquidem minori delphino quoque similis ipsa est. Nascitur in Ponto. Hoc vero ab illo differt, quod et minor est, et dorso latiore, colore coeruleo. Phocaenam generi<sup>2</sup> delphinorum multi attribuerunt. Spirant omnia, quae habent fistulam, atque aerem recipiunt: pulmonem enim habent. Quin animaduerterunt delphinum extante rostro dormientem atque per somnum stertentem. Habet autem tam delphin quam phocaena lac, quod catulis suis praebeant; quos etiam, dum pusilli sunt, intra se recipiunt. Capiunt incrementum celeriter delphinorum catuli: decimo enim anno iustam absoluunt magnitudinem. Gerit vterum menses decem. Parit aestate delphin, neque alio tempore. Fit etiam, vt lateat sub ortu caniculae circiter triginta dies. Catulos suos diu comitatur, quippe magna erga eos caritate est. Viuit



annis pluribus: etenim aliquem plus quam quinque et viginti vixisse annos constitit: alium autem et ad triginta. Id quod obseruarunt piscatores amputatis caudis atque ab se amissis: quo argumento eorum aetatem deprehenderunt. [Cap. XI. Scaligero.] Vi- 3  
 tulus autem marinus vtriusque naturae particeps est: nam neque aquam recipit, sed respirat; atque etiam tum dormit tum parit in terra ad littora, tanquam animal terrae incola. At in mari cum maiorem aetatis suae partem exigat, atque ex eo sibi victum petat, de eo inter aquatiles dicendum est. Concipit igitur illico intra se animal atque edit: itemque secundas et cetera eiicit pecudum more. Vitulorum, quos parit, numerus singuli biniue: cum plurimi, terni. Habet vbera, quibus lactat foetus suos, quemadmodum et quadrupedes. Parit autem omni tempore anni, sicut et homo; potissimum autem cum primis capellis. Vitulos deducit 4  
 suos duodecimo circiter quam peperit die in mare: identidem interdium paulatim assuescens. Ii autem proni repunt, nec ambulant; quippe inniti pedibus qui nequeant. Colligere et contrahere se ipsum potest: carnosus enim est et mollis, ossaque eius cartilaginea. Nec facile interficitur, et frustrantur conatibus, nisi iuxta tempora percutiant: eius enim corpus carnosum est. Emittit vocem boui similem.

Habet genitale femina simile raiae; (batidi;) reliqua omnia similia mulieri. De aquaticis igitur, quae intra aut extra se pariunt animal, generatio partusque sic se habet.

C A P. XII. (vulgo XIII. Scaligero XII.)

At qui pisces oua edunt, eorum matrix binis sinubus caua, et in imo sita est, quemadmodum antea dictum est. Pariunt oua omnes qui squammis teguntur, (lepidoti,) vt lupus, cephalus, mugil, entelis, (*vulgo* etelis,) atque omnes, qui candidi appellantur: praeterea laeues quoque, praeter anguillam. Ouum habent arenaceum. Hoc autem sic (*simplex et vnum*) videtur, propterea quod tota matrix ouis stipata est, ita vt in minutis piscibus duo tantummodo oua esse videantur, cum propter et paruitatem et tenuitatem matrix nequeat deprehendi. Ac de piscium quidem omnium coitu iam dictum fuit. Piscium vero pars maxima maris et feminae notis distinguitur; de rubello (erythrino) et hiatula (channa) dubitatur: omnes enim grauidae  
 2 capiuntur. Quanquam autem concreantur oua in coeuntibus, tamen etiam sine coitu habent quidam pisces. Deprehensum hoc est in fluuiatilium certis generibus. Paene enim statim quam nati sunt atque pusilli adhuc phoxini foeti sunt. Feminae oua



guttatim emittunt, et mares, quemadmodum aiunt, magnam partem ouorum deuorant: alia autem pereunt in aqua. Quaecunque autem deposuerint in locis, in quibus pariunt, ea supersunt. Etenim si omnia incolumia forent, nimia cuiusque generis esset copia. Quin ne horum quidem quodlibet genitale est, sed quae irrorarit genitura sua mas. Etenim dum pariunt, sequens mas aspergit oua semine suo. Quae igitur aspersa fuerint, ex iis omnibus pisciculi generantur; aliis alia sors est. Hoc 3 idem etiam molluscis euenit. Nam in genere sepiarum femina ubi peperit, mas irrorat oua. Quod ratione pari colligere possis etiam in aliis fieri molluscis: nam in solis sepiis ad hunc usque diem id obseruatum est. Pariunt prope terram ad saxa gobii, estque quod pariunt latum et arenaceum. Sic et alii. Tepidiora enim loca iuxta terram sunt; et est unde plus escae suppeditetur. Tunc sic potest cauere, ne a grandioribus foetus absumantur. Quae causa est, ut in Ponto ad Thermodontem fluuium plurimi pariant: tranquillus enim locus est tepidusque, et uberior aqua dulci. Qui edunt oua 4 pisces ceteri, semel pariunt in anno praeter paruas fucas. (phycides.) Hae enim bis. Differt a femina fucus, (phyces,) quod et nigrior fit et maiori squamma tectus. Igitur ceteri omnes pisces legitima

foetura pariunt atque oua edunt; at ea, quam acum  
 vocant, instante pariendi tempore, dirumpitur;  
 atque ita exeunt oua. Habet enim is piscis sub  
 ventre et sumine (*Codices* iecinore) rimam quan-  
 dam, veluti caeciliae serpentes. At vbi peperit,  
 5 vulnus rursus coalescit. Eodem modo generantur  
 ex ouo pisces vel extra vel intus oua parientes. In  
 summo enim oui pullus oritur, et ambitur mem-  
 brana; et oculi primum apparent grandes atque  
 globosi. Quare manifestum est, non eodem, vt  
 aiunt, modo fieri, quo qui e vermiculis generantur.  
 Contraria enim in illis ratio: inferiora enim maiora  
 prius: caput autem atque oculi posterius. Ab-  
 sumpto autem ouo accipiunt gyrini faciem; ac prin-  
 cipio quidem nullum capiunt cibum, sed crescunt  
 hausto oui humore. Postea vero aluntur, vsque  
 6 dum excreuerint, aquis fluuialibus. Cum purgatur  
 Pontus, fluitat secundo mari ad Hellespontum id  
 quod appellant Graeci fucum, nos algam. Color  
 huic pallidus. Nonnulli algae florem dicunt esse,  
 ex quo etiam fucus fiat. (*Alii Codices sic*: Non-  
 nulli dicunt, fucum esse florem aliquem naturalem.)  
 Ineunte aestate fit hoc, quo et ostreae et pisciculi,  
 ea loca qui colunt, alantur. Maris accolae nonnulli  
 etiam purpuram suam ab hoc florem habere  
 tradunt.



## C A P. XIII. (vulgo XIV.)

Lacustres fluuiatilesque pisces fere grauidi esse incipiunt quinto aetatis suae mense. Vertente autem anno pariunt omnes. Neque vero aut mares genituram aut feminae oua omnia simul emittunt, vt nec marini; sed semper plus minusue habent hae ouorum, hi seminis genitalis. Pariunt statis temporibus; cyprinus quinquies aut sexies, paritque potissimum sub certorum siderum exortu. Chalcis autem ter: ceteri omnes semel in anno. Pariunt autem in stagnantibus fluuiorum aquis lacuumque ad arundines, veluti phoxini et percae. Glanes et percae foetus suos cohaerentes edunt, sic vt et ranae; qui ita sunt continuata serie obuoluti, vt quod perca pepererit, propterea quod fusius expandatur, piscatores in lacubus ex arundinibus in glomum colligant. Maiores glanes in profundis aquis pariunt; quippe nonnulli etiam vbi senum pedum altitudo sit. Minores locis breuioribus fere ad radices salicis aut alterius arboris cuiuspiam, iuxtaque arundines atque etiam muscum. (vluam *Camotiana editio nominat.*) Coeunt etiam inter-  
 dum valde magnus cum paruo, et admotis meatibus inter se, quos vocant aliqui vmbilicos; qua parte semen emittunt genitale: feminae oua, mares genituram proiiciunt. Primo igitur aspersu oua

statim fiunt candidiora grandioraque vel ipso paene die: deinde mox apparent oculi pisciculorum: quae pars in omni piscium genere, sicut in aliis quoque animalibus, et maxime conspicua et maxima est. At quae oua non attigerit semen, quemadmodum in maritimis dicebamus, inutile fit ouum ineptumque  
4 ad generationem. Auctis autem piscibus, ex iis ouis, quae sunt genitalia, excutitur quasi putamen quoddam. Ea est membrana illa, qua et ouum et pisciculus continentur. Vbi vero admistum fuerit ouo semen, quod ex utroque conflatum est, viscidum fit et adhaeret radicibus aliisque locis, ubi pepererint. Quo loco oua plurima edita fuerint, ibi eorum agit custodiam mas: femina cum pepererit, abit. Tardissimum glani est ex ouo incrementum: atque idcirco assidet mas quadragenos quinquagenosque dies, ne deuoretur foetus ab oc-  
5 currentibus piscibus. Proxima tarditas cyprino generando: quanquam horum quoque foetus qui servatus fuerit, celeriter aufugit. At in minorum genere vel tertio die pisciculi species iam agnoscitur. Eodem quoque die atque etiam post capiunt oua incrementum, quae contigerit semen; glanis ad erui magnitudinem; cyprinorum atque eiusmodi quantum milium sit. Haec igitur ad hunc modum  
6 et pariunt et gignunt. Chalcis autem conferta parit



in altis aquis in vnum congregata. At quem tylo-  
nem (*vulgo* psyllonem, *Gaza* fullonem) vocant,  
ad littora ventis auersa. Is quoque gregalis est.  
Cyprinus, balerus, ac fere omnes alii ad vada ap-  
pellunt sese, vbi pariant. Singulas feminas saepe-  
numero terni quaterniue deni sequuntur mares,  
ouumque quod ea abscedente emissum fuerit, asse-  
cuti aspergunt semine. Verum quia cedendo parit  
femina, plurima intereunt, quae correpta aquae  
fluxu dissipantur, nisi quae aliquam ad materiam  
adhaeserint. Neque enim praeter glanin vllus alio-  
rum custodit oua, nisi si quando forte cyprinus  
suis in vnum locum compositis interuenerit: tunc  
enim amat ea seruare. Semen autem mares omnes 7  
habent praeter anguillam, quae neque semen neque  
ouum. Mugiles autem e mari ascendunt in lacus et  
fluuios: anguillae contra ex his in mare. Maxima  
igitur piscium pars, sicut dictum est, ex ouo ge-  
neratur.

#### C A P. XIV. (*vulgo* XV.)

At enimuero nonnulli ex limo et arena: quin  
ex his ipsis generibus, quae etiam ex coitu atque  
ouo procreantur, tum in aliis stagnis, tum in eo,  
quod circa Cnidon fuisse olim aiunt. Eo cani-  
culae sideris aestu exiccato, totus quoque limus extra-  
hebatur. Tunc vbi primis imbribus aquae restitui

incipiebant, ibi vero pisciculi cum ipsis aquae initiis exoriri, qui genus essent eorum mugilum, quod e coitu nasci solet, pusillarum maenularum magnitudine, sine ouo, sine semine. In Asiae quoque fluuiis, qui in mare exitum non habent, pisciculi pusilli nascuntur, quemadmodum et illi, similes vero minimorum pisciculorum (hepseti) intestinis. Quidam falso sic omnes mugiles aiunt prouenire: eo namque in genere gerentes oua feminae et mares cum semine genitali videntur. Sed certum genus duntaxat id est, quod e limo et arena procreatur.

- 2 Cum igitur quaedam neque ex ouis neque ex coitu sed sponte oriri his argumentis manifestum est, tum vero quae neque ouum neque animal pariunt, omnia vel e limo vel ex arena, atque etiam ex fluitante re quapiam putrefacta euenire solent; quemadmodum ex sabulone ea, quam in genere apuae spumam vocant. Est enim eiusmodi apua, ut neque grandescat, neque habilis sit ad generandum, neque diu queat durare. Sed priore turba abolita, altera succrescit. Quo fit, ut, praeterquam paruo tempore quodam, semper proueniat. Durat enim ab initio Arcturi autumnalis ad yer vsque. Eam vero e terra prodire interdum hoc argumento obseruarunt piscatores, quod frigidis temporibus non capiatur, sed tepore quem de terra emergens captet



illa. Quin traheis scalpta humo saepenumero et copiosiores et praestantiores capiunt. At alia aquarum genera deteriora, propterea quod praemature minus creuere. Oriuntur opacis paludosisque locis, 3 cum coeli clementia terra concalescit, velut in Atheniensis agri Salamine et ad Themistocleum et in Marathone. His scilicet locis spuma illa fit. Ceterum in locis eiusmodi et teporibus existere consuevit; sed alibi quoque, vbi largiores imbres ingruunt, excitata in ipsis spuma; aqua etiam spumae nomen est consecuta. Fertur etiam tepido coelo fluitabunda maris aequore ea in materia, in qua conuoluta est. Nam quemadmodum in fimo vermiculi minuti, sic in eiusmodi re spuma, quocunque loco aequoris concreuerit. Quo fit, vt ex alto multa ad loca appellatur hoc apuae genus. Eius prouentus ac praestantia maxima, quo tempore annus humore et tepore abundat. Alia autem apua 4 a piscibus generatur. Quae enim gobialis (cobitis) appellatur, fit e gobiis minutis et vilibus, qui terram subeunt. E Phalerica autem oriuntur membrades; ex his trichides; e trichidibus trichiae: ex aliquo genere apuae, velut eo, quod in portu Atheniensium degit, generantur qui encrasicholi dicuntur. Est et alia (*Codex alius* et haec apua maenarum) apua, quae maenularum et mugilum foetura

est. At spuma illa sterilis est et breui, vt antea dictum est, aboletur. Reliquum tandem caput atque oculi ipsi fiunt. Piscatorum tamen horum nostrorum inuentum est, vt eam, quo deportare possint, sale aspergant: sic enim diutius durat.

### C A P. XV. (vulgo XVI.)

Anguilla neque ex coitu generatur, neque ouum parit: neque vlla capta est, quae vel genituram vel ouum haberet: neque dissecta comperti sunt meatus vel seminales vel ad matricis officium destinati; sed solum (*vulgo* totum) hoc genus interea, quae sanguine constant, neque ex coitu neque ex animali fit. Sic autem esse hoc arguimento patet. Certis enim feculentis lacubus, tota aqua exhausta, et coeno exacto, rursus generantur, vbi imbres euerint. Siccis autem temporibus non proueniunt, neque in lacubus perennibus. Veniunt enim atque aluntur aqua pluua. Quod autem neque e coitu neque ex animalibus fiant, manifestum est. Verum quibusdam generare visae sunt, propterea quod in nonnullis lumbricellos deprehendere: ex quibus  
 2 arbitrati sunt innasci anguillas. At hoc sic non habet; sed gignuntur ex iis, quae terrae intestina nominant, quae sponte concrescunt in coeno et humo vda. At iam obseruatae sunt ex iis emergen-



tes anguillae: partim etiam discerptis et discissis extiterunt. Haec autem proueniunt tum in mari, tum in fluuiis, cum potissimum fit putrefactio. Maritimis quidem locis, vbicunque alga (fucus) fuerit; in stagnis autem ac fluuiis iuxta ripas: ibi enim tepor vicens putrefacit. De anguillae igitur generatione sic se habet.

## C A P. XVI. (vulgo XVII.)

Non autem omnes pisces eodem aut tempore aut modo pariunt, neque pari gerunt vterum tractu. Igitur ante coitum gregatim conueniunt tum mares tum feminae. Appetente vero et coitus et partus tempore per paria comparantur. Vterum gerunt horum nonnulli haud plures tricenos dies: alii pauciores. Sed omnes iis temporibus, quae certo septimanarum numero diuidi possunt. Plurimum tempus gerunt, qui marini vocantur. Circiter Decembrem (Poseidoneonem) mensem praegnans fit sargus, geritque dies triginta. Eodem tempore vterum gestat tum is, quem labeonem (cheilonem) in mugilum genere vocant, tum muco. (myxon.) Doloribus laborant praegnantes. Quo fit, vt per id tempus potissimum exilient. Feruntur enim graui stimulo concitati in terram; atque omnino interea perpetuo in motu sunt, quoad pariant:

maxime omnium piscium mugil. Leuati autem  
 2 partu quietem agitant. Parere desinunt pisces  
 multi innatis in ventre vermiculis. Innascuntur  
 enim pusilla animalcula, quae exigunt foetus.  
 Pisces, qui rhyades appellantur, vere pariunt, ac  
 plurimi circa vernum aequinoctium. Aliis aliud  
 anni tempus: nam quibusdam aestas, nonnullis  
 aequinoctium autumnale. Hoc in genere prima  
 parit atherina, idque iuxta terram. Cephalus au-  
 tem postremus. Deprehensum hoc est eo, quod  
 huius foetus primus aspectus sit, cephali autem  
 postremus. Parit autem mugil inter primos. Salpa  
 [locis plurimis] aestate parit ineunte: alicubi etiam  
 3 autumnno. Aulopias quoque, quem anthiam vo-  
 cant, aestate parit. Post hos aurata et lupus et  
 mormyrus, (osmylus *alii Codices*) denique om-  
 nes, quos Graeci cursores (dromades) vocant. Vi-  
 timus gregalium mullus et coracinus: pariunt enim  
 autumnno. Parit mullus in coeno; ideo sero parit:  
 diu enim coenum frigidum est. Post mullum co-  
 racinus in algis (fucis) egressus, propterea quod  
 degit inter saxa, et diu vterum gerit. Maenae pa-  
 riunt circa brumam. Ceterorum, qui in alto mari  
 degunt, magna pars aestate pariunt: quod ita con-  
 iiciunt, propterea quod per id tempus non capiun-  
 tur. Foecundissima piscium maena: e cartilagineis



autem rana: sed infrequentes tamen sunt, propterea quod facile intereunt. Parit enim simul omnia et iuxta terram. Verum omnino minus foecundi<sup>4</sup> sunt cartilaginei, idcirco quia animal pariunt; ac tutissimi sunt ob corporis magnitudinem. Sero parit etiam quae acus vocatur, et pleraeque earum parturientes dirumpuntur ab ouis, quae non tam multa quam magna continet. Foetus circa parentem quasi phalangia circumfusi sunt: parit enim ad se ipsam: sed si tetigeris, fugiunt. Atherina parit atterendo aluum ad arenam. Rumpuntur (dehiscunt *Plinius*) thynni quoque prae obesitate. Vivunt annos duos; quod eo argumento deprehenderunt piscatores: cum anno superiore defecissent thynnides, sequenti ipsi quoque thynni defecerunt. Videntur enim esse thynni quam pelamydes anno vno grandiores. Thynni scombrique (scombriae-<sup>5</sup> que *Codex vnus*) coeunt mense Februario (Elaphebolione) post Idus; pariunt Iunii (Hecatombaeonis) initio: ova edunt quasi in vtriculo. Thynnides celeriter capiunt incrementum. Cum hi pisces in Ponto pepererint, ex eorum ovo fiunt, quas cordylas vocant aliqui, auxidas autem Byzantii, propterea quod paucis diebus augescunt. Exeunt autumno cum thynnidibus (*vulgo thynnis*) simul: verno autem tempore repetunt iam factae pelamydes.

Paene autem pisces omnes alii celeriter crescunt: at omnes in Ponto celerius: nam et amiae incrementum singulis diebus manifeste intelligitur. Omnino autem existimandum, iisdem piscibus non iisdem locis alia esse tempora tum coeundi tum vterum gestandi; neque vero aut pariendi aut proficiendi: quandoquidem qui dicuntur coracini circa triticeae messis tempus pariant alicubi. Verum quae diximus, ita magna ex parte euenire volumus  
 6 intelligi. Gerunt congri quoque; quanquam haud aequae omnibus locis hoc satis constat: neque ipse foetus propter pinguedinem sensu satis apprehendi potest. Oblongus enim est, sicut et serpentibus; verum igni inditus deprehenditur. Adeps enim exhalat ac tabescit; oua autem exiliunt, atque extrita sonitum edunt. Praeterea si quis attrectet atque affricet digitis, seui quidem laeuitatem, at oui asperitatem dignoscet. Congri igitur quidam seuum quidem habent, ouum autem nullum: alii contra seui nihil, ouum autem cuiusmodi diximus. Animalium igitur fere omnium, quae natatu aut volatu aut humi tantum mouentur, partus ex ouo dictus est. Itemque de coitu, de vtero, de generatione atque iis quae eius sunt modi.

C A P. XVII. (vulgo XVIII.)

At de iis, quae humi mouentur atque animal



pariunt, ac de ipso homine dicenda sunt eadem  
 ratione, quaecunque natura euenire solent. De  
 coitu igitur, quaeque peculiaria quaeque communia  
 essent, dictum est. Commune autem omnium ani-  
 malium est, vt voluptate et cupidine propter coi-  
 tum soleant sollicitari. Inprimis feminae difficiles  
 sunt, vbi pepererint; mares tempore cocundi. Mor-  
 dent enim equi equos, et deiiciunt sessores atque  
 eos insectantur. Sues quoque feri perditissime sae-  
 viunt, quanquam ab coitu tempore hoc maxime  
 sint imbecilli. Atque inter se pugnascient admi- 2  
 rabiles. Namque affricantes ad arbores tergora lu-  
 toque incrustantes saepe et resiccato, quam crassis-  
 simum sibi comparant corium, et sibi loricam in-  
 duunt; initaque pugna e gregibus (lustris) expel-  
 luntur (prorumpunt) adeo acri, vt ambo saepenu-  
 mero intereant. Idem mos tauris quoque et arie-  
 tibus et hircis: cum suo enim quique in genere  
 gregatim compascere soleant, coitus tempore sedi-  
 tione mutua facta praeliantur. Camelus quoque  
 mas sollicitatus coitu haud facile aditur vel ab ho-  
 mine vel a camelo. Nam alioqui semper atque omni  
 de caussa cum equo bellum gerit. Ferae quoque 3  
 nihilo secius agunt. Quippe ad vrsos, lupos, leo-  
 nes hoc eodem tempore non sine pernicie acceditur.  
 Inter se autem minus pugnant, propterea quod eo

in genere nullum gregale est. Ac sane vrsa ipsa enixa morosior est, et canis femina, ob catulos vtraque suos. Efferantur item elephanti coiturientes. Quae, vt aiunt, caussa est, ne Indi eos admittant ad feminas: in insaniam enim actos tunc euertere eorum casas, quippe minus affabre extructas; aliaque multa committere. Mitiores tamen eos reddi pabulo largiore; quin et adductis aliis atque iussis illos caedere, et vlciscuntur et seruire cogunt. At quae animantes saepe et non vno stato coeunt tempore, cuiusmodi eae sunt, quae hominis consortii participes sunt, sues et canes, minus constat hoc agere propter coitus copiam. Coeundi libidine incenduntur inter feminas equae potissimum, secundum autem eas vaccae. Igitur equae maris desiderio insaniunt: vnde etiam earum nomen ab vno animali in eas, quae libidine vrantur, maledicto transferunt. Aiunt etiam per idem tempus vento grauidas fieri. Qua de caussa in Creta nunquam segregant a feminis admissarios. Cum igitur equi absentia sollicitantur, ceteris, quae in armento sunt, relictis, cursu abeunt. Est autem affectio in equabus, quam Graeci *ἵππομανεῖν* dicunt, latine equifurere; quod in suibus iidem *καπρίζειν*, nos subare. Vbi currunt, neque auroram neque occidentem, sed aut septentriones aut austrum pe-



tunt. Cum sic affectae sunt, neminem ad sese ac- 5  
cedere patiuntur, nisi aut labore fatigatae, aut cum  
ad mare peruenerint. Ibi vero eiiciunt quiddam,  
quod cognomine voce appellant cum eo, quod pul-  
lus nascens gerit, hippomanes. Est autem qualis  
a Graecis *καρία*, a nobis apria (*Scaligero* porcia)  
dici potest. Atque id exquiritur maxime veneficiis.  
Instante coitu capitibus inuicem obuersis atque in-  
clinatis consistunt magis quam antea, caudamque  
motant; aliter quoque quam consueuere hinniunt.  
E genitali geniturae simile quiddam effluit multo  
tenuius quam maris semen: quod etiam nonnulli  
hippomanes quoque vocant, non autem id, quod  
pullis innascitur. Non sine negotio excipi posse au-  
tument; paullatim enim destillat. Quin etiam,  
dum equiunt, saepius mingunt et inter se collu-  
dunt. Haec de equis sic habent. Vaccae autem 6  
tauriunt. Tanto autem furore capiuntur, ut neque  
tenere neque capere bubulci eas valeant. Cum vruntur  
libidine coeundi tum equae tum vaccae, id de-  
prehendes tumore genitalium. Vaccae quoque per-  
inde atque equae micturiunt. Vaccae etiam inscen-  
dunt tauros, comitanturque eos semper atque et-  
iam assistunt. Iuniores in equorum genere et bu-  
bulo priores incipiunt vrgeri ad coitum. Tempo-  
ribus quoque tepidioribus et habitudine secundiore

plus in venerem vrgentur. Equae etiam cum at-  
tendentur, earum impetus cohibetur, et fronte tri-  
7 stiori fiunt. Armenti sui consortes feminas odore  
dignoscunt equi, etiam, si paucos tantum dies ante  
coitus tempus vna fuerint; quas, si se cum aliis  
commiscuerint, (*si cum aliis coierint?*) morsu ex-  
pellunt, segregatique pascuntur, suas quique ha-  
bentes. Tricenae aut paulo plures singulis dantur.  
Quod si mas aliquis accedat, coactas in vnum vbi  
ambierit cursu, adoritur oppugnare aemulum, et  
ex agmine quae se mouerit, morsu inhibet. Taurus  
autem appetente coitus tempore armentis aggrega-  
tur, pugnamque ceteris ciet. At antea simul de-  
gunt ipsi; id quod Graeci ἀτιμαγελεῖν, nos possu-  
mus dicere segregari vel exarmentari. Saepe enim  
numero Epirotici tres menses totos non comparent.  
Denique siluestria vel omnia vel plurima ante coi-  
tus tempus non vtuntur communi cum feminis pa-  
scuo: sed mares, cum adoleuerint, segregantur, at-  
que seorsim a feminis degunt. Scrofae quoque,  
cum veneris impetu sollicitantur, id subare vocant,  
infestae etiam homines adoriuntur. Canes autem eo  
9 affectae modo dicuntur catulire. Coituriensibus fe-  
minis intumescunt genitalia locusque ille humescit.  
Equabus quoque liquor albus eodem tempore de-  
stillat. Menstruorum quoque purgationes eueniunt



ceteris animalibus, sed nulli aequè ac mulieri. In ouibus et capris tum coeundi tempus tum coitum peractum certis signis deprehendes: inde nihil noui indicii moliuntur, quoad pariturae sint. Tunc enim quibusdam argumentis cognoscunt pastores instare partum. Editio foetu large purgantur, principio cruenta materia non valde, postea vero valde. At 10 boui quidem asinoque atque equo quam his vberiores eueniunt purgationes, propterea quod sunt grandiores: verum si ad vtrorumque magnitudinem magnitudinis spectes rationem, multo parcius purgantur. Bos igitur venere exstimulata leuiter purgatur, quippe ad heminae dimidium aut non multo plus: quo purgationis tempore opportunus est coitus. Equa facillime omnium quadrupedum parit; et quod attinet ad purgamenta, purissima est, minimumque fluxum sanguinis emittit pro corporis magnitudine. Equabus et vaccis praecipue menstruatio fit, intermissa bimestri et quadrimestri et semestri spatio: quod non nisi ab armentariis iisque valde assuetis animaduerti potest; idcircoque nonnulli putarunt iis menstrua non solui. Mulabus non exeunt men- 11 strua, sed vrina, quae fit crassior quam mulorum. Omnino autem vesicae excrementum quadrupedibus quam hominibus crassius est. In genere ouillo et caprino femellarum vrinae quam marium crassiores;

at asinarum tenuior, vaccae acrior. A partu omnium quadrupedum crassior vrina fit; magisque etiamnum iis, quae minus fuerint purgatae. Lac per initia coitus puris specie prouenit. Vtile autem fit, postquam pepererint. Oues capraeque praegnant pinguescunt ac plus comedunt. Ita et boues et quadrupedes omnes aliae.

CAP. XVIII. (vulgo continuatur CAP. XVIII.)

Verno tempore in vniuersum aguntur in venem; quanquam non omnes eodem coeunt tempore, sed eo quod ad nutriendos foetus fuerit conuenientius. Sues villaticae quaternos menses gerunt; gerunt autem cum plurimos vicanos. Verum vbi multos pepererint, non omnes educare possunt. Vtulae nihilo secius pariunt, sed tardius coeunt. Vno quidem initu implentur; sed saepius admittant, propterea quod post coitum eiiciunt id quod apriam diximus. Quae communis quidem omnibus affectio est, sed quaedam etiam cum ea semen emittunt. Quae proles in vtero iusta magnitudine deprauata fuerit, Graeci *μετάχοιρον* vocant, quasi tu porcellum cordum dicas. Hoc quouis matricis loco generari consuevit. Vt primum quemque peperit, eidem primam mammam dat. Subantem non oportet statim iniri, priusquam aures demiserit;



alioqui rursus subaturit. Si autem vrgeat eam verneris impetus, vnus initus, vti diximus, satis est. Apro coituro confert praeberere in pabulum hordeum; scrofae autem, vbi peperit, coctum. Sunt scrofae, quae primori statim aetate ferunt porcellos bonos; aliae aetate tantum procedente proles suas et porcellas probas generant. Aiunt altero eruto oculo scrofam celeriter interire, raroque eua-  
dere. Viuunt fere omnes quindecim annis: nonnullae paulo minus viginti.

## C A P. XIX.

Tertio aut quarto initu replentur tam oues quam caprae. Imbre coitum superueniente, repetendus coitus est. Pariunt cum plurimos duos; interdum tres; iam vero etiam quatuor. Gerunt vterum menses quinque tam ouis quam capra; quo fit, vt locis tepidis commodisque et ad pastum vberibus his pariant. Viuit capra annos octo circiter: ouis decem; sed etiam saepe minus, praeter earum ductores, qui ad quindecim accedunt. Vnicuique enim gregi ex maribus ductorem vnum comparant, qui a pastore nominatim vocatus antecedit, assuefactus hoc agere a tenera aetate. Aethiopicae oues et ad duodecim et tredecim viuunt annos: atque caprae ad decem et vndecim. Coit tum ouis tum capra, tam

mares quam feminae, quamdiu viuunt. Geminos pariunt oues atque caprae et pabuli vbertate, et cum aries aut hircus vel ipsa mater fuerit vna e gemellis. Mares vero aut feminae nascuntur tum propter aquas, (quarum vis aliarum alii sexui destinatur,) tum propter ipsos parentes; nec minus aquilone spirante coeuntes mares potius generant, austro feminas. Mutantur etiam naturae, vt quae feminas parere consueuerint, mares edant, si in coitu aduersus aquilonem obuersae stent. Quae mature iniiri solent, si sero admittas, non patiuntur arietes.

3 Proles candida aut nigra fit, prout sub arietis lingua aut candidae aut nigrae venae subsunt. A nigris nigra, a candidis candida, ab vtrisque varia, a rufis rufa. Quae salsiores aquas potant, maturius coeunt. Operae pretium etiam est, antequam pariant, salire aquas: itemque et postquam pepेरint, atque etiam vere. Capris ductorem non constituunt, propterea quod earum natura minus constans sit, sed cito et facile vagentur. Stato tempore si grandiores natu oues ad coitum incitentur, aiunt pastores, commodiorem annum gregi portendi; si iuniores, male ei cessurum.

## C A P. XX.

Canum genera plura. Canes Laconici tam mares quam feminae coeunt octauo aetatis mense. Ac



sublato crure circa id tempus nonnulli vrinam reddunt. Vnico initu concipit canis. Quod deprehensum ex eo est, cum furtim subdidissent feminas: semel enim initae conceperunt. Gerit vterum Laconica sextam anni partem, hoc est dies sexaginta; quanquam interdum vno alteroue aut tertio die plures aut pauciores. Postquam peperit catulos, ii duodecim dies carent visu. A partu coitum repetit non ante sextum mensem. Quaedam quintam anni partem gerunt, dies scilicet duos et septuaginta. Harum catelli non ante quartum decimum diem vident. Quaedam vero quartam anni partem; quippe tres menses totos. Harum catuli decem et septem diebus carent visu. Videntur autem canes catuliendo tantundem ponere temporis. Septenos 2 dies canibus menstrua soluuntur; simul et genitalia turgent. Verum nondum admittunt mares; sed sequentibus diebus totidem. Omnes enim fere videntur quaternis denis diebus catulire: quanquam etiam septenis denis quaedam sic affectae fuerunt. Exeuntibus catulis vna cum illis exit purgamentum crassum mucosum; quod post partum plus de corpore (*crassitie*) quam de copia magis magisque perdit. Canes, antequam pariant, fere dies quinque lac habent. Quanquam quibusdam proueniat et septimo et quarto. Atque a partu statim utile

est. Laconicae autem tricesimo die post coitum lac habent. Initio crassum, processu temporis tenuius fit. Praestat caninum crassitudine, post suillum et leporinum. Appetens aetas ad coitum idonea deprehenditur argumentis, sicut et in homine. Intumescunt aliquantisper papillae mamillarum et cartilagineam induunt duritiem. Verum difficile est imperitis haec dignoscere: neque enim vlla sunt insigni magnitudine. Atque hoc feminae quidem evenit; at mari nihil eiusmodi. Sed sublato crure mingunt mares fere sexto aetatis suae mense. Hoc aliqui faciunt demum octauo: etiam sunt, qui ante sextum: sed paene semper cum incipiunt coire, (corroborari, *alii Codd.*) id agunt. At feminae conquiniscentes vrinam reddunt omnes. Iam vero etiam quaedam elato crure minxerunt. Parit canis cum plurimos duodenos: nam fere quinos senosue. Iam vero vnicum fuit quae pepererit. Laconicae fere octo. Coeunt tam mares quam feminae quamdiu viuunt. Peculiare vero id Laconicis. Laboribus enim exercitae plus valent ad coeundum quam desides. Viuit Laconicus canis annos decem, femina duodecim. Aliarum maxima pars quatuordecim aut quindecim; quaedam viginti. Idcirco aiunt Homerum recte cecinisse, canem Vlyssis anno vicesimo esse mortuum. In genere Laconum



mares quam feminae ob labores minus diu viuunt : in aliis haud sane compertum est : verum mares longaeuiore. Dentes canis praeterquam eos, qui canini dicuntur, nullos mutat, atque illos sane quarto quam nati sunt mense, tam mas quam femina. Igitur contrario modo sentiunt aliqui, propterea, quod hos solos mutat, ac quidam idcirco negant vllum omnino mutare; quidam, cum hos obseruarint, putant ceteros quoque mutare. Aetates a dentibus iudicant: iuniores candidos et acutos habent; seniores atros et obtusos.

## C A P. XXI.

Taurus vno initu implet. Inscendit autem violenter ita, vt vacca sese concuruet. Quod si impetus illius euentus vanus fuerit, vicesimo post die vacca taurum iterum admittit. Seniores tauri eandem eadem die saepius non inscendunt, sed intermittunt: at iuniores tum eidem saepius vim afferunt, tum multas ineunt, robore suo incitati. Marium minime libidinosum animal est taurus. Qui vicit, coitum exercet, in quo cum prae libidine viribus fuerit defectus, inuadit eum victus, ac saepenumero superat. Initia coeundi tam mari 2 quam feminae anniculis, ita vt etiam generent: plerumque tamen hoc faciunt annum et octo menses

nati; sed, quod potissimum confessum est, bimi. Gerit nouem menses, parit decimo. Quidam affirmant, ipso complente decimum die parere. At quod citra dicta tempora editum fuerit, abortus est: [*Quin etiam si vel tantillum anteuerterit partus tempus, neque uiuit,*] neque potest vivere. Ipsae enim ungulae quoque admodum sunt molles atque imperfectae tunc. Parit vnum fere: 3 raro duos. Parit vero atque coit, quoad uiuit. Quindecim annos circiter uiuit magna ex parte femina; item mares, si castrentur. Aliqui etiam ad viginti aut etiam plures, si agili sint corpore. Exectos mares assuefaciunt armentis ductandis, quemadmodum in genere ouillo. Ii diutius quam ceteri viuunt, propterea quod neque laborant, et sinceriori pabulo vescuntur. Flos aetatis anno quinto. Itaque recte quidam aiunt cecinisse Homerum: *marem quinquennem*: et illud: *bouis nouennis* (*aetate florentis?*): idem enim significare. Dentes mutat bos anno altero aetatis suae, non vniuersos, sed vt equus. Ungulas, cum dolore pedum laborat, non amittit, sed tumescunt valde ei pedes. Lac post partum (statim) vtile est: ante id tempus non habet lac. Primum quodque lac vbi concreuerit, adeo durum fit, quasi lapis. Quod ita demum contingit, si quis ei aquam non admisceat. Mi-



nones anniculis non coeunt iuuencae nisi prodigiose: nam et quadrimestres aliquae initum passae sunt, et mares coierunt. Mense Aprili (Thargelione) et Maio (Scirrhophorione) coire incipiunt plurimae: verum aliquae et ante autumnum non implentur. Cum multae sunt grauidae atque initum (*iterum?*) admittunt, ratum argumentum videtur esse et tempestatis et imbrium. Menses soluuntur vaccis, ut equabus, sed minus.

## C A P. XXII.

Equus et mas et femina coire incipiunt bimi; quanquam hoc haud saepe fit. Eorum quoque proles tum minor tum infirmior. Sed fere tres annos natis initium veneris est utrique sexui, ac proficiunt pullis subinde melioribus generandis ad annum usque vicesimum. Gerit equa menses undecim, parit duodecimo. Implet equus non certo dierum numero, sed aliquando vno aut altero aut tertio aut pluribus: asinus autem celerius. Equorum coitus non est laboriosus, veluti bouum. Salacissimum est omnium et marium et feminarum genus equorum praeter hominem. Excitantur ad coitum praeter aetatis rationem iuueni equi, cum et bono et largo pabulo luxuriant. Raro plures vno parit; aliquando parit etiam geminos, sed nunquam

plures; iam et mulos quaedam geminos peperit: quod prodigiosum censetur. Coit equus etiam tricesimo mense aetatis suae; ita ut post dentium mutationem sese digna generet. Iam vero etiam dum amitterent adhuc dentes, impleuerunt, ut aiunt, nisi sua natura steriles fuerint. Habet equus dentes quadraginta; amittit primores quatuor mense tricesimo, duos superiores, totidem inferiores. Exacto deinde anno, eodem modo quatuor abiicit, duos superiores, duos inferiores. Tum sequenti anno peracto quatuor alteros ad eundem modum. Postquam annos quatuor atque insuper menses sex natus fuerit, nullum amplius amittit. Iam vero cuidam omnes cum primis exciderunt; alii autem cum postremis. Verum haec raro fiunt, ita ut fere quarto et quadragesimo mense utilis maxime sit ad generationem. Seniores equi tam mares quam feminae aptiores sunt ad generandum. Ineunt et matres et filias equi: quo argumento iam tum completum armentum putant, cum suam conscendunt prolem. Scythae equabus grauidis equitant, cum primum foetus se conuerterit, quo faciliorem partum aiunt euenire. Ceterae quadrupedes pariunt iacentes; atque idcirco earum omnium foetus in latus exeunt: at equa appropinquante partu erecta stans edit prolem. Equorum plurimi duodeuiginti



annos viuunt; item viginti quinque atque etiam triginta. Quod si bene curentur, pertingunt etiam ad quinquagesimum. Sed fere longissima vita tricesimus; (nonus *omittunt Codd. aliquot*) equabus autem quintus et vicesimus. Iam vero quaedam etiam quadraginta vixerunt annos. Minus diu viuunt mares feminis ob coitus, et domestici quam armentarii. Feminae iusta altitudo longitudoque anno quinto; mari sexto. Sex annis sequentibus crassescit corpus, perficiturque ad vicesimum usque annum. Citius perficiuntur feminae quam mares: at in vtero mares quam feminae; sicut et in hominum euenit genere, et in aliis animalibus, quae multipara sunt. Aiunt mulum post mensem <sup>4</sup> sextum ad mammam non admittere lactis gratia, ut ante; conuulsione enim idcirco laborare: at equum longiore tempore admittit. Aetatis vigor equo et mulo dentibus mutatis. Cum omnes iam amiserit, haud facile est nosse aetatem. Itaque vulgo iactant sic, notam equum habere ante amissos, amissis non habere. Dignoscitur omnino aetas post amissionem de caninis. Eorum enim, qui equitantur, attritu minores fiunt: iuxta enim eos imponitur frenum. Qui equitem non ferunt, maiores habent, sed dissitos. Iunioribus autem acuti et pusilli sunt. Coit mas et quouis tempore et quoad viuut. Fe- <sup>5</sup>

minae autem idemque et coeundi et vitae finis est. Quouis autem tempore coeunt, nisi si quis vinculis aliaue coerceat necessitate. Nec tempus vllum certum eorum libidini et veneri definitum est: neque tamen, quocunque coierint tempore, queunt quod genuerint educare. In Opunte armentarius equus quadragenarius inibat; sed eius anteriora crura contollere oportebat. Vere coitum auspicantur equae. Postquam peperit equa, non continuo deinceps impletur, sed aliquamdiu abstinet; ac quarto quintoue post partum anno parit praestantiora. Vnum saltem annum interponere necesse est, ac tanquam noualem quendam facere.

6 Equa igitur per interualla parit; asina (*Codices omnes* mulus) autem nunquam intermittit. Sunt nonnullae equae steriles omnino. Aliae concipiunt quidem, sed perferre nequeunt. Harum argumentum obseruarunt in dissecto pullo, circum cuius renes renum specie alia sint, ita vt renes quatuor esse videantur. Equa vbi peperit, illico devorat secundas, itemque auulsum de pullo id, quod in equorum genere pullorum fronti innascitur, Hippomanes nomine, magnitudine paruae caricae, facie latum, orbiculatum, nigrum. Hoc si quis praeueniens auferat, odore eius sollicitata equa mente abalienatur atque furit. Quamobrem



veneficae id quaerunt atque colligunt. Impletam ab equo equam asinus si ineat, corrumpit conceptum antea foetum. Equis nullum praestituunt ducem armentarii, sicut faciunt bobus, propterea quod vagum suapte natura animal est acreque, neque vno in loco facile manet.

## C A P. XXIII.

Asinus asinaque coeunt mense aetatis tricesimo; et tunc amittit primos dentes: secundos autem sexto mense: ac tertios quartosque simili modo. Hos autem quartos notam vocant. Iam vero etiam anicula asella concepit, ita vt etiam educaret. Exceptum coitu semen emingit, nisi prohibeatur; idcirco post coitum statim verberibus insectantur et in cursum propellunt. Parit mense duodecimo. Vnum fere parit: haec enim est eius natura; quam interdum et duos. Ac, quemadmodum diximus, equi conceptum corrumpit asinus coiens, at non ita equus asini, cum inita ab eo equa fuerit. Grauida mense decimo lac habet. A partu initur 2 die septimo, eoque huius diei initu potissimum impletur, quanquam etiam post. Quod si non pepererit prius, quam dentes gnomones amittat, nunquam amplius aut impletur aut coit postea, quamdiu viuit. Non vult parere in conspectu ho-

minis aut in luce, sed in tenebras abducunt parturientem. Tota vita parit, si non ante pepererit, quam amittat gnomones. Viuit asinus plus annos triginta, ac femina quam mas diutius. Cum equus asinam, aut asinus equam init, multo magis abortus sequitur, quam si congeneres coeant, cum equa equus, cum asina asinus. Secundum maris naturam euenit vteri gerendi tempus, cum diuersi coiuerint. Tantundem, inquam, temporis, quanto perficitur ipse, suo e genere cum procreatur. At corporis magnitudo et facies et robur prolis potius  
 3 matrem repraesentat. Quod si eiusmodi mixtio perpetuetur, neque ita coeundi tempus vllum intermittatur, breui femina effoeta fit. Idcirco qui hoc agunt, non perpetuo miscent, sed interponunt tempus. Non admittit aut equa asinum aut equum asina, nisi asinus vel femina equam suxerit. Ergo dant operam, vt supponant eos, quos vocant equirumos. Hi ineunt in pascuis vi superantes, velut equi.

#### C A P. XXIV.

Mulus conscendit atque coit post amissos dentes priores; septennis etiam implet: ac iam ex eius initu ginnum equa procreauit: postea amplius non coit. Atque iam mula grauida facta est, sed ad finem perferre foetum non potuit. At mulae in terra



Syria supra Phoenicen coeunt et pariunt. Sed enim simile genus est, non idem. Qui ginni vocantur, ex equa generantur, cum haec inter gestandum male affecta fuerit; quemadmodum inter homines pumiliones, et in suillo genere porculi cordi. Habet genitale ginnus grande, sicut et pumiliones. Vita mulorum ad annos multos: quidam octogena-  
 2 narius factus est Athenis, quo tempore templum exaedificabant. Is etsi dimissus ob senium, adnixus iumentis, quae trahebant carros, ea ad opus adhortabatur. Quare plebiscitum factum eoque cautum fuit, ne annonae negotiatores a frugum cumeris in foro arcerent eum. Serius mula senescit quam mulus. Nonnulli ita aiunt, feminam cum purgatione vrinam reddere, marem autem vrinam eius odorantem celerius senescere. [Vulgo et Scaligero XXV.] Horum igitur animalium generationes  
 3 ad hunc modum sunt. Sed qui quadrupedibus (*dictis*) curandis obeunt munus, hoc argumento seniores iunioresue deprehendunt. Si a maxilla abducta cutis continuo retendatur, iunior quadrupes est: si autem diu corrugata maneat, vetula est.

#### C A P. XXV. (vulgo et Scaligero XXVI.)

Camelus gerit menses duodecim. (*Libri omnes decem.*) Parit autem vnicum: vnipara enim est.

Foetum anniculum segregant ex armento. Viuit diu; quippe vel ad annos plus quinquaginta. Parit vere. Lac semper habet, quoad iterum conceperit. Atque carnes et lac inter suauissimos censentur cibos. Lactis vsus est admixto duplo aut triplo  
 2 aquae. [Vulgo et Scaligero XXVII.] Elephantis primum aetatis anno vicesimo tam mas quam femina coeunt. A coitu femina gerit vterum, vt aiunt quidam, sesquiannum, vt alii, annos tres. Controuersiae temporis in caussa est, quod coitum nemo facile conspiciere potest. Parit femina clunibus demissis, manifesto dolore. Natus pullus ore, non promuscide, lac sugit, statimque et oculis vtitur ad videndum et cruribus ad ingressum.  
 3 [Vulgo et Scaligero XXVIII.] Sues ferae ineunte hieme coeunt. Vere pariunt secedentes in loca maxime inaccessa et praerupta, angustaque atque opaca. Versatur inter scrofas mas triginta fere dies. Partus numerus ferendique vteri tempus idem, quod et in villaticis suibus: vocemque his similem edunt; sed femina quam mas frequentiore: is enim raro. Sues feri castrati tum maiores tum saeuiores euadunt, sicut etiam Homerus cecinit:

*Exectum aprum aluit saeuum, qui non fuit instar  
 Frugiferae ille ferae, sed molis montis opaci.*

Fiunt autem castrationes in iuuenculis, quorum



testes morbo pruriginem inducente capiuntur. Ergo scabentes ad arbores eos exterunt.

C A P. XXVI. (vulgo et Scaligero XXIX.)

Cerua ita coit, vt diximus antea, fere subtrahendo se: raro enim marem pati potest ob impetus contentionem. Aliquando tamen etiam more pecudum patiuntur, atque vrgente venere socias visitant et secedunt. Mutat feminas mas, neque vnus tantum vtitur consuetudine: sed breui tempore interposito aliam atque aliam adit. Coeunt post Arcturum circa Augustum et Septembrem. (Boedromionem et Maimacterionem.) Gerit menses octo: impletur paucis diebus, et ab vno multae. Vnum <sup>2</sup> fere parit; sed paucae geminos peperisse visae sunt. Parit iuxta vias, ob ferarum metum. Hinnuli celeriter crescunt. Purgationes aliis temporibus non eueniunt ceruis; sed cum pepererint, mucoso quodam humore purgantur. Assuescit hinnulos petere lustra: quem locum pro profugio habet, saxum discissum vno aditu: vbi etiam pugnare solet aduersus eos, qui sese adoriuntur. De eius vitae <sup>3</sup> longitudine fabulantur, atque earum fabularum ratio incerta sane. Neque enim aut gestatio aut incrementa hinnulorum eiusmodi sunt, vt prae-

beant argumentum longaeui animalis. In Asiae monte Elaphunte (*alii* Elapho) appellato ad Arginusam, vbi diem obiit Alcibiades, ceruae omnes fissa sunt aure: quo signo, cum loca mutant, dignoscuntur. Quin ipsi quoque in vtero statim formati foetus eadem nota praediti sunt. Papillas ha-

4 bent ceruae quaternas, sicut et vaccae. Vbi ceruae grauidae sunt, segregantur mares: ac veneris impetu agitati, (*Codices* propter libidinis graueolentiam) sibi quisque seorsum scrobes fodit, ac more hircorum foetet, faciesque adspergine (*seminis genitalis*) nigrescit, vt hircis. Atque ita agitant, donec imbres euenerint. Inde in pastum vertuntur. Id ita agit animal hoc, propterea quod salax natura sua sit, et quia pinguissimum est: id quod praeter modum ei accidit aestate. Quamobrem currere non valent, sed capiuntur etiam a pe-

5 ditibus insequentibus altero aut tertio cursu. Fugiant vero tum ob aestum tum ob anhelitus fatigationem in aquas. Coitus tempore carnes eorum vitiantur, ac maleolentes fiunt hircorum more. Hieme igitur extenuantur ac deficiuntur viribus: sub ver maxime vigent cursu. Fugiant interpellato cursu, ac subsistentes manent, vsque dum prope sit qui insectatur; tum vero fugam repetunt. Hoc fa-



cere videntur ob intestinorum qua laborant tenuitatem atque debilitatem; quae tanta est, vt, si quis percutiat, intus rumpantur, saluo corio.

C A P. XXVII. (vulgo et Scaligero XXX.)

Vrsi coeunt, quemadmodum dictum est, non ascendendo, sed humi decumbentes. Fert femina dies triginta. Parit singulos aut binos, neque vnquam plures quinis. Parit foetum minima magnitudine, si ad eius corpus respicias: minorem enim mustela edit, maiorem mure, nudum, coecum, et paene informem cruribus plurimisque membris aliis. Coit mense Februario; (Elaphebolione;) parit sub tempus, quo est latitura. Per id tempus tum mas tum femina maxime pinguescunt. Educatis catulis tertio (*post brumam*) mense prod-eunt iam appulso vere. Hystrix quoque et latet et gerit dies totidem, ac reliqua agit, vt vrsa. Praegnans vrsa raro et difficulter capitur.

C A P. XXVIII. (vulgo et Scaligero XXXI.)

Leonem auersum coire retroque vrinam red-dere, iam dictum est. Coit paritque non quouis tempore, quanquam quotannis. Parit autem vere. Binos fere parit, neque plures senis: interdum etiam vnum. Nam quae narratur fabula, leaenam

parientem eiicere matricem, delira est. Sed composita ex eo fuit, quod animal hoc rarum est. Idcirco qui fabulam confinxit, caussam ignorauit. Rarum igitur leonum genus est, rarisque gignitur locis; sed tota Europa inter Acheloum et Nessum duntaxat fluuios. Ipsa quoque leaena parit pusilla omnino, adeo vt altero aetatis mense vix ingrediantur. Terrae Syriae leaenae quinquies pariunt, primum quinos, post deinde vno pauciores; postremo nullum, sed effoetae agitant. Caret leaena iuba; solus mas habet. Mutat dentes leo quatuor eos tantum, qui canini appellantur, duos superiores, totidem inferiores, idque aetatis suae mense sexto. [Vulgo et Scaligero XXXII.) Hyaena colore lupi est, sed hirtior, iubamque habet toto dorso perpetuam. Quod autem aiunt, vtriusque sexus habere genitalia, falsum est: sed quod habent mares, est simile lupi et canis. Quod autem videtur esse feminineum, sub cauda quidem est simile figura feminino, verum peruium non est: sub hoc meatus excrementorum. At femina hyaena habet ipsa foramen illud, simile ei, quod feminae dicitur genitale, idque sub cauda, sicut et mas, sed nullo meatu peruium: deinde meatum excrementorum, sub quo verum genitale. Habet femina matricem quoque, sicut et aliae eiusmodi animantes. Raro



capitur hyaena femina: nam venator inter vndecim numero (vndecim annis *Codex.*) vnam tantum ce-  
 isse retulit. [Vulgo et Scaligero XXXIII.] Lepores 3  
 venerem exercent coeuntes auersi inter se, sicut  
 iam dictum est: retro enim mingunt. Coeunt au-  
 tem et pariunt omni tempore. Et superfoetant, cum  
 gestant, et pariunt singulis mensibus. Pariunt au-  
 tem non vniuersos, sed interponunt dies quot res  
 tulerit. Habet lac femina priusquam pariat. A  
 partu coitum statim repetit. Et etiamnum lactans  
 concipit. Lac crassitudine suillum refert. Parit  
 coecos, sicut pleraque eorum, quae pedes in multa  
 fissos habent.

C A P. XXIX. (vulgo et Scaligero XXXIV.)

Vulpes conscendens coit; parit vrsae modo foe-  
 tum [*coecum*] atque etiam magis indiscretum. In-  
 stante partu demigrat; itaque non saepe capta est  
 praegnans vulpes. Editum foetum lingua lambendo  
 et fouet et maturat. Nunquam plures quaternis  
 gignit. [Vulgo et Scaligero XXXV.] Lupus et ge- 2  
 rit et parit eanum more, tum tempore, tum nu-  
 mero foetuum: item coecos, sicut et canis. Coit  
 autem vno certo tempore. Parit aestate ineunte.  
 Fertur etiam ratio partus, fabulam adiungens.  
 Aiunt enim lupos inter duodecim dies anni parere.

Huius autem rei causam referunt in fabula, propterea quod in totidem diebus Latonam lupae facie tectam Iunonis metu ex Hyperboreis in Delum deduxerint. At vero an id sit tempus ferendi necne, (*alii Codd.* aut semper,) nondum etiam perspectum est; sed tantummodo sic fertur. Commentum videtur tamen; quemadmodum et cum aiunt, semel

3 tantum in vita lupos parere. Feles et ichneumones tot pariunt, quot canes; atque idem cibi genus est. Viuunt ad annos sex. Panthera (panther) coecos item gignit, quemadmodum lupo. Nunquam plures quatuor parit. Lupi ceruarii (thoes) implentur coitu, ut canes: pariunt coeca duo aut tria aut quatuor numero. Quod ad eius speciem attinet, caudam versus porrigitur, sed humilior est. Celeritate quoque praestat, quanquam cruribus brevibus: verum propterea quod agilis est, prosilire

4 longe potest. [Vulgo et Scaligero XXXVI.] Sunt in Syria muli, (hemioni,) sic enim appellant, diuersum ab iis genus, qui ex coitu equi asinique procreantur; simili tamen facie; ut siluestres etiam asini ob quandam similitudinem cum domesticis appellati sunt. Et quemadmodum asini siluestres, ita hi muli praestant celeritate. Hoc in genere mulae vicissim ex se procreant: quod ex iis deprehensum est, qui venerunt in Phrygiam Pharnacis



tempore, qui Pharnabazi pater fuit. Durant adhuc; sed tres tantum nunc extant, cum olim novem, vt aiunt, fuerint.

CAP. XXX. (vulgo et Scaligero XXXVIII.)

Murium generatio inprimis mirabilis prae ceteris animalibus, tum magnitudine tum celeritate. Iam enim in vase miliario intercepta femina grauidā, non multo post apertō vase, extiterunt musculi centum viginti numero. In quaestione etiam est et generatio et interitus murium, qui in agris emergunt. Multis enim in locis murium innumerabilis multitudo in aruis existere solet, ita vt ex vniuersa segete parum reliqui fiat. Tam repente enim cooriuntur, vt qui haud ita agri magnum modum colunt, cum vidissent instare messis tempus, postridie mane adductis messoribus, deuoratam vniuersam segetem offenderent. Verum iidem abolentur item praeter 2 rationem: paucis enim diebus omnino nusquam comparent. At enimvero homines ei rei anteuertentes euincere non possunt vel suffitibus vel effossa terra vel etiam venationibus. Quin immittunt sues quoque, quorum opera illorum lustra eruantur. Ad haec vulpes illos captant, et inprimis agrestes mustelae (viuerrae) interficiunt. At ne sic quidem aut foecunditatem aut celeritatem generandi

superare queunt: neque aliud quippiam, nisi im-  
 bres superuenerint. Cito enim fit, vt nusquam  
 3 praeterea conspiciantur. Quodam in loco terrae  
 Persicae dissectae grauidae matris foetus feminei  
 praegnantes apparent. Quidam et aiunt et affir-  
 mant, salem si delingant, sine coitu praegnantes  
 fieri. Aegyptii mures duro sunt pilo, quemad-  
 modum erinacei. (Sunt et alii, qui *haec omittunt*  
*Codices optimi.*) bipedes ingrediuntur: anteriora  
 enim crura breuia habent, posteriora magna: et  
 frequentes sunt. Sunt praeterea murium genera alia  
 multa.

---



---

A R I S T O T E L I S  
D E A N I M A L I B V S H I S T O R I A E  
L I B E R V I I .

---

C A P . I .

Quibus principiis quoque modo et generetur homo in vtero feminae, ac deinde quibus euentis, propriae naturae ratione, agitet vsque ad senectutem, sic instituamus. Quid differret a femina mas, quibusque membris, iam antea dictum est. Bis septenis exactis annis mas ferre primum incipit genitale semen magna ex parte. Simul et pubes vestripilis incipit: quemadmodum plantae quoque, quae semen incipiunt ferre, florere primum ait Alcmaeon Crotoniata. Vox quoque per hoc idem tempus mutari incipit in asperiores sonum atque inaequalitatem; neque amplius acuta est, neque dum grauis; neque sibi constans; sed quae similis videatur fidiculis asperis atque e neruis male con-

tortis. Idque vocant Graeci *τραγίζειν*, Latini  
2 *hirquitallire*. Euenit hoc magis iis, qui venerem  
tentarint. Nam qui eiusmodi rem appetunt, iis  
mutatur vox etiam in virilem: abstinentibus con-  
tra. Quod si cura adhibita ad arcendum hoc in-  
commodum connituntur, (id quod agunt ex iis qui-  
dam, qui musicae artis et cantus chorici studio te-  
nentur,) porro vsque perdurat: longeque minimam  
patitur mutationem. Mammae quoque exturgescunt  
et genitalia; neque solum in magnitudinem, sed et-  
iam in aliam speciem. Euenit hoc quoque tempore  
iis, qui libidinosa attrectatione sollicitantur ad emit-  
tendum semen, vt exeunte eo non solum capiant  
3 voluptatem, sed etiam dolore capiantur. Per idem  
tempus foemellis quoque mamillae intumescunt, et  
quae appellant menstrua erumpunt. Ea sunt san-  
guis quasi recens caesi animalis. Nam quae sunt  
alba, etiam omnino tenella aetate proueniunt, tanto  
magis, si alantur humidioribus cibis. At ea pro-  
hibent incrementum puellularum, earumque cor-  
pora extenuant. Sed plurimis soluuntur menstrua  
prima, vbi iam mammae in digitorum duorum al-  
titudinem tolluntur. Atque etiam puellis mutatur  
vox hoc tempore in sonum grauiorem. Omnino  
namque est mulieris quam viri vox acutior. Ita et  
puellae quam adultiorum; quemadmodum puero-



rum quam virorum: et virginalis fistula quam puerilis acutior. Potissimum autem tum egent custodia: vehementissime enim in vsum veneris sollicitantur illis incipientibus. Quod si nulla verecundia plus moueant corpora, quam quantum ex imitatione afficiuntur, iis, qui abstinent venere, transire consuevit id in sequentes aetates. Adolescentulae namque exercitae opere venereo euadunt intemperantiores. Itemque mares, si incustoditi degant. Namque et meatus aperiuntur, et per eos fit, vt facile permittat corpus fluere humorem; simulque recordatio eius, quae olim contingebat, voluptatis ad illius temporis coitum excitat appetentiam. Sunt 5 quidam impubes et steriles a generatione, propterea quod genitalis locus deprauatus fuit. Sic etiam foeminis quibusdam nulla vnquam pubes oritur a generatione. Mutant autem et habitudines tam mares quam foeminae, quo vel in prosperam vel in aduersam valetudinem propensiores sint. Et quod ad corpulentiam attinet, graciliores aut crassiores aut habitiores. Nam post pubem nonnulli ex gracilibus fiunt crassi atque saniores. Alii e contrario. Similis euentus et in virginibus. Quotus enim quisque vel puer vel virgo in corpore habuit superfluos humores, iis simul excretis, in puero per semen, in virgine per menstrua, eorum corpora

et secundiore valetudine et nitidiorē habitudine comparantur exeuntibus iis, quae et sanitati et ali-  
6 mentis incommodabant. Aliis contraria natura praeditis exiliora fiunt corpora et morbis plus obnoxia. Namque de ipsa natura deque iis, quae bene habent, excretio fit, pueris in semine, virginibus in menstruis. Mammarum quoque ratio aliis alia virginibus est. Quaedam vastas habent: nonnullae paruas. Illud autem eis euenit fere, quibus aetate puerili humores redundant. Cunctantibus enim, neque dum solutis menstruis, quo magis inest humiditas, eo altius attolli cogit, quoad erumpant. Quem igitur tunc tumorem compararint, ne in posterum quidem remittunt. Qui mares laeues sunt et humidi, neque venosi, iis tam iunioribus quam senioribus magis prominent vbera, magisque muliebrem speciem referunt; idque plus  
7 fuscis quam candidis. Igitur ad ter (*vulgo* bis) septenos annos vsque primum sterile semen est; deinde genitale quidem, sed pumila et imperfecta generant et adolescentes et puellae; quemadmodum euenit plurimis aliorum animalium. Concipiunt celerius iuniores, sed in parturiendo laborant magis; earumque corpora non fere perficiuntur; maturiusque senescunt salaces vel masculi, vel femellae frequentia partuum. Videntur enim, quae



tertium pepererint, amplius nec crescere quidem posse. Sedantur moderanturque magis feminae quae intemperantes in veneris consuetudinem sunt, si frequenter pariant. Post ter septimos annos mu-  
 8  
 lier opportune se habet ad prolificandum: viri autem adhuc proficiunt. Semina tenuia sterilia sunt: grandinis speciem quae referunt, et prolifica et masculifica magis: at tenuia et non globulosa foemellifica. Mentumque maribus id aetatis vestitur pilis.

## C A P. II.

Cientur mulieribus menstrua decrescente luna. Idcirco qui argutantur, aiunt Lunam esse foeminam: propterea quod eodem tempore et illae purgantur et haec decrescit, ac post tum purgationem tum deminutionem ambae replentur. Paucis ipsarum singulorum mensium frequentia euenit, sed tertio quoque mense plurimae purgantur. Quibus igitur modico tempore alterum aut tertium diem durant, facilius liberantur: quae plures dies ponunt, difficilius: aegre enim habent iis diebus. His enim vniuersa simul purgatio prorumpit, illis vero paulatim. Omnibus autem corpus aggrauatur, usque dum exeat. Pleraeque autem incitatis atque instantibus menstruis matrices strangulantur et tumultuantur, quoad erumpant. His expeditae foe-  
 2

minae natura concipiunt. Quae non menstruantur, fere steriles degunt: quanquam aliquae, quibus nulla vnquam menstrua effluxere, concipiunt; collecto scilicet tanto humore, quantus solet relinqui iis, quae matres factae sunt post purgationem, modo ne foras exeat. Adhuc etiam profluentibus nonnullae concipiunt, post non concipiunt, eae scilicet, quibus statim post purgationem vulua concluditur. Quibusdam menses ad finem non cessant profluere quanquam grauidis: sed iis euenit, vt minus idoneos pariant foetus, quique aut seruari, 3 vt crescant, nequeunt, aut imbecilli euadunt. Ple- risque autem prae desiderio coitus propter aut flo- rentem aetatem aut diuturnam abstinentiam descen- dunt vteri, et fluunt menstrua saepius in mense, donec concipiant: tunc reuertuntur rursus in su- perio-rem locum peculiarem. Interdum etiam, licet ceterum bene habeat, si forte humidus vterus sit, 4 efflat semen genitale, quod humidum sit. Omnium animalium mulier inter feminas, vt iam dictum est, largissimis menstruis purgatur. Nam quae animal non pariunt, iis nihil tale euenit; propterea quod is humor superfluous in corpus vertitur. Quippe eorum quaedam maiora suis maribus sunt. Prae- terea in squallorem, quibusdam in squamas, aliis in pennarum copiam absumitur. Illis autem quae



animal pariunt, et humo sola vtuntur ad mouendum sese, tum in pilos tum in corpus, (solus enim homo laevis est) item in vrinas: maxima enim eorum pars mingit crassum et copiosum. At mulieri horum vice omne vertitur superfluum illud in purgamentum. Similis quoque in maribus ratio. Inter 5 alia enim animalia plurimum seminis emittit homo pro sui corporis magnitudine. [*Idcircoque laevis-  
sissimus omnium animalium est.*] Inter eos autem ii, qui et natura humidiores et non multum sunt corpulenti: sicut et candidi quam fusi. Eodem quoque modo mulieribus carnosus transit in corporis alimentum magna pars illius fluoris. Atque in opere venereo candidarum natura fert, vt plus quam fuscae exigant humoris. Efficiunt autem eiusmodi coitum alimenta humida atque acria.

## C A P. III.

Mulierem concepisse indicat locus, si continuo post coitum resiccetur. Sane labia ostii si laeua sint, nequeunt concipere: dilabitur enim: neque si crassa. Quod si digito attrectata asperiora sint et resistant, aut tenuia inueniantur, tunc opportunum ad coeundum tempus est. Ad hunc modum vterus apparandus est, vt concipiat; contra vero, vt ne concipiat. Etenim si labia laeua sunt, non

concepit. Idcirco nonnullae matricis os, ne semen intra procidat, oblinunt cedria, aut cerussa, aut  
2 thure oleo dilutis. Igitur si septem diebus contineatur, manifestum indicium est conceptionis. Nam quae vocantur effluxiones, in his diebus eueniunt. Postquam conceperint aliquae ad certum usque tempus purgantur, conceptis foemellis cum diutissime diebus tricenis; ad quadragenos autem in masculis. Purgationes quoque sequentes partum tantundem dierum numerum repraesentant; quan-  
3 quam non omnibus aequè exacte eueniat. Post verò tum conceptionem tum quot diximus dies non amplius eueniunt, sed in mammas diuertitur, atque lac fit. Cuius sane lactis extant indicia prima pauculi et araneosi in mammis. Cum conceperint, fit, ut sentiant potissimum in ilibus; nonnullis enim ea efficiuntur pleniora; manifestiusque apparet id gracilioribus: item in inguine. Mares in dextro latere quadragésimo fere die, foemellae autem in laeuo circiter nonagesimo mouentur. At enim-  
vero arbitrandum est, nulla certa lege hoc euenire; multis enim feminam gerentibus motus in dextra, mascula prole grauidis in sinistra factus est. Verum omnia haec atque eiusmodi differunt fere inter se,  
4 quod frequentius rariusue contingant. Per idem tempus etiam finditur foetus, cum antea indiscretus



carnosus constiterit. Quae intra septimum diem corrumpuntur, appellantur effluxiones; quae intra quadagesimum, abortus. Sane plurimi foetus interea pereunt. Masculus si quadagesimo exeat die, atque in aliud quippiam indatur, diluitur atque aboletur: sin in aquam frigidam, consistit ibi tanquam in membrana. Ea deinde discalpta, apparet foetus quantitate formicae grandioris; partesque ipsae conspicuae sunt tum ceterae omnes tum genitale ipsum; atque oculi, sicut in aliis animalibus, maximi. Foemineus foetus, qui intra tres menses corruptus fuerit, fere indiscretus videtur: qui vero de quarto mense assumserit, et finditur et celeriter adipiscitur aliam dearticulationem. Hucusque uni-  
 5  
 versam membrorum perfectionem serius accipit femina quam mas, et mense decimo frequentius quam mas oritur. Cum autem nata fuerit femina, celerius quam mas et in iuventutem et aetatem statam et senectutem peruenit; et citius etiam quae pueriorum frequentia utebantur; quemadmodum antea quoque dictum est.

## C A P. IV.

Cum vterus semen genitale comprehenderit, plerisque statim occluditur, quoad septimus mensis exigatur: octauo aperitur. Ac foetus, si maturus

ad partum sit, praeuenit descendere mense octauo. Qui autem maturi non sunt, sed suffocati, [*mense octauo pariundi, quos non perferunt octo menses mulieres* omittunt Codices alii] neque occupant descendere octauo mense, neque vteri eo mense aperiuntur. Idque indicio est, foetum non esse maturum, cum exit antequam quae diximus  
2 contigerint. Post conceptum mulierum totum corpus aggrauatur, visus obtenebratur, capitis dolores oriuntur. Atque haec quidem nonnullis citius ac fere die decimo eueniunt; aliis serius, vt quaeque forte superfluo humore plus minus occupatae fuerint. Praeterea nausea et vomitu plurimae corripiuntur; maxime vero eae, quibus cessant purgationes, neque in mammas deuertunt. Igitur per initia quaedam plus laborant mulieres; quaedam procedente tempore, auctiore iam foetu: multis saepe  
3 tandem vrinam destillari contingit. Quae marem gerunt, fere facilius expediuntur, et nitidiores degunt: quae feminam, contra. Decolores enim plus sunt magna ex parte, atque molestius agitantur. Plerisque etiam crura circum intumescunt, et caro protuberascit; quanquam aliquibus contra eueniat. Solent praegnantibus varii appetitus contingere, iique celeriter commutari: quod vocant Graecorum nonnulli picare. Et quae foemellas gerunt magis



praecipites sunt ad appetendum; sed iam apposis rebus minus frui possunt. Paucis euenit grauidis corpore melius habere. Maxime infestantur, cum foetui incipiunt oriri pili. Congeniti pili praegnantibus rarescunt et defluunt: quae loca autem glabra habere consueuerunt, ea potius pilosa fiunt. Masculus fere magis mouetur in vtero quam foemella, et celerius editur. Foemella autem tardius. Atque in foemellis dolor continuus et lentior, in masculis expeditior quidem, sed longe molestior. Instante partus tempore quae cum viris coeunt, celerius pariunt. Videntur parturire mulieres interdum, cum tamen tempus pariendi nullum sit. Sed parturitionem appetere putant, cum infans vertitur in caput. Reliqua igitur animalia perficiunt partus suos vna tantum lege. Vnum enim tempus praescriptum est pariendi. Soli ex animalibus homini multa. Nam et septimo et octauo et nono mense parit: plurimum etiam decimo: quaedam etiam ex vndecimo insuper etiam aliquid capiunt. Qui ante mensem septimum prodeunt, nulli vlla ratione possunt viuere. At septimus mature oriendi principium est. Verum plerique sunt imbecilles: ideo inuoluunt eos lanis. Foramina etiam aliqui indiscreta habent; qualia sunt aurium et narium. Ceterum crescentibus deformantur; atque horum

quidem viuunt multi. Octauo autem mense editi in Aegypto atque aliis aliquot locis, quorum indigenae mulieres commode perferunt, et tum ferunt multos facile, tum etiam pariunt: ii que nati valent viuere, etiamsi monstrosi fuerint; ibi igitur octimestres et vitales sunt et educantur. At in terrae Graeciae regionibus pauci omnino superesse possunt: multi autem intereunt. Quod si quis saluus sit, ob eam opinionem putant mulieres non octauo natum mense, sed latuisse sese conceptum  
6 antea. Laborant potissimum mulieres mense quarto et octauo: quarto igitur et octauo mense si foetus corrumpatur, ipsae quoque fere pereunt. Quare non solum non viuunt octimestres foetus, sed et illorum pereuntium parientes in discrimine sunt. Eodem modo latuisse quoque eorum conceptio videtur, qui post vndecimum mensem editi sunt. Illorum enim conceptus initium ignorant mulieres. Flatibus enim vteri saepenumero occupatae, postea coeundo grauidae factae, illud arbitrantur fuisse initium conceptionis, quod ex indiciiis vsitatis agnouissent.

CAP. V. (vulgo continuatur CAP. IV.)

Igitur quot metis pariendi differat ab aliis animalibus homo, hae sunt. Animalia quaedam cum



singulos tantum pariant, alia autem multa, vtriusque naturae particeps est humanum genus. Namque et plurimae et plurimis locis singulos pariunt mulieres: multae et multis gemellos, vt toto ambitu terrae Aegypti. Quin etiam ternos quater-nosque quibusdam locis non paucis; quemadmodum supra dictum est. Non plures parit quinis: id quod euenisse pluribus obseruatum est. Quaedam vero viginti peperit, quater quinos scilicet; atque eorum plerique educati sunt. In aliis animalibus gemelli, etsi sunt mas et foemina nati, nihilominus enutriuntur et viuunt, quam si aut mas vterque aut foemina sit: at in hominibus pauci supersunt e geminis, si alter mas, alter foemina extiterit. Admittunt initum praegnantēs potissimum <sup>2</sup> animalium mulier atque equa. Cetera, postquam grauida facta sunt, fugiunt mares, exceptis iis, quorum natura fert superfoetationem: cuiusmodi est genus leporinum. Atque equa quidem semel praegnans non superfoetat postea, sed vnum fere tantum parit. Homini autem aliquando euenit, sed raro. Igitur qui multo post tempore concepti fuerint, non perficiuntur, sed dolorem faciunt, et corrumpunt priorem foetum. Iam vero euenit, vt abortu facto duodecim superfoetatione concepti exciderint. Quod si statim conceperint, extulere in

lucem eum, quo superfoetarant: sicque eos edunt, quasi qui gemellorum eduntur lege. Id  
 3 quod de Iphicle et Hercule fabulantur. Atque hoc iam constitit: adultera enim quaedam alterum marito similem, adultero alterum peperit. Olim etiam quaedam gemellos vtero cum gestaret, tertium insuper concepit. Appetente igitur tempore iusto, illos quidem suo perfectos tempore edidit, hunc autem quinquemestrem: atque is illico periit. Alii contigit, vt cum vnum septimestrem peperisset, postea duos mensium iustorum fine absoluto pareret: quorum ille mortuus est, hi vixere. Quaedam etiam abortientes simul concepere, alterumque eiecerunt, alterum pepererunt. Plurimae si coeunt praegnautes post octauum mensem, infans prodit mucoso lentore plenus. Plerumque vero etiam ciborum, qui matri oblati sunt, reферtus exit. Largius autem sale si vescatur, non habent vngues foetus ipsi.

C A P. VI. (vulgo C A P. V.)

Lac quod prouenit ante septimum mensem, inutile est; sed simul et infantes maturi sunt ad nascendum, et lac vtile est. Primum autem salsum est, sicut et ouium. Potissimum cum grauidae sunt vini sensu afficiuntur plurimae: dissoluuntur



enim, si bibant, et deficiuntur. Principium finisque mulieribus virisque prolificandi is est, his seminis, illis menstruorum emissio. Ceterum neque incipientes statim prolifici sunt, et si generent, quod paucis euenit, satis firmi sunt foetus. Aetas autem huius principii dicta est. Plurimis mulierum cessant menstrua anno circiter quadragesimo; quod tempus quae excedunt, iis ad quinquagesimum usque: quo etiam quaedam pepererunt: ultra id tempus nulla. [Vulgo Caput VI.] At virorum maxima pars generant usque ad annum sexagesimum. Cum hunc excesserint, ad septuagesimum usque. Nam septuagenarii quidam cum essent, generaverunt. [Caput VIII. Scaligero.] Euenit multis tam mulieribus quam viris inter se coniunctis non posse liberos procreare, disiunctis posse. Hoc idem euenit et procreandis masculis foemellisue. Interdum enim sunt et mulieres et viri, qui simul manentes foemellas aut masculos generant: soluto matrimonio contra euadunt. Secundum aetatem quoque mutantur: iuuenes cum sunt iuncti, foemellas generant: seniores masculos: aliis contra euenit. Atque in totum quod pertinet ad generandum, idem fit, ut iuuenes non, senes generent: alii primum, post non procreent. Sunt etiam mulieres, quae vix concipiunt: at si concipiant, per-

latum pariant. Alia contra facile concipiunt, sed perferre nequeunt. Sunt vero et viri et feminae, qui et quae foemellas tantum generent aut mares. Sicut et de Hercule fabulis proditum est, qui in duobus et septuaginta liberis filiam vnam genuit. Quae concipere nequeunt, si qua cura adhibita, aut quo alio casu concipiant, fere foemellam pariunt potius quam marem. Plerisque quoque viris euenit, cum possent procreare, postea vt ne possent; atque iterum vt restituerentur ad id ipsum. [Cap. IX. Scagliero.] Generantur etiam ex mancis manci, vt claudi ex claudis, ex coecis coeci. In summa saepe etiam similes iis quoque rebus, quae praeter naturam sunt, et notis cognatis insignes: qualia sunt tubera et cicatrices. Iam vero tale quiddam repraesentatum est etiam tertia generatione. Cum enim haberet quidam in brachio punctum, eius filius non habuit, sed nepos eodem in loco atrum confusum. Pauca autem ad hunc modum fiunt: et plurima integra e mancis nascuntur: et nihil horum certo ordine statutum est. Similes quoque parentibus vel etiam auis: interdum autem nullis quicquam. Referuntur autem etiam per multas generationes; quemadmodum eius, quae in Elide [vulgo Sicilia] cum Aethiope concubuerat, filia  
5 non fuit nigra, sed huius natus. Partibus quoque



alii nati vtrosque repraesentant. Olim etiam gemelli nati sunt inter se dissimiles: quanquam plurimi fere similes sunt. Nam cum peperisset quaedam septimoque post die et coisset et concepisset, peperit posteriorem priori similem quasi gemellum. Sunt etiam feminae [in ceteris animalibus,] quae sibi, aliae, quae patri similes generent: qualis in Pharsalia equa, quae Iusta nominabatur.

## C A P. VII. (Scaligero X.)

In seminis exitu primum spiritus antecedit: ostendit autem exitus ipse, quod fiat a spiritu. Nihil enim procul iacitur sine vi spirituali. Exceptum ab utero semen, ubi immoratum fuerit, membrana obducitur. Si enim prius exeat, quam dearticuletur, videtur quasi ouum membrana obtectum, cui putamen detractum sit. Membrana autem illa venarum plena est. Omnia animalia tam natatilia quam quae humo sola nituntur, aut volatu mouentur, quaeque animalis quaeque oui principiis prouenerunt, simili modo generantur: nisi quod, quae animalis forma eduntur, appositum vteris habent vmbilicum: illa autem ad ouum: alia autem utroque modo, veluti in piscium (*cartilagineorum*) quodam genere. Et in aliquibus membranae quasi quaedam, in aliis autem ambiunt

secundae. Ac primum quidem intra extimas secundas generatur animal: deinde circum hoc membrana altera, cuius maxima pars haeret matrici, parte cetera absistens et aquam continens. Inter eas autem humor aquosus, [saniosus *omittunt Codd. aliqui*] cruentus, quae a mulieribus primitiae appellantur. [Vulgo Cap. VIII.] Crescunt omnia animalia per vmbilicum, quae scilicet vmbilicum habent. Is, vbi acetabula sunt, 'adsitus illis est: at si laeues sunt matricēs, ipsis super venam aptus est. Situs in vtero quadrupedum omnium extensus est: eorum, quae pedibus carent, obliquus, vt piscium: bipedum contractus, vt auis et hominis. Nares inter genua habent, oculos super genibus, aures extra. Similiter etiam omnia animalia caput primum superne habent; aucta autem et exiturientia deorsum obuertuntur. Natura enim suapte omnia in caput exeunt; obliqua autem aut in pedes praeter naturam. Quadrupedum foetus cum sunt absoluti, etiam tum excrementa habent tum liquida tum stercora (*proprie globosa*). Haec in postrema intestini parte: in vesica autem

3 vrinam. Quae animalia in matrice habent acetabula, illis haec decrescunt crescente foetu, ac tandem nulla extant. Est autem vmbilicus putamen circa venas, quarum ortus a matrice est, atque ex



acetabulis quidem, in quibus sunt acetabula; vbi nulla sunt, ex vena. Sunt autem grandioribus, quemadmodum boum foetibus, quaternae venae: minoribus autem binae: minutissimis, velut aui- bus, vna. Tendunt in foetus duae per iecoris quas appellant portas ad magnam venam: duae ad aor- tam, vbi ipsa scissa fit ex vna duae. Vtrumque ve- narum par obtegitur membrana: circum membra- nam ymbilicus est, tanquam caliculus. Augescen- tibus autem magis magisque subsidunt hae venae. Foetus autem adultus caua loca (*corporis*) subit, ibique manifesto motu agitur: interdum etiam circa pubem volutatur.

## CAP. VIII. (vulgo CAP. IX. Scaligero XI.)

Parturientes mulieres cum multis aliis partibus affixis doloribus infestantur, tum vel maximis in alterutrum femur. Quas dolores vehementissimi circa aluum vrgent, eae celerrime pariunt: at quae lumbos prius dolent, vix: quae vero sumen, cito. Si marem parturiat, antecedit saniosa aqua sub- pallida: si foemellam, cruenta; diluta tamen et haec. Quanquam sunt etiam quibus parturientibus neutrum horum accidat. Cetera animalia non la-  
2  
boriose pariunt, sed mediocrius videntur partu- riendo vexari. At mulieribus fortiores labores

eueniunt, ac potissimum otiosis: item si quae imbecillis sunt lateribus, neque spiritum continere possunt: aegrius etiam pariunt, si coactae a spiritu respirarint. Primum igitur mouente se infante ruptisque membranis exit aqua illa: deinde foetus, inuerso vtero et exinuantibus interiorem superficiem extrorsum secundis.

C A P. IX. (vulgo X. Scaligero XII.)

Quemadmodum secandus sit vmbilicus, pars est non imprudentis cogitationis obstetricum. Neque enim sola dexteritate opus est, vt iuuare possint mulieres, quae aegre pariant, sed etiam praesente animi vi, ad ea quae euenire queunt, et ad vmbilicum infantium vinciendum. Etenim si simul secundae procidant, vmbilicum lana ligatum separare a secundis cautio est. Tum supra secatur; quaque nexum est, coalescit; atque inde quod continuatum est, decidit. Quod si vinculum dissolvatur, [antequam consolidetur vmbilicus *addit versio Alberti,*] perit infans effluente sanguine. Quod si non simul exeant statim secundae, sed intus sint, infans autem foris, praeciditur, obligato  
 2 vmbilico. Saepe autem factum est, vt videretur nasci infans mortuus, cum eo infirmo in vmbilicum ac partes circumsitas efflueret sanguis, priusquam



ligaretur. Verum peritae artis obstetrices exprimunt intro ab vmbilico; ac statim infans quasi prius exanguis rursus reuixit. [Cap. XIII. Scaligero.] Nascuntur in caput, quemadmodum dictum est, etiam alia animalia secundum naturam: infantes autem etiam brachiis ad costas porrectis. Egressi autem statim vocem edunt, et admovent ori manus. Emittunt etiam excrementa quidam illico, quidam haud multo post: omnes autem eodem die. Cuius excrementi quantitas maior quam pro pueri magnitudine; quod appellant mulieres papauerculum. (meconium.) Color eius cruentus ac valde ater, et piceus: post illud mox lacteus: statim enim sugit mammam. Antequam egrediatur, nullam emittit vocem infans: neque adeo, si in difficili partu caput quidem extet, totum vero corpus intus sit. Quibus ante tempus purgandi anteuenterint purgationes, difficilius partu liberantur. Post puerperium vero purgationes si eueniant parciore, nec nisi quantae priores fuere, neque ad quadragesimum vsque diem perdurent, validiores efficiuntur mulieres et celerius concipiunt. Infantes nati ante quadragesimum diem vigilando neque rident neque flent; noctu autem interdum vtrumque. Et fere titillatus non sentiunt. Maximam quoque partem temporis dormiunt. Crescentes mutantur,

vt fiant vigilantiores. Somniare autem manifestum est. Sero autem meminit species. (imagines *Gazae*.) Ceteris animalibus nulla ossium differentia, sed omnia perfecta oriuntur: infantibus vertex mollis et sero duratur. Atque illa quidem cum dentibus nascuntur: infantes autem septimo mense dentire incipiunt. Edunt primores primum: quanquam alii superiores, alii inferiores: omnes celerius, quorum nutrices calidius lac habent.

C A P. X. (vulgo XI. Scaligero XIV.)

Post partum atque purgationes mulieribus lactis copia prouenit. Ac quibusdam fluit non solum per papillas, sed etiam passim per mammas; aliquibus etiam per axillas. Itaque procedente tempore permanent strumulae, cum humor incoctus non egressus fuerit, sed differciatur. Tota enim mamma adeo spongiosa est, vt etiam hausto in potu pilo vbera eo morbo laborent, quem Graeci pilarem idcirco vocant, quoad aut ipse forte exeat expressus cum lacte, aut exugatur. Lac habent, donec concipiant iterum. Tunc autem cessat et extinguatur aequè in hominibus et aliis quae animal pariunt quadrupedibus. Exeunte lacte haud fere eueniunt purgationes. Nam sane quae lactant, factum est vt purgentur. Omnino natura ita fert, ne



humor ille locis pluribus simul erumpat: velut iis quae fluxus sanguineos patiuntur, deteriores (*minores*) superueniunt purgationes: aliis per varices, cum a lumbis excretus fuerit, priusquam vterum subeat. Quibus cessant purgationes, si vomitus sanguinis eueniat, nihil laeduntur.

C A P. XI. (vulgo XII. Scaligero XV.)

Solet conuulsio inuadere infantes, praesertim habitiores, vtentesque lacte aut copiosiore aut crassiore, et nutricibus corpulentis. Accessionem adauget noxium huic morbo vinum, idque nigrum potius quam album, merumque: et pars maxima ciborum flatuosiorum et adstricta aluus. Plurimi itaque ante diem septimum intereunt. Idcirco tunc nomina imponunt: propterea quod iam puerorum saluti magis credunt. Pleniluniis magis aegrotant. Pueris si a scapulis conuulsio oriatur, (*adultiori aetati*) periculum insuper portendit.

---

---

A R I S T O T E L I S  
DE ANIMALIBVS HISTORIAE  
LIBER VIII.

---

C A P. I.

Quae ad naturam ceteram generationemque pertinent animalium, ita se habent. Actiones autem et victus secundum mores atque escas differunt. Insunt enim in maxima ceterorum animalium parte vestigia morum, qui ad animam pertinent: qui inter homines apertiora habent discrimina. Namque mansuetudo et feritas, lenitas et asperitas, et fortitudo et timiditas, et metus et fidentia, et iracundia et versutia, prudentiae per cogitationem comparatae imagines ipsorum plerisque insita sunt. Sicut etiam de partibus eorum narrauimus. Quaedam enim ab homine, a multis animalibus homo, plus minusue differunt. Horum enim quaedam existunt in homine: quaedam plus in aliis anima-



libus. Alia autem differunt proportionem. Quem- 2  
admodum enim in homine ars et sapientia et prudentia; sic etiam in aliis animalibus est altera quaedam talis naturalis vis. Planissimum est hoc in puerorum aetatem intuentibus: in his enim futurorum habituum quasi vestigia ac semina videre est. Nam, ut ita dicam, nihilo differt per id tempus illorum pueritia ab anima brutorum. Quare non ab re est, si partim eadem, partim similia, partim proportionem insunt aliis animalibus. Sic enim ab inanimis ad animantes transit natura paulatim, ut in continuatione eorum confinia mediaque lateant utrius sint. Etenim ab inanimatarum rerum genere primum est plantarum genus. Quarum unum ab altero differt eo, quod plus videtur esse vitae particeps. Vniuersum autem genus hoc cum ceteris corporibus comparatum videtur fere animatum: cum animali autem inanimatum. Ac transitus 3  
illorum in animalia continuus est, quemadmodum prius dictum est. Nonnulla enim quae in mari agitant dubitarit quispiam animalne sint an plantae: agnata enim humo sunt, atque exempta intereunt eorum pleraque: veluti pinnae suapte natura affixae sunt: digitelli (solenes) autem auulsi nequeunt viuere. Omnino vero genus omne testaceorum simile plantis est, si cum gressilibus ani-

malibus comparetur. [Sensuum officia in aliquibus nullo indicioprehenduntur: in aliis autem obscure. Quorundam autem corpora carnea natura constant: cuiusmodi quae tethya (papillae) vocantur, et vrticarum genus est. Spongia autem penitus est similis plantarum: semper enim per pusillam differentiam alia ante alia iam videntur plus et vi-  
4 tae et motus obtinere. Ad officia quoque vitae eodem modo sese habent. Plantarum enim opus nullum aliud videtur, nisi qualis ipsa sit alteram ut faciat. De iis dico, quae semine proueniunt. Eadem ratio et in animalibus. In quibusdam enim praeter generationem nullum aliud opus deprehendas. Idcirco tales actiones omnibus sunt communes. Igitur accessione sensus facta iam vitae differunt eorum, tum circa coitum propter voluptatem, tum circa partus ac sobolis educationes. Ergo quaedam plantarum more simpliciter certis temporibus propriam perficiunt generationem: quaedam etiam laborant enutriendis foetibus. Quo opere absoluto deserunt eos, ac nequaquam praeterea cum illis ullam habent societatem. Quae autem prudentiora sunt ac plus memoriae compararunt,  
5 etiam ciuilius utuntur sua sobole. Partem igitur vitae animalium habent opera ad generationem, alia ad cibum pertinentia. Circa enim haec duo



omnibus et studia et vita versatur. Omnes autem cibi differunt eius potissimum materiae ratione, cuiusmodi e materia sunt constituti. Ex eadem enim fit secundum naturam cuiusque incrementum. At quod secundum naturam est, suaue est. Sequuntur autem omnia naturalem voluptatem.

## C A P. II.

Differunt etiam animalia secundum loca, (*quae habitant.*) Quaedam enim in terra agitant, quaedam autem in aquis tantum. Trifariam vero haec differentia dicitur, ita ut ea, quae recipiunt aerem, terrestria, illa, quae aquam, aquatilia appellentur: quae vero [*non recipiunt quidem, sed*] ita a natura temperata sunt, ut refrigerationem ab utroque elemento admittant, aut terrestria aut aquatilia vocantur, quamvis nec spirent nec recipiant aquam. Alia vero et cibum capiunt et degunt in utroque elemento: multa enim aerem recipientia et in terra parientia cibum ex aquaticis petunt locis, plurimumque temporis in aqua versantur: quae sola animalium videntur utramque sortita naturam; quippe et ut terrestria et aquatilia ea quis statuere possit. [Vulgo Cap. II.] Quae autem <sup>2</sup> aquam recipiunt, eorum neque terrestre (*gressile*) neque volatile ullum de terra cibum petit. At ter-

restrium quae aerem recipiunt multa. Atque eorum quaedam in tantum, vt ne viuere quidem queant, si a natura aquae eximantur: cuiusmodi marinae testudines et crocodili et equi fluuiatiles et vituli et minorum animalium emydes (lacustres testudines) ranarumque genus. Haec enim si aliquo tempore non respirent, suffocantur: pariuntque atque etiam educant in sicco, alia prope siccum: 3 degunt autem in vdo. Maxime vero excedit modum hunc delphin inter omnia animalia, et si quid aliud tale est tum aquatilium tum cetaceorum, quae ad hunc modum sese habent, vt balaena, et quaecunque alia horum fistulam habent. Non enim facile aut aquatile solum aut terrestre horum vllum statuere licet; si terrestria tantum illa ponenda sunt, quae aerem recipiunt, aquatilia autem, quae aquam natura. Vtriusque enim particeps est: nam et mare recipit, et amittit per fistulam; aerem autem pulmone. Hanc enim habent partem et spirant. Atque idcirco captus in reti delphin cito suffocatur; propterea quod non respiret. Extractus enim viuit diu mutiens ac gemens, sicut et alia quae spirant animalia. Etiam dormit extanti rostro, 4 vt respiret. Eadem autem redigere in ordinem vtriusque diuisionis, absurdum est: quippe quae sunt contrariae: sed ipsum aquatile insuper est et-



iam diuidendum. Quaedam enim et recipiunt et reddunt aquam eadem de caussa, qua ea quae spirant aerem, ob refrigerationem scilicet. Alia autem ob cibum. Necesse enim est, vt cum cibum in humore capiant, simul humorem ipsum hauriant, itaque etiam habeant instrumentum, quo emittant. Quae igitur humore vtuntur tanquam vicario respirationis, branchias habent: quae autem ob cibum, fistulam; quae sunt sanguine concreta. Similiter autem et mollusca et crustacea: haec enim propter cibum recipiunt humorem. Aquatilia autem sunt etiam altero modo propter corporis temperamentum et victum. Quae cum aerem recipiant, viuunt tamen in humore: aut quae humorem recipiunt branchiisque sunt praedita, sed migrant in siccum atque capiunt cibum. Vnum autem visum est tale, quem cordylum vocant. Is pulmonem non habet, sed branchias habet; egressusque in siccum capit cibum; quadrupesque est etiam, vt sit aptus ingredi. Horum autem omnium natura videtur quasi a legibus aberrasse: quo etiam modo mascula quaedam foeminina oriuntur, et in sexu foemineo masculina facie. Etenim animantes adptae paruis in membris differentiam, differre totius natura corporis videntur. Hoc euidentius est in exectis: pusilla namque particula mutilata, mu-

tatur in foeminam animal. Igitur manifestum est, in principiorum concretionem momentaneam cuiuspiam magnitudinis facta mutatione, ea si principii species sit, fieri vel foeminam vel marem: illa autem sublata, neutrum. Itaque secundum utrumque modum tam terrestre quam aquatile fit, pusillis mutatis membris... contingit, ut aliqua euadant terrestria, alia aquatilia. Atque horum quidem aliqua ad neutram partem pertinent: alia autem ad utramque: propterea quod in constitutione et generatione materiae quandam partem praeceperunt, de cuius simili sint victitura. Quod enim secundum naturam est, expetitur ab omni animali, sicut iam dictum est.

### C A P. III.

Trinis modis diuisione facta animalium in aquatile et terrestre, primum quod vel aerem vel aquam recipiant, deinde quod certo sint corporis temperamento, tum propter alimenta, viuendi ratio consequetur ipsa secundum has diuisiones. Quaedam enim sequuntur secundum et temperamentum et cibum, et eo quod vel aerem vel aquam recipiant: alia autem secundum temperamentum et victum  
 2 tantum. Testaceorum itaque animalium quae non mutant locum, aluntur aqua. Percolatur enim



per densa, cum sit subtilior mari, concocta scilicet: quemadmodum etiam a principio nascitur. Quae autem potabilis aqua in mari est, in eo quoque percolari posse manifestum est. Contigit enim, ut experimento deprehenderetur. Tenui enim e cera vas si quis fingat et obligatum demittat in mare vacuum per noctem et diem, excipit aquam satis multam, quae sine controuersia ad potandum est utilis. Vrticae autem vescuntur pisciculis, qui 3 ad eas allapsi fuerint. Habent enim in medio os: quod euidentius in maioribus est. Ac quemadmodum ostreae foramen habent, quo secedit foras cibus: atque id habent parte superiore. Similis enim ostrearum natura vrticis est; ut earum carnosae pars sit quod interior ostrearum: at ipsae utantur saxo tanquam testa. [*Patellae quoque absolutae transmigrant et pascuntur.*] Quae au- 4 tem mutant locum, partim vescuntur animalibus alunturque pisciculis minutis, ut purpura. Carniuora enim est; atque idcirco eiusmodi rebus inescatur. Partim iis aluntur, quae in mari plantarum natura oriuntur. At marinae testudines etiam conchis vescuntur: ore enim robustissimo sunt. Quodcumque enim corripiunt, aut lapidem aut aliud quid, confractum depascitur. Egressa etiam in terram herbam pascitur. Laborant ac saepe

etiam intereunt, cum summo mari fluitantes praeter modum a sole exsiccantur: neque enim facile  
5 rursum mergi possunt. [Cap. V. Scaligero.] Idem quoque modus crustaceorum: omniuora enim haec item sunt. Namque et lapides et limum (*vulgo* ligna) et algulas atque adeo stercus deuorant: ut cancri saxatiles: quin etiam carne vescuntur. Locustae vero etiam maiores pisces superant: et accidit horum nonnullis conuersio rerum in contrarium. Namque locustas vincunt polypi; [neque enim testa locustae nocet polypis:] itaque si eodem in reti sese prope esse senserint, moriuntur locustae metu. Locustae congros superant: namque asperitas in causa est, quo minus dilabantur. At congris polypos deuorant: neque enim ob laeuitatem apprehendi possunt. [Mollusca autem omnia  
6 carniuora sunt.] Pascuntur locustae pisciculis, quos circa latibula sua venantur. Namque in alti maris eiusmodi locis nascuntur, quae sint aspera ac scruposa, atque in iisdem cubilia sua habent: ac more cancrorum forcipato pede ori admouent quem prehenderint. Procedit prorsum natura sua, cum sine metu est, demittens cornicula in latera: perterrefacta autem retro fugit, porrectaque vibrat cornua. Arietum modo inter se pugnant sublati cornibus ferientes: conspiciuntur autem plerum-



que tanquam greges mutuo congressu. Crustacea itaque sicpote viuunt. In genere molluscorum lo-  
 ligines (teuthides) et sepiae etiam magnos pisces  
 superant. Polypi conchis potissimum collectis ex-  
 emptisque carnibus aluntur. Idcirco de eiusmodi  
 testis captatores agnoscunt eorum cubilia. Nam  
 quod aiunt quidam, eos sese deuorare, falsum  
 est: sed nonnulli brachia habent ambesa a congris.

CAP. IV. (vulgo adhuc CAP. II. Scaligero V.)

Pisces suis foetibus aluntur omnes, ipsius foe-  
 turae tempore: at alio cibo non omnes vtuntur.  
 Nonnulli enim sola vescuntur carne: vt cartila-  
 ginei et congri et channae et thunni et lupi (labra-  
 ces) et dentices (synodontes) et amiae et orphi et  
 muraenae. Mulli autem alga aluntur et ostreis et  
 coeno atque etiam carnibus: [cephali coeno:] da-  
 scillus coeno et stercore. Scarus autem et melanu-  
 rus alga. Salpa stercore et alga: carpit etiam mar-  
 rubium: (prasium:) sola piscium cucurbita quoque  
 capitur. Deuorant se inuicem omnes praeter mu-  
 gilem; maxime autem congri. At capito et mugil  
 soli omnino carnem non esitant. Huius rei argu-  
 mentum est, quod nihil vnquam tale in eorum  
 ventre repertum est: neque inescant eos animalium  
 carnibus, sed offa panis. Alitur omnis mugil alga

et arena. In genere capitonum is, quem labeonem (cheilonem) vocant, littoralis est: alter autem procul incolit: atque hic quidem suo muco alitur: idcircoque semper ieiunio inanis est. Capitones autem pascuntur limo: ac propterea graues et coenosi sunt. Piscem enim nullum esitant: saepeque emergunt e coeno, in quo habitant, vt sese eo eluant. Eorum prolem nulla bestia vorat: ideo sunt frequentes. Sed vbi adoleuerunt, tunc ab aliis piscibus deuorantur, maximeque ab acharna.

3 Gulosissimus piscium mugil est et inexplibilis: idcircoque venter ei distenditur: et cum non est ieiunus, deterior. Cum perterrefit, abscondit caput perinde ac toto corpore occultato. Carne alitur etiam dentex, ac deuorat mollusca: tum istum channa insequentes minutiores pisces eiiciunt ventriculos, propterea quod piscibus ventriculus prope os est, neque gulam habent. Quidam igitur carne sola, vti diximus, vescuntur, veluti delphin, dentex, aurata, (chrysophrys,) cartilaginei pisces et mollusca. Alii magna ex parte coenum et algam et muscum et quod caulium vocant, et si qua alia in mari nascitur materia: vt fucula (phycis) et gobio et saxatiles. Fucula ceterorum carne abstinet: solis vescitur squillis. Saepenumero etiam inter se appetunt, quemadmodum dictum est: et sane mi-



nores a maioribus conficiuntur. Argumento est, carnibus eos vesci, quod capiuntur eiusmodi escis. Amia, thunnus, (*vulgo thynnus*,) lupus fere carni- 4 bus victitant: carpunt tamen etiam algas. Sargus reliquiis alitur pabuli, quod mullus, excitato coeno, (fodere enim valet,) reliquit. Postquam enim is abiit, ipse accedit et pascitur, imbecillioresque ar- cet coenae societate. Solus piscium qui vocatur scarus videtur quadrupedum more ruminare. Ceteri pisces aduerso ore ita venantur minores, quem- admodum etiam natate consueuerunt. At cartilaginei omnes, et delphines et cetacei resupinati omnes corripunt: subtus enim habent os. Itaque minus pereunt minores: alioqui pauci admodum euaderent. Nam delphini pernicitas ac vis deuorandi videtur sane mirabilis. At anguillae paucae quae- 5 dam nec multis locis et limo et obiectis aluntur eduliis; potissimum autem aqua potabili. Atque huius generis piscinarii id obseruant, vt quam purissima effluat atque influat in fossis; aut opere tectorio inducunt viuaria. Cito enim suffocantur, nisi sit aqua pura: branchias si quidem exiguas habent. Idcirco eas cum venantur, aquam perturbant. Et in Strymone circa exortum Vergiliarum capiuntur: eo namque tempore conturbatur aqua, excitato coeno aduersis ventis. Alioqui confert

opere abstinere. Mortuae anguillae non fluitant; ac ne sursum quidem efferuntur, veluti piscium pars maxima. Habent enim ventrem modicum. Pinguedinem autem paucae habent: plurimae non  
 6 habent. Exemptae ex aqua et quinque et sex viuunt dies: aquilone flante plures: austro pauciores. Atque per aestatem in viuaria translatae e lacubus intereunt: per hiemem non item. Nec mutationes vehementes perferunt, velut cum ii, qui ferunt, in frigidam merserint: intereunt enim plerumque vniuersae. Intereunt etiam, si in pauca aqua alantur: quod ceteris quoque piscibus euēnit. Suffocantur enim in eadem semper aqua, quae sit exigua: quemadmodum et spirantia animalia, si paulillo aere includantur. Viuunt anguillarum quaedam et septem et octo annos. Sese inuicem deuorant anguillae fluuiales, sed et herbis vescuntur et radicibus, et si quid in coeno deprehenderint. Plus noctu pascuntur: interdium in altum abscedunt. Piscium ita se victus habet.

C A P. V. (vulgo C A P. III. Scaligero VI.)

Auium vncungues omnes carniuorae sunt: fruges autem, etiamsi quis frustillatim in os indiderit, nequeunt deglutire. Talia aquilarum genera omnia, et milui, et accipiter vterque tum palumbarius tum



fringillarius: qui magnitudine inter se multum differunt. Et buteo: is magnitudine miluum aequat, et semper apparet. Item ossifraga et vultur. Est autem ossifraga quam aquila maior, colore cinereo. At vulturum duae sunt species: alter minor et exalbidior: maior autem plus cinereum referens colorem. (*alii Codd. multiformior.*) Praeterea nocturnarum avium nonnullae sunt vncis 2 vnguibus, ut nocticorvus, noctua, (glaux,) bubo. (bryas, *ut Codd. bis habent. Vulgo est byas.*) Est bubo noctuae similis, sed magnitudine non inferior aquila. Quin etiam vlula, (*Gazae aluco,*) (eleos) et capriceps, (*Gazae vlula,*) (aigolius) et asio: (scops:) quorum vlula gallinaceo maior est, capriceps par: vterque picas venatur. Asio minor quam noctua. (glaux.) Haec tria similia de facie et carniuora omnia sunt. Sunt quaedam ex iis, quae vncos vngues non habent, carniuora, ut hirundo. Alia autem vermiculis vescuntur, ut fringilla, (spiza,) 3 passer, rubicola, (*Gazae rubetra,*) [*Graece batis, sed alii Codd. batios vel sacios habent.*] vireola, (*Gazae luteola,*) (chloris,) parus, (aegithalus.) Pari tria genera sunt. Vnum grandissimum: dictus fringillaris: (spizites:) aequat enim fringillae magnitudinem. Alter montanus appellatur; propterea quod montes colit, longam habens caudam. Tertium

genus his simile est, sed magnitudine differt: est enim minimus. Item ficedula, (sycalis,) atriceps, (*Gazae* atricapilla,) pyrrhulas, (*Gazae* rubecula, *Scaligero* byrriola,) erithacus, (*Gazae* siluia,) curuca, asilus, (oestrus,) tyrannus. Is paulo est maior locusta, punicea crista atque adeo venusta auicula atque bene composita. Qui florus dicitur, (anthos,) fringillae est magnitudine. At montifringilla (orospizus) et similitudine et magnitudine illam refert; sed circa collum habet coeruleum colorem atque in montibus agitatur. Ad haec regulus, seminilegus. (spermologus.) Hae igitur atque aliae eiusmodi aut solis vermibus aut fere non alio aluntur cibo. At hae e spinis victitant: spinula, (acanthis, *Gazae* spinus sine ligurinus,) thraupis, [*alii Codd.* thlypis] (*Gazae* carduelus,) et quae dicitur chrysometris. (*Gazae* auriuittis.) Omnes enim e spinis carpunt: vermem autem aut animantem nullam. Eodem autem in loco hae et somnum capiunt et cibum. Aliae culiciuorae sunt, quae culicum venatu maxime viuunt, veluti pipo maior et minor, [*Aliae duae circa stipites satagunt,*] quas nonnulli vocant tundiquercos, Latini picos. Similes hae inter se, similique voce sunt: sed maiori maior. Alitur vtraque stipitibus obuolando. Praeterea celeus. (*vulgo colios erat, Gazae et Sca-*



*ligero* galgulus.) Is aequat turturis magnitudinem, colore totus luteus. Ligna vehementer pertundit, et in ipsis fere vescitur. Vocem magnam habet: frequentissima auis Peloponeso. Alius vocatur culicilega, (cnipologus,) paruus vt spinula: colore cinereo et punctis distincto: voce exigua. Is item ligna tundit. Aliae frugiuorae [*et herbiuorae*], vt 5 palumbes, (phabs et phatta,) columba, rupilia, (oenas,) turtur. Ac palumbes quidem columbaque semper apparent: turtur aestate; hieme non comparet: latet enim. Rupilia autem autumnopotissimum et apparet et capitur. Est rupilia quam columba maior, quam palumbes minor. Capitur fere, dum aquam haustu capit. Adueniunt autem huc ad nos cum pullis suis: ceterae omnes adueniunt aestate, nidificant apud nos, et plurimae animalibus aluntur, excepto genere columbaceo. [Cap. VII. Scaligero.] Auium omnium aliae, vt 6 ita dicam, terrae obuersantur cibi gratia: aliae circa fluuios ac lacus victitant: aliae circa mare. Quae palmipedes sunt, in ipsa aqua plurimum tempus agitant: quae fissipedes, circa ipsam aquam. Atque harum quaedam [immergentes sese] aluntur: aliae plantarum generibus: scilicet quae carniuorae non sunt: [at] circa lacus ac fluuios ardeola et albardeola, quae illa minor est, habetque

- 7 rostrum latum et longum. Item ciconia et gauia. Est autem gauiae color cinereus. Et schoenilus (*Gazae* iunco) et cinclus et albicula, (pygargus,) [et trynga.] Is est maximus horum minutiorum: aequat enim turdum. Omnes autem hi motant caudam. Et calidris, (*Codices quidam* scandris,) quae auicula cinerea est, sed variegata. Ad haec alcedonum [*vulgo* lusciniarum] genus iuxta aquas agit. Eius sunt duae species: quarum altera vocalis est, insidetque arundinibus: altera muta, quae maior est. Vtrique dorsum caeruleum. Circa mare et alcedo et cerylus. Sed et cornices aluntur animalibus e mari eiectis: omnis enim generis cibo aluntur. Praeterea gauia candida, et fulica, (cephus,) et mergus, (aithya,) et charadrius. [*Gazae*
- 8 rupex.] Quae in genere palmipedum sunt grauiiores, circum fluuios et paludes agitant, vt olor, anas, phalaris, vrinatrix. (colymbis.) Et boscas, (pascua *Scaligero*,) quae anati similis, sed minor est. Ad haec is, qui vocatur coruus. Is ciconiae refert magnitudinem: ceterum cruribus est breuioribus. Palmipes est, et nandi potens, colore niger. Insidet et arboribus, in quibus etiam solus aquaticarum nidulatur. Et anser, et anser minor gregatilis, et vulpanser, et capella, et penelops. Marina aquila et circa mare agit, et lacustres aquas de-



praedatur. Multae aues etiam omniuorae sunt. Vncungues cum ceteris, quae superarint, animalibus, tum et auibuscum vescuuntur ipsis. Sed mutuo cibatu de proprio genere nullam esitant, sicut pisces: saepenumero enim hi e sua specie pascuntur. Vniuersum auium genus parce bibit: atque ipsae vncungues potu omnino abstinent praeter paucas, easque raro: cuiusmodi potissimum tinnunculus. Miluus quoque raro bibere visus est.

CAP. VI. (vulgo IV. Scaligero VIII.)

Quae squalida teguntur cute, vt lacertus et alia quadrupeda (huiusmodi,) haec et serpentes omnivora sunt. Nam et carne et herba vescuuntur. Serpentes vero etiam omnium animalium maximi sunt liguritores. Paruo igitur potu contenta sunt tum haec tum alia, quaecunque rarae texturae pulmonem habent. Habent autem omnia, et paucis repletum sanguine, quaecunque oua pariunt. Serpentes vero etiam intemperantes sunt erga vinum: idcirco venantur viperas (echis) testis cum vino per sepes dispositis: ebriae enim capiuntur. Carniuori serpentes cum sint, vbi quod prehenderint animal, exhausto succo integrum per secessus meatum reddunt. Id quod fere alia quoque eiusmodi faciunt, vt aranei. Sed aranei foris exugunt, serpentes

2 autem in ventre. Corripit serpens, vnde libet ei forte oblatum sit. Edit enim et auiculas et bestio-  
 las, et deuorat oua. Vbiprehendit, reducit vsque adeo, dum in summo erectus consistat. Deinde ita colligit sese atque contrahit in exiguum, vt cum extensus fuerit, descendat quod deuorarit. Hoc agit propterea, quod gulam habet longam et angustam. Possunt et phalangia et serpentes diu sine cibo vivere; quod perspicipote ex iis, quas alunt medicamentarii.

C. A. P. VII. (vulgo V. Scaligero IX.)

Quae quadrupedes animal pariunt, feraeque sunt et dentibus exsertis praeditae, carne vescuntur omnes. Lupos tamen aiunt esurientes certam terram deuorare; idque huic vni euenire animali. Herbam vero cibi gratia non attingunt aliàs; sed cum aegroti sunt, more canum, deuorant et reuomunt ac purgantur. Inter ipsos lupos ii, qui a Graecis dicuntur *μονοπείραι*, latine soliuagi praedones, potius hominem cibi gratia appetunt, quam  
 2 ii, qui in sodalitie venantur. At quem alii glanum, alii hyaenam vocant, non est minor lupo. Tubam habet sicut equus, sed setas ipsas tum duriores tum densiores, (*Gazae* longiores,) continenturque toto dorso. Insidiatur ac captat ho-



mines: canes autem hominum vomitum imitata  
venatur: sepulcra etiam eruit humanae carnis ap-  
petens. Vrsus omniuorus est. Nam et fructibus 3  
vescitur, et arbores conscendit ob corporis agilita-  
tem: item legumina; diffractis quoque aluearibus  
mel edit et caneros et formicas. Carniuorus quo-  
que est. Cum enim robustus sit, inuadit non so-  
lum ceruos, sed etiam apros, si facere potest, vt  
improuisus aggrediatur; etiam tauros. Cum ipsis  
enim congressus ex aduerso, supinus concidit,  
tum eo moliente vulnera, cornua brachiis ample-  
xus, armos ore mordet, vsque dum ipsum proster-  
nat. Per breue etiam temporis spatium ingreditur  
bipes erectus. Carnes quascunque esitat, prius omit-  
tit putrescere. Leo, sicut et aliae ferae et serratis 4  
dentibus praeditae, carne vescitur; cibo auide vti-  
tur, multaque solida deuorat, nihil discindens.  
Deinde dies duos tresue cibo abstinet; id quod  
sane potest, eo quod satis superque expletus fuit.  
Parce bibit: raro excrementa reddit: tertio enim  
quoque die, aut vt fors tulerit, excernit, eaque  
dura atque exucta, more canum. Flatum etiam  
eadem parte emittit acerrimum, et olentem vrinam.  
Idcirco canes odorantur arbores: nam ille sublato  
crure vrinam reddit, more canum. Inficit etiam  
cibos odorem inspirans tetrum: secto enim leone

- 5 interiora grauem halitum emittunt. Quaedam ferae quadrupedes etiam circa lacus ac fluuios cibum quaerunt: at circa mare nullum, excepto vitulo marino. Huius generis sunt fiber et satherion (sathrion) et satyrion (sapi-*ri*on *alii Codices.*) et lutra et latax, quae quam lutra latior est, robustisque adeo dentibus praedita est. Egressa enim noctu plerumque proxima virgulta fluuio dentibus exscindit. Etiam lutra mordet homines; neque prius, vt aiunt, amittit, quam ossis crepitum audiuerit. Lataci pilus durus est: specie media inter eum, qui est cerui et vituli marini.

CAP. VIII. (vulgo VI. Scaliger rectius continuat IX. Caput.)

Bibunt animalia serrata lambendo, et quaedam non serrata, vt mures; aequalibus praedita dentibus trahendo (sorbendo *cum Plinio Gaza*), vt equi et boues. Vrsus neque trahendo neque lambendo, sed morsu. Et aues partim trahendo, sed ita quae longo sunt collo, intermissis vicibus, et tollentes (resupinantes) caput. Solus porphyrio morsu. Cornigera animalia tum mitia tum fera, quae serratos dentes non habent, omnia et fructibus et herbis vescuntur, nisi valida fame vrgeantur, praeter canem: (*alii Codices* suem:) is enim minime aut



herba aut fructu alitur. At sus maxime omnium <sup>2</sup>  
 animalium radicum vorax est, propter rostri ad  
 eiusmodi commoditatem; facillimeque omnium  
 quoduis pabulum admittit, celerrimeque proficit  
 crassitudine, quantam fert eius magnitudo. Spatio  
 enim sexaginta dierum pinguescit. Agnoscunt in-  
 crementum saginatores, postquam ieiunum ipsum  
 ponderauerunt. Pinguescit, si triduo fame fuerit  
 maceratus; quemadmodum alia fere omnia fame  
 affecta prius. Post eos dies tres vberiori pabulo ac-  
 cipiunt suem. At Thraces saginant prima die <sup>3</sup>  
 potu exhibito: deinde vnum diem intermittunt:  
 tum duos, postea tres et quatuor, vsque ad septem.  
 Pinguescit hordeo, milio, ficu, glande, pyro, cu-  
 cumere. Pinguescunt autem tum haec tum alia,  
 quae ventriculum calidum habent, otio: sed sues  
 etiam coenosa lauatione. Pastiones constitui vo-  
 lunt secundum aetates. Pugnat sus etiam cum lupo.  
 Quot pondo viuens est, eius ponderis sexta pars  
 abit in setas, sanguinem et eiusmodi. Sues alia-  
 que omnia lactantia fiunt exiliora. Atque haec ita  
 se habent.

## CAP. IX. (vulgo VII. Scaligero X.)

Boues autem et fruge et herba vescuntur: pin-  
 guescunt flatuosis, eruo, et faba fresa et stipula  
 viridi fabarum. Vetulos vero etiam incisa prius

cute atque insufflata, ac deinde pabulo appposito: item hordeo vel integro vel pinsito: praeterea rebus dulcibus, cuiusmodi sunt ficus et vuae: et vino et vلمي foliis. Sed maxime sole et lotione aquae calidae. Vitulorum cornua cera tepefacta ducuntur, quorsum quis velit: et pedes minus dolitant, si cornua (*ungulas*) cera aut pice aut oleo oblinantur. Laborant armenta magis pruina quam niue excitata. (*dum loca mutant.*) Crescunt, cum plures annos veneris expertes sint. Idcirco Epirotae vacas quas vocant Pyrrhicas annos nouem coitu arceudas curant, ut crescant: atauras appellant. Aiunt eas esse numero circiter quadringentas, regum peculiares: aliis locis viuere non posse, multorum experimento.

#### C A P. X. (vulgo VIII. Scaligero XI.)

Equi, muli, asini fructu atque herba vescuntur. Potu maxime pinguescunt. Nam iumenta, ut cuiusque vsus aquae euenerit, ita ad fruendum pabulo afficiuntur, et ut eorum quodque minus detrectat potum, ita commodius pinguescit. Farrago grauida adhuc pilo laeuiore (*densiore alii Codd.*) ut sint efficit: at cum erit aristis durioribus, inutilis est. Herbae Medicae cum est prima seges, (*falx*), mala, tum, si aqua putrida irrigetur, male



ipsa olet. Boues puram quaerunt, quam bibant: at equi, vt cameli. Nam camelo suauior potus turbidus ac crassus. Neque de fluuio potat priusquam conturbarit. Sine potu durare potest etiam dies quatuor: post quos deinde bibit largissime.

C A P. XI. (vulgo IX. Scaligero XII.)

Elephantus quidem cum plurimum edit (hordei *addit Aelianus*,) Macedonicos modios nouenos; sed id non sine periculo. Verum ad summum senos septenosue: farinae quinos: vini totidem maros. Capit marus heminas sex. Semel olim quidam elephantus bibit aquae metretas Macedonicas quatuordecim; et vespere praeterea octo. Plerique e camelis viuunt annos circiter tricenos: aliqui multo plures: quippe ad centesimum. Elephantum sunt qui trecentos annos dicunt: alii ducentos.

C A P. XII. (vulgo X. Scaligero XIII.)

Oues capraeque herbis vescuntur. Pascuntur oues asseduae et stabili grege. Caprae subinde mutant loca, et summa quaeque carpentes tantum. Pinguescit ouis potu maxime. Idcirco per aestatem salis dant quinto quoque die centenis modium, quo grex et melius valeat et pinguior sit. Saepe etiam salito pabulo sic exhibent, vt in paleis salis multum

indant, quo, collecta siti, plus bibant. Autumno etiam cucurbitam sale aspersam: hoc enim etiam lactis copiam excitat. Ex ambulatione quoque meridiana largius bibunt vespere. A partu sale pastae  
2 maiora demittunt vbera. Pinguescunt olea, oleastro, vicia, (aphaca,) palea, herba; (palea quacunque *alii Codd.*) eoque magis, omnia aqua salsa si ante irrorentur. Eae quoque fame prius affectae tri-duana crassessunt amplius. Aqua ouibus aestate borealis, autumno australis vtilior. Pastiones vespertinae (ad solis occasum *Gaza*) conferunt: itinera et labores extenuant. Pastores dignoscunt oves valentiores, si hieme eis haereat pruina, ab aliis, quibus non haeret. Etenim prae imbecillitate cum sese mo-  
3 veant, excutiunt quae perferre non possunt. Omnium quadrupedum carnes deteriores, quae locis palustribus pascuntur, quam quae editioribus. Minus (*vulgo est* magis) hiemem perferunt laticaudae oves quam longicaudae, et glabellae (*breui lana*) quam hirtae. Hiemis impatientes etiam crispae (*vulgo* capellae) sunt. Salubriores oves sunt quam caprae. Sed caprae quam oves robustiores. Vellera ouium, quae a lupis voratae sunt, itemque lanae atque ex iis confectae vestes multo sunt ad generandum pediculos aptiores quam aliarum.



## C A P. XIII. (vulgo XI. Scaligero XIV.)

Quae insecta dentes habent, omni genere cibi vescuntur. At quibus lingua est, humido tantum aluntur, ipsa scilicet vndecunque exugentia. Atque horum partim omniuora; (omnes enim sapes degustant, vt muscae:) partim sanguinem hauriunt, vt tabanus, (myops,) asilus. (oestrus.) Alia plantarum ac fructuum tantum succos. Sola apes ad nullam rem putridam insidet: neque alio vtitur cibo, quam qui dulci succo sit praeditus. Et vbi saliant aquae suauissimae et purae, ibi aquantur. Cibis igitur, quibus diximus, animalium genera vtuntur.

## C A P. XIV. (vulgo XII. Scaligero XV.)

Actiones autem ipsorum tum ob coitum ac procreationem sunt, tum circa commeatum ciborum. Nec minus sese comparant ad frigora aut tepores, itemque ad temporum mutationes. Omnia enim innatam habent naturam ad sensu percipiendum et calidi et frigidi mutationem. Ac quemadmodum homines quidam aedes per hiemis tempus mutant: alii, qui multae terrae domini sunt, aestates agitant in gelidis, hibernant in tepidis: sic etiam animalia, quae loca mutare possunt, partim iisdem in locis inueniunt praesidia, partim loca egrediuntur. Post autumnale aequinoctium ex Ponto et frigidis

locis instantem hiemem fugientia: post vernum ex aestiuis in gelida loca, metu caloris. Quorum alia in propinqua migrant loca; alia ex vltimis, vt ita  
2 dicam, demigrant; vt grues. Quae a Scythiae campis in paludes, quae sunt supra Aegyptum, vnde fluit Nilus, commeant. Ea loca sunt, quae Pygmaei incolunt, pusillum genus, vt aiunt, ipsi, atque etiam equi; cauernasque habitant. Et plateae (pelecanes) loca mutant, volantque a Strymone fluuio ad Danubium, (Istrum,) atque ibi pariunt. Vniuersae abeunt, expectanturque a prioribus posteriores, propterea quod priorum prospectus superuolantium montis obiectu intercipitur posterioribus.  
3 Sic et pisces quidam aut ex Ponto aut in Pontum demigrant. Quidam hieme ex alto ad terram sequentes teporem, per aestatem ex litoralibus in altum aestum fugientes. Imbecilles quoque aues hieme et gelidis tempestatibus in campos descendunt ob teporem. Aestate abscedunt in montes  
4 superiores ob aestum. Imbecilliora animalia secundum vtrumque excessum primo quoque tempore mutant loca. Praeuertunt scombri (scombriae *Codd.*) thunnis, coturnices gruibus: nam illi Augusto (Boedromeone), hi Septembri. (Maemacterione.) Sunt omnia pinguiora, cum e frigidis locis transmeant, quam cum e calidis: vt coturnices



autumno potius, quam vere. Euenit autem, vt et frigidis e locis simul et tempore calido discedatur. Sunt etiam verno tempore appetentiores coitus et cum descendunt e calidis locis. Ac quem- 5  
admodum supra dictum est, grues ab extremis in extremas migrant partes. Aduerso vento volant. De lapide quod aiunt, falsum est, cum eas pro libramento habere, esseque vtilem ad auri probationem, cum euomuerint. Abeunt palumbes (phattae) et turriliae, (peliades,) neque hibernant: item (hirundines et *omittunt alii Codices*) turtures: columbae non abeunt. Praeterea coturnices, exceptis paucis reliquiis coturnicum et turturum in locis apricis. Congregantur et palumbes et turtures, (et coturnices *addunt alii Codd.*) vel cum accedunt, vel cum in eo sunt, vt reuertantur. Coturnices cum incubuerint (*alarum remigio*), si serenum sit coelum, aut aquilonium, per paria coniunguntur, et recte habent. Austrum flantem moleste ferunt, propterea quod minus habiles sunt ad volandum. Est quippe ventus et humidus et grauis. Itaque aucupes captant ex austro venandi occasionem, serenitatem transmittunt. [Aegre autem] volant ob grauitatem: corpulentae enim valde sunt. Idcirco cum clamore volant, quia laborant. Igitur cum 6  
illinc appellunt, ducem nullum habent; cum hinc

abeunt, tum ligula (lingulaca *Gazae*, graece glottis,) simul demigrat et ortygometra et otus (*Gazae* auritus, *Scaligero* noctuinus,) et cychramus, qui etiam noctu eas reuocat. Cuius vocem aucupes cum audierint, sciunt ipsas non mansuras. Ortygometra par facie est auibus palustribus. Ligula habet linguam exsertam vsque porro. Otus est similis noctuis; at circa aures pinnulas habet. Eum quidam nycticoracem, id est coruum nocturnum, vocant. Parasitus (*Gazae et Scaligero* blatero) est, gesticulator; capiturque saltatione a venatore, quam vicissim imitatur; itaque a socio circumuenitur, sicut noctua. Omnium autem vncungues et collo sunt breuiore et latiore linguam habent, et imitatrices sunt. Talis enim et auis Indica psittacus, (sittace,) quam ab humana lingua Graeci ἀνθρώπων γλωττον nominant. Is etiam vini potu fit intemperantior. Gregales aues sunt grus, olor, platea, anser minor.

CAP. XV. (vulgo XIII. *Scaligero* XVI.)

Ex piscibus nonnulli, vt diximus, commeant in terram ex alto, et a terra in altum, fugientes vel gelu vel aestus excessum. Praestantiores sunt littorales iis, qui in alto agitant. Nam et vberiore et meliore vtuntur pabulo. Quo enim sol inuadit,



oritur et largius et probius et mollius, velut in hortis. Nam et alga nigra secus terram nascitur. Alia autem similior agresti est. Maritima quoque loca littoralia bene temperata ex calido et frigido sunt. Idcirco etiam huiusmodi piscium carnes compactiores sunt: at eorum, qui in alto degunt, humidae ac fluidae. Sunt littorales dentex, (synodon,) cantharus, cernua, (orphus,) aurata, (chrysophrys,) mugil, (cestreus,) mullus, turdus, draco, callionymus, gobio et saxatiles omnes. In alto degunt pastinaca, cartilaginea, congri albi, diana, rubellius, (erythrinus,) caesius. (glaucus.) Pagri autem, (phagri,) et scorpii, et congri atrii, et muraenae, et cuculi vtrisque locis versantur. Locorum quoque 2 differunt hi ratione: ut circa Cretam gobii et saxatiles omnes pingues sunt. Post Arcturum iterum thunnus bonus euadit: hoc enim tempore cessat agitari asilo. Quae est causa, quare aestate deterior sit. In maritimis lacubus etiam multi nascuntur pisces, ut salpa, aurata, mullus, atque ex aliis fere generibus plurimi. Quippe etiam amiae: ut circa Alopeconesum, et in Bistone palude insunt piscium plurima genera. Coliarum (monedularum *Gazae*, gracculorum *Scaligero*) pleraeque Pontum non subeunt, sed in Propontide aestiuant et pariunt: hibernant ad Aegialum. (*Vulgo* in Aegaeo.) Thu-

- nides et pelamydes et amiae in Pontum traiciunt vere, atque ibi aestatem habent, ac fere maxima pars fusaneorum (rhyadum) et gregatiliū. **3** Maxima autem pars piscium est gregatilis. Habent hi ducem; omnesque Pontum subeunt, tum propter pabulum, quod et largius et praestantius ex aqua dulci est, tum ob belluas grandiores, quae ibi sunt infrequentiores. Nam praeter phocaenam et delphinum nulla in Ponto est: et ipse sane delphin pusillus est ibi: exeunti autem illico grandis. Igitur et pabuli gratia et pariendi caussa eo adnatant. Sunt enim loca ad pariendum accommoda, et potabilis aqua et dulcior catulos educat. Vbi pepere- rint, et foetus aucti fuerint, recedunt statim post Vergilias. Austrina hieme serius egrediuntur: aquilonia temperius: vento enim secundo iuuantur. Eorum itaque proles tum parua capitur ad Byzantium, propterea quod non diu manserit in Ponto.
- 4** Alii tam adeuntes quam abeuntes videntur. At trichiae soli e piscibus cum abeunt, capiuntur: reuerti nulli videntur. Sed ad Byzantium si quis capiat, piscatores retia lustrant, propterea quod reuerti non consueuerint. In caussa est, quoniam hi soli in Istrum abeunt; atque vbi finditur, in Adriaticum descendunt. Cuius rei argumentum est, quod in Adriaticum ingredientiē nulli capiun-



iur, sed ex Adriatico abeuntes capiuntur. Ingre- 5  
 diuntur thunni vergentes dextrorsum ad terram:  
 egrediuntur sinistrorsum secundum littus. Id  
 quod eos autumant facere quidam propterea, quod  
 dextro oculo acutius videant, alioqui natura sua  
 obtusa oculorum acie. Fusanei interdum comitantur,  
 noctu abstinere ab itinere ac pascuntur; etiam si-  
 lente luna: alioqui abstinere, sed iter faciunt.  
 Maris accolae quidam ita aiunt, per brumam immo-  
 biles euadere, et in loco, quem nacti fuerint, quie-  
 tem agere usque ad aequinoctii tempus. Ac coliae 6  
 quidem subeuntes capiuntur, exeuntes minus. Alii  
 autem fusanei, cum exeunt e Ponto, capiuntur: quo  
 tempore longe optimi sunt. Cum vero ingrediun-  
 tur, proxime Aegialum (*vulgo* littora) pinguiissimi  
 capiuntur. Quo interius subeunt, tanto macri-  
 ores. Ac saepe numero fit, ut, cum increbuerint  
 contra flatus Austrini, simul cum coliiis etiam  
 scombri (*vulgo* et scombris) emigrent, atque infra  
 Byzantium potius capiantur. Hoc igitur modo  
 mutant loca pisces.

CAP. XVI. (*vulgo* adhuc CAP. XIII. Scali-  
 gero XVII.)

Similis vero affectio euenit terrestribus latitan-  
 di tempore imminente. Hieme enim capiuntur

impetu ad latendum; atque redeunt tempore calidiore. Latent animalia, ut aduersus vtriusque temporis excessus sese communiant. Ac quorundam genus omne latet: alia non omnia. Iam vero testacea latent omnia; veluti ex maritimis purpurae, buccini, et vniuersum genus huiusmodi. Sed manifestius hoc agunt ea, quae affixa non sunt; quippe sese abdunt, ut pectines. Quaedam vero in superficie operculo muniuntur, ut terrestres cochleae. At eorum quae adhaerent, modus quo lateant, incertus est. Verum non eodem tempore latent omnia: sed hieme cochleae: purpurae et buccini sub cane circiter dies triginta: quo tempore etiam pectines. Maxima vero pars latet et in vehemēti gelu et in vehemēti aestu. (Vulgo Cap. 2 XIII. Scaligero XVIII.) Insecta paene omnia latent, nisi si qua ex ipsis in domiciliis nobiscum agitant: atque ea quae intereunt, neque perennant. Tempus insectis latendi hiems. Latent quaedam diebus pluribus: alia gelidioribus tantum, ut apes: latent enim hae quoque. Argumento est, quod nihil gustant ciborum, qui apponuntur. Tum earum si qua ereptarit, videtur translucida; neque quicquam plane in ventre continere. Quiescunt ab occasu Vergiliarum ad ver usque. Latent anima-



lia atque abdunt sese tepidis, et quibus antea locis cubilia constituere consueuere.

CAP. XVII. (vulgo XV. Scaligero XIX.)

Latent etiam multa eorum, quae sunt e sanguine constituta: qualia quae cute squalida teguntur, vt serpentes et lacerti et stelliones, (ascalabotae,) et crocodili fluuiales: idque menses quatuor hiemis acrioris, nihilque esitant. Ac ceterae quidem serpentes in terram conduntur: viperæ autem sub saxis abdunt sese. [Cap. XX. Scaligero.] Latent etiam multi e piscibus: manifestissime hippurus et coracinus hieme. Hi namque soli nusquam capiuntur, nisi statis temporibus quibusdam atque iisdem semper. Reliqui fere omnes semper capiuntur. Latent et muraena et orphus et conger. In saxatiliū genere mares ac foemellae coniuges latent, quemadmodum etiam nidulantur, turdi, merulae, percae. Latent thunni hieme in profundo maris: post quod tempus euadunt pinguiissimi. Igitur ab exortu Vergiliarum eorum captura incipit ad extremum arcturi occasum vsque. Praeter id temporis in latibulis quiescunt. Ex thunnis sicut ex aliis aliqui capiuntur cum latent: cum tempor praeter temporis rationem superuenerit. Atque ii, si tepidus sit locus, mouentur paululum a cu-

bilibus progressi in pastum. Sic etiam plena luna. Plerique pisces tum suauissimi sunt. Primades (*vulgo premadiae*) abdunt sese in coenum: colligitur hoc ex eo, quod tunc non capiuntur. Videntur quoque tergo limoso admodum et pinnis impactis. (*impressis, compactis inter se ob coe-*  
 3 *num.*) Verno autem tempore mouentur, atque ad terram appellant, tum coeundi tum pariendi gratia: ac grauidae capiuntur. Videturque id tempus afferre eis gratiam ad cibos. Deteriores enim sunt et autumnus et hieme. Simul mares deprehenduntur pleni suo semine genitali. Foetibus etiamnum pusillis haud facile capiuntur: ubi crevere, vberius, asilo agitatae. Latent alia in arena, alia in luto, exserto tantum ore. Maxima pars latet hieme. At crustacea et saxatiles pisces, et  
 4 raiae, (bati,) et cartilaginea gelidissimis tantum diebus. Id quod declaratur, propterea quod tempore frigido non capiuntur. Quidam etiam pisces aestate conduntur, ut glaucus: latet enim aestiuus diebus circiter sexagenis. Latet enim asellus atque aurata. Asellus intelligitur quidem plurimum latere: quia plurimo transacto tempore capitur. Argumentum, quod aestate lateant pisces, videtur illud esse, quia siderum exortu capiuntur, maxime vero caniculae. Eo enim tempore subuerti



mare. Id quod in Bosporo manifestius est: limus enim sursum fertur, simulque efferuntur pisces. Aiunt etiam saepenumero euenisse, vt fundo verriculis excitato plures eodem verriculo altero iactu quam priore capiantur. Imbribus autem largioribus ingruentibus apparent animalia, quae aut nunquam aut raro visa sunt.

CAP. XVIII. (vulgo XVI. Scaligero XXI.)

Ex auibus quoque multae latent, nec, vt quidam arbitrantur, omnes in tepida loca secedunt; sed qui haud multum absunt ab eiusmodi locis, quales ii, in quibus semper morantur; veluti milui et hirundines. Quae vero longius absunt, non mutant locum, sed se ipsas abdunt. Visae enim sunt hirundines in angustiis conuallium (*Scaliger* in cauernis) multae, plumis nudatae penitus: et milui ex iis euolantes locis visi sunt, cum primum apparuerant. Nullo quoque discrimine tam quae 2 rectos quam quae vncos habent vngues sese condunt (*quaedam.*) Quippe et ciconia et merula et turtur et alauda. Ac turtur quidem nemo dubitat quin maxime omnium lateat. Nulla enim, vt aiunt, audita est hieme canere vsquam. Cum init latebras, valde pinguis est. Atque in latibulo plumis spoliatur: neque tamen macrescit. Palumbium

(phasson, *vulgo legitur* cicurum) quaedam latent, quaedam non: abeunt cum hirundinibus. Latet etiam turdus et sturnus. Ex iis, quae aduncis sunt vnguibus, paucis diebus latent milui et noctua. (glau.)

CAP. XIX. (vulgò XVII. Scaligero XXII.)

Ex quadrupedum genere quae animal pariunt spini(hystrices) et vrsi latent. Ac sane constat, vrsos feros latere: verum propterne frigus, an aliam ob causam, dubitatur. Per id enim tempus fiunt tum mares tum foeminae pinguissimi, atque adeo, vt minus commode moueri queant. Foeminae vero ad pariendum tempestiuum est: latetque tantisper, dum sit tempus catulos educendi. Hoc verè fit mense tertio a bruma. Quadraginta dies latet cum paucissimos: ex quibus bis septenos aiunt, in quibus non moueatur. Ceteris, quorum numerus maior est, latet quidem, sed mouetur et expergiscitur. Praegnans vrsa aut a nullo aut a paucis capta fuit. Hoc tempore constat eos nihil vesci: neque enim exeunt. Quod si capiantur, inani ventre et intestinis visuntur. Aiunt etiam, quoniam non ceperit cibum, intestinum nonnihil coalescere: ac propterea, cum primum prodeunt, arum gustare, quo intestinum absistat et dilatetur.



Latet etiam glis (elios) in ipsis arboribus: atque 2  
per id temporis euadit pinguissimus. Et mus Ponticus candidus. (Cap. XXIII. Scaligero.) [*Quae latent, nonnulla exuunt id, quod appellant senectam. Suprema haec cutis est, et folliculus tempore generationis.*] Igitur in quadrupedum genere quod animal parit, de vrsō, quare lateat, dubitatur, quemadmodum dictum est. Quae vero cute squalida praedita sunt, eorum pars paene maxima latet. Exuunt autem senectutem ea, quorum cutis mollis, non testacea, qualis testudini, (est enim tum testudo tum lutaria (emys) e genere squalidorum:) sed qualis stellioni et lacerto et potissimum omnium serpentibus. Exuunt enim tum vere, 3  
cum exeunt, tum autumnō iterum. Viperae quoque exuunt senectam et vere et autumnō. At non, ut putarunt aliqui, vnum genus hoc e serpentibus non exuere. Cum incipiunt exuere serpentes, aiunt ab oculis primum abscedere, ita ut affectionis eius imperitis coeci videantur: deinde a capite, quod tum omnibus album videatur. Intra noctem ac diem tota senectus paene exuitur, initio facto a capite ad caudam vsque. Fit autem quod intus erat foris: egrediuntur enim sicut foetus ab vteri inuolucro. Eodem modo ex insectorum genere 4  
exuunt senectutem quae exuere consueuere, ut sil-

pha et culex, (empis,) et quibus alae in vaginis sunt, qualis est scarabaeus. (cantharus.) Sed omnia postquam genita sunt, exuunt. Nam sicuti animali secundina, cum editur, sic etiam vermiculo, cum paritur, obrumpitur folliculus. Aequae sane et apibus et locustis. Ac cicadae quidem cum egres-  
sae sunt, considunt super oleis et arundinibus. Circumrupto autem folliculo exeunt, pauxillo humore relicto intus: neque multo post tempore  
5 et volant et canunt. Ex maritimis autem locustae et gammari exuunt aliquando vere, alias autumno, postquam pepererunt. Iam vero quaedam e locustis captae sunt, quae molles partes circa pectus haberent, propterea quod obrupta crusta fuisset ibi: at inferiores duras idcirco; quia nondum ibi circumrupta esset. Neque enim eodem quo serpentes modo exeunt. Latent locustae quinque circiter menses. Exuunt cancri quoque senectutem. Ac sane de iis qui molliore teguntur crusta, nulla est controuersia. Aiunt etiam qui duriore, ut maias et vetulas. (graus.) Et cum exuunt, fiunt crustae molles omnino. Ac cancri quidem haud valde ingredi queunt. Exuunt haec non semel, sed saepe. Quae igitur lateant et quando et quomodo quaeque exuant senectutem, iam dictum est.



## CAP. XX. (vulgo XVIII. Scaligero XXIV.)

Bene autem habent animalia nec iisdem temporibus aequae neque excessibus quibuscunque. Secundae quoque atque aduersae valetudines aliis aliae eueniunt generibus pro temporum ratione ac denique non eadem omnibus. Auibus igitur squa-  
lores conferunt tum ad ceteram sanitatem tum etiam ad partus, praecipue palumbis. (phattis.) Pisces autem praeter paucos iuuantur imbribus. Incommoda vtrisque contraria sunt; pluuiæ quidem tempestates auibus: omnino namque multus potus eis non est conducibilis: piscibus autem siccitates. Paene igitur omnia in genere vncunguium, sicuti <sup>2</sup>  
supra dictum est, potu omnino abstinent: quod Herodotus (*Codices alii* Hesiodus) ignorauit. Is enim, vbi narrat Nini obsidionem, aquilam augurii praesidem bibentem facit. Alia vero bibunt quidem, sed non multum: atque omnino ne ceterorum quidem vllum, quod pulmone raro praeditum sit atque oua pariat. Anium morbos indicant plumæ: obturbantur enim, neque pristinam sanitatis obtinent constitutionem. [Vulgo [Cap. XIX. Scaligero XXV.] Annis pluuiis, sicut antea dictum est, pisces bene habent se: neque enim solum habent plus alimenti, sed etiam conducibiles sunt eis imbres, quemadmodum etiam plantis. Olera nam-

que, tametsi irrigantur, tamen compluta plus proficiunt. Idem quoque euenit palustribus arundinibus: neque enim admodum crescunt nisi pluuiarum accessione. Argumento quoque est migratio plurimorum piscium annua in Pontum, vt ibi aestiuent, vbi propter fluuiorum frequentiam dulcior aqua fit, iidemque multum escae subuehant. Subeunt praeterea amnes multi ex piscibus, inque eis atque in lacubus bene agitant: cuiusmodi amia est et mugil. Gobii quoque in fluuiis euadunt pingues. Denique lacuum commoditate loca praedita praestantissimos habent pisces. Aestiuae autem pluviae maximae piscium parti sunt vtiliores: ac praeterea cum ver aestasue aut autumnus pluuius, hiems autem tepida fuerit. Ac sane, vt de omnibus dicatur, cum hominibus euenerit annus salubris, maxima quoque piscium pars bene vt habeat contingit. In locis autem frigidis non bene habent. Maxime vero laborant per hiemem, qui in capite lapillum habent, vt chromis, lupus, vmbra, pagrus. Lapis enim facit, vt a frigore congelentur et ad littus appellantur. Plurimis igitur piscibus magis conferunt pluviae. At mugili et capitoni, et ei quem nonnulli vocant marinum, (*vulgo myrinum*,) contra euenit. Namque pluuiis aquis, si nimiae sint, eorum magna pars celerius excoeca-



tur. Consueuere enim capitones per hiemem potius id pati: quippe exalbescunt oculi eorum: atque eo tempore macilenti capiuntur: ac tandem intereunt funditus. Verum eius affectionis non videtur caussa esse imber potius quam frigus. Nam cum alibi iam tum circa Naupliam Argiuorum ad stagnum (*aestuarium*) capti sunt coeci multi, cum gelu inualuisset: ac non pauci albis quoque oculis deprehensi sunt. Aegre etiam fert sese aurata hie- 7  
me: aestate autem acharnas, ac macescit. Sicciores anni praeter ceteros propemodum pisces plus conferunt coracinis. (*coruulis Gazae.*) Atque his quoque ea de caussa, quod sicco tempore tepor euenire solet frequentius. Loca autem commoda cuique sunt, in quibus bene habeant: quicunque enim aut littore aut alto gaudent, in altero horum: qui autem sine discrimine vtrumque frequentant, vtroque. Sunt et propria quaedam loca singulis, in quibus degunt commode. In vniuersum fere algosi conferunt; atque idcirco pinguiore in his capiuntur ii, qui quouis locorum genere pabulantur. Nam sane algioris cibus suppetit largior: carniuori autem plures pisces ibi nanciscuntur. Differunt etiam aquilonia ab austrinis. Nam lon- 8  
gis piscibus melius est in aquiloniis, ac per aestatem eodem in loco plus longorum quam latorum

capitur. Thunni et gladii sub caniculae exortum asilo agitantur. Habet enim per id tempus vtrumque genus secundum pinnulas quasi vermiculum, quem asilum vocant, scorpii specie, aranei magnitudine. Hoc tantum facit doloris, vt exiliat gladius non minus delphino: atque adeo saepe in navigia incidat. <sup>9</sup> Tepore gaudent thunni maxime piscium: eiusque genera appellant sese ad littoris arenam, vt calore fruantur: summoque aequore nant. Pisciculi autem minuti idcirco tuti sunt ab interitu, quia despiciuntur: maiores enim ii qui grandiores sunt persequuntur. At ouorum et sobolis maxima pars interit tempore teporis. Quaecunque enim deprehenderint, absumunt omnia. <sup>10</sup> Ante solis ortum potissimum capiuntur pisces et post occasum. Omnino vero circa ortum et occasum. Tunc enim tempestiue iaci retia dicuntur. Per id itaque tempus tollunt retia piscatores: quo tempore per visum decipiuntur pisces. Noctu <sup>11</sup> igitur quiescunt. Maioris autem luminis accessione plus vident. Pestilens vero morbus nullus in pisces incidere videtur, cuiusmodi hominibus euenit saepenumero, et inter animalia quadrupeda et quae animal pariunt equis et bobus, aliisque ali- quibus tam mitibus quam feris generibus: aegrotare tamen videntur. Id quod ex eo coniiciunt



piscatores, cum inter multos pingues eiusdem generis capiunt nonnullos attenuatos atque aegrotis similes, etiam mutato colore. Ad hunc igitur modum sese habent marini pisces. (Vulgo Cap. XX.)

At neque aut lacustres aut fluuiatiles vexantur vlllo 12 genere morbi pestilentis: eorum vero nonnulli certis morbis tentantur. Nam glanis sideratur sub canicula potissimum, quia summa aqua natat, et a forti tonitru consopitur et fit attonitus. Patitur hoc etiam cyprinus, sed minus. Glanis etiam saepe a serpente dracone in vadis ictus interit. In baliro autem atque tillone lumbricus innascitur sub canicula, qui instigat eos ad summa aequoris atque inualidos efficit. Innatantes vero etiam aestus interficit. Chalcis valido morbo corripitur. Pediculi enim permulti sub branchiis orti eam interimunt. Cuiusmodi morbo nullus praeterea tentatur piscis. Intereunt verbasco pisces. Itaque eo 13 fluuiis ac lacubus infectis tum alii venantur eos, tum Phoenices etiam marinos. Sunt et alii duo piscandi modi, cum fugiunt altos gurgites fluuiorum per hiemem. Nam sane dulces aquae alioqui gelidiores. Ergo per terram continentem scrobem, quae in fluuium ducat, fodiunt. Eam opertam tum foeno (gramine) et lapidibus, quasi cauea

vt sit, faciunt, relicto aditu a fluuio. Gelu igitur facto, ex ea fossa nassa venantur. Alterum genus capturae simile est; idque tum aestate tum hieme exercent. Medio in fluuio surculis ac lapidibus circumuallant ac quasi ostioli spatium relinquunt. Ibi nassa indita capiunt lapidibus ablatis.

14 Cetera testacea pluuiis gaudent annis: purpura non item. Cuius rei argumentum est, quod, vbi fluuius in mare effluit, si ponantur ibi, atque aquam gustarint, obeunt intra diem. Atqui viuit purpura, postquam capta est, dies quinquagenos circiter. Alit sane alia aliam; adnascitur enim testis quasi alga quaequam et muscus. Nam quae apponunt ipsis ad vescendum, aiunt id ea de caussa fieri,

15 vti plus ponderent. Ceteris anni sicciores nocent: deteriora enim fiunt et infrequentiora. Ac pectines quoque tunc rubescunt magis. Itaque in Euripo Pyrrhaeorum olim defecerunt non solum quia instrumento piscatores verrebant, sed etiam ob anni siccitatem. Aliis autem testaceis anni pluuii conferunt, propterea quod dulcescit mare. In Ponto autem ob frigus non nascuntur, neque in fluuiis praeter pauca, quae valuulis clauduntur. Et quae vnico tegmine constant, tempore gelido gelantur. Hactenus de aquaticis animantibus.



## C A P. XXI. (Scaligero XXVI.)

At in quadrupedum genere sues tribus laborant morbis, quorum vnus vocatur angina, (graece branchus, raucedo *Gazae*) cum potissimum fauces ac maxillae inflammantur. Euenit etiam aliis partibus quibuscunque corporis: saepe enim pedem corripit: aliquando aurem. Hoc continuo putrescit, simul et id quod cohaeret, vsque dum in pulmonem inuadat. Tunc enim interit. Cito crescit; ipse cibo abstinet statim cum correptus est morbo hoc vel quantulocunque. Tantisper dum morbum pusillum esse sentiunt subulci, medicas adhibent manus, non alio modo, quam tota abscissa parte. Duo alii sunt morbi; vtrumque Graeci *κραῦραν* <sup>2</sup> dicunt, (latine strumam *Gaza*, grunionem *Scaliger*, *utroque male*.) Alter est capitis dolor et grauitas, quibus plurimi capiuntur. Alter est alui incitatio. Atque hic videtur non posse sanari. Alteri auxiliantur, vino naribus admoto eoque elotis. Verum haud facile euadunt. Tertio enim quartoue interimit die. Angina corripuntur potissimum, cum <sup>3</sup> aestas largius tulerit (ficus *addit Codex*), atque ipsi euaserint pinguissimi. Remedio sunt mora praebita, et lauacrum tum largum tum calidum, scarificata subtus lingua. Grandinosi sues sunt, quibus caro humida tum in cruribus tum in collo

atque etiam armis. Quibus in locis plurima quoque grando est. Ac sane paucae si sint, dulcior caro: sin multae, humida valde atque insipida  
 4 est. Grandinis indicia sumuntur ex linguae parte inferiore, vbi grandines maxime insunt. Tum ex iuba setas si quis euellat, apparent subcruentae. Praeterea qui sic sunt affecti, posterioribus pedibus nequeunt quiescere. Tantisper carent grandine, dum lac sugunt duntaxat. Tolluntur grandines tipha: ea etiam ad alendum utilis est. Commodissime et aluntur et pinguescunt cicere et ficu. Summa illa est, non simplicem apponere cibum, sed variare. Gaudet enim mutatione, quemadmodum alia quoque animalia. Aiunt etiam simul cibi parte inflari, parte [*carnem augeri, parte*] pinguescere. Glandes vero libenter quidem ab illis esitari; sed humidam efficere carnem. Et, si grauidae largius eas esitarint, abortiuntur, sicut et oues. Hae enim manifestius id patiuntur ob glandes. Solus ex animalibus, quae nota sunt nobis, grandine afficitur sus.

#### C A P. XXII. (Scaligero XXVII.)

Canes tribus morbis infestantur: quorum nomina rabies, angina, podagra. Rabies insanos facit: et quae momorderint, omnia in rabiem agun-



tur praeter hominem. Interficit pestis haec tum canes ipsos, tum id quod momorderint, excepto homine. Interficit etiam angina canes. Pauci ex podagra euadunt. Corripit rabies etiam camelum. [*Elephantos aiunt immunes esse ab aliis morbis, sed flatibus infestari.*] [Vulgo Cap. XXIII. 2 Scaligero XXVIII.] Duabus aegritudinibus afficiuntur gregales boues, podagra et struma. (crauro.) In podagra pedes tument: verum non intereunt, neque ungulas amittunt. Melius se habent delibutis pice calida cornibus. Cum autem strumescit, spiritus calefit, et crassior euadit. Et quod est in hominibus febris, hoc est in bobus strumam pati. Signum morbi aures demissae, atque edendi impotentia. Celeriter intereunt: atque dissectis pulmo putridus apparet.

## CAP. XXIII. (vulgo XXIV. Scaligero XXIX.)

Equi pascui non sunt obnoxii aegritudinibus, praeterquam podagrae. Hac cum laborant, interdum etiam ungulas amittunt: amissis illico aliae subnascuntur. Simul enim altera abiicitur et altera generatur. Morbi indicium est testis dexter subsiliens, vel etiam paulo infra nares medio in loco rugosa quaedam cauitas est. At qui aluntur domi, plurimis morbis corripiuntur: capiuntur enim tor-

minibus. Indicant aegritudinem, cum crura posteriora ad anteriora attrahunt; quae ita submouent, ut inter se paene collidant. Quod si post aliquot dierum inedia furore agitentur, detracto sanguine, et castrantes auxiliantur eis. Tetano etiam laborant. Indicio sunt venae intentae omnes: tum caput et collum: ac cruribus rigidis incedunt. Eorum quoque pulmo laborat pure. Corripiuntur etiam morbo alio, quem Graeci vocant *κρυθιά*, latine possis hordeaginem. Signum mutatae valetudinis palati mollitia: et feruidam spirat. Quae sponte sua nisi desistunt, curam admittunt nullam. Et quod vocant lymphari, cohibetur sono tibiae. Demissa his frons est. At ubi conscenderis, cursu incitantur, quoad fiat, ut ad quempiam feratur. (ut aliquis retineat *Codices alii.*) Cum rabie infestatur, tristis item est. Rabiei signum: retrahit auriculas ad iubam, atque prorsum iterum tendit.

3 Et deficitur animo, et anhelat. Haec quoque remedio nullo tolluntur, si cordis dolorem patiantur; cuius indicium est, cum dolet, ducit ilia: siue suo loco mota sit vesica; cuius mali nota est, cum nequeunt urinam facere: tum ungulas atque clunes trahit: siue staphylinum (pastinacam) devoravit. Is est sphondylae magnitudine et facie. Muris aranei morsus etiam aliis iumentis perni-



ciosi. Excitantur pustulae. Perniciosius mordet  
 praegnans; nam praegnantis ex morsu pustulae di-  
 rumpuntur: sin minus, non interficit. Praeterea  
 interficit morsu aut magnum dolorem affert ea,  
 quam nonnulli chalcidem, alii vocant zygnidem.  
 Similis haec est pusillis lacertis, colore caecilia-  
 rum (typhlinarum) serpentium. In summa periti 4  
 sic autumant: omnibus paene morbis, quibus la-  
 borat homo, equum quoque tentari atque ouem.  
 Sandaracae veneno interit tum equus tum iumenta  
 alia. Datur autem in aqua atque percolatur. Ab-  
 ortum facit equa foeta extinctae lucernae odore:  
 id quod praegnantibus mulieribus nonnullis quoque  
 vsu venit. Atque hactenus de morbis equorum. At 5  
 quod vocant hippomanes, innascitur pullis, vt aiunt.  
 Equae vero praelambentes depurantesque abrodunt  
 ipsum. Quae autem fabulantur, ficta sunt a mu-  
 lierculis et incantatricibus. Non est controuersum,  
 edi ab equabus id quod vocant pullium, antequam  
 pariant. Agnoscunt equi vocem aduersariorum, 6  
 quibuscum pugnarint aliquando. Gaudent equi  
 pratis et paludibus: turbidam namque potant  
 aquam: atque si pura est, vngulis obturbant. Ita  
 vbi biberint, lauantur: lauacri enim atque aqua-  
 rum amantissimum animal est. Quare sic quoque  
 constituta fuit equi fluuiatilis natura. At bos con-

tra, nisi pura aqua sit et frigida et sincera, non vult bibere.

CAP. XXIV. (vulgo XXV. Scaligero XXX.)

Asini vno potissimum laborant morbo, quem vocant melida. Circa ipsum caput fit primum: tum destillatur per nares phlegma (pituita *Gazae*) crassum et rufum: quod vbi in pulmonis partes descendit, interficit. Nam eius initia, cum tantum caput occupat, non sunt letalia. Frigoris impatientissimum animal hoc est. Quamobrem neque in terris Ponti neque in Scythia non generantur asini.

CAP. XXV. (vulgo XXVI. Scaligero XXXI.)

Elephantos infestant aegritudines flatuosae, quibus fit, vt neque vrinam reddere neque alui excrementa queant. Quod etiam si terram deuorarint, inualidi fiunt. Ita sane, si intermiserint. Si non intermittant, non afficiuntur nocumento. Deuorant etiam lapides interdum. Inuadit etiam alui profluuium. Eo captis medentur aquae calidae potu dato. Melle quoque intinctum foenum in cibum praebent: quorum vtrouis sistitur. Cum lassitudinem contrahunt idcirco, quia non decubuerint, sanantur affricatis armis sale, oleo, calida aqua. Cum humeros dolent, suillas carnes assas



apponunt, atque ita auxiliantur. Elephanti non omnes oleum bibunt. At qui bibunt, si quid in corpus ab hostibus adactum est, olei potu eiici praedicant. Illis, qui non bibunt, vinum oryzae cum oleo coctum praebent. (*Vulgo est: radicem cum oleo coctam praebent.*) Hactenus de quadrupedibus.

## CAP. XXVI. (vulgo XXVII. Scaligero XXXII.)

At insectorum pars maxima bene valet, cum annus eiusmodi sit, quale tempus in quo generantur, verno similis, humidus et tepidus. At in alveis apum oriuntur bestiolae, quae populantur favos. Deuastantur enim a vermiculo, qui tela obducit, quem clerum vocant; alii autem pyraustam. Parit is in cellulis sibi simile, aranei specie: ac facit, vt aegrotet examen. Item alia bestiola hepiolo similis, qui circum lucernam obuolitat. Haec parit quiddam plenum lanugine: neque pungitur ab apibus, sed solo fumo fugatur. Innascuntur in alueariis etiam erucæ, quas vocant teredines. Has non insectantur apes. Aegrotant, cum sylua rubiginosos flores tulerit, et anno sicciore. Insecta omnia oleo intereunt: celerrime, si quis capite illito in sole ponat.

C A P. XXVII. (vulgo XXVIII.  
Scaligero XXXIII.)

Omnino vero locorum ratione diuersis modis sese habent animalia. Nam sicuti alicubi quaedam prorsus non nascuntur, sic alibi nascuntur sane, sed pauciora, quaeque nec diu uiuant, neque bene valeant. Ac sane etiam propinquis in regionibus differentia haec est. Nam in terrae Milesiae vicinis inter se locis gignuntur cicadae, et non gignuntur. Et in Cephalaria fluuio disterminantur, vbi  
 2 cicadae vel nascantur vel non. In Poroselene dirimuntur itinere loca, in quorum altero mustela (gale) sit, in altero non sit. In Boeotia talpae circa Orchomenum multae sunt; in Lebadica vicina nulla: neque si importentur, volunt fodere. In Ithacam lepores si quis attulerit atque dimiserit, nequeunt viuere; sed mortui reperiuntur iuxta mare, reuersi eam in partem, qua fuerint importati. In Sicilia non sunt hippomyrmeces. In Cyrenensi  
 3 agro vocales ranae olim non fuere. Nusquam locorum in Africa aprum inuenias, neque ceruum, neque feram capram. In India Ctesias, indignus cui fidem habeamus, negat esse suem vel cicurem vel ferum. Animalia vero, quae sanguine nullo concreta sunt, et omnia quae latitant, (*Scaliger* terram subeunt,) magnitudine esse insigni. In Ponto



neque mollusca gignuntur neque omnia testacea, nisi paucis locis. In mari rubro mirae magnitudinis testacea omnia. In Syria ouibus caudae sunt cubiti latitudine: auriculae capellis longitudine palmi ac dodrantis. Quibusdam etiam inferne coeunt inter se auriculae. (*Codices alii* pertingunt vsque ad terram.) Boues Syri, sicut cameli, iugas habent in summis armis. [*Vulgo erat* flexuras habent. *Gaza*: nodos scapularum flectunt. *Rectius videtur*: gibber habent in summis armis.] In Lycia *vulgo* Cilicia) tondentur caprae, quemadmodum oves alibi. In Africa cornigeri arietes nascuntur statim, neque solum mares, vt Homerus ait, sed etiam alia. (*foeminae*.) At in Ponto circa Scythiam contra: sine cornibus omnia. In Aegypto alia quidem maiora quam in Graecia, vt boues et oves: alia autem minora, vt canes, (*vulgo* asini,) lupi, lepores, vulpes, corui, accipitres: alia pari magnitudine, vt cornices, caprae. Huius rei causam pabulo attribuunt; quod aliis suppetat abunde, aliis non item. Nam lupo et accipitri, qui carnibus vescantur, materia infrequens est: rarae enim auiculae sunt. Lepori vero et aliis, quae carnibus non aluntur, neque nuces neque poma diuturniora sunt. Multis autem locis etiam temperatura in causa est: quemadmodum in Illyrico et Thracia et Epiro asini pusilli

sunt. In Scythia et Celtica nusquam gignuntur: aegre enim hiemem tolerant. In Arabia autem lacerti cubito maiores: et mures multo grandiores quam sunt apud nos rustici. (sorices *Scaliger*.) Anterioribus cruribus palmi longitudine: posterioribus autem usque ad primam flexuram fere cubiti. In Africa serpentum ingens, ut aiunt, magnitudo: sic enim praedicant nonnulli, eo cum appulissent, conspexisse multorum ossa bouum, qui tum illis viderentur ab anguibus deuorati. Prouectas enim triremes nihilo secius serpentes celeriter insectatos: atque eorum aliquot cum inuasissent, triremem subuertisse. In Europa quoque atque Europae parte ea tantum, quae inter Acheloum ac Nessum amnem interiacet, plus leonum quam in Asia. Contra in Asia pantherae, (pardales,) in Europa nullae. Omnino vero in Asia ferae omnes efferatiores: fortiores autem in Europa. Multae maxime species in Africa. Et prouerbum circumfertur: Semper aliquid noui afferre Africam. Cum enim regio ea laboret aquarum penuria, occursum mutuo ad aquulas facto, videntur ea quoque, quae non eiusdem generis sunt, tum coire, tum etiam educare, si tempora vtero gerendo sint eadem, neque inter se valde discrepent magnitudine. Mitescunt autem inuicem ob bibendi usum. Contra vero quam alia indigent potu hieme potius



quam aestate. Nam aestivae pluviae cum ibi nullae sint, non consuevere tunc bibere. Atque ipsi quidem mures si biberint, moriuntur. Generantur alia 8 quoque ex mistione diuersorum generum: veluti miscentur in Cyrenaico agro canes cum lupis ac generant. Sic ex vulpe et cane Laconici. Aiunt etiam ex tigride et cane nasci canes Indicos: verum non protinus, sed tertia mistione. Primos enim foetus esse feroces autumant. Actas in deserta canes vinciunt. Ac sane earum multae deuorantur, nisi forte in venerem incensa sit fera.

C A P. XXVIII. (vulgo XXIX. Scaliger  
rectius continuat C A P. XXXIII.)

Morum quoque loca faciunt diuersitatem, montana et aspera a campestribus et mollibus. Sunt enim facie torua et fortiora: quemadmodum in Atho monte sues. Illorum enim foeminas ne mares quidem subiectae planitiei possunt subsistere. Etiam ad serpentum morsus aliter atque aliter sese habent terrarum loca. Nam circa Pharum atque alias regiones scorpii non sunt molesti: at vero cum aliis in locis tum in Caria (*Scythia cum Codd. aliquot Plinius,*) et multi et magni et perniciosi generantur. Si quem hominem aut feram pupugerint, necant. Necant etiam sues: quae alioquin minime aliorum morsus sentiunt. Nigros facilius interimunt. Quod

si percussi sues in aquam descenderint, tunc celer-  
 2 rime pereunt. Serpentum quoque morsus multum  
 differunt. Fert Africa serpentem aspidem, ex quo  
 faciunt septicum medicamentum, ad quod nullum  
 remedium inuenitur. Nascitur in lasere anguiculus,  
 aduersus quem remedium fertur lapis quidam ac-  
 ceptus a regis prisci sepulcro: eoque perfuso vi-  
 num bibunt. Etiam stellionum morsus in Italiae  
 quibusdam locis mortales sunt. Si forte alia aliam  
 deuorarit bestia venenata, eius tum morsus maxime  
 est perniciosus: veluti si scorpionem vipera come-  
 derit. Aduersatur autem eorum plurimis hominis  
 saliu. (*sputum.*) Serpens quidam minutus est,  
 quem vocant nonnulli sacrum: is magnos valde fu-  
 gat angues. Magnitudo eius est cubitalis, et hirsu-  
 tus visu est: quod momorderit, illico in orbem  
 putrescit. In India serpentillus quidam est, ad-  
 versus quem solum non habent remedium,

CAP. XXIX. (vulgo XXX, Scaligero XXXIV.)

Etiam vteri gestatio facit, vt animalia meliora  
 sint aut deteriora. Ac testacea quidem, vt pectun-  
 culi et omnia ostracea et crusta intecta, praestantis-  
 sima sunt praegnantia: sicut omnia locustacea.  
 Nam testacea quoque dicuntur vterum gestare. At  
 crustacea etiam coeuntia videntur, et parientia: at



illorum nullum. Mollusca cum grauida, tum opti-  
 ma: vt lolligunculae, (teuthides,) sepiae et polypi.  
 Pisces per initia conceptionis boni fere omnes: pro-  
 cedente foetatione partim boni, partim non. Foeta <sup>2</sup>  
 igitur bona maenula. (maenis.) Foemina facie est  
 rotundiore: mas oblongior et latior. Cum coepere  
 foemellae concipere, mares tunc contrahunt colo-  
 rem nigrum et varium magis; deterioresque sunt  
 ad vescendum. Per id tempus a quibusdam hirci  
 appellantur. Mutant etiam colorem, quas merulas  
 vocant, et turdi, et squilla certis anni tempestati-  
 bus, sicut et auium quaedam. Vere enim nigre-  
 scunt: post ver pristinum recipiunt candorem. Mu- <sup>3</sup>  
 tat etiam colorem fuca. (phycis.) Nam cetero tem-  
 pore candida, vere varia. Sola haec marinorum  
 piscium sternere sibi nidum, vbi pariat, praedica-  
 tur. Mutat igitur et maenula, vt dictum est, et  
 smaris: atque ex albidioribus fiunt aestate nigrio-  
 res: qui color plus extat in pinnis et branchiis. Et  
 coracinus praestantissimus est, cum gerit vterum,  
 quemadmodum et maenula. Mugil vero et lupus  
 et squammati (*Codices* et ceteri fluti, *graece* ploti)  
 fere omnes pleno ventre deteriores. Qui vero per- <sup>4</sup>  
 inde praestantes sint, et cum ferunt et cum non fe-  
 runt, pauci, vt glaucus. Deteriores etiam vetuli  
 pisces: quin etiam ad salsamenta ineptiores thunni

vetuli: multum enim carnis absumitur. Id quod aliis quoque euenit piscibus. Indicium senectutis squammarum magnitudo et duritia. Iam captus fuit vetulus thunnus, cuius pondus erat talentum quindecim: caudae distantia duorum (*vulgo* quin-  
 5 que) cubitorum et palmi. Fluiatiles vero et lacustres exacto foetu optimi euadunt: item emissio semine, si iterum alimentis recreentur. Ex his pleno vtero aliqui sunt boni, vt saperdis: aliqui mali, vt glanis. Ceteri omnes mares praestantiores foemellis. At glanio mari foemella melior. Inter anguillas quas vocant foemellas, eae sunt praestantiores. Sane vocant foemellas propter earum faciem diuersam: neque enim sunt.

---



---

A R I S T O T E L I S  
DE ANIMALIBVS HISTORIAE  
LIBER IX.

---

C A P. I.

Quae animalia tum obscuriora tum aevi sunt brevioris, eorum mores sensus nostros magis latent. In longaeuioribus facilius deprehenduntur. Naturali namque vi quadam praedita videntur, quae singulis animi (*humani*) affectionibus, prudentiae, stultitiae, fortitudini, metui, item mansuetudini, acerbitati atque aliis habitibus eiusmodi respondet. Nonnullorum etiam communis natura, ut tum doceantur tum discant, vel inter se vel ab homine: qualia sunt, quae audiendi sensus sunt participes, non solum ad sonorum sed etiam ad signorum differentias percipiendas. Quibus in generibus est 2  
mas et foemina, in iis omnibus paene simili ratione distinxit natura genus foeminarum a maribus. Patet autem hoc potissimum in homine et in maioribus

animantibus, et in iis quadrupedibus, quae animal pariunt. Horum enim foeminae moribus sunt mollioribus, ac citius cicurantur et mansuescunt et instituuntur. Cuiusmodi Laconicae canes: meliore enim indole sunt foeminae quam masculi. At Molossicorum genus canum, venaticum quidem, nihil differt a ceteris: quod autem greges sequitur, et magnitudine praestat, et fortitudine, qua ferae debellentur. Praestantes vero sunt tum fortitudine tum industria, qui ex utroque genere, Molosso ac  
3 Laconico, procreantur. Minus animosae foeminae omnes, praeter vrsam et pantheram. (pardalin.) In his foemella videtur esse fortior. Aliis generibus foeminae molliores et maleficientiores, et minus simplices, et procaciores, ac liberis alendis attentiores. Contra mares animosiores, ferociores, simpliciores et minus insidiosi. Atque horum quidem vestigia cum paene in omnibus sint, tum apertius videntur in iis, quae sunt moratiora. Maxime vero in homine: ipse enim naturam habet perfectam.  
4 Quare ii habitus in eo sunt manifestiores. Quippe mulier quam vir facilius mouetur misericordia, et ad lacrymas promptior. Invidia quoque plus laborat. Ac frequentius defraudatam sese conqueritur: conuiciosior etiam et exprobrantior. (*Gazae* mordacior.) Est etiam animo demissiore



foemina quam mas et desperantior: impudentior quoque et mendacior. Facilius dolo capitur, et memorosior. Ad haec vigilantior et ignauior, atque denique minus mobilis: minus item capit cibi. Mas auxilium suum impensius praestat, et, quemadmodum supra diximus, fortior est. Nam et in molluscorum genere si feriat sepia tridente, mas foeminae subuenit: foemina contra fugit, percusso mare.

#### CAP. II. (vulgo continuatur CAP. I.)

Pugnant igitur inter se animantes, quae eadem loca tenent, quorumque victus est idem. Si enim cibi penuria laborant, etiam congeneres inter se praeliantur. Nam marinos quoque vitulos aiunt bellare pro loco, tum marem aduersus marem, tum foeminam aduersus foeminam, quoad aut interficiatur, aut exigatur alter ab altero: atque etiam catuli ipsi. Crudiuioris quoque omnia infesta sunt, et ipsa aliis. Ex animalibus enim cibum petunt. Vnde et dissidia et considia vates capiunt. Dissidia ex inimicis: considia ex pacatis inter se. Solent abundante cibo ea quae sua natura aut timida aut effera sunt, pati vt mitescant vel erga homines, vel inter se eodem modo. Constat hoc ex cura, quae in terra Aegypti impenditur animalibus. Cum enim cibus abundanter suppetat, etiam inter se degunt

- ipsa ferocissima. Beneficio enim mitescunt. Vel-  
 uti crocodilorum genus afficitur ergo sacerdotem,  
 a quo curatur, ut alantur. Hoc etiam tum in aliis  
 regionibus tum earum quoque partibus videtur.
- 2 Sunt aquila et draco inimici: alitur enim serpenti-  
 bus aquila. Et ichneumon ac phalangium bellum  
 gerunt: venatur enim ea ichneumon. Ex auibus  
 variolae (poecilides) et alaudae et pipo (*vulgo pi-  
 pra*) et chloreus: inuicem enim oua edunt. Item  
 cornix et noctua: quia enim interdiu minus acute  
 videt noctua, illa meridie arrepta eius oua deuorat.  
 Contra noctua nocte illius. Nam valentior illa  
 interdiu, haec noctu est. Hostes inter se noctua  
 et orchilus. Nam is quoque noctuae oua absu-  
 mit. Quin interdiu ceterae quoque auiculae no-  
 ctuam circumuolant; id quod vocant admirari;  
 atque etiam aduolantes vellicant. Quo fit, ut  
 aucupes venentur eius opera omne genus au-  
 3 cularum. Inimicus etiam presbys dictus, (rex  
 anium *Gazae*,) et mustela et cornix. Oua  
 enim illius et pullos deuorant. Et turtur et pyral-  
 lis: (ignaria *Gazae*;) idem enim locus pabuli,  
 idemque victus. Et celeus et libycus. (galgulus  
*Gazae et Scaligero*.) Miluus et coruus. Cum  
 enim miluus valentior et vnguibus et volatu sit, sub-  
 trahit a coruo quicquid tenet. Quare hi quoque



hostes ob cibum fiunt. Ad haec quae de mari cibum petunt, inter se dissident, brenthus, (anas *Gazae*), gauia (larus) et harpe. Buteo (triorches) rubetae (phryni) hostis et anguium: deuorat enim eas. Turtur et chloreus: interficit enim hic turturem. Et cornix quem typanum (*vulgo* tapy-num, *Gaza* tympanum,) vocant. Aegolius (*Gazae* vlula) calarin, (*vulgo* colarin,) sicut et alii vncungues deuorant: vnde his bellum. Bellum 4 item inter stellionem et araneum: deuorat enim araneas stellio. Et pipo et ardeolam: oua enim et pullos huius illa absumit. Praeliantur aegithus (*Gazae* salus) et asinus, propterea quod accedit ad vepres asinus, vt scabat vlcera. Tum igitur sic, tum etiam rudendo oua eius eiicit atque pullos. Tremefacti enim excidunt. Ergo ille ob hanc noxiam inuolans eius vlcera morsicat. Lupus asino et tauro et vulpi facit bellum: crudiorens enim cum sit, inuadit boues et asinos et vulpes. Vulpes et circus eandem ob caussam: qui cum vncunguis et crudiorens sit, aggreditur et percutiens vlcera facit. Coruus tauri atque asini hostis est: quapropter 5 aduolans eos ferit, oculosque eorum fodit. Aquila et ardeola pugnant. Aquila enim, cum sit vncunguis, adoritur: illa autem defendendo sese moritur. Aesalon vulturi hostis. Crex coleo,

(galgulo *Gazae et Scaligero*), merulae et chlorioni,  
(vireoni *Gazae et Scaligero*), quem ex rogo natum fabulantur. Hic enim tum eos infestat, tum eorum pullos. Sitta et trochilus aquilae inimica. Sitta enim aquilae oua frangit. Ipsa autem tum propter hoc, tum quia crudiuora est, infesta est  
6 omnibus. Anthus (florus *Gazae*) equi hostis est. Abigit enim e pastu equum. Herba enim vescitur anthus. Oculi eius nube occupati hebetius vident. Imitatur equi vocem, et perterret aduolans. At ille si capiat, interficit. Habitat anthus secundum fluuios ac paludes; colore pulchro, et parabili contentus victu. Colotae asinus hostis est. Cubat enim in eius praesepio, et in nares sese in-  
7 ducens impedit, ne comedat. Ardeolarum tria genera sunt: pella, alba et stellaris (asterias) quae dicitur. Harum pella non sine molestia cubat et coit. Clangit enim et sanguinem, vt aiunt, ex oculis emittit coiens. Parit quoque incommode et cum dolore. Pugnat cum aduersariis: quippe aquilae, propterea quod eius praeda fit. Vulpi, quia noctu eam absumit. Alaudae, quoniam eius  
8 oua furatur. Mustelae suilloque generi serpens hostis est. Mustelae, cum vterque eadem in domo fuerint: idem enim victus vtriusque. Sus autem serpentes deuorat. Aesalo vulpi inimicus. Idcirco



ferit eam ac vellicat, eiusque catulos interficit. Vncunguis enim est. Vulpes autem et coruus amici. Inimicus enim coruus aesalonis. Idcirco fert opem vulneratae. Vultur et aesalo hostes invicem: vterque enim vncunguis. Pugnat cum aquila vultur: item olor, et superat olor saepe. Inter aves maxime olores alter alteri esca est. Ferae 9 aliae inter se perpetuas gerunt inimicitias, aliae, sicut homines, fortuitas. Asinus et acanthides (spini *Gazae*) aduersarii. His enim victus a vepribus: ille tenellas vepres depascitur. Anthus et acanthis et aegithus. Aiunt vero, aegithi et anthi sanguinem non commisceri inter se. Cornix et ardeola amici. Et schoenio (iunco *Gazae*) alaudae. Et laëdus (vulgo libyus) celeo. Secundum enim flumen et fruticeta habitat celeus: laëdus saxa et montes. Amant igitur regionem quam incolunt. Pifinx et harpe et miluus amici. Item vulpes ac serpens. Ambo enim caua terrae habitant. Merula et turtur. Hostes inter se leones et thoes. Cruidiiori enim 10 cum sint, indidem vtrique victitant. Pugnant elephantum etiam vehementer inuicem et feriunt dentibus. Victus penitus redigitur in servitutem: neque enim victoris vocem fert. Differunt inter se fortitudine mirum in modum. Tam maribus quam foeminis vtuntur Indi ad praelia. Minores tamen

foeminae et animosae minus longe. Muros prosternit elephanteus admotis dentibus maioribus. Palmas autem fronte, usque dum inclinat pedibus  
 11 superuenit atque humi extendit. Elephantorum autem venatio fit hoc modo. Cicuratos fortiores aliquos inscendunt, atque insectantur. Vbi sunt assecuti, ferire iubent, quoad fatiscant illi. Tunc rector in alterum transsilit, eumque falce regit. Celeriter deinde mitescit, atque imperata facit. Rectore insidente mites sunt omnes. Vbi descendit, non omnes. Itaque ferociorum priora crura vinciunt compedibus, ut quiescant. Venantur vero vel adultos vel vitulos. Atque hae sunt tum amicitiae tum bella in feris his, quae ob victum atque escam conferuntur.

### C A P. III. (vulgo C A P. II.)

Piscium vero quidam congregantur et amici sunt: quidam segregatim degunt inimici. Nonnulli congregantur cum foeti sunt, alii cum foetus edidere. Summa autem gregalium haec est: thunnæ, (thynnides,) maenulae, gobii, boces, lacerti, coracini, dentices, (synodontes,) muli, sphyrænae, anthiae, elegini, atherini, sargini, aciculae, (belonae,) [*mecones*,] loligines, (teuthi,) iulides, pelamydes, scombri, coliae. Horum quidam sunt



non solum gregarii, verum etiam coniuges. Reliqui enim omnes etiam in coniugia conueniunt, sed congregantur statis temporibus, vt diximus, cum vterum gerunt, aut cum pepererint. Lupus vero <sup>2</sup> ac mugil, etsi sunt inimicissimi, simul tamen quibusdam temporibus congregantur. Conueniunt enim in vnum non solum quae eiusdem sunt generis, sed quibus aut eadem aut similis esca est, si large suppetat. Viuunt saepe mugiles et congri adesa cauda ab ea vsque parte, qua exit excrementum. Abroditur autem cauda mugilis a lupo, congri a muraena. Bellum vero faciunt valentiores imbecillioribus: eos enim deuorant. Ac de maritimis haec.

#### C A P. IV. (vulgo III.)

Animantium vero mores differunt, quia sunt aut meticulosae, aut faciles, aut fortes, aut mites, aut cordatae, aut amentes. Nam et oues, vt fertur, ingenio sunt stolido atque amenti: ita vt omnium quadrupedum nequissimae sint. Adeunt enim solitudines nulla de caussa: hiemis quoque tempore exeunt e praesepibus. Deprehensae niuibus, nisi ab opilione moueantur, nolunt abire, sed relictae intereunt, nisi arietes a pastoribus adducantur. Tunc enim sequuntur. Caprae autem vnus si <sup>2</sup> summum aruncum, qui villi specie est, apprehen-

das, illico restitant aliae stupidae spectantes illam. Frigidioribus locis libentius cubant oues. Caprae autem plus ruminant, et facilius accedunt ad hominem: et aegrius ferunt frigus. Instituuntur ab opilionibus oues, vt strepitum cienti congregentur. Nam tonante coelo si qua praegnans seorsim deprehendatur, neque concurrat, abortum facit. Quae caussa est, vt etiam domi, strepitu exaudito, conueniant ex consuetudine. [*Etiam tauri, cum neglecto armento errabundi feruntur, a feris interficiuntur.*] Decumbunt tum oues tum caprae simul cunctae per sua genera quaeque. (per cognationem *Gaza*.) De vergente sole statim aiunt pastores auersas inter se capras, non aduersis oculis, cubare.

#### C A P. V. (vulgo IV.)

Boues et per societates et quae sibi inuicem assueuerunt simul pascuntur. Atque earum vna si aberrauerit, tum eam ceterae consequentur. Idcirco bubulci, vnam si amiserint, omnes praeterea continuo peruestigant. Etiam tauri, cum neglecto armento errabundi feruntur, a feris interficiuntur. Armentariae equae autem, si altera perierit, educant pullos inter se. Sane enim totum equinum genus videtur esse natura benignum erga sobolem. Cuius rei signum est, quod saepenumero steriles



subductos a matribus pullos ipsae curant et diligunt.  
Verum lactis inopia perdunt eos.

C A P. VI. (vulgo V.)

Inter feras quadrupedes cerua non pessime videtur vti prudentia: tum quod iuxta semitas parit, quo bestiae non adeunt hominum metu: tum quod, vbi pepererit, deuorat secundas primum: deinde accurrit ad seselim: qua depasta, sic pote ad sobolem rursum redit. Praeterea ad stabula hinnulos actos instituit assuescere, quo se a fuga recipiant. Est igitur locus saxum praeruptum, vnicum habens aditum: vbi etiam subsistere et repugnare tradunt. Item mas, cum euasit pinguis, obesissimus enim fit autumnno, nequaquam comparet; sed mutat locum: facilis enim ob adipem captu est. Abiiciunt etiam cornua locis et aditu et inuentu difficilibus. Vnde et prouerbium ortum est: vbi cerui cornua deponunt. Id ea causa faciunt, quod, quasi tela amiserint, cauent, ne videantur. Ferunt, sinistrum cornu a nemine vnquam visum: abscondere enim id tanquam medicamento insigne. Anniculis non oriuntur cornua, nisi tanquam signi gratia inchoatum quiddam, idque breue et hirsutum. In bimatu edunt cornua primum recta subularum facie. Vnde eos Latini subulones, Graeci *παρταλίας* vocant.

Tertio anno furcata fundunt. Quarto autem asperiora: quomodo ad sextum vsque annum semper superaddunt. Exinde semper similia enascuntur, adeo, vt per cornua nequeas aetatem dignoscere. Vetulos duobus potissimum indiciis deprehendunt: quidam enim dentibus omnino carent; quidam paucos habent: propugnacula etiam non amplius subnascuntur. Sunt propugnacula, quae Gracci vocant ἀμυντήρας, nutantes prorsum partes cornuum, quibus pugnant. Eas vetuli non habent;  
 3 sed in surrectum crescunt eorum cornua. Amittunt annis singulis cornua mense Aprili. (Thargelione.) Amissis latent interdiu, vti diximus. Abscondunt sese densis frutetis muscarum fastidio. Noctu similibus pascuntur locis, quoad cornua renascantur. Inchoantur primum quasi cute obducta, et fiunt hirsuta. Aucta ad solem exponunt, vt excoquantur atque exiccentur. Cum vero inter scabendum ad arbores non amplius dolitant, tunc relinquunt loca eiusmodi, quasi habeant, quo sese vindicent. Iam vero captus ceruus est achaines, gerens in cornibus enatam hederam multum viridem, quasi quae, cum tenella essent, innata fuerit tan-  
 4 quam in arbore viridi. Cerui a phalangio aut aliquo eiusmodi icti collectos caneros esitant. Id quod homini quoque prodesse videtur in potu



datum; sed sane insuaue est. Ceruae leuatae partu statim deuorant secundas: neque intercipi possunt. Nam antequam terram attingant, ipsae adipiscuntur. Putant autem in eis esse vim medicam. Capiunt venatores ceruos fistula et cantu, quo demulcentur. Duo ibi cum sint, alter palam voce aut fistula canit; alter a tergo icit, vbi iam tempus esse ab illo accepit signum. Surrectis auriculis cervus acute audit, neque falli potest: demissis occupatur.

C A P. VII. (vulgo VI.)

Vrsae in fuga catulos praeurgent, et susceptos ferunt. Cum eas assecutus venator est, in arbores conscendunt. E latibulo prodeunt arum, quemadmodum iam dictum est, vorant, et ligna quasi dentientes mandunt. [Cap. VIII. Scaligero.] Multas praeterea ceterarum quadrupedum sibi prudenter opem ferre constat. Nam in Creta aiunt capras sagitta ictas dictamnium quaerere. Videntur enim eius vi eiici, quae in corpus infixae sunt tela. Canes morbo quoque correpti vomitum cient, deuorata herba quadam. Panthera, deuorato veneno, quod idcirco vocant pardalianches, quaerit hominis stercus: iuuat enim. Interficit eadem herba (pharmacum idem) leones quoque. Idcirco venatores appendunt stercus in vase de arbore quapiam, ne

procul abscedat fera. Ibi igitur assultando spe capiundi perit. Aiunt etiam, pantherae notum esse, eius odore oblectari feras. Ergo abscondere sese, ac venari: accedere enim illas: hanc autem corripere etiam ceruos ad hunc modum. In Aegypto ichneumon, conspecta serpente aspidē, non prius invadit, quam convocatis auxiliariis aliis. Tum adversus ictus atque morsus se ipsos luto oblinunt: madefacti enim aqua prius, mox humi volutantur. Trochilus crocodilorum oscitantium in os inuolat, cuius dentes purgat. Igitur inde ipse cibum capit, illi voluptatem capiunt, neque nocent. Sed ubi exire vult, collum mouet, ne mordeat. Testudo cum viperam deuorauerit, mox esitat cunilam bubulam: atque hoc observatum est. Quidam igitur cum id conspexisset, saepe hoc eam facere, ut gustata cunila ad viperam remearet, extirpauit herbam. Quo facto testudo interiit. Mustela cum serpentibus pugnatura edit rutam: infestus enim eius odor serpentibus. Draco ubi fructuum esu grauatur, picridis succum haurit: hoc enim perspectum fuit. Canes lumbricis infestati tritici segetem depascuntur. Ciconiae atque aues ceterae, exceptis in pugna vulneribus, cunilam bubulam imponunt. [Cap. IX. Scaligero.] Multi etiam viderunt locustam corripere collo serpentes, quibuscum pu-



gnet. Prudenter quoque capere auiculas mustela existimatur: iugulat enim, sicut lupi oues. Pugnatur etiam cum serpentibus, maxime murium venatricibus, (myotheris,) propterea quod ipsa quoque eos venatur. Erinaceorum quoque sensus multis locis spectatus fuit. Prout enim aut Aquilo aut Auster flarit, qui in terra degunt, ostiola cauorum permutant: qui in aedibus aluntur, parietum obiectum mutant. Vnde Byzantii aiunt quendam, cum erinaceos hoc facere animaduertisset, atque praedixisset. Ictis autem est Melitaei catelli magnitudine; pilo autem et facie et candore ventris atque etiam morum maleficio mustelae similis. Valde vero cicuratur. Aluearia infestat, quippe melle oblectatur. Vescitur auibus, quemadmodum feles. Eius veretrum, sicuti diximus, osseum est. Cuius ramenta putant facere ad vrinae stillicidia.

#### C A P. VIII. (vulgo VII. Scaligero X.)

Omnino vero si quis animantium ceterorum victum contempletur, ea multis in rebus humanam vitam imitari, cogitationem vero exactiorem in minoribus quam in magnis videbit. Principio in auium genere tale est hirundinum ingenium ad nidum fingendum. Complicat enim lutum festucis eodem ordine, quo lutum palea ad parietes sub-

igitur. Si luto egeat, madefaciens se ipsam volutatur alis in puluere. Stragulum quoque conficit hominis more, primum subdens duriora, et quod suae respondeat magnitudini. Ac sane alendae prolis tam mas quam foemina studiosa est. Dant enim singulis per vices, observantes more quodam eum, qui prior ceperit, ne bis accipiat. Ac ster-  
cus primum ipsae eiiciunt: ubi autem pulli creuerint, auertentes extrorsum docent deiicere. [Ca-  
2 put XI. Scaligero.] Sunt etiam alia quaedam talia, quae in columbarum genere contemlemur. Neque enim volunt coniungere sese pluribus, neque consortem tori relinquunt, quam aut viduus aut vidua sit. Parturiente columba, vehemens maris cura est instigantis. Si enim in aditu nidi languidius ob dolorem partus cunctetur, vrget caedendo, atque intrare cogit. Pullis natis salsuginosam terram collectam (*vulgo erat* praemansam), eorum os aperiens, inspuit, sic praeparans ad cibum. Cum e  
3 nido prodituri sunt, omnes mas init. Sic igitur mutuo maxima ex parte inter se amore degunt. Verum enimvero etiam aliquae praeterquam a maritis subagitatae sunt. Est autem pugnax animal hoc, interturbantque sese mutuo. Quin etiam nidos alienos ingrediuntur: sed raro hoc. Nam etsi remotioribus locis minus, ad ipsum tamen nidum



vltimis conatibus dimicant. Proprium columbi vi-  
 detur esse et palumbis et turturis, in potu collum  
 non resupinare, nisi cum satis biberint. Turtur  
 quoque et palumba habet suum quaeque marem  
 eundem, neque alium admittit: incubantque tam  
 mas quam foemina. Quibus tamen signis differant,  
 non est facile dignoscere, nisi ex interioribus mem-  
 bris. Vicere palumbas diu, ad quinque et vi- 4  
 ginti vel triginta annos, observatum est: aliquas  
 etiam quadraginta. In senecta ungues augentur,  
 qui ab iis, qui eas alunt, reciduntur. Eis nihil  
 praeterea incommodi manifesti a senecta affertur.  
 Turtures quoque et columbae octo viuunt annos,  
 quae excoecatae sunt ab iis, qui in aucupii pella-  
 ciam eas alunt. Viuunt etiam perdices ad annos  
 quindecim. Nidulantur tam palumbae quam tur-  
 tures iisdem in locis semper. Longaeuiiores qui- 5  
 dem, vt summatim dicamus, sunt mares foeminis:  
 verum hoc in genere mares aiunt obire prius, sum-  
 to indicio ex iis, quae aluntur domi, quas diximus  
 pellaces. (illices.) De passeribus quoque aiunt qui-  
 dam, annum solum mares viuere. Coniecturam  
 inde faciunt, quod vere statim cum apparent, non  
 videntur habere maculam circa barbam (*in collo*)  
 nigram, quam procedente tempore postea habent.  
 Itaque priorum nullum extare. Diutius foeminas

viuere: quippe quae inter iuuenculos capiantur: dignoscunturque ex eo, quod labiorum margines habeant duriores. Degunt aestate turtures locis frigidis: hieme tepidis. Fringillae aestate calidis, hieme gelidis.

CAP. IX. (vulgo VIII. Scaligero XII.)

Grauiiores aues non faciunt nidum: neque enim prodest, cum minus volatiles sint: quales sunt coturnices, perdices, atque eiusmodi aliae. Sed ubi in loco puro et aprico aream sibi fecerint, (nusquam enim alibi pariunt) et consepito loco spina quapiam aut alia materia, quae sit aduersus accipitrem et aquilas pro munimento, ibi ponunt oua et fouent. Exclusos protinus educunt pullos: quippe volando cum nequeant illis purare victum. Requiescunt vero collectis sub se pullis tum coturnix  
 2 tum perdix, gallinarum more. Non eodem loco et pariunt et incubant: ne diutius in eodem morantibus ipsis locus ille a quopiam deprehendatur. Si venator in nidum inciderit, ante pedes venatoris perdix volutatur, quasi iam in eo sit, vt capiat. Et abstrahit ipsum capturientem [*ad se ipsam,*] vsque dum aufugerint pulli singuli. Tum illa auolans reuocat eos rursum. Parit igitur perdix oua non minus decem: saepe sexdecim. Quemadmo-



dum diximus, non fatua est sed vafra haec avis. Mares vere per paria coniugati cum foemina, quam sibi quisque compararit, segregantur a comitatu cantillantes et pugnantes. Propterea vero quod in venerem propensiores sunt perdices, ne foemina incubet, mares oua prouoluta conterunt, si repererint. Aduersus quam impressionem arte vtitur foemella: aufugit enim et parit. Saepe etiam numero vrgente partu, vbi sit locorum eiicit, si mas [non adsit *addit Scaliger*]. Atque vt omnia seruentur, non accedit ad ipsa. [ipsum *Scaliger*.] Etiam si ab homine conspecta sit, quemadmodum a pullis, ita ab ouis sese aufert, ante pedes sese ostentans, ab ouis eum vt abducatur. Post fugam 3 foeminis incubantibus mares vociferantur, et congregientes pugnant. Vocant eos tum coelibes. Victus in pugna victorem sequitur; a quo etiam solo initur. Quod si quis ab illo altero, aut quovis alio superetur, is clam subigitur a superatore. Fit hoc non semper, sed certo anni tempore. Idem euenit etiam coturnicibus: interdum etiam gallis. Nam in templis, vbi sine gallinis dicati degunt, vt quisque donatus fuerit, eum omnes sane subigunt. Cicures quoque perdices feros subigunt et pulsant et contumelia afficiunt. In venatorem quo- 4 que perdicem impetum facit agrestium dux, con-

tra cantans et quasi ad pugnam prouocans. Eo  
 vero capto viminea cauea, denuo alter contra pro-  
 cedit eodem modo. Si igitur mas sit, quo venan-  
 tur, hoc faciunt. Quod si foemina fuerit venatrix,  
 et cantet, cantuque responderit ei dux, cetera  
 turba conglobati pulsant illum, atque a foemina  
 fugatum persequuntur, propterea quod ad illam,  
 non ad se accedat. Ille vero hanc ob causam si-  
 lentio progreditur, ne quis exaudita voce prodeat  
 secum pugnaturus. Vsu periti ferunt, accedentem  
 marem interdum efficere, vt foemina sileat, ne  
 audientibus maribus cogatur cum ipsis dimicare.  
 Non solum autem cantat perdix, sed etiam emittit  
 tum eam vocem, quam Graeci vocant *τριγμὸν*,  
 5 stridorem Latini, tum alias. Saepe etiam foemina  
 incubans, vbi marem ad venatricem foeminam  
 accedere perceperit, surgit, et occurrens subsistit,  
 vt ineatur, abstrahatque illum a venatrice. Coeun-  
 di cupiditate eo dementiae veniunt et coturnices et  
 perdices, vt in venatores incidant, atque etiam  
 capitibus insidant.

#### C A P. X. (Scaligero XIII.)

In perdicum coitu [et venatione] haec ita usu  
 veniunt atque etiam in alia morum astutia. Ni-  
 dificant humi, quemadmodum dictum est, et co-



turnices et perdices, et aliae quaedam [minus addunt *Gaza et Guilelmus*] volaces. Atque ex huiusmodi nonnullae ne in arbore quidem sidunt, vt alauda, coturnix, scolopax, sed in terra. [Incipit vulgo Cap. IX.] At picus in terra non con- 2  
sedit. Tundit quercus vermiculorum et formicarum (culicum *Gazae et Scaligero*) gratia, vt exeant. Egressos excipit lingua, quam latam habet et grandem. Ingreditur super arboribus celeriter, quouis modo, etiam supinus, stellionum more. Ungues habet a natura datos aptiores, quam sunt graculis, (coliiis?) quibus tutius in arboribus inhaereat. Iis enim impactis ambulat. Est autem picorum genus vnum minus merula, cum maculis subrubris pusillis. Alterum maius merula. Tertium genus non multo minus gallina. Nidos facit in arboribus, quemadmodum diximus, tum ceteris tum etiam in oleis. Vescitur formicis et vermiculis. (cossis *Gaza et Scaligero*.) Aiunt vero, dum eos venatur, eo vsque excauare arbores, vt eas deiciat. Quin etiam cicur quidam amygdalum in ligni rimam ab se inditum, vt sic aptum ictum eius exciperet, tertia percussione pertudit, et edit nucleum.

## CAP. XI. (vulgo X. Scaligero XIV.)

Multis quoque modis euenire videtur, vt gruum prudentia agnoscatur. Transmigrant enim in longinqua loca, et in altum subuolant, vt quae procul sunt, despiciant. Vbi viderint nubes aut tempestates, deuolant et quiescunt. Item quod habent duces, et qui in postremo agmine signum dant, vt exaudiantur. Vbi demisere sese, partim sub ala capite condito dormiunt, vno in pede stantes per vices. At dux aperto capite prospicit: ac, si quid percipiat, clamore significat. Pelecanes, qui (plateae, quae) in fluuiis degunt, deuorant magnas conchas easque laeues. Quas cum receperint, eum in locum, cui ventriculus subest, euomunt, vt hiantibus illis exempta vescantur carne.

## CAP. XII. (vulgo XI. Scaligero XV.)

Agrestes aues domicilia fabricant tum ob vitae comoda, tum ad salutem liberorum suorum. Sunt nonnullae et foecundae et sobolis studiosae: aliae contra. Et quaedam ad victum parandum aptiores: quaedam minus. Habitant aliae circa conualles et cauernas ac saxa, vt is, qui charadrius dicitur: cui et color et vox minus bona est. Noctu apparet, interdiu fugit. In praeruptis quoque nidificat accipiter. Quanquam crudiuor est, ta-



men quas aues ceperit, earum cor non vorat. Id quod in coturnice et turdo obseruarunt, et in aliis alii. Non eodem quoque modo venantur semper: non enim aequè rapiunt aestate ac hieme. Vulturis nec pullum nec nidum a quoquam visum aiunt. Propterea Herodorus, Brysonis rhetoris pater, dicebat, ipsos a superiore quapiam terra alia aduentare: illo etiam vsus argumento, apparere exemplo multos: sed quibus e locis, constare nulli. Eius rei caussa est, quod parit locis inaccessis. Neque vero multarum regionum incola est auis haec. Vnum parit ouum, aut summum duo. Aliquae 3 etiam in montibus et siluis habitant, vt vpupa et brenthus. (*vulgo brinthus.*) Hic vero bene et victitat et cantillat. Trochilus fruteta aut foramina colit. Difficile capitur: fugax enim est. Quod ad mores spectat, imbecillus: parat sibi victum, non iners. Vocatur etiam et Senator et Rex: propter quam caussam aiunt ei infestam esse aquilam.

### C A P. XIII. (*vulgo XII. Scaligero XVI.*)

Sunt quae circa mare victitant; vt cinclus. Est is astutus, neque facilis captu. Verum captus maxime omnium cicuratur. Contigit ei a natura, vt esset minus integer: partes enim posteriores minus valentes habet. Vitunt circa mare et fluuios

- et lacus palmipedes omnes: eiusmodi namque natura amat victum parabilem. Multae etiam fissipedes circa aquas et paludes victitant, vt anthus circa fluuios. Is colore pulcher est, et victu facilis. Catarractes viuut circa mare. Cum autem sese in profundum demiserit, non minore manet tempore, quam quanto iugerum quis transiuerit.
- 2 Est autem minor accipitre auis. Olores etiam palmipedes sunt: et circa lacus atque paludes viuunt. Facili victu et moribus innoxiiis, et foecundi, et senecta prospera. Aquilam inuadentem repugnando vincunt: ipsi nunquam lacesunt. Cantores vero sunt: atque sub mortem potissimum canunt. Auolant enim etiam in altum mare: vbi iam praeternauigantes quidam Africam inuenerunt multos canentes voce lugubri: quorum etiam aliquot morientes tum videre. [Cap. XVII. Scaligero.] Cymindis raro apparet: montes enim habitat: colore atro, accipitris magnitudine cognomento palumbarii: facie procera et tenui. [colore aereo resplendens: vnde etiam chalcis appellatur.] Cymindin autem vocant Iones. Cuius etiam Homerus meminit in Iliade: *Chalcida quem superi vocitant, hominesque cymindin.* [Hybris autem: aiunt quidam hanc eandem esse auem cum ptynge.] Hic interdiu non apparet propter visus hebetu-
- 3



dinem. Noctu venatur, vt aquila: cum qua adeo vehementer pugnat, vt ambae viuae saepe a pastoribus capiantur. Oua bina parit: nidificat etiam is in saxis et speluncis. [Cap. XVIII. Scaligero.] Pugnare solent etiam grues inter se tam acriter, vt et ipsae dimicantes ambae a pastoribus capiantur viuae. [*Restitant enim.*] Pariunt [*etiam*] grues oua bina.

## CAP. XIV. (vulgo XIII. Scaligero XIX.)

Multas voces pica mutat: singulis namque propemodum diebus aliam edit. Parit oua nouem circiter. Nidum facit in arboribus ex pilis et lana: glandem, cum deficit, abditam condit. [Scaligero Cap. XX.] Multos auctores habet fama, quae de ciconiis circumfertur, parentibus a liberis educationis gratiam referri. Hoc idem etiam a merope factitari aiunt. A sobole vicissim nutriri, non solum senescentes, sed continuo, vbi id pulli efficere valeant: matrem patremque a nido non dimoueri. Quod ad formam auis attinet: pennae inferiores pallidae, (luteae,) superiores caeruleae, vt alcedoni: alarum extrema rubra. Versus autumnum parit sex aut septem in ripis praeruptis mollioribus, intra quas etiam quatuor cubita subit. Quae chlo-  
2  
ris dicitur, propterea quod inferiores plumas luteas habeat, est alaudae magnitudine. Parit oua qua-

terna quinaue. Ex symphyto nidum facit radicitus extracto, consternens pilo et lana. Hoc idem facit et merula et pica, atque ex his interna nidorum construunt. Artificiosus acanthyllidis quoque nidus est: intextus enim est perinde atque pila linea, (lini surculis *Scaliger*, lineis filis *Gaza*,) angusto aditu. Aiunt etiam cinnamomum auem esse ex locis illis, eamque alicunde ferre quod cinnamomum vocant: ex eo sibi nidum aedificare in alto, et arborum ramis impositum. Incolas apto ad sagittas plumbo deicere, atque ita ex congesto (*reliqua nidi materia*) seligere cinnamomum.

CAP. XV. (vulgo XIV. Scaligero XXI.)

Alcedo passere haud maior est: colorem habet caeruleum et luteum et subpurpureum mixtum. Tale corpus totum et alae, tum colli partes, non seorsum positis coloribus. Rostrum subluteum, longum, tenue. Talis eius species est: nidus autem fere similis marinis pilis, et quas halosachnas vocant, colore tantum distans: subrufus enim est. Figura repraesentat cucurbitas, quibus longum colum est, maximis spongiis maior: quanquam simul alii etiam minores. Omnes autem consepti et adstricti soliditate et raritate crebra constant. Ferri aciem non cito patitur, sed percussu et manuum vi celeri-

? cas



ter diffrangitur, sicut et halosachne. Ostiolum angustum habet, quantum satis sit ad ingressum pusillum; adeo, vbi subuertitur mare, vt ne tum quidem ingrediatur. Cauernas intus habet, vt spongiae. Dubitant de materia eius. Videtur vero ex aciculae (belonae) spinis confici. Piscibus enim victitat. Subit etiam fluuios. Parit potissimum oua quinque. Quamdiu viuit, foecunda est: incipit autem quarto aetatis mense.

CAP. XVI. (vulgo XV. Scaligero XXII.)

Epops (vpupa) nidum fere facit ex humano stercore. Mutat faciem aestate et hieme, sicut et aliarum agrestium auium plurimae. Aegithalus (parus *Gazae*) parit, vt aiunt, oua plurima. Aliqui etiam a melancorypho plurima edi autumant, praeter struthionem Afrum. Etenim ad septem et decem visa sunt. Sed enimuero etiam plura parit quam viginti: semperque imparia. Nidificat et hic in arboribus, et vermes depascitur. Proprium et huic et luscinae praeter alias aues, carere linguae mucrone. Aegithus victus facilitate et foecunditate praeditus est: sed pede altero claudicat. Chlorio (virido) docilis est et industrius ad victum, sed minus aptus ad volandum, et colore minus nitido. [Vulgo Cap. XVI.] Helea, si qua alia 2

auium, facile sibi victum quaerit. Aestate in  
 aura et opacis habitat; hieme in apricis. (*et a  
 vento tectis, in arundinibus circa paludes alii*  
 Codices.) Ab summis arundinibus paludes circum-  
 3 spectat. Corpore est paruo, voce bona. Et quae  
 gnaphalus vocatur, vocem habet commendabilem,  
 et colorem pulchrum: et ad victum apparatus, et  
 visu decorus. Peregrina auis haec: raro enim  
 4 mutat sedes proprias. [Vulgo Cap. XVII.] Crex,  
 quod ad mores spectat, pugnax est: quod ad in-  
 genium attinet, industrius ad victum: alioqui in-  
 felix auis. Quae sitta dicitur, et natura pugnax et  
 ingenio tractabilis et composita. Victu parabili  
 contenta. Aiunt in ea vim esse medicamenti, quia  
 multiscia sit. Foecunda quoque est, et sobole felici:  
 5 et viuit ligna tundens. Noctu pascitur aegolius,  
 interdiu raro visitur. Et saxa et speluncas habitat  
 hic quoque. Victus enim gemini est: viuendi in-  
 dustria insignis. Est auicula quaedam parua, quae  
 vocatur certhius. Audax haec est, et arbores ac-  
 colit, et cossis victitat. Ingenio parato ad victum et  
 voce clara praeditus. Acanthides male victitant,  
 malique sunt coloris, vocem tamen argutam habent.

CAP. XVII. (vulgo XVIII. Scaligero XXIII.)

Ardeolarum pella coit, vt diximus, difficul-



ter: ingeniosa vero, et escae gerula, (*pullis?*) et piscandi perita. Interdiu agit: colore deteriore est: at aluo semper vda. Reliquarum duarum, (nam tria genera sunt) alba colore pulchro est, et innoxiae veneris. Nidum struit et parit commode super arboribus. Pascitur in paludibus et lacubus et campis et pratis. At asterias, cognomento ocnus, (*ignauus*) dicitur in fabulis olim mutatus ex seruo esse. Est is, vt cognomen indicat, horum pigerrimus. [Cap. XXIV. Scaligero.] Ardeola- 2  
rum igitur vita talis est. At quae dicitur poyx, (*vulgo phoix*), proprium hoc habet cum ceteris comparata. Inter aues enim potissimum oculos appetit ad vorandum. Harpae hostis est: victus enim vtriusque similis.

## CAP. XVIII. (vulgo XIX. Scaligero XXV.)

Merularum genera duo: altera nigra, et vbique visitur: altera candida, (*vulgo exalbida*), magnitudo par, et vox similis. Haec in Arcadiae Cyllene est, alibi nusquam. Harum nigrae similis est laius, (*fuscus addunt Codd. aliqui*), sed paulo minor. Haec in saxis et tegulis diuersorium facit: neque rostro puniceo est, quale merulae. [Vulgo C. XX. Scaligero XXVI.] Turdorum species tres. 2  
Vna visciuorus (*ixoborus*) appellatur: neque enim

alia re alitur quam visco et resina. Magnitudine est par picae. Altera trichas (pilaris *Gazae*) dicitur, voce acuta, magnitudine merulae. Tertia, quam vocant illadem, (*vulgo* iliadem, *Gazae* iliacum,) minima omnium, ac minus varia. [Cap. <sup>3</sup> XXI. *vulgo*, XXVII. Scaligero.] Est et saxatilis auicula, cui nomen cyanus: (caeruleus:) ea in Scyro (Nisyro *alii Codices*) maxime est. Agitat inter saxa: merula minor, fringilla paulo maior: pedibus nigris. [*vulgo* praegrandibus.] Saxa scandit; tota caerulea: rostro firmo et longo: (*breui?*) cruribus breuibus, auiculae pipo similibus.

CAP. XIX. (*vulgo* XXII. Scaligero XXVIII.)

Chlorio (vireo) luteus (viridis luteo aspersus) totus, hieme non videtur: solstitio apparet potissimum: abit arcturi exortu: magnitudine turturis. Malacocraneus (molliceps *Gazae*) semper eadem vitur sede, atque ibi capitur. Facies eius talis est: caput praegrande et cartilagineum. Turdo paulo minor, ore robusto, paruo, rotundo. Colore totus cineritio: pedibus, non alis valet. Capitur <sup>2</sup> maxime noctua. [Vulgo Cap. XXIII.] Pardalus auicula gregalis est: neque enim fere segregata videtur: colore toto cinereo: magnitudine par illis:



tum pedibus tum alis praestans: multa voce, nec graui. (et graui *Codex Guilelmi*.) [Cap. XXX. Scaligero.] Collyrioni cibus idem qui et merulae: magnitudo eadem quae et supra dictis. Capitur hieme potissimum. Haec autem omnia non (*negationem omittunt alii Codd.*) omni tempore visuntur. (Capiuntur hieme potissimum haec omnia: neque enim omni tempore visuntur *Guilelmi Codex*.) Recensendae etiam quae in urbibus maxima ex parte viuere consueuerunt, coruus et cornix. Nam hae semper videntur: neque mutant loca, neque latent. [Vulgo Cap. XXIV. Scaligero XXXI.] <sup>3</sup>

Gracculorum (Monedularum *Gazae*) species tres. Vnus est coracias; (graculus *Gazae*;) qui est cornicis magnitudine, rostro puniceo. Alter qui lycius (*vulgo* lupus) dicitur. Tertius paruus, scurra. Quartum praeterea genus in Lycia et Phrygia, palmipes. [Vulgo Cap. XXV. Scaligero XXXII.] <sup>4</sup>

Alaudarum (corydalorum) genera duo: altera humi agitans et cristata: altera gregatilis, non autem dispersa, ut illa: colore tamen simili; sed minor, et sine crista, atque esculenta. [Vulgo Cap. XXVI. <sup>5</sup> Scaligero XXXIII.] Ascalopas (*Ascolopax Codices alii*) in hortis et capitur caueolis, gallinae magnitudine: rostro longo: colore attagenis. Currit perniciter, et admodum hominem amat. [Sca-

ligero Cap. XXXIV.] Sturnus est varius, magnitudine merulae. [Vulgo Cap. XXVII. Scaligero XXXV.] Ibes in Aegypto duum sunt generum: aliae candidae, aliae nigrae. Cetera in terra Aegypti albae sunt, in Pelusio non sunt. Contra in illa non sunt nigrae, in Pelusio sunt. [Vulgo 7 Cap. XXVIII. Scaligero XXXVI.] In genere scopum (asionum *Gazae et Scaligero*) qui dicuntur aeiscope, (semperasiones,) totum annum videntur. Vnde et nomen. Verum cum inutiles sint ad cibum, non esitantur. Aliqui autem aliquando autumnno existunt: neque plus vno aut altero die apparent, et sunt esculenti, atque vehementer commendantur. Atque ii a semperasionibus nulla alia paene re differunt quam pinguedine. Sed neque vocem edunt: illi autem sunt vocales. Quemadmodum vero generentur, nondum perspectum est; nisi quod fauonio spirante comparent. Hoc vero manifestum est.

#### CAP. XX. (vulgo XXIX. Scaligero XXXVII.)

Cuculus, vt alibi dictum est, nidum non aedificat, sed in alienis parit: praesertim in palumbarum, et hypolaidis, (currucae,) et alaudae humi. Super arboribus autem in chloridis nido. Parit igitur ouum vnum: verum non incubat ipse. Sed



ea auis, cuius in nidum deposuerit ouum, et excludit et alit: ac, quemadmodum aiunt, vbi cuculi pulli creuerint, eiicit suos, atque ita intereunt. Alii ita tradunt: interfici a matre, atque dein deuorari. Propterea enim, quod pulcher sit pulchus cuculi, suos non probare. Maximam igitur harum rerum partem perspectam ab sese multi autumant. Sed quemadmodum pulli auiculae intereant, non omnes conueniunt. Sed quidam aiunt, frequentantem nidum cuculum deuorare hospitis auiculae pullos. Alii dicunt, cuculi pullum magnitudine praestantem cibum allatum praeripere et deuorare: atque ita ceteros fame mori. Alii, perimere educationis participes, vt puta valentiores. Prudenter igitur sobolem procreare cuculus videtur. Conscius enim timiditatis suae atque imbelliae, eam ob causam quasi subdititios facit pullos suos, vt salui sint. Mirum enim in modum meticulosa haec auis est: vellicatur enim etiam a minutis auiculis, easque fugit.

C A P. XXI. (vulgo XXX. Scaligero  
CAP. XXXVIII.)

Apodes, quos aliqui cypsellos vocant, similes esse hirundini, iam dictum est. Neque enim

facile dignoscuntur ab ea, nisi quod crus hirtum habent. Hi nidificant in alueolis eluto structis oblongis, orificio, quantum satis ad ingressum, aperto, angusto. Nidum ponit sub saxis et rupibus, quo et a feris et ab hominibus tuto sese recipiat. [Cap. <sup>2</sup> XXXIX. Scaligero.] Qui dicitur aegothelas, (caprimulgus,) montana avis est, merula paulo maior, minor cuculo. Duo parit oua, aut ad summum tria. Moribus mollioribus. Aduolans capros mulget: vnde et nomen. Aiunt, vbi <sup>3</sup> mam suxerit, extingui et [capram] obcaecari. Interdiu hebetius videt: sed noctu cernit. [Vulgo Cap. XXXI. Scaligero XL.] Corui in regionibus parvis, atque vbi non satis cibi suppeditari possit, bini tantum esse solent. Et suos pullos, vbi volare possunt, primum exigunt: deinde etiam extra regionem fugant. Parit coruus et quaterna et quina. Quo tempore Medii hospites (milites peregrini) in Pharsalo interierunt, reliquere corui terram Atticam et Peloponnesum; quasi sensum haberent aliquem, quo inter se rerum euenta significarent.

C A P. XXII. (vulgo XXXII. Scaligero XLI.)

Aquilarum plura genera. Vnum, quem pygargum (quasi albicillam *Gaza*) vocant. Is campos



et lucos atque etiam circa oppida habitat. Quidam nebrophonon (hinnicidam, *Gaza hinnulariam*) eam vocant. Volat etiam in montana et saltus, sui confidens. Nam reliqua genera minus campos et lucos frequentant. Alterum genus planus dicitur, secundus a priore et robore et magnitudine. Saltus et conualles et lacus habitat. Cognominatur etiam anataria et morphnus. Cuius etiam meminit Homerus in exitu Priami. Alia est nigro colore, minima et nobilissima harum. Montes habitat et silvas, et dicitur melanaetos, quasi atraquila, et leporaria. Sola haec alit pullos suos et educat. Pernici impetu est, elegans, liberalis, intrepida, pugnax, auspicata: neque enim querula est, neque clangit. Est aliud genus percnopterus, capite candido, grandissima, alis breuissimis, cauda longiore, (clunibus longis *Scaliger*) vulturi similis. Vocatur oripelargus (*ciconia montana*) et gypaeus. (*vultur aquila.*) [*alii Codices hypaietos i. e. subaquila habent.*] Lucos habitat. Vitia aliarum ipsa quoque habet: boni autem nihil. Capitur enim et fugatur a coruis et aliis: quippe grauis et inepta ad parandum sibi victum: et cadauera gerens. Semper esurit vociferaturque querula. Praeterea genus aliud aquilae est, qui haliaeeti (aquilae marinae) vocantur. Cervix his magna et crassa: alae curvae,

cauda lata (clunes lati *Scaliger*). Accolunt mare et littora. Euenit interdum, vt captam praedam cum gestare non possunt, [in profundum delati mergantur. Ad haec genus est quod germanum appellant. Alia namque genera mixta et adulterata sunt inuicem: aquilarum, accipitrum et minutiorum. Maxima haec est aquilarum omnium: etiam ossifraga maior, ita vt sesquiaquila sit: colore ru-tilo. Raro apparet, sicut et quae cymindis dici-  
4 tur. Tempus agendi et volandi aquilae est a prandio ad vesperam. Mane enim sedet vsque dum forum frequens sit. Senescentibus aquilis rostri superior pars semper augetur incuruendo: itaque tandem fame moriuntur. Additur fabula: ei id sic euenire, propterea quod olim homo cum esset, iniuria affecit hospitem. Reponit aquila reliquias pastus pullorum in nido: propterea quod, cum non facile possint quotidie praedam consequi, interdum  
5 non habent quem aliunde afferant cibum. Pulsant alis, et vnguibus lacerant, si quem deprehendant circa nidum insidiantem. Nidificant non in planis locis, sed celsis: maxime in praeruptis saxis: quin etiam in arboribus. Alunt pullos quoad volare queant: tum e nidis ipsos eijciunt, tum etiam ex locis vicinis exigunt. Vnum enim aquilarum par magnam occupat regionem. Quare non permit-



tunt alios prope sese habitare. Venantur sane non 6  
 ex vicinis nido locis, sed e multum remotis. Prae-  
 dam sublatam non statim fert, sed deponit. Tum,  
 explorata praeda, inuentam grauiorem dimittit.  
 Lepores non statim corripit, sed permittens in  
 campo procurrere: neque statim in solum defertur,  
 sed semper paulatim orbe interiore. Horum vero  
 vtrumque facit, vt tutior ab insidiis sit. In sublimi  
 considet, propterea quod tarde a terra tollitur. In  
 altum volat, vt multum loci capiat oculis: atque  
 idcirco ab hominibus sola auium diuina appellatur.  
 Nullus autem vncunguium libenter super saxis con- 7  
 sistit, idcirco quia curuitati durities impedimento  
 est. Venatur hinnulos et lepores et vulpes et reli-  
 qua quae possit superare. Diu viuere aquilam con-  
 stat ex eo, quod idem nidus longo tempore (*alii*  
*Codices* semper) duret. [Vulgo Cap. XXXIII.  
 Scaligero XLII.] In Scythia genus auium est, otide 8  
 non minus: hoc duos pullos parit: ouis non in-  
 cubat: sed in pelle leporina aut vulpina impositos  
 relinquit. Quando non abest venandi causa, ob-  
 seruat in summa arbore; et si quis adscendat, pu-  
 gnat et verberat alis, vt aquilae.

C A P. XXIII. (vulgo C A P. XXXIV.

Scaligero XLIII.)

Noctuae (glaucēs) et nocticorui (nycticoraces)

atque eiusmodi, quae interdiu videre nequeunt, noctu venatu sibi victum comparant. Verum non totam noctem id faciunt; sed circa crepusculum et ante lucem. Venantur mures et lacertos et sphondylas, et eiusmodi animalia minuta. [Scaligero Cap. 2 XLIV.] Quam vocant phenam, (ossifragam,) et feliciter parit, et victus studiosa est. Fert enim pullos escam. Pietate quoque praedita est: nam tum suos pullos educat, tum etiam aquilae. Hos enim illa cum abdicat, excipit atque alit. Exigit enim praemature suos aquila, etiam indigentes victus, neque dum valentes volare. Videtur autem ob livorem aquila id facere. Suapte enim natura est et inuida et perfamelica, (nec adeo *addunt Codices*) prompta et felix in capienda praeda. Magnam enim refert, quando potita est. Invidet igitur pullis nitidioribus, cum bene affecti sunt ad vescendum et lacerandum vnguibus. [*Vulgo est et lacerat (vexat Scaliger)* vnguibus.] Pugnant etiam pulli inter se de loco et de cibo. At illa eiicit eos atque verberat. Eiectos illos atque vociferantes suscipit ossifraga. Est haec oculis ob albuginem vitiosis: neque integre videt. [Cap. XLV. Scaligero.] At haliaetus visu est acutissimo: pullos etiamnum implumes aduersus solem intueri iubet. Detrectantem caedit et conuertit. Vtrius oculi prius lacrymarint,



eum interficit, alterum educat. Accolit mare, vivitque venando aues marinas, quemadmodum dictum est. Singulas in venatu capit, observans emergentem e mari: ea conspecta cum emergit prae metu rursus mergitur: vt iterum alibi exeat. Ille autem aciei oculorum beneficio fretus semper volat, vsque dum illa aut suffocetur, aut sublimem ceperit. Greges vero non inuadit: alarum enim aspersu arcent. [Vulgo XXXV. Scaligero XLVI.] Fulicae 4 (cepphi) capiuntur spuma: deglutiunt enim eam. Ideo aspersu eius venantur. Cetera eius caro iucunde sapore est: clunes autem solae coenum arenae olent. Pinguescunt admodum.

C A P. XXIV. (vulgo XXXVI. Scaligero  
C A P. XLVII.)

Accipitrum valentissimus buteo. (triorches.) Secundo loco aesalo. Tertius circus. Asterias autem et palumbarius et pternis diuersi. Latis alis accipitres subbuteones appellantur. Alii autem perci et spiziae. (fringillarii *Gazae*.) At laeues (*palustres*?) et rubetarii facili victu contenti sunt, et humili volatu. Accipitrum aliqui genera non pau- 2 ciora putant, quam quae diximus decem. Differunt autem inter se, propterea quod humi sedentem columbam petunt et corripunt: volantem non

attingunt. Alii in arbore aut alibi considentem eam  
 nacti venantur: humi autem aut sublimem non  
 tangunt. Alii neque humi neque alibi considen-  
 3 tem, sed volantem appetunt capere. Aiunt vero  
 etiam columbis vnumquodque horum generum  
 notum esse. Itaque si quis aduolet eorum, qui sub-  
 limes praedantur, manere eas vbi fuerint. Sin ad-  
 volans ex iis sit, qui ab humo petunt, non manere,  
 4 sed auolare. In Thraciae vrbe quae Cedropolis  
 olim vocabatur, communi venatione cum accipi-  
 tribus venantur homines auiculas in palude. Per-  
 ticiis enim mouent arundines et siluam illi, vt vo-  
 lent auiculae. At accipitres desuper apparentes  
 insectantur. Eae exterrefactae deorsum volant  
 iterum ad terram. Quas baculis homines caedunt  
 ac capiunt, atque illos praeda impertiunt. Proii-  
 5 ciunt enim ex aibus, atque illi capiunt. At circa  
 Maeotidem paludem lupos aiunt id agere ex con-  
 suetudine, vt si piscatores non impertiantur ex  
 piscibus, dilacerent eorum retia, cum in terra sic-  
 cantur. Auium igitur natura sic se habet.

C A P. XXV. (vulgo XXXVII. Scaligero  
 C A P. XLVIII.)

Etiam in marinis animantibus licet multa ob-  
 seruare, quae earum vitam non inertem prodant.



Nam quae tum de rana piscatrice tum de torpedine praedicantur, vera sunt. Quippe rana iis appendicibus, quae gemina pilorum modo prae oculis propendent, earum cacumen, quod globulosum est, cum sabulo aut limo, quem excitauit, se ipsam abscondit, quasi escae gratia attollit; appetentibus pisciculis contrahit, vsque dum ad os adduxerit. Torpedo autem quorum piscium compos 2 futura est, eos virtute ea, quam suo in corpore habet, torpere facit, illisque captis alitur. Abdit vero sese in arenam et lutum, et capit supernatantes pisces, quos eo allatos torpescere fecerit. Cuius rei spectatores aliqui fuere. Condit etiam pastinaca sese, sed non similiter. Quod autem sic viuant, argumentum illud est. Capiuntur enim saepe cum mugile in ventre, velocissimo piscium, tardissimae ipsae. Ranae vero, quae non amplius globulos pilorum illos habuerint, capiuntur macilentiores. Quin etiam torpedo manifesto homines torpescere facit. Occultant sese arena etiam asellus et raia 3 (batos) et passer et squatina. Atque vbi sese condidere, tum surrigunt in virgulae modum ea quae in ore habent, atque vocant piscatores radiolos. Eo accedunt minuti pisciculi, (tanquam ad algulas, quibus vesci consueuere. [Cap. XLIX. Scaligero.] Vbi anthias conspectus fuerit, non inuenitur bellua.

Quo vtentes indicio vrinant spongiatores, et hos pisces sacros vocant. Videtur casu hoc fieri: quemadmodum, vbi cochlea sit, suem non esse neque perdicem: edunt enim omnes cochleas. [Cap. L. <sup>4</sup> Scaligero.] Marinus serpens colore et corpore similis congro est, sed obscurior et acrior. Is si captus dimittatur, subit celerrime arenam, rostro sibi cauum cauiens. Habet autem os acutius quam serpentes. [Cap. LI. Scaligero.] Quam vocant scolopendram, vbi hamum deglutiuerit, inuertit intestina extrorsum, quoad hamum eiiciat: deinde rursum introrsum vertit. Appellunt sese scolopendrae ad nidorem, sicut et terrestres. Ore non mordent, sed vniuersi corporis superficie, sicut <sup>5</sup> vrticae. [Cap. LII. Scaligero.] Inter pisces eae quae vulpes nominantur, vbi sensere ab sese hamum devoratum, opem ferunt, sicut et scolopendra. Procurrentes enim prorsum ad lineam, abrodunt. Capiuntur enim multiplici hamo quibusdam locis in aqua fluctuosa et profunda. [Cap. LIII. Scaligero.] Conspecta bellua conglobant sese amiae: atque earum maximae quaeque circumnatant: tum si quam attigerit, defendunt. Habent autem dentes robustos. Iam vero cum aliae belluae tum lamia aggressa vulnera accepisse visa est. [Cap. LIV. <sup>6</sup> Scaligero.] Inter fluuiatiles glanis mas prolis curam



gerit multam. Foemina enim cum pepererit, abit: at mas, vbi editorum ouorum maxima constiterit pars, ea seruat adstans: nihil praeterea afferens commodi, nisi quod arcet pisciculos alios, ne diripiant foetus. Atque hoc agit diebus XL aut etiam L, donec foetus adulti possint euadere ab aliis piscibus. Agnoscitur a piscatoribus, vbi excubet pro ouis: abigens enim pisciculos huc illuc salit, et sonitum quendam facit et murmur. Adeo vero ouis assidet, vt, tametsi piscatores oua, si radicibus profundis adhaeserint, deducunt quam maxime possunt in vadum, nequaquam tamen ille relinquat foetum. Ceterum etiamsi fuerit e iunioribus, celeriter hamo capitur, propterea quod corripit accedentes pisciculos. At si hamis assueuerit deuorandis, ne sic quidem relinquit; sed dentibus, quos habet durissimos, mordens rumpit hamos. [Cap. LV. Scaligero.] Omnia vero tum 7 natantia tum immobilia iis pascuntur locis, in quibus generantur, aut illis similibus: suus enim cibus cuiusque in his est. Vagantur plurimum carniuora. Omnia vero paene carniuora sunt, praeter pauca: cuiusmodi est mugil, salpa, mullus, chalcis. Quae vero pholis appellatur, mucorem quendam emittit: atque is in circuitu eius concrecit, ac fit quasi cubile. [Cap.

LVI. Scaligero.] Testaceorum in genere et pede carentium pecten maxime et plurimum mouetur, per se ipsum volans. Nam purpura atque ei similia  
8 parum valde progrediuntur. [Cap. LVII. Scaligero.] Ex Euripo Pyrrhaeorum hieme propter frigus exeunt pisces, praeter gobionem. Gelidus enim Euripus est. Simul cum vere reuertuntur. Non sunt in Euripo scarus, thrissa, aliaque aristis praedita, neque musteli, (galei,) neque acanthiae, neque locustae, neque polypi, neque bolitaenae, neque alia quaedam. Atque ex iis, quos Euripus fert, gobius candidus in alto mari non inuenitur. [Cap. LVIII. Scaligero.] Vigent pisces ouigeri vere, usque dum pepererint. Qui animal pariunt, autumno: et praeter hos etiam mugiles et mulli et alia eiusmodi omnia. Circa Lesbum tum qui in alto tum qui in Euripo degunt, in Euripo pariunt: coeunt autumno, pariunt vere. Cartilaginea quoque autumno. Permisti sunt mares et foemellae coitus tempore. At vere ingrediuntur seiuncta, donec pepererint. At coitus tempore capiuntur  
9 multa coniugata. [Cap. LIX. Scaligero.] Molluscorum autem astutissima sepia est: solaque vitur atramento non modo ob metum, verum etiam ad latitandum. Polypus autem et loligo ob pauorem emittunt illud. Verum haec omnia nunquam emit-



tunt vniuersum: quin etiam amissum de integro augetur. At sepia, quemadmodum dictum est, et atramento saepe vtitur pro latibulo, et cum prorsum ire simulauerit, reuertitur in suum atramentum. Venatur etiam longis tendiculis non solum pisciculos minutos, verum etiam saepe mugiles. Polypus autem stultus est: accedit enim ad hominis manum demissam. Prudens tamen rei familiaris est. Omnia enim congerit in cubile, quod inhabitat. Vbi vero quae vsui maxime sint absumpserit, eiicit testas et putamina cancerorum et concharum et piscium spinas. Venatur pisces colorem mutans, efficiensque, vt quibus haeserit lapidibus, similis sit. Hoc idem etiam in metu fauit. Fertur <sup>10</sup> a quibusdam, hoc idem facere sepiam: suum enim colorem aiunt assimilare loco, in quo versatur. Ex piscibus sola squatina hoc potest: mutat enim colorem, sicut polypus. Paucissima genera polyporum biennium viuunt. Natura enim facile contabescit. Argumento est: pressus enim aliquid semper emittit, ac tandem euanescit. Patiuntur hoc foeminae post partum magis, ac stupidae fiunt, neque fluctibus agitatae sentiunt. Facile quoque ab vrinantibus manu capiuntur. Mucosae quoque euadunt, neque ad venandum consistere queunt. Mares autem coriacci fiunt et lenti. (lubrici *Sca-*

11 *ligero*.) Quod autem bimatum non expleant, inde capiunt argumentum. Nam postquam polypuli orti sunt, tum in aestate tum sub autumnum haud facile inuenias polypum grandem. At paulo ante id tempus maximi sunt polypi. Vbi igitur oua ediderint, sic canescere atque debilitari vtrumque autumant, vt etiam a pisciculis exedantur; perfacile quoque abstrahi a cubilibus possint. Ante id tempus nihil tale. Ad haec paruulos et iuuenculos polypos, postquam orti sunt, nihil tale pati, sed validiores natu grandibus. Ac ne sepiae quidem biennium viuunt. In siccum solus e molluscorum genere exit polypus. Incedit per aspera, laeuia vitat. Cetero corpore validum animal est: at collo imbecillo, si prematur. Molluscorum igitur res

12 sic se habet. [Cap. LX. Scaligero.] \* \* \* \* Produnt quidam conchas tenues et asperas sibi ipsis obducere quasi lorica duram, eamque, cum ipsae crescunt, ampliorem: ex qua exeant quasi ex latibulo quodam aut domicilio. [Cap. LXI. Scaligero.] Est etiam polypus nautilus tum natura tum actionibus suis singularis. Ex imo enim fundo efferens sese summum mare nauigat. Exit autem inuersa testa, vt facilius emergat et inani nauiget: quam, vbi in summo aequore est, conuertit. Habet inter brachia [duo] quiddam contextum, simile mem-



branae inter palmipedum digitos: nisi quod illis crassum, huic tenue et araneosum. Vtitur eo, flante aura, pro velo. Pro gubernaculo brachia [duo] demittit iuxta. Pauefactus mergitur, mari implens testam. Quemadmodum vero et ipse generetur et an concha cum eo nascatur et crescat, nondum exacte compertum est. Videtur autem non ex coitu generari, sed oriri, quemadmodum conchae aliae. Neque id constat, an exutus concha possit viuere.

C A P. XXVI. ( vulgo XXXVIII.  
Scaligero LXII.)

Insectorum operosissimum fere, quodque cum aliis omnibus comparari mereatur, tum formicarum tum apum genus: atque etiam crabrones et vespae et omnia denique quae cognata sunt. Quin ex araneis et elegantissimi et agilissimi (strigosiores *Gazae*), etiam ingeniosiores in vitae functionibus. Formicarum igitur opera omnibus manifestò extant, quomodo eandem viam omnes ineunt, et promunt et condunt cibos. Operantur enim etiam noctu pleniluniis. [Cap. vulgo XXXIX. Scaligero LXIII.] 2  
Araneorum autem et phalangiorum multa genera sunt. Mordacium phalangiorum duo. Vnum simile illis, quos lupos vocant: paruum, varium,

mobile, (viuidum, *Plinio* acuminatum,) saltax:  
et appellatur pulex. Alterum maius, colore nigro,  
anterioribus cruribus longis, motu pigrum, lente  
ingrediens, imbecillum, neque habile ad salien-  
dum. Cetera vero, quae exposita habent medica-  
mentarii, aut nullum aut debilem morsum affe-  
3 runt. Aliud est genus, quem lupum nominant.  
In quo is, qui minor est, telam non textit. Qui  
maior, crassam et improbam humi et ad sepes.  
Rimis semper obtexit telam, atque ponit intus or-  
ditus. Vbi moratur, dum aliquid incidens moueat:  
atque inde accedit. Aliud autem genus varium sub  
4 arboribus textit telam paruam et prauam. Tertium  
praeterea genus est horum sapientissimum et poli-  
tissimum. Principio namque textit extendens ad  
cornua vndecunque: deinde stamen inducit a me-  
dio; quod medium quantum satis sit, capit. Tum  
super haec tramam imponit: postremo contextit.  
Ac cubile quidem suum praedaeque repositorium  
alibi constituit: in medio vero obseruat praedam.  
Vnde si cuiuspiam rei casu medium moueatur, pri-  
mum circumligat, circumque inuoluit tela, vsque  
dum sui impotem fecerit. Posthaec sublatum ex-  
tulit. Quod si fames vrgeat, exugit. Is enim ei  
modus capiendi cibum est. Si non esurit, rursus,  
sarcito prius scisso opere, ad venationem reuertitur.



Quod si quid interea inciderit, primum it in me- 5  
 dium, atque ex eo loco, sicut antea fecerat, redit  
 ad id, quod incidit. Quod si quis lacerarit rete,  
 de integro incipit texere occidente sole aut oriente,  
 propterea quod per haec tempora incidere potissi-  
 mum soleant bestiolae. Operatur foemina ac ve-  
 natur: mas autem quoque fruitur partis. Araneo- 6  
 rum elegantiorum, qui telam spissiore texunt,  
 duo sunt genera: alterum maius, alterum minus.  
 Longioribus cruribus praeditus imo ex loco pen-  
 dulus observat, ne perterritae bestiolae metuant,  
 sed superne irretiantur. Quippe cum sit grandior,  
 minus commode latere potest. At ille alter medio-  
 rior in superiore excubat loco, abdens sese in exi-  
 guo telae foramine. Possunt aranei statim nati 7  
 emittere telam. Neque enim egreditur quasi ex-  
 crementum, ut ait Democritus, sed de ipso cor-  
 pore, quemadmodum cortex, et sicut quae iacu-  
 lantur pilos: quales sunt hystrices. Adoritur et-  
 iam et obducit maiora animalia. Nam minores  
 quoque lacertulas inuadit: et circum lacertulam  
 emissa fila iniicit, donec buccas comprehenderit.  
 Tum vero accedens mordet. Hactenus de his ani-  
 malibus.

C A P. XXVII. (vulgo C A P. XL. Scaligero  
CAP. LXIV.)

Insectorum vero genus est quoddam, quod nomine caret, quo vno comprehendatur. Verum omnes species continent formam congenerem. Eae sunt quaecunque fauificant: quales apes sunt et quae simili facie. Horum genera sunt nouem. Quorum sex gregalia: apes, apum reges, fucus, apiaster, vespa annua, crabro et tenthredo. Tria solitaria: siren paruus, fuscus; alter siren maior, niger et varius. Tertius, omnium horum maximus, bombylius qui nominatur. Ergo formicae nihil venantur, sed facta ab aliis colligunt. Ara-  
nei nihil faciunt ipsi, neque horreum habent: tan-  
2 tum venantur, quo victitent. Quod autem ad genera, quae descripsimus, pertinet, postea dicetur. At apes nihil venantur: et ipsae faciunt et reponunt: aluntur enim melle; quod manifesto apparet. Nam cum castrare alueos parant mellifices, suffitu fumi vehementer vexatae, tum vero maxime vorant mel: alio tempore non item perspectum est, sed par-  
cunt et reponunt cibi gratia. Est et alius illis ci-  
bus, quem cerinthum aliqui vocant. Est hoc de-  
terius, dulcedinem tamen fici habens. Gerunt hoc cruribus, quemadmodum et ceram. Magna earum in opere et viuendi ratione industria atque



ars conspicitur. Si purum aluearium ipsis exhibeatur, quibus fauos aedificent, afferunt lacrymas, tum ab aliis floribus, tum ab arboribus, salice atque vltimo ceterisque glutinosis. Hoc etiam solum oblinunt aliarum gratia bestiolarum. Hoc vocant apiarii commosin. (guminationem.) Oras quoque adituum stipant atque angustant addita materia, si latiores sint. Fingunt autem fauos primum, in quibus ipsae oriri consueuere, deinde in quibus ii qui vocantur reges, et fucarios. Ac suos quidem semper aedificant: regios autem, cum largior foetura futura est. Fucarios vero, cum mellis abundantia significatur. Fingunt regales fauos iuxta suos: hi vero sunt parui: prope regios fucarios, (*fucarios seorsum?*) minores quam sint apiarii. Ordiuntur ab aluei tecto telas suas, quas ad ima vsque contexunt, et multas pauimento tenus deducunt. Cellulae tam mellis quam foetuum gemino constant ostio. Vnam enim basin vtrinque circumstant singulae, sicut in geminis calicibus, altera intus, altera foris. Fauis, qui per exordia contexuntur ad aluearia, eorum ordines duo aut tres in orbem breues sunt et melle vacui. Fauis ii sunt pleniores, qui plurima cera constructi sunt. Aluearii ostium ad primum aditum oblinitur melle. Id nigrum est, quasi repurgamentum cerae: odore

acri. Remedio adhibetur percussionibus et eiusmodi suppurationibus. Continuum huic linimentum pissoceros (ceropiceum) est; minus odoratum, minusque efficax medicamentum quam mity. Aiunt quidam, fucos et per se ipsos fauos condere in eodem alueo, et in eodem fauo (struendo) operam cum apibus partiri: verum non mellificare, sed apum opere alitum ipsos tum eorum sobolem. Manent magna temporis parte intus fuci. Vbi vero euolarint, efferunt sese fusim coelum versus, versantes sese in orbem, ac quasi exercitantes. Cum id fecerint, rursus ingredienti es epulantur. Reges non exeunt nisi toto cum populo, neque in pastum, neque alia de causa. Ferunt etiam, si ab rege aberrauerint, vestigantes recurrere, usque dum odoratu ducem inuenerint. Dicitur etiam gestari ab agmine, cum volare nequit. Eo mortuo abire agmen: aut si aliquantis per manserit, et fauos fecerint, in ipsis mel non facere, easque breui disperdi. Ceram excipiunt apes prioribus pedibus, germina (flores *Gaza*) celeriter perreptantes, eosque abstergunt mediis, a quibus excutunt in curvaturas (*laminas*) postremorum. Atque ad hunc modum oneratae auolant, atque eo onere manifesto grauari videntur. Eodem volatu non petit apis diuersas florum species; sed verbi gratia a vio-



la ad violam: neque sane attingit aliud, donec in alueum reuertatur. Eo cum sunt ingressae, excutiunt et deponunt onus. Semper etiam singulis ternae quaternaeque administrant. Quid accipiant, non facile videre est: neque visum, quo operentur modo. Ceram tamen sumere obseruatum est ab oliuis ob frondium densitatem, eodem in loco diu immorantibus. Post haec foetus edunt. 8

Nec quicquam impedimento est, quin eodem in fauo et apiculae et mel et fuci sint. Viuente igitur rege seorsum aiunt fucos nasci. Eo mortuo in apum cellis ab illis generari; esseque hos iracundiores. Idcirco vocari aculeatos: non quod habeant aculeum, sed quod velint, licet nequeant, pungere. Sunt autem cellae fucorum capaciores. Fingunt autem interdum suos sibi fauos fucis; sed frequentius cum fauis apiariis coniungunt. Quapropter abscindunt. Sunt apum genera plura, 9 sicut dictum est. Ac duo quidem regum. Alter rufus, qui praestantior: alter niger ac varius magis, maior altero tanto ape frugi. Est autem optima parua, rotunda, varia. Altera longa, similis crabroni. Diuersum hic genus, qui fur dicitur, niger, ventre lato: et praeterea fucus: is omnium maximus, sine aculeo et segnis. Natalibus quoque apes differunt, prout ortae sunt a parentibus

villaticarum pastionum, aut ab iis, quae saltus colunt. Sunt enim soboles siluicolarum pilosae magis, minores, magis opifices, acerbiores. Apes frugi faciunt fauos aequales, et quod obducunt integumentum totum laeue. Praeterea fauum vnus generis, veluti totum melle aut prole aut fucis repletum. Quod si contingat eodem in fauo vt omnia haec insint, vnum deinceps genus operis et scor-  
10 sum erit. Longae autem fauos inaequales faciunt et tuberosum operimentum, quale etiam crabrones. Praeterea neque sobolem neque alia ordine disponunt, sed temere deponunt. Itaque etiam ex his oriuntur duces deteriores et fucorum frequentia, et quos fures diximus: mel autem paucum aut nullum. Insident fauis apes et concoquunt. Id si non fecerint, corrumpi aiunt fauos et araneari. Quod si postea reliquum temporis possint insidendo sese continere: id quasi cibarium fit: sin minus, toti pereunt. Tum innascuntur vitiatis vermiculi; quibus agnascentibus alis volucres fiunt. Collabentes etiam fauos erigunt apes, fulturasque substituunt, vt subire queant. Nam si non extet via, qua accedant, non assident, atque illi araneantur.  
11 Furis et fuci nati nullum opus est, sed alienis nocumentum afferunt. Itaque capti occiduntur ab apibus frugi. Hae vero frequenter interficiunt du-



ces, cum sunt multi: potius etiam malos: ne eorum multitudine distrahatur gens. Potissimum vero cum sobolis infrequentia est, neque coloniae mittendae sunt. Per ea enim tempora demoliuntur sedes quoque regias, si sint apparatus, utpote cum sint ipsi auctores emigrandi. Diripiunt etiam fucorum fauos, si penuria mellis futura est neque mel-  
 latione vberē aluearia suppetant. Atque mel si eximatur, pro melle tunc pugnant maxime. Et eos, qui pridem inerant, fucos eiiciunt. Ac saepe numero conspiciuntur dissidentes in alueari. Asperrimas pugnas conserunt paruae cum longis, 12  
 conanturque eiicere ex alueariis. Quod si vincant, putant examen illud praestantia excellere. Quod si fiat, ut alterum genus illud per se solum sit, segnes sunt, nihilque boni faciunt. Quin ipsae ante autumnum moriuntur. Bonae apes cum quam-  
 piam interfecerint, dant operam, ut extra alueum id agant. Quod si qua intus moriatur, efferunt nihilo secius. Qui fures vocantur et domesticis fauis nocent, et subeunt, si clam possint, etiam alienos: ubi deprehensi interficiuntur. Sed difficile est latere. In omni enim aditu excubiae agitantur. Quod si tamen furtim ingressus sit, melle supra modum expletus volare nequit, sed ante alveum volutatur. Quare non sine magno negotio

13 euadere potest. Reges non visuntur extra nisi cum exercitu: quo tempore migrant. Ac tunc reliquae apes conglomeratae eum stipant. Emigraturis vox singularis ac certa aliquot ad dies oritur: atque biduum aut triduum ante paucae alueum circumuolitant. An vero inter eas rex sit, nondum ob difficultatem id est perspectum. Cum autem congregatae sunt, euolant ita, ut aliae cum sua quaeque duce separentur. Quod si paucae prope frequentes consederint, emigrant ad multas paucae, ac regem, quem deseruere, si consequatur, interimunt. Sic igitur et relinquunt aluearia et  
 14 abeunt. Operi vero aliae alii praefectae sunt. Nam aliae flores ferunt, aliae aquam; aliae laeuigant ac dirigunt fauos. Aquari autem solent, cum alunt soboles. Carnibus nullius animalis insidunt, neque obsonium appetunt. Non consueuere stato tempore opus incipere. Sed si non desint necessaria et bene valeant, potius vere aggrediuntur opus: quod sane tepido tempore intermittere non solent. Quin etiam iuuencula apicula tertio statim quam prodierit die operatur, modo cibum habeat. Consistente etiam examine, quaedam in pastum diuertuntur; atque inde rursum remeant. Si examen bene valet, apum proles non deficit (labor non cessat?) nisi circiter quadraginta diebus tantum,



quae brumam sequuntur. Adolescentibus pullis, cibo apposito oblinunt cellas: qui cum vires adepti fuerint, ipsi operculum scindunt et exeunt. Quae bestiolae intus nocent, fauis bonae apes ex-<sup>15</sup> pellunt. Aliae autem nequiter negligunt opus, quod perit. Apiarii cum mel eximunt, relinquunt eis cibum in hiemem. Qui si satis sit, servatur examen: sin minus, aut aspera hieme imminente, ibi moriuntur, aut tepidis diebus deserunt alueos. Melle vescuntur tum aestate tum hieme. Verum alio quoque vtuntur cibo, quem reponunt, duritia cerae, quam nominant quidam sandaracam. Nocent eis maxime vespac et auicu-<sup>16</sup> lae, quas vocant aegithalos: (paros *Gaza*:) item hirundo et merops: etiam lacunales ranae obuias ipsam ad aquam venantur. Ranas igitur apiarii piscantur e stagnis, vnde aquantur apes. Et vespas atque hirundines alueis propinquas et meropum nidos tollunt. Nullum animal fugiunt, nisi sui ipsarum generis. Pugna enim est tum inter ipsas tum aduersus vespas. Atque foris neque inter se iniuria afficiuntur neque aliis inferunt: sed quae prope aluearia inuenerint, si queant, interficiunt. Illae<sup>17</sup> vero percutientes intereunt, propterea quod nequeunt aculeum saluo intestino recipere. At servatur saepe, si is qui ictus est, curet vt aculeum

exprimat. Nam amisso aculeo perit apis. Inter-  
eunt percussa etiam grandiora animalia: quemad-  
modum olim equus. Minime vero molesti sunt  
18 reges, neque percutiunt. Apum cadauera efferunt.  
Nam quod etiam ad alia spectat, mundissimum  
animal est. Quare cum earum excrementum male  
oleat, auolantes reddunt. Odere autem tum ma-  
los odores, tum etiam vnguenta ipsa. Itaque ipsis  
delibutos pungunt. Dispereunt et aliis euentis et  
regum frequentia, quorum alius aliam sibi partem  
abducit. Interimit etiam rubeta (phrynos) apes.  
Accedens enim ad aditus sufflat, obseruansque  
euolantes deuorat. Atque illi ab apibus nihil no-  
19 ceri potest: sed ab apiario interficitur. Quos fa-  
vos diximus inaequales fieri ab apibus improbis,  
hos aiunt nonnulli mellifices opus esse iuniorum.  
Esse enim etiamnum imperitas. Eiusmodi vero  
esse anniculas. Haud aequae pungunt iuuenulae.  
Idcirco gestantur emissa examina: quippe quae  
ex iuuenculis sunt. Cum mel defit, fucos eiiciunt:  
tuncque apponuntur eis ficus et alia dulcia. Apes  
maiores natu intus opus faciunt: suntque hirtiores  
ea de caussa, quia non exeunt. Iuniores, quae  
opus sunt, important, suntque glabriores: et fucos  
occidunt, cum locus angustior est operantibus:  
agitant enim in aluei recessu. Cum alueus quidam



morbo laboraret, inuaserunt ipsum peregrinae apes quaedam: quae conserta pugna cum vicissent, egerebant mel. Verum eas apiarius cum necaret, illae aliae egressae vlciscebantur, nec hominem percutiebant. Aluearia sana potissimum incidunt <sup>20</sup> in aegritudines tam alias quam in clerum. Oriuntur enim in pauimento vermiculi, quibus crescentibus tanquam araneis obducitur alueus totus fauique putrescunt. Est et alia aegritudo, quasi veternus apum et foetor aluearis. Pastus apum thymus. Praestantius album rubente. Locus in aestu minus quam tepidus: in hieme tepidus. Maxime aegrotant, cum de rubiginosa materia opus faciunt. Spirante vento magno lapillum gestant secum, tan- <sup>21</sup> quam aduersus flatum saburram. Si prope sit fluuius, non aliunde potant, deposito prius onere. Sin minus, aliunde potu hausto, mel vomunt, (resumunt?) ac subinde ad opus eunt. Conficiendi mellis duo tempora, ver et autumnus. Suauius et candidius et in summa praestantius est vernum autumnali. Mel commendabilius ex noua cera nouelloque germine. Rufum turpius est ob fauum. Vitiatur enim sicut vinum in vase. Idcirco oportet ipsum (*excoquere et*) resiccare. Cum florente thymo replentur faui, id mel non concrecit. Est pulehrum et praestans aurei coloris. Album autem

non ex thymo sincero, commendatur ad oculos et vlcera. Mellis quod minus valet, fluitat. Hoc  
22 oportet tollere. Quod purius est, subsidit. Erumpentibus floribus, (cum stirpes florent *Gaza*,) ceram conficiunt. Idcirco eo tempore ex alueo eximenda cera est. Statim enim operantur. Haec sunt, a quibus ferunt. Thymum, atractylis, melilotum, asphodelus, myrtus, phleus, agnus, spartum. Cum thymum elaborant, aquam miscent, priusquam fauos oblinant. Excrementa deiiciunt apes omnes aut egressae inter volandum aut vnum in fauum. Plus operis conficiunt paruae quam magnae, vt dictum est. Habent igitur alarum oras attritas, et colore atro sunt atque obustulato. Illae vero nitidae et sublustres, sicut mulieres otiosae.  
23 Videntur apes oblectari plausu. Igitur testarum strepitu ac tinnitu aeris aiunt congregari in alueum. Non constat tamen, audiant nec ne, atque vtrum hoc prae voluptate an prae metu faciant. Mittunt in exilium tum cessatrices tum prodigas. Dispartitur suum cuique munus, vt dicebamus. Aliae mel faciunt, aliae foetum, alii erithacen. Nonnullae aedificant fauos: aliquae ferunt aquam in cellas ac melli admiscent: ceterae ad opus pergunt. Mane tantisper silent, dum vna excitarit edito murmure bis aut ter. Tum vero ad opus cunctae



euolant. Reuersae iterum fremunt primum, sed paulatim, minus minusque; donec vna circumvolans bombum edit, tanquam signo dato dormiendi. Atque inde extemplo conticescunt. Bene va-<sup>24</sup> lentis examinis signum est sonitus multus et motus exeuntium atque ingredientium. Tunc enim foetus operantur. Potissimum esuriunt, (laborant *alii Codices*,) cum exacta iam hieme opus incipiunt. Segniores redduntur, si quis, cum castrat, plus mellis reliquerit. Verum pro multitudinis ratione in fauis relinquendum est: nam minus alacres item sunt ad opus, si minus relinquatur. Si alueus sit capacior, tunc quoque fiunt segniores: minus enim promptae sunt ad laborem. Castratur alueus singulis sextariis aut sesquisextario: si vero examen sit bene valens, aut binis sextariis aut quinis semisextariis. Ternis sextariis pauci. Ho-<sup>25</sup> stis apum ouis est, et vespae, quemadmodum supra dictum est. Venantur eas apiarii olla posita, inditisque in ea carnibus. Vbi multae inciderint, opertam in igne ponunt. Fuci si pauci insint, iuvant examen: efficiunt enim, vt studiosius operi incumbant. Praesagiunt tempestates atque imbres. Deprehensum id est ex eo, quod non prouolant, sed prope sereno adhuc versantur, neque ab eo dimouentur. Quo indicio nouere apiarii, eas ex-

26 pectare tempestatem. Cum autem pendent inter se in examine, indicium est futuri discessus. Verum aspergunt examini vinum dulce apiarii, cum id persenserunt. Serere circum alueos conuenit pyros, fabas, herbam Medicam, herbam Syriam, faseelos, (eruiliam *Gaza*,) myrtum, papauer, serpyllum, amygdalam. Ex apiariis sunt, qui in pastu suas cognoscunt, farina aspersa. Si ver sero appetat, aut si sit squalidus annus aut rubiginosus, minus foecundae sunt. Haec de apibus hactenus.

C A P. XXVIII. (vulgo XLI. Scaligero  
C A P. LXV.)

Vesparum autem duo sunt genera. Quorum alterum ferum, rarum: gignitur enim in montibus; neque sub terra parit, sed in quercubus. Facie est maiore et oblongiore quam aliae. Variae omnes et aculeatae et valentiores. Ictus quoque earum maiorem dolorem affert quam illarum; aculeus enim pro portione his maior est. Hae igitur annum transigunt. Hieme enim videntur e quercubus caesis euolare. Viuunt hieme in latibulis. Degunt in truncis. Earum aliae sunt matricis, aliae operariae; quemadmodum etiam in mitioribus. Tam matricis quam operariae quae sit na-



tura, in genere mitiorum constabit. Sunt enim mitiorum quoque duo genera. Principes, quos 2 matrices vocant, et operariae. Maiores sunt principes et placidiores: et operariae ad bimatum non perueniunt, sed moriuntur omnes hieme praeuentae. Id adeo ex his constat. Nam appetente hieme obstupescunt ipsae. In bruma autem omnino non comparent. At principes, qui matrices cognominantur, tota hieme conspiciuntur, et sub terram conditi latent. Ab aratoribus enim et fossoribus multi principes per hiemem sunt conspecti: operiarum autem nulla. Vesparum generatio talis est. 3 Duces ubi cepere locum conspicuum, ineunte aestate fingunt fauos, et constituunt quae vespeta vocantur pusilla, puta quaternis ostiolis aut propemodum: in quibus vespae oriuntur, non autem matrices. Quibus adultis, de integro praeter superiores telas alias maiores construunt: atque his adultis, alias: adeo ut ad finem autumnii plurima et maxima vespeta sint. In quibus dux, quem matricem nominauimus, non amplius gignit vespas, sed matrices. Oriuntur hae grandiorum vermium specie in quatuor aut non multo pluribus inter se continuatis cellis in suprema vespeta parte. Cetera similis ratio his et ducibus, qui in fauibus apium generantur. Ortis vespis operariis in fauibus,

nihil amplius operis faciunt principes: sed operariae intro important eis cibum. Constat id ex eo, quod non amplius euolant duces; sed intus quiete  
 4 degunt. Vtrum vero superioris anni duces, creatis nouis ducibus, cum [*alii Codices* occisi a] iunioribus vespis simili fato [*meliores Codices* et semper] intereant, an diutius queant viuere, nondum perspectum est. Neque vero senectam aut ducis aut ferarum vesparum aliosue tales in eis affectus nemo vidisse visus est. Est matrix lata et grauis et crassior, atque grandior, quam vespa: ad volandum inualidior, ob grauitatem. Non fere igitur volare longius queunt, sed in vespariis sedent, semper confingentes atque ordinantes domestica.  
 5 Plurimis in vespariis matrices insunt. Verum dubitatur, aculeatae sint nec ne. Videntur tamen vt reges apum esse: verum neque exserere neque ferire. At vesparum aliae carent aculeo, vt fuci: aliae non carent. Quae carent, sunt minores et imbelliores, neque pugnant: aculeatae maiores et valentes. Atque has quidam vocant mares, illas aculeo carentes foeminas. Eae quae aculeos habent, sub hiemem amittere ipsos videntur. Verum nondum inuenimus, qui ipse vidisse testaretur.  
 6 Oriuntur annis squallentibus et locis asperis potius vespae. Oriuntur vero sub terra. Fauos conficiunt



ex festucis collectis (congerie *Gaza*) et terra, ab vno exordio singulos tanquam ab radice. Cibus sumunt (*carptim*) a floribus et fructibus quibusdam, plurimum autem ex animalibus. Visae sunt aliquae ex ceteris (*mitioribus*) etiam coeuntes. Ceterum aculeataene essent ambae, an non: earumue altera, nec ne, nondum perspectum est. Fero quoque in genere coeuntes animaduersae sunt, quarum altera aculeo armata esset: de altera non constabat. Foetus tamen non videtur ex partu procreari, sed statim maior esse, quam vt vespae sit partus. Cor- 7  
reptam pedibus vespam si quis permittat, vt strepat alis, eae quae aculeo carent, aduolant: aculeatae vero non aduolant. Qua vtuntur coniectura, vt illae foeminae sint, hi mares. In antris hieme capiuntur quaedam aculeatae: quaedam carentes aculeo. Sunt quae vesparia (fauos *Scaliger*) parua et pauca condant: aliae plura et ampliora. Magna pars matricum capitur a solstitio (*vulgo* procedente anno) circa vlnos. Legunt enim viscida et gummosa. Matricum prouentus alicubi fuit, cum anno superiore vesparum frequentia fuisset et imbrium. Capiuntur locis praeruptis et rimis terrae rectis. Atque omnes deprehenduntur esse aculeati. Haec vesparum ratio est.

C A P. XXIX. (vulgo XLII. Scaligero

C A P. LXVI.)

Crabrones autem viuunt non legentes flores, vt apes, sed carnem vorant. Idcirco in fimetis versantur: venantur enim grandes muscas. Quas vbi ceperint, amputato capite auolant feruntque reliquum corpus. Appetunt autem etiam fructus dulces. Ac cibo quidem hoc vtuntur, quem diximus. Habent autem principes, apum more atque vesparum; qui proportionem crabronibus maiores sunt, quam vesparii vespis et apiarii apibus comparati.

- 2 Intus manent ii, sicut et duces vesparum. Sub terra examen constituunt crabrones, egesta humo, formicarum more. Neque emittunt examina, vt apes; sicut neque vespae. Sed accessione facta sobolis manent ibi, augentque alueum, egesta srobe. Fiunt sane examina magna. Iam enim quoddam cum commodè valuisset, cophini tres atque quatuor fauorum extracti sunt. Neque apum more cibum reponunt; sed latent hieme. Maxima tamen pars interit. An vero omnes moriantur, nondum constat. Plures vno duces non habent in caueis suis, sicut in alueis apes, qui apium examina distrahunt.
- 3 Crabrones si qui ab examine aberrarint, conuersi ad aliquam materiam, fauos aedificant. Cuiusmodi saepe videntur in superficie; atque in iis regem



vnum conficiunt. Is cum adoleuerit, exit et sobolem sumtam atque abductam in alueum secum ad habitandum collocat. De coitu crabronum nihil exploratum adhuc habemus: neque vnde foetus oriatur. Igitur inter apes aculeo carent tum fuci tum reges ipsi: sed et vesparum quaedam non habent, quemadmodum supra dictum est. At crabrones omnes habere compertum est. Tantum de principe adhuc, habeat nec ne is, accuratius inquirendum est.

C A P. XXX. (vulgo XLIII. Scaligero  
C A P. LXVII.)

Bombylii (bombyces *Gazae et Scaligero*) sub saxis pariunt super terra, cellulis binis aut paulo pluribus. Inuenitur autem in his etiam mel quoddam improbum inchoatum. [*Scaligero* Cap. LXVIII.] Tenthredo autem crabroni similis: sed varia et lata, sicut apis. Liguritrix haec, et macella sectatur. Ad pisces quoque atque eiusmodi cibos fruendos singularis aduolat. Parit sub terra, vt vespae. Foecunda quoque est, et nidus eius multo maior quam vesparum: etiam longior est. Talia sunt quae de apum et vesparum et aliorum eiusmodi opere ac vita dicenda erant.

C A P. XXXI. (vulgo XLIV. Scaligero  
C A P. LXIX.)

Moribus autem differunt animalia, vt supra dictum est, praesertim fortitudine et formidine: secundo loco mansuetudine et ferocia, etiam in genere ipsarum ferarum. Nam leo in pastu et esuriens acerbissimus est: satur autem mitissimus. Est animo minime suspicaci: nihil sane suspicatur. Et cum sociis educationis aut consuetudinis mirum in modum colludendi studiosus ac blandus. In venationibus nunquam palam fugit aut metuit. Quin etiam si prae venatorum multitudine subducere se conatur, lente et pedatim cedit, et subinde sese conuertens. Quod si quid siluae densioris nactus sit, fugit celeriter, donec in loco aperto sit. Tum vero de integro pedetentim subducit sese. In locis patentibus palam propter multitudinem si cogatur, currit contento cursu, nec salit. Eius sane cursus continuatus atque porrectus est, sicut canum. At cum sectatur ipse, iniicit sese, cum prope praedam est. Vera etiam sunt, quae narrantur de igni, quem ille metuit. Quemadmodum cecinit Homerus: *ardentesque faces, quas metuit, tametsi incitatus sit ad impressionem faciendam.* Tum hoc, ab eo obseruari atque impeti illum, a quo ictus sit. Quod si quis iaculatus eum tamen



non percusserit, impetu in illum facto si comprehenderit, nulla iniuria afficit, neque nocet vnguib; sed excussum atque perterrefactum ab se dimittit. Potissimum cum vetuli sunt, neque valent ob senium venari, dentesque male affecti sunt, accedunt ad vrbes, atque homines afficiunt iniuria. Viuunt annos multos. Iam enim captus leo claudus inuentus est habere dentes fractos: quo argumento eos diu viuere coniectabant. Neque enim nisi longaeuo id euenire potuisse. Leonum genera duo: 3  
alterum rotundius et iuba crispior, idque timidius: alterum longius, iuba spissa, fortius. Fugiunt interdum leones demissa cauda, vt canes. Visus est leo, qui aggressus suem, vbi animaduertit sese defendentem et setis contra horrentem, fugerit. Cetero tempore ictus excipere potest multos. Illorum parte sustinere non potest. Capite firmissimo est. Quaecunque momorderit aut vnguibus vulnerauerit, ex iis vulneribus sanies fluit pallida valde, quamque de fasciis atque spongiis nihil valeat eluere. Eorum cura eadem quae morsus rabidi canis. [Cap. LXX. Scaligero.] Thoes quoque 4  
homines diligunt: neque eis afferunt iniuriam, neque eos valde metuunt: at cum canibus et leonibus bellum gerunt. Quo fit, vt in iisdem locis non degant. Praestantissimi parui sunt. Eorum genera

namque duo tradunt quidam: alii tria: neque plura putant. Verum quemadmodum piscium auiumque atque etiam quadrupedum quaedam, sic certis temporibus thoes mutantur: atque alium colorem habent hieme, alium aestate. Atque aestate quidem glabrescunt, hieme vero pilosi sunt.

C A P. XXXII. (vulgo XLV. Scaligero

C A P. LXXI.)

Bonassus nascitur in Paeoniae monte Messapio, qui separat Paeoniam a Maedica regione. Vocant eum Paeones Monapum. Tauri est magnitudine: sed est boue crassior: neque enim longus est. Eius corium distentum occupat spatium quantum satis est septem lectis conuiuarum. Ceterum species bovis est, nisi quod habet iubam ad summos vsque armos, sicut equus, villo tamen molliore et magis adstricto, quam est equi: colore fuluo. Iuba autem proluxa et densa vsque ad oculos pertingit. Color pilorum inter cinereum et rufum; non qualis equarum, quas paroas vocant, sed squallidior; pilus inferior lanaceus. Atri aut gilui vehementer  
 2 nulli sunt. Vocem similem boui habet: cornua autem curua, et aduerso inter se flexu curua, atque inutilia ad pugnam: magnitudine palmi aut non multo longiora: crassitudine singulis quanta



capere possit non multo minus semisextario. Nigredo autem pulchra et nitida cornuum est. Antiae (*capronae*) vero ad oculos vsque pertinent, ita vt in latus potius quam antrorsum prospicere videantur posse. Superioribus caret dentibus, sicut et bos et alia cornigera omnia. Crura autem hirta. Et est bisulcus. Caudam habet minorem quam pro sua magnitudine, similem tamen bubulae. Spargit puluerem et terram fodit, tauri more. Corium est aduersus ictus validum. Carne est suauis: idcirco eum venantur. Percussus fugit: delassatus subsistit. Tuetur sese calcibus et stercore, quod ab sese quaternis passibus eiacularur: cuius vsum facilem et promptum habet: et saepe canes insequentes adurit, ita vt eorum pili absumantur. Perturbati igitur atque perterrefacti potest hoc efficere stercus: pacati non adurit. Ferae facies ac natura talis est. Imminente autem tempore pariendi, vniuersi in montibus pariunt: ac priusquam sobolem edant, circum locum alium exonerant, tanquam ponentes munimentum. Emittit enim fera haec largam quandam copiam excrementi huius.

C A P. XXXIII. (vulgo XLVI. Scaligero

C A P. LXXII.)

Ferarum omnium maxime cicuratur elephante

ac mitescit. Nam et instituitur, et intelligit. Docetur namque etiam regem (*Persarum*) adorare. Sensuum et ceterae intellectionis vi praestat. Quam inierit atque implevit, non iterum attingit. Vivere aiunt elephantum annos alii ducentos, alii centum viginti, et foeminam tot paene quot mas. Vigere circiter anno suae aetatis sexagesimo. Hiemis ac frigoris esse impatientem. Fluuios animal hoc libenter accolit; non tamen fluuiale est. Ingreditur vero per aquam eo usque procedens, dum eius nares extent: his enim et flat et respirat. Nare vero non facile quit ob corporis vastitatem.

C A P. XXXIV. (vulgo XLVII. Scaligero  
C A P. LXXIII.)

Cameli non ineunt matres: etiamsi cogantur, nolunt. Olim enim camelarius, cum egeret admissario, pullum admisit ad matrem, tectam operimento: qui cum coitu peracto descendisset, cognovit quacum rem habuerit, et paulo post morsu perorigam interfecit. Ferunt etiam Scytharum regi fuisse equam generosam, ex qua editos equos omnes fuisse bonos. Horum praestantissimum cum vellet facere ut ex matre procrearet, adductum, ut coiret: illum, cum primum recusaret, opertam mox ignarum iniisse matrem. Verum peracto coitu, at-



que detracto de facie operimento, matre agnita au-  
fugisse, atque e rupibus sese praecipitem dedisse.

C A P. XXXV. (vulgo XLVIII. Scaligero  
C A P. LXXIV.)

In genere marino multa feruntur exempla de  
mansuetudine et mitibus delphinorum moribus.  
Narrant enim amores eorum erga pueros atque de-  
sideria, circa Tarentum et Cariam et alia loca. Ad  
terram Cariam delphino capto atque saucio, grex  
dicitur conuenisse delphinorum in portum, donec  
eum piscator dimiserit. Tunc vero retro omnes  
reuersi sunt. Delphin illos quoque semper quis-  
piam e grandioribus custodiae gratia comitatur.  
Conspectus est olim delphinorum et maiorum si-  
mul et minorum grex: post hos delphini quidam  
duo non magno interuallo apparuere delphinillum  
defunctum labentem in profundum subeuntes nando  
atque subleuantes dorso, quasi ducti misericordia,  
ne qua a bellua deuoraretur. De eorum quoque 2  
celeritate supra fidem est quod narrant. Omnium  
enim animalium tum aquatiliū tum terrestrium  
pernicissimum esse existimatur. Maiorum etiam  
nauigiorum transiliunt vela. Id potissimum euenit  
ipsis, cum cibi gratia piscem quempiam insectantur.  
Fugientem enim eum vrgent in profundum vsque

fame coacti, et si reuersionis tractus magnus sit, spiritum continent, quasi computantes rationem spatii, et collectis viribus sagittae celeritate feruntur, dum student transmittere spatium, vt respirare queant, et superant vela, si forte offendant nauigia. Hoc faciunt etiam vrinatores, cum sese in profundum demiserint: totis enim viribus, cum reuertuntur, emergunt. Degunt inter se coniugia, mares simul et feminae. Dubitant de ipsis, quae sit ratio, quare in terram erumpant et impingant. Aiunt enim, nullo discrimine temporum facere eos id, etiam nulla de causa.

C A P. XXXVI. (vulgo XLIX. Scaligero  
C A P. LXXV.)

Quemadmodum autem omnibus animantibus affectus animi tales sunt, quales actiones: sic rursus mores quoque mutantur secundum actiones: quin etiam saepe membra quaedam. Id quod in auibus contingit. Gallinae enim cum vicerint gallos, cucuriunt, maresque imitando subagitare conantur. Attollitur etiam crista ipsis, simul et clunes; (vropygium) adeo vt non iam facile dignoscantur, an foeminae sint. Quibusdam etiam calcaria parua surriguntur. Iam vero mares quidam visi sunt, amissa gallina, ipsimet matris curam



mpendere pullis: eos etiam circumducere et enu-  
 trire ita, vt non amplius cucuriant aut veneri ope-  
 ram dent. Quidam vero galli adeo effeminati no-  
 scuntur, vt neque cucuriant, neque inire aggredian-  
 tur, et ineuntes alios patiantur. [Vulgo sequeba-  
 tur sectio nostra quarta.] Multae aues mutant per <sup>2</sup>  
 tempora anni tum colorem tum vocem. Vt merula  
 ex nigra rufescit. Cohibet etiam vocem. Nam  
 aestate canit: hieme strepit et tumultuose vocula-  
 tur. Mutat etiam turdus colorem: hieme cinereo  
 colore: aestate vario circa collum: vocem tamen  
 nunquam mutat. Luscinia cantat quidem conti-  
 nuatis diebus ac noctibus quindecim, cum montes  
 iam vestiuntur. Deinde canit quidem, sed inter-  
 pellatim. Aestate procedente aliam emittit vocem,  
 verum non amplius omnimodam, neque celerem,  
 neque inflexam, (modulatam *Gaza*), sed simpli-  
 cem. Colorem quoque alium induit: et in Italia  
 tunc alio vocatur nomine. Videtur non diu: latet  
 enim. Etiam qui erithaci (rubeculae *Gazae*) et <sup>3</sup>  
 qui phoenicuri (rubicillae *Gazae*) dicuntur, inter  
 se commutantur. Est erithacus hiemalis, phoe-  
 nicurus aestiuus. Differunt sane, vt ita dicam,  
 nihilo, nisi colore tantum. Similiter et ficedulae  
 et melancoryphi: inter se enim transmutantur.  
 Est ficedula autumnii tempore: melancoryphus

statim post autumnum. Ne hi quidem differunt nisi colore et voce. Eandem vero esse auem constat; cum vtrumque genus hoc mutationis tempore obseruarunt. Cum enim nondum mutationem integram obsoluisset, neque alterius speciem assumsisset, vtrique suberat aliquid proprii. Nihil vero mirum, in his si voces et colores immutantur. Nam etiam palumbes hieme vocem edunt nullam, nihi si quando saeuam hiemem tepor exceperit. Tunc quidem vocem emisit, non sine peritorum miraculo. Si simul cum vere incipit vocem dare. In summa aues et maxime et plurimum voculantur  
4 tempore coitus. [Vulgo sectio 2.] Mutat et cuculus colorem. Vocem minus explanat, cum futurum est, vt amplius non compareat. Abit autem sub cane. Ostendit sese a vere incipiens ad canis exortum vsque. Abdit sese ea quoque, quam oenanthem (vitiferam *Gaza*) vocant, exortu sideris eiusdem: occidente ostendit se. Vitat autem interdum frigus, interdum aestum. Mutat etiam vpupa colorem et faciem, sicut in poemate Aeschyli est: *Epopa hunc, spectatorem suorum ipsius malorum, varium fecit, atque auem audacem petricolam armis insigniuit. Is vere nouo pennas quatit circi: (nam duas ab vno ortu formas nouellus et adultus induet;)* cum vero seges ado-



*leuerit, variae eum rursus pennae amiciunt. Semper autem odio horum Pallenae locorum* 5  
*longe hinc in nemora et montes migrabit.* Aues  
 quaedam sese puluerant, quaedam lauant, quae-  
 dam neutrum faciunt. Quaecunque non multum  
 valent volatu, sed humiliter degunt, pulueratione  
 gaudent, vt gallina, perdix, attagen, alauda, pha-  
 sianus. Item ex iis quae rectis vnguibus praeditae  
 sunt quaedam: tum omnes quae fluuium aut palu-  
 dem aut mare accolunt, lauacris gaudent. Aliae  
 vtrumque faciunt, et puluerantur et lauantur: vt  
 columba et passer. Vncunguium autem multae  
 neutrum. Atque haec quidem ita se habent. [Cap.  
 LXXVIII. Scaligero.] Proprium autem quarun-  
 dam auicularum edere sonum ex aluo. Quod etiam  
 euenit turturibus. Agitantur etiam orae sedis ve-  
 hementer, simul ac vocem edunt.

C A P. XXXVII. (vulgo L. Scaligero

C A P. LXXIX.)

Mutantur animalium quorundam non solum  
 figurae et mores per aetatem et anni tempora, sed  
 etiam cum castrantur. Castrantur autem animalia  
 quae testes habent. Habent autem aues intus testes,  
 et quadrupedes ouiparae, ad lumbos scilicet. At  
 quae animal pariunt et soli beneficio vtuntur ad

ingressum, maxima pars foris, cetera intus. Omnia autem ad partem ventris vltimam. Castrantur autem aues (galli) ad clunes, (vropygium,) qua parte conquiniscunt coeuntes. Quem locum si quis ferramentis binis ternisue vsserit, et gallus adultus fuerit, tum crista pallescit, neque amplius cucurit, neque venerem tentat. Si autem pullus sit, vbi creuerit, nihil horum omnino ei contingit. <sup>2</sup> Idem modus etiam in hominibus. Si quis enim puerili aetate sic mutiletur, neque oriuntur pili, qui nobis natis postea prouenire consueuere: neque mutatur vox, sed acuta durat. Si vero puber sit, ii quos diximus pili defiunt, praeterquam qui in pube sunt: quanquam ii quoque, etsi manent, tamen fiunt rariores. Pili autem connati non abeunt. Nullus enim eunuchus caluescit. Mutatur etiam vox in quadrupedibus omnibus exectis, [aut alio vitio effeminatis.] Quadrupedes igitur aliae, nisi iuenculae castrentur, vitiantur. In solo aprorum genere nihil refert. Quae prima aetate castrantur, et maiora et nitidiora euadunt non castratis. Si autem aetate stata castrentur, <sup>3</sup> non amplius crescunt. Cerui, qui nondum per aetatem cornua habuerunt, si castrentur, non amplius edunt cornua: sin tunc, cum ipsa habent, excantur, cornuum magnitudo eadem durat; neque



ea abiiciunt. Vituli igitur anniculi castrantur: alioqui turpiores et minores euadunt iuueni. Modus castrandi is est. [*Codices sic: euadunt. Iuueni autem ita castrantur.*] Reclinantes et scrotum incidentes deorsum testes extringunt. Deinde radices, quammaxime possunt, sursum contrahunt. Incisuram villis stipant, vt sanies exire possit. Quod si inflammentur, scrotum vstulantes conspergunt. Tauri adulti si castrantur, atque illico admittantur, possunt inire, quantum quidem apparet. Exsecatur etiam vulua (capria) scropharum, ita vt non amplius coire opus habeant, sed breui tempore pinguescant. Igitur biduum cum ieiunarint, appensa pernis posterioribus, secatur sumen: qua potissimum parte maribus testes sunt. Ibi enim matricibus adnata est (adiacet) capria: (apria *Gazae*:) vnde paululum abscindentes consuunt. Castrantur etiam in genere camelorum foeminae, cum earum vsum in bello quaerunt, ne praegnantess fiant. Earum numerum possident aliqui in Asia superiore etiam ad trium millium. Currunt multo celerius quam Nisaei equi, qui in cursum incitantur, propter magnitudinem passus porrectioris. Omnino longiora fiunt castrata quam non castrata. [Cap. LXXX. Scaligero.] Animalia, quibus ruminare in more est, proficiunt

delectanturque non minus in ruminando quam edendo. (nihiloque secius ruminant, quam mandunt *Scaliger*.) Ruminant tantum altera dentata maxilla, ut boues et oves et caprae. In feris nondum perspectum est, quae nobiscum non aluntur aliquando: cuiusmodi ceruus est. Etenim is ruminat. Omnia autem iacendo potius ruminant. Maxime vero hiberno tempore. Quaedam aluntur, septem fere menses hoc faciunt. Greges autem minus et minus temporis ruminant, propterea quod aluntur  
 7 foris. Ruminant etiam quaedam, quae utraque maxilla dentata sunt: ut mures Pontici, et pisces, et quem (*Gaza* piscem quem) idcirco ruminacem (*Gaza* ruminalem) vocant. [Cap. LXXXI. *Scaligero*.] Animalia longis praedita cruribus aluum vdam habent. Quibus latum pectus, facilius vomunt, et in quadrupedibus et in avibus et in hominibus magna ex parte.

---

[*Decimi libri, qui vulgo fertur, versionem Scaligerianam omisimus, cum liber ipse manifesto sit supposititius, et ab historia de animalibus paene totus alienus. Quippe est de causis sterilitatis. Praeterea versio Scaligeri plurimis in locis non solum a veritate aberrat, sed etiam a nostrae editionis scriptura discrepat.*]

---



---

# ARISTOTELIS

QVI FALSO DICITVR

## DE ANIMALIBVS HISTORIAE LIBER DECIMVS E VERSIONE ALBERTI COGNOMINE MAGNI.

---

*Incipit liber decimus animalium, qui est de impedimentis generationis. Caput I. de dispositionibus matricis, quae impediunt conceptionem.* (Cap. I, 1.) Coitus autem est res, quae accidit tam viris quam mulieribus omnibus, non paucis quae arctae sunt. Viri autem quidam licet sint impotentes et forte ex calido consumente humidum aut frigidum, quod materiam constringit, tamen mulier, quia non semper coit emittendo, sed etiam alias habet coitus delectationes, semper parata est ad coitum. In his enim patitur et non agit: et ideo virtute agente non indiget. Quamuis autem sic coire conueniat tam viris quam mulieribus, tamen non semper consequitur generatio propter sterilitatem vtriusque, et viri et mulieris, aut forte alterius eorum. Et tunc si multum vtantur coitu, tamen non generabunt: et causa, sicut diximus, est aliquando ex utroque, et aliquando ex altero. Propter quod in tali vitio prius considerata est matrix feminae: et si causa sterilitatis fuerit ex matrice, tunc oportet nos succurrere

per medicinam matricis. Si autem causa non est ex matrice, sed ex aliquo alio, sicut spermate vel menstruo, tunc intendemus illud, cuius causa accidit sterilitas, rectificare per medicinam. Matricem autem iudicabimus sanam sicut et alia membra sana iudicantur; quoniam quando membrum complet opus suum et officium sine diminutione et sine sua magna post opus suum debilitatione, tunc iudicatur esse sanum: verbi gratia, oculus dicitur esse sanus, quando nulla laesione existente in ipso visum in actu perficit bonum, et non multum lassatur et debilitatur post videre. Similiter ergo et matrix sana vocabitur, quando nulla in ea existente debilitate opus suum bene perficit, et post completionem operis non est destituta et multum lassa. (Cap. I, 2.) Possibile tamen est, ut aliqua matrix non sit sana in toto, et tamen bene perficit opus suum sine nocumento et diminutione: et fit hoc plurimum, quando infirmitas non est in tota matrice, sed in aliqua parte ipsius opus suum non impedit. Non enim improbable est, videre oculum visu bono, quamvis laesa sit aliqua partium ipsius, si sit aliqua macula in quadam partium ipsius, quae non prohibet ipsum videre. Hoc tamen nunquam accidit, nisi quando infirmitatis occasio non quidem est in parte nobili oculi, ex qua elicitur operatio bona, sed in aliqua alia operationem non impediens. Simile autem iudicium per omnia est de matrice. Matrix igitur per omnia sana debet primo quidem sita esse in loco qui competit ei secundum naturam positionis membrorum ad facile concipere, et bene conceptum tenere, ita quod situs eius non sit diuersus in partibus, ita quod vna pars ipsius forte nimis est profunda et alta, et altera demissa in inguen. Erit etiam quandoque matrix remota a loco positionis suae naturalis aut in altum aut in inum aut in transuersum absque omni infirmitate et defectu substantiae matricis. Quod autem matrix debeat esse sita in loco conuenienti, ex hoc notum esse poterit, quoniam



si matrix fuerit longinqua a loco, a quo poterit trahere sperma, sicut sunt profundae multum matricēs, non traheret sperma, et accidit impedimentum sui operis. Si autem fuerit multum propinqua plus quam expediat, sicut sunt descendentes in collum vulvae matricēs, erit matrix ex tactu nimio et compressione quasi insensibilis: et tunc iterum sperma non trahit, et accidit sterilitas, quia quando est insensibilis, non cito aperitur ad sugendum sperma. (Cap. I, 3.) Si autem substantia matricis sana sit, et situs eius conueniens, adhuc considerandum est in menstruo sanguine, quod ipsum etiam fluat secundum dispositiones bonas et vtilēs ad conceptum: quod videlicet ordinate fluat secundum aequalia tempora, in quibus a luna causatur fluxus eius. Praecipue autem opus est consideratione menstrui, quando corpore sano et matrice in loco et in substantia bene disposita non fit conceptus: quoniam si ista sic se habent, certissime scitur, quod matrix est secundum quod dicitur esse in apertione susceptionis spermatis et retentione ipsius: et ideo sterilitas non est in ipsa, sed in menstruo. Quando enim menstruum suas multiplicat revolutiones, et reuertitur citius vel tardius quam debet, aut etiam quando inordinanter fluit non expectans tempus revolutionis lunae, sed modo venit citius et modo tardius: etsi cum hoc fuerit corpus sanum: tunc oportet intueri colorem menstrui sanguinis. Si enim color eius mutatus fuerit a colore naturali, scimus manifeste causam inordinati fluxus eius esse in matrice. Orificia enim venarum, quae sunt in matrice, tunc aperta sunt, et inobservato ordine immaturum sanguinem emittunt. Aliquando autem hoc accidit sine dolore, et aliquando cum dolore. (Cap. II, 3.) In statu autem naturalis dispositionis debet orificium matricis esse siccum, sed non durum, et quod in ista dispositione remaneat media die ad minus: et melius erit, si vna die vel duabus sic remaneat. Quando enim sic fuerit, significat bonae dispositionis esse matri-

cem quoad profusionem menstrui, et quod opus eius possit quoad hanc conditionem esse completum. Si autem orificium matricis forte non fuerit apertum in tempore conuenienti, sed sit valde molle et flexibile, significat, quod cum debilitate matricis totum sit corpus debile et fluens humore corrupto: et ideo conuenit multam superfluitatem emundari ab ipsa; quia aliter, quamuis forte molle et humidum matricis orificium sit bonae et facilis apertionis, tamen tunc non bene tenet conceptum sperma, sed facile emittit ipsum. Hoc enim signum est, quod orificium est bonae receptionis, et si adiutum fuerit per sanitatem corporis, a superfluo humore tunc magis exsiccabitur matricis orificium: et tunc matrix talis et bona sperma recipit receptione, et postea bene constringitur orificium bona constrictione super receptum: et sic bene retinebitur conceptum: et his duobus perficitur impraegnatio quantum ad statum matricis. (Cap. III, 1.) Dispositiones autem matricis post emundationem a superfluo menstrui sunt istae. Signum enim facilis conceptus est, quod mulier post emundationem menstrui somniat virum coire secum et leuiter in ipsam proicere sperma, sicut proiicitur in coitu vigilando. Et si hoc multotiens somniauerit, melius erit et perfectius signum: hoc enim signum causam habet in muliere descensum sui humoris et quod facile occurrat in coitu spermati viri: quae potissima est causa impraegnationis. Postquam autem de somnio tali expergefata est, debet indigere, vt faciat hoc quod mulieres faciunt, quando appropinquat descensus spermatis, hoc est, vt faciat confricationem, per quam sperma eiiciatur, quod iam est in via vasorum seminariarum. Vulua autem aliquoties illo tempore debet apparere siccior; non quidem post somnium tale, eo quod tunc humidam habet vuluam propter eam quae in somno facta est pollutionem: sed post hoc et ante hoc significat bonam matricis retentionem. Siccetur ergo post somnium infra sex



horas ad minus, hoc est vsque post (ad *Lugd.*) meridiem vel modicum somnii vel minus. Adhuc autem humor, quem emittit in pollutione, debet esse maturus, albus et viscosus, sicut humor qui vocatur in muliere sperma coitus. Alius enim humor medius inter aquam et sperma aliquando emittitur, qui significat, aquosum esse semen et inutile ad generationem. Omnia igitur haec signa concurrentia significant, quod matrix sperma bene parata est recipere, et quod ora coctilidonum quae sunt in matricis superficie interiori, quae non est aequalis et plana, bonae sunt attractionis. Et si coniungetur eis sperma, bene tenebunt et bene nutrient ipsum: nec a tali matrice facile exit semen conceptum, nisi voluntarie per violentiam saltus vel medicinae eiiciatur. (Cap. III, 2.) Signum etiam bonae matricis est, quod accidat in ipsa aliquando modicus tumor sine dolore, sicut accidit in ventre ex ventositate: hoc enim signum est, quod in ipsam destillat semen mulieris et resolvitur in ventositatem, eo quod non est coniunctum spermati viri: et ideo si adueniat sperma viri tali matrici, facilis erit conceptus. Tumor autem talis debet accidere sine infirmitate: quoniam si infirmitatem induceret, hoc nimiam significaret matricis clausuram, ex qua ventositas expirare non posset. Omnia ergo ista concurrentia significant matrices esse laudabilis dispositionis, et quod non sint magis durae quam debeant, neque flexibiles plus quam oporteat naturali dispositione, quae a natiuitate habetur, aut etiam ea, quae per infirmitatem est contracta. Debent etiam matrices, quando sperma receperunt, esse extensibiles et ampliabiles secundum quantitatem, quam recipit spermatis conceptus, ut dent ei locum augmenti. Quae enim nimis paruae sunt, destruunt conceptum, et sunt causa, quare non venit ad debitam quantitatem, sed forte erit nanus. Si autem tales non fuerint matrices, sed sint valde durae aut nimis molles aut forte insensibiles, siue habeant istas dispositiones a natiuitate

aut ex infirmitate, tunc erunt illaudabilis dispositionis: et ideo non possunt creare embrionem, sed corrumpunt conceptum sperma et eiiciunt, si sint istae occasiones infirmitatum magnae in ipsis. Si autem sint paruae, concipiunt quidem et creant conceptum, sed erit infirmus et aegrotatius, ad periodum suae speciei conuenientem non perueniens: et hoc ideo est, quia cibantur ex vase malo et corrupto in matrice. (Cap. III, 3.) Adhuc autem in laudabili matrice partes dextrae et sinistrae, ubi sunt duae partes (camerae *Lugd.*) matricis, debent esse mollis tactus, et partes residuae similiter; quia aliter confringerent filositatem et viscositatem spermatis. Adhuc autem signum concipientis matricis est, quod, quando vir coierit cum muliere, inter eos non sit multa humiditas neque multotiens effluens, sed semel post coitum, ita quod sit sicut humiditas sudoris, qui accidit in locis genitalibus. Hoc enim signum est, quod glandulosum et viscosum sugatur a matrice et non effluat nisi modicum aquosi humoris, qui inutilis est ad generationem. Dico autem, quod sit sicut humiditas sudoris: membra enim genitalia saepissime resudant, eo quod vaporosa sint, praecipue in cibo, quando interiora calefiunt, et ad exteriora propellunt humorem. Tunc enim propter aperturam pororum et viarum in inguine plus aliis membris resudant genitalia. Resudant autem haec membra facilius aliis in labore, et praecipue in labore coitus: nec est mirum hoc, quia etiam oculi, qui frigidissimi sunt omnium membrorum corporis, in paruo labore: quando videlicet vident album multum lucidum, lacrimantur. Patiuntur enim facile membra genitalia a frigore forti et a calore forti (et a calore forti *omissit Lugd.*) propter neruositatem, quae est in eis. Sudant autem praecipue genitalia in his, in quibus sunt humida a complexione naturali: et similiter faciunt matrices humidae post laborem coitus. Quando ergo ex complexione sunt humidae, efficiuntur magis humidae per sudorem ex



labore coitus: et forte accidit hoc aliquando mulieribus, quae sunt laudabilis dispositionis secundum complexionem naturalem: et ideo indigent medicina matricem exsiccante, sed magis et minus secundum quod sunt abundantes in humore magis et minus. Aliquando enim in quibusdam mulieribus inuenitur tanta huiusmodi humiditas, quod nimia lubricitate matricis non possunt attrahere sperma viri, nisi admisceatur cum humore alio, qui est sperma mulieris, antequam permisceatur cum sudore matricis. Admixtum enim cum spermate mulieris conuoluitur et non miscetur sudori de facili. (Cap. III, 4.) Amplius autem in muliere, quae potest impraegnari, considerandum est, vtrum ex-pergefata post pollutionem in somno factam sit debilis vel fortis: et si est debilis, vtrum talis debilitas accadat ei semper post pollutionem, aut non, sed aliquando sit et aliquando non. Et similiter si est fortis post pollutionem, quaeremus aut (*an?*) hoc semper accadat ei, aut aliquando: et considerabimus etiam, vtrum humiditate praecedente in pollutione sequatur postea corporis nimia siccitas, aut e conuerso sit, quod videlicet non sequatur complexionis siccitas post pollutionem: quoniam si sequatur debilitas et complexionalis siccitas, signum est, ipsam esse nimis siccam, et de necessario ad consistentiam corporis emisisse in pollutione: et ideo non esse foecundam secundum naturam, quia non habet quod ponat in semine. Opposita autem istorum sunt laudabilia ad conceptum. Omnia ergo ista considerata sunt in muliere quae est foecunda ad partum. Flexibilitas autem matricis et debilitas significant matricem sperma conceptum non retinere. Si autem matrix dolorosa fuerit, et corpus praeterea mulier languens dolorosum habeat, significatur infirmitas concipiendi, et quod impraegnari mulier talis non possit. Et quando mulier fuerit aliquando quidem fortis et aliquando debilis, et matrix eius est primo sicca et postea humectatur, significatur totum corpus mulieris humidum esse, et quod

matrix bene quidem recipit sperma, sed ex humore superueniente corrumpit ipsum et postea eiicit. Amplius autem ex superius determinatis constat matricem attrahere sperma, quod in ipsam cum impulsu ventoso iniectum est, et quod mulier in coitu suum sperma eiicit ad orificium interius matricis, ad quam etiam suum sperma proiicit masculus. (Cap. III, 10.) Res autem omnes cum impulsu venti proiectae cum virtute quadam et impetu mouentur. Contingit autem saepius in muliere esse nimis impetuosam projectionem, ita quod per ipsam retunditur ad extra sperma viri, et impeditur impraegnatio. Oportet enim corpus tam mulieris quam matricis esse conueniens ad hoc quod matrix et concipiat et pariat. Accidit autem multas mulieres pati infirmitatem, quam hanemusam graeci vocant medici: quae est, quando matrix ventosa de sublimi sufflat inferius per os matricis et collum, sicut musa vel fistula. Oportet igitur per medicinas sollicitari ad remouendum a matrice accidens illud: aliter enim quotiescunque mulier talis cum viro coierit, exsufflabitur sperma viri et impediatur impraegnatio. Causa autem huius infirmitatis siccitas vehemens est matricis: tunc enim humiditatem proprii humoris aut spermatis mulieris attrahit et in ventum conuertit, et per illum exsufflat quicquid spermatis viri ad os eius proiicitur: et sic paulatim exsiccata, exsiccatur spermatis viri humiditas et minoratur per euentationem matricis: et tandem excidit in toto. Ventationem autem illam non in se sentit mulier propter paucitatem ipsius. Matrix autem, quando in ea haec aggrauatur infirmitas, tunc efficitur valde sicca, et tunc citius eiicit sperma, quam quando fuerit causa infirmitatis parua: et tunc non erit opinio etiam impraegnationis. Quando autem parua fuerit infirmitas propter temporalem retentionem spermatis, aliquotiens forte opinabitur mulier se concepisse, vsque dum sperma paulatina (paulatim a *Lugd.*) sufflatione eiicitur. In tali autem infirmitate matricis sae-



pe quidem eueniunt dolores subito ex inflante ventositate, sicut sunt dolores impraegnatarum; quoniam ventositas matricem eleuans pungit inguen ad exeundum nitens; aliquando etiam recepto spermate intra talem matricem, cum sperma in ventum resoluitur, fit tumida matrix, quod opinatur mulier, se esse impraegnatam, si diu ventositas intra matricem clausa teneatur. Stat autem iste tumor, donec ventus sperma quasi per aborsum eiiciat: et tunc residet venter conuersus ad dispositionem priorem. Et hoc accidens prioris infirmitatis graecorum medici vocant ragmoneon. Euenit autem matri dupliciter: ex infirmitate accidentalit videlicet: et tunc leui tollitur medicamine: euenit etiam ex natiuitate: et tunc radicata infirmitas in principiis naturalibus incurabilis est, aut vix potest curari. Signum autem, hanc infirmitatem non per naturam inesse matri, est, si aliquando matrix sperma recipit et tenet, et tamen non sequitur impraegnatio. Si enim per naturam inesset fortificata passio, aut sperma recipi non permetteret, aut receptum statim reiiceret. (Cap. IV, 1.) Amplius autem multotiens prohibetur impraegnatio propter spasmus, qui est in matrice. Spasmus autem in matrice accidere consuevit ex duabus causis: aut enim accidit ex apostemate calido malum humorem attrahente, et sic spasmante venas et neruos; sicut omne extensibile, quando multum trahitur in circuitu in spissum, decurtationem patitur in sua longitudine; sicut si saccus de corio extensibili factus superimpleteatur: illius enim statim longitudo contrahitur et decurtatur; quia substantia non sufficit duabus simul extensionibus. Alia de causa spasmat matrix inanitione, quando multa humiditas fluxerit ex ipsa; sicut corium decurtatur et corrugatur ad ignem. Est enim matrix substantia neruosa extensibilis, sicut corium; et ideo etiam spasmus patitur, sicut corium. Tempore enim partus ex multis matricibus tantum effluit humoris, quod postea siccitas spermatis dominatur in ea. Et his duabus de causis

spasmus in matricibus inuenitur. Signum autem, spasmus in ea non esse, est, quod non sit ventosa, et quod perficiat opus suum inordinata menstruorum emissionem. Ventus enim est ex resolutio humido: cuius succedens contrarium facit spasmus ex inanitione humidi. Retentio autem menstrui signum est apostemationis, praecipue quando est cum dolore loci et calore febrili. Si autem in ea fuerit spasmus, nequaquam complebit opus suum, eo quod contractione neruorum, qui sunt in ipsa, impeditur. Amplius autem impraegnatio impeditur pustulis et verrucis in orificio matricis existentibus: et taliter patiens mulier semper laeditur in coitu: et sperma matrix eius non sugit, praecipue quando a magno tempore durans iam chronica facta est aegritudo. Signum autem curationis huius aegritudinis delectatio est et non dolor coitus, et quod matrix aperitur et constringitur ad sperma secundum quod debet, et quod aperitur et clauditur secundum quod oportet in hora menstrui. (Cap. IV, 2.) Amplius autem impeditur impraegnatio ex nimia clausura orificii matricis. Accidit autem iste defectus a partu, quando nimis exsiccatur matrix: aliquando autem ex infirmitate alia. In quibusdam enim infirmitatibus matrix multum sursum extenditur: et tunc os eius fortiter clauditur. In quibusdam autem infirmitatibus non quidem extenditur, sed corrugatur, et corrugatione sua praeccludit orificium. Nec causa huius accidentis de facili cognoscitur, sed quod scitur, hoc est, quod, si matrix insanabilis ab hoc morbo sit, tunc nihil omnino recipit. Si autem recipere quidem potest sperma viri, sed deinde eiicit ipsum, certum est infirmitatem ipsam sanabilem esse. Si autem nihil inductorum prohibuerit impraegnationem, et fuerint corpora mulierum sana, tunc procul dubio mulieres vtentes coitu impraegnabuntur, et filios procreabunt, nisi sit causa sterilitatis in viro aut in proportionem, quae est inter duo spermata, viri videlicet et mulieris.



## C A P. II.

*De impedimentis generationis, quae sunt ex parte viri coeuntis aut ex parte inconuenientiae duorum spermatum, viri videlicet et mulieris.*

(Cap. IV, 2.) Accidit autem aliquando viro et mulieri vtentibus coitu non generare, nullo praedictorum impedimentorum existente in muliere: et loquimur hoc modo quo humor emissus a muliere sperma vocatur improprie: et tunc oportet quaerere signa sterilitatis, per quae sciatur, vtrum causa sterilitatis sit in viro vel non. (Cap. V.) Signum autem non esse in viro causam priuationis conceptus, est quando cum coit vir cum aliis mulieribus et concipiunt ex ipso: et tunc causa impimenti neque est in viro secundum se, neque in muliere, sed quia spermata insimul non conueniunt in vnum locum et in eodem tempore proiecta. Notum enim est, quod ad conceptum necessarium est, quod spermata ambo conueniant ad locum vnum et eundem et in eodem tempore proiecta. Viro enim in coitu spermatice proiciente quasi in principio coitus, et muliere proiciente tarde quasi in fine coitus eiusdem, impeditur impraegnatio. Quando enim vnum spermata separatum est ab alio, accidit tunc impraegnationem impediri tamdiu, quousque per aliquem coitum coniungantur ambo spermata. Idem autem genus impimenti est, quando mulier in coitus principio est in libidinis desiderio et statim emittit sperma: vir autem non tantum desiderat, et ideo diu postea sperma emittit. Saepius tamen accidit, quod mulieres propter complexionalem frigiditatem tardius emittunt, postquam diu coitus durauit: et ideo, si vir tunc etiam est aut forte dolens aut frigidae complexionis, et ideo tarde postquam diu coierit emittens, horum spermata frequenter conueniunt et perficiunt impraegnationem. (Cap. III, 5.) Amplius autem mulieribus aliquando incipientibus somnare coitum viri, et viris postea secum in vigilia coeuntibus, accidit sanas esse, vt superius dixi-

mus: et hoc non semper est secundum fortitudinem corporis, sed secundum sanitatem matricis. Hoc autem praecipue somnium accidit in multiplicatione spermatis intra vasa seminaria: et huius signum est, quod per exitum talis spermatis ex eis non debilitantur: et praecipue quando loca seminis circa renes existentia multum in se haustum habent sperma. Accidit autem non debilitari corpus in emissione spermatis tunc maxime, quando sperma exiens non bonum fuerit. Simile autem accidit in his, qui valde pletorica habent corpora. Sanius enim erit corpus eorum, quando superfluous humor per coitum vel per pollutionem exierit. Si autem siccum sit corpus et indigeat humido, quod est in ipso, tunc debilitabitur per exitum ab eo humidi; sed tamen cito restaurabitur virtus, si corpus sanum fuerit per nutrimenti humidi et confortantis susceptionem, et praecipue ex his, quae sunt humiditatis restaurativae, (Cap. III, 6.) et praecipue in eo, qui est in aetate conuenienti ad spermatis generationem, quae est aetas iuventutis. Amplius autem et mulieres norunt hoc, quod conuenientia spermata faciunt impraegnationem: propter quod etiam non se reputant impraegnari per coitum aliquem, nisi se sentiant emittere sperma interim, dum viri sperma emittitur, scientes quod sperma quod facit impraegnationem ab utroque emittitur, hoc est a viro et muliere. Amplius autem accidit aliquando, quod tam vir quam mulier eiiciunt plus de spermate quam oporteat, et ideo non totum potest remanere in matrice. Et quando matrix attraxerit de eo, quod sufficit, residuum ante orificium matricis remanebit, et tunc putant se aliquando impraegnatas non esse. (Cap. III, 7.) Abundantia autem spermatis aliquando proici in vno et eodem coitu cognoscitur ex aliis animalibus, quae multos pariunt geminos concubitu vno. Cognoscitur etiam hoc ex partu geminorum in ipso homine, qui frequenter sunt ex vno concubitu, quoniam superabundat sperma. Patet enim non quemlibet gemi-



norum per se esse ex toto spermate, sed potius quiddam  
 spermatis peruenit ad vnum aliquem locum matricis, et fit  
 ex eo embrio vnicus, et quiddam ipsius peruenit ad alium  
 locum matricis, et fit ex eo embrio alius, et sic nascuntur  
 gemini. Amplius autem mulier eiicit sperma suum apud  
 orificium suae matricis in locum, in quem eiicit ipsum vir:  
 et cum ambo spermata cadunt in vnum, et tunc matrix  
 attrahit ipsum vento in trahendo spiritum per modum su-  
 gentis: sicut os et nares spirantium attrahunt aerem. Om-  
 ne autem membrum, quod hoc modo vento et attractione  
 spiritus sugendo aliquid ad se trahit, in superiori parte  
 sua habet concauitatem, in quam recipitur ventus intractus.  
 (Cap. III, 8.) Ad concauum autem matricis vadit sperma  
 collo matricis mediante, quod est inter os vuluae et ori-  
 ficium matricis intrinsecum, super quod est matricis con-  
 cauitas. Hoc autem collum est loco virgae in masculis,  
 sicut diximus in anatomia. Ventus autem sic attractus per  
 collum matricis non stat in collo matricis, sed spargitur  
 et diffunditur in concauo matricis per totum in introitu  
 eius: propter quod etiam mulieres non longe mingunt sic-  
 vt viri, quia nec virgam habent dependentem, neque et-  
 iam ventositatem impellentem longe, eo quod diffunditur  
 in sacco matricis: sed exit fluens ab eis vrina prope crus,  
 quando extrahunt eam. Hinc etiam est, quod quando  
 sunt in desiderio et libidine magna coitus, non remanet  
 matrix et vulua in dispositione, in qua erant ante coitus  
 desiderium, sed potius inflantur et mouentur aperiendo et  
 claudendo per vaporationem venti qui est in matrice. Ex-  
 itus autem spermatis est mediante collo isto. Partes au-  
 tem istae matricis superiores sunt ampliores, quam illae  
 quae sunt prope collum matricis. Assimilatur enim col-  
 lum matricis figurae nasi: nasus enim habet viam ad can-  
 nam, per quam est respiratio: et haec est arcta: et aliam  
 partem viae habet ad aerem hauriendum, et illa est am-  
 pla. Similiter et collum matricis habet viam paruam et

strictam, quae adiuvat in exitu venti de matrice: et habet aliam partem viae amplam magnam, sicut est in naso foramen extrinsecum: et haec via venit ad os vulvae exterius. Foramen enim naris, quod attrahit aerem extrinsecum, maius est foramine, quod habet versus os et cannam. Et similiter mulieres etiam habent illud foramen, quod est ante matricem, maius et magis amplum, quam sit foramen extrinsecum; quia illud est concavum matricis: et aliud est, per quod recipitur semen coitus. Sic enim dispositum valet conceptioni spermatis. (Cap. III, 9.) Haec igitur omnia sunt, quae oportet inquiri in causis impraegnationis et impedimentis eius. Cum enim multa sint, quae causant coitum, oportet etiam esse multa accidentia promouentia et impediencia generationem. Quaecunque enim communicant in causis, communicant etiam in accidentibus causarum illarum impediens et promouens operationes ipsarum. Si enim homo per aestimationem prudentem inuestiget de causis mortis aut infirmitatis et aliorum, quaecunque nomine et ratione conueniunt istis, oportet ipsum peruenire ad primas causas ipsorum et accidentia, quae significant ea: et tunc erit perfectus medicus. Multae enim res, quae sunt circa corpora animalium, habent easdem causas; et multae habent diuersas: quas omnes oportet cognoscere, si diligens debeat adhiberi cura corporibus. Diuersitas enim causarum diuersitatem facit operationum in membris eiusdem. Oportet igitur, quod inquisitores causarum inquirant multitudinem causarum, quando multae sunt: aut inquirant paucitatem earum, quando paucae sunt. Si autem sunt res primae, quae sunt causae, et non habent causam, tunc non inquirent causam; quia aliter philosophia procederet in infinitum, quod esse non potest.



## C A P. III.

*Quod sperma feminae etiam quando non profecit generationi, est sperma vocatum.*

(Cap. VI, 1.) Id autem quod etiam est de his quae impediunt conceptum in animalibus, est forte quod feminae non appetunt coitum: quoniam in aliis animalibus maxime videmus, quod quando feminae eorum appetunt coitum, tunc quaerunt mares, et vadunt ad eos: sicut cum gallina appetit coitum, sedet iuxta gallum, etiam quando gallus non habet desiderium coeundi. Idem autem faciunt alia animalia multa. In desiderio autem coitus id quod diligit gallina, non est receptio spermatis tantum, sed etiam eiectio spermatis proprii in se ipsam. Signum autem huius est, quod quando non habet marem, tunc in se ipsam spermatizat, et ouat oua venti. Hoc enim non prouenit nisi ex appetitu eiectionis spermatis ex vasis seminariis in matricem propriam. Idem autem accidens petit in coitu maris. Huius autem signum est, quod quaedam mulier habuit locustam vociferantem musice et cantantem, quam propter cantum enutrierat: et quando creuerat locusta, inuenit eam per se sine mare esse de ouis impraegnata. (Cap. VI, 2.) Et hoc est signum, quod quaelibet animalium femina sperma habet naturaliter. Nulla enim differentia est inter ouum venti et aliud ouum in habendo sperma femininum: sed in hoc est differentia, quod ex ouo venti non exit animal, eo quod non habet sperma maris. Ex ouo autem coitus exit animal propter sperma masculi, quod est in ipso. (se ipso *Lugd.*) Nec etiam ex omnibus quae sunt a coitu maris, fiunt animalia: sed ex quibusdam fiunt, quando semen maris est efficax et semen feminae non impediat. Ex quibusdam autem non erunt, quando defectus aliquis fuerit in altero spermatum vel in utroque. Et ideo vere dictum est, quod generatio non accidit nisi per conuenientiam duorum spermatum in om-

nibus causis et accidentibus generationis. Amplius autem mulieribus accidit debilitas post pollutionem somnii, sicut post coitum: et ideo sperma est quod eiiciunt apud somnium, sicut quod eiiciunt in coitu. Cognoscitur autem hoc tactu et visu, quoniam locus genitalium humidus humore spermatibus post tale somnium inuenitur, et oportet tunc uti his tursoriis, quibus viuntur illae, quae cum viris coeunt. (Cap. VI, 3.) Ex hoc etiam apparet, quod vterque, mulier videlicet et vir, eiicit sperma, non in profundum matricis, sed ante orificium ipsius, quod deinde matrix ad se trahit per modum quem supra diximus. Adhuc autem quaedam feminae animalium, quae diu usu maris caruerunt, aliquando eiiciunt simul multum humidum spermaticum, quod paritur ab ipsis, sicut a gallinis et aliis auiibus paritur ouum venti. Quaedam autem feminae animalium nihil talium (tale?) vnquam videntur parere aut emittere, sicut equa et ouis. Contingit etiam hoc ideo, quod gallina et huiusmodi aues eiiciunt suum sperma in propriam matricem, et simul ipsum continent in ea, eo quod non habent collum matricis, in quod eiiciant ipsum: quod conueniat, ut in ipsum eiiciatur sperma. Aliae autem animalium feminae proiciunt in collum suae matricis: et ex illo paulatim effluit et non congregatur. Amplius autem mares animalium, quando non habent feminam, cum qua coeant, et sunt in feruore libidinis, saepe proiciunt sperma super terram: et tamen illud vere est sperma. In quadrupedibus enim feminis inuenitur locus coeundi extrinsecus, qui est vulua: et ille locus conueniens est spermatis receptioni, et in illum locum eiicit sperma suum mas, quando coit simul et femina. Et quia frequenter in loco illo sunt aliae humiditates, ideo spermata frequenter admiscentur cum eis, ita quod aliquando etiam natant in vrina. Gallina autem et aliae aues recipiunt spermata in matricem suam, et non habent huiusmodi loca extra: et receptum in matricem calefaciunt. Etsi sperma ex vtroque fuerit, mare



et femina, pullificabit: si autem non ex vtroque fuerit, non pullificabit.

#### C A P. IV.

*De impedimento generationis, quod est mola matricis vocatum.*

(Cap. VII, 1.) Est autem inquirendum, vtrum mulieres dicant verum in eo, quod dicunt quod saepe post pollutionem in somnio factam in vigilia se inveniunt siccas in genitalibus nullum humorem ibi sentientes. Si enim contingit aliquando, tunc notum est pro certo, quod matrix ex sui caliditate et siccitate attraxit ipsum, sicut attrahit, quando adunatur cum spermate viri. Diuisim enim accidit attrahere vtraque spermata, sicut superius diximus. Accidit etenim hoc quibusdam mulieribus, quod post coitum viri non trahunt nisi sperma viri: et putant ex hoc longo tempore, quod sint impraegnatae, quando matrix clausa est super sperma attractum: et in veritate patiuntur id quod graece molyn, latine autem molam matricis vocant. (molin — mola — vocatur *Lugd.*) Visa est enim mulier, quae cum viro coiuit et putauit se impraegnatam esse, eo quod tumor ventris eius omni die augmentabatur, et cum peruenit ad tempus partus, non peperit, nec decreuit tumor, et ita remansit per tres aut quatuor annos: et postea accidit ei dissinteria, et peperit multam et magnam carnem, quae molyn hoc est mola matricis appellatur. In quibusdam autem mulieribus durat valde diu haec infirmitas et protenditur vsque ad mortem. (Cap. VII, 2.) Accidit autem a calore matricis, quoniam quando matrix fuerit calida et sicca, attrahit ad se sperma viri aut feminae, quodcunque inuenerit, et retinet ipsum. Et quando sperma illud non est admixtum ex duobus spermatibus, non generatur ex eo animal, sed crescit per sanguinem menstruum, sicut caro: et est in talibus animalibus, sicut ouum venti in auibus: et ipsum est

causa et materia eius quod dicitur modyn siue mola matricis, et non animal conceptum, eo quod non est ex duobus spermatibus: neque est animatum, neque remansit in matrice longo tempore nisi propter dispositionem quam diximus. A simili enim causa gallina, quando recipit sperma in matrice, generat ex ea ouum, quod congregatur in ea, sicut mola congregatur: sed gallina ponit ipsum; quod non facit molam portans. Et quia iam matrix simul aperta est per sperma quod recipit et clauditur, continuis incrementis efficitur amplius quam erat. Animal autem, de quo impraegnatur matrix, exit ex matrice, quando aggrauat eam: tunc enim descendit, sicut accidit in apostematibus calidis, quae maturum humorem eiiciunt. (Cap. VII, 3.) Ista autem caro est mollis et temperata; et ideo matricem non aggrauat: et ideo non quaerit eam eiicere: propter quod in longum prolongatur infirmitas, forte vsque ad mortem durans, nisi superueniat aliqua alia laudabilis infirmitas, quae ipsam expellat, sicut mulieri, de qua supra fecimus mentionem, accidit dissinteria. Et si frigus comprimens non fuerit in matrice, non descendet ab eo mola, eo quod matrix non habet tantum calorem, ut cito digerat ipsum ad modum digestionis rerum quae coctae sunt in murationibus apostematum aut rerum aliarum: res enim decoctae et maturatae non diu durant. Matrix igitur rem istam longo tenet tempore, propter causam quam diximus. Huius autem est et alia causa cooperans, quae est quod mola non inducit dolorem, quem ex pondere et descensu inducit partus. Hic enim dolor partus est propter motum ligamentorum matricis, quae non commouentur ex mola: quia iterum mola in multis est similis carni viucae, non laeditur ex ea matrix: et sic ista caro tandem indurescit, nec est inflata nisi ex corruptione. Prolongatur autem aliquando ita diu ista infirmitas, quod caro adeo dura efficitur, quod etiam extracta securi scindi non po-



test de facili. (Cap. VII, 4.) Propter quod etiam medicorum multi ignorantes ea quae diximus, qualiter videlicet accidit ista duricies in matrice, et qualiter eleuatus venter sine hydropisi, et abscinditur menstruum, et prolongatur aegritudo, dicunt quod in matrice est causa infirmitatis, quae dicitur mola: et non est opinio eorum vera. Haec enim mola raro accidit; et si causam haberet ex vitio matricis, saepius accideret mulieribus. Hoc autem ostendit, quia saepe accidit istam infirmitatem patientibus, quod euacuantur et liberantur per fluxum exeuntibus superfluitatibus viscosis et humiditatibus subtilibus aquosis; et cum illis aliquando excidit caro illa: et si tunc remanserit, iterum augmentabitur, et lapidescit, et facit abscissionem menstrui: (Cap. VII, 5.) eo quod menstrui superfluitates transeunt in eam, sicut accidit in lactantibus: quoniam aut nihil aut modicum menstruantur, quando abundat lac in mammillis. Nihil autem horum accideret, si infirmitatis causa esset ex vitio matricis. Est autem in hac infirmitate et alia deceptio, qua plurimi inexperti decipiuntur. Aliquando enim descendunt humiditates superfluae expulsae de membris corporis, et congregantur ad locum, qui est inter matricem et ventrem siue stomachum, et putatur tunc, quod mola sit propter similitudinem tumoris: et tamen cognoscitur, molam non esse, de facili si tangatur matrix: quoniam si infirmitas est in loco dicto et in tactu matricis, non sentitur tumor neque duricies: quae sunt accidentia molae; non erit mola quod putatur mola esse. Et si locus infirmitatis est durus, sicut duricies apostematis, et est frigidi tactus, tunc notum est, quod mola est; praecipue si durus tumor manu voluitur de loco ad locum. (Cap. III, 6. et 7.) Si autem mulier non sentit dolorem et tumet, cum sit impraegnata, (non *omisit Veneta*) hoc est difficile: quoniam est in periculo molae. Saepe autem, sicut superius diximus, attrahit mulieris matrix quantum sufficit ei

de spermate: et tunc remanet multum de ipso destillans extra vuluam: et mulier sentit illam humiditatem descendentem, et nescit se impraegnata esse. Et hoc cognoscitur, sicut diximus, ex hoc, quod multa animalia generant multos geminos ex vno coitu: et notum est, quod quilibet geminorum est ex vna aliqua parte spermatis et non ex toto spermate. Manifestum est igitur ex hoc, quod matrix aliquando attrahit partem vnam spermatis, et attracta aliquando facit molam, sicut diximus.

---



---

# ALBERTI COGNOMINE MAGNI

## LIBER XXI.

### DE PERFECTIS ET IMPERFECTIS, ET CAUSA PERFECTIONIS ET IM- PERFECTIONIS.

#### TRACTATUS I.

#### DE GRADIBVS PERFECTORVM ET IMPER- FECTORVM ANIMALIVM.

---

#### C A P. I.

*De summa animalis perfectione, quae est in homine.*

**D**eterminandum autem nunc videtur de perfectione et imperfectione animalium secundum animae facultates et potestates et de causa perfectionis et imperfectionis ipsorum. Haec enim videtur antecedere considerationem de animalibus in specie perfectorum aut imperfectorum animalium. Cum autem omnis perfectio animalium et imperfectio sit secundum participationem virtutum animalium perfectam vel imperfectam, nec imperfectum sciri possit nisi per rationem perfecti, oportet nos primum determinare, quae sit ratio animalis perfectissimi: quia secundum proportionem ad illud omnem inuenimus in aliis gradum imperfectionis. Ratio autem perfectionis animalis secundum animae vires quaerenda est: quia, sicut

- iam ante diximus, quod est perfectum in virtutibus animae, perfectum est in organis, cum organum non faciat natura in animalibus nisi propter virtutem animae quae mouet organum ipsum. Hoc igitur modo non potest esse perfectior modus virium alicuius animae, nisi quod organicae vires non sint nisi secundum esse non\*) organi-
- 2 carum. Sicut enim diximus in antehabitis, in omnibus, in quibus sensibilis anima est, actus vltimus siue *endelechia* completa in his vegetatiua non est nisi sicut pars potestatis, et est in eis secundum esse sensibilis. Cuius signum est: quia hoc circa quod operatur, ad viuum sensibile terminat: et cum eodem modo in quibuscunque rationalis anima est *endelechia* completiua, in his vegetabilis et sensibilis potentiae naturales existentes sunt secundum esse rationalis, eo quod virtus animalis vnicum est esse, quod est actus et effectus essentiae et formae suae substantialis: et ideo sicut viuere simpliciter vegetabilibus est esse, ita sentire sentientibus est esse, et intelligere intelligentibus est esse.
- 3 Dico autem viuere, sentire, et intelligere, vitam et sensum et intellectum habere: eo quod anima primo actus est sicut somnus, sicut diximus in libro de anima, et postea sicut vigilia, sicut sunt duo actus ensis, scilicet figura ensis, et secare, vel incidere. Cum autem vegetabilis et sensibilis potentiae insunt secundum esse perfectissimi, quod potest esse a corpore organico, necessarium est ipsas perfectissimas esse et ratione aliquo modo participare. Cuius signum est, quod in homine tam in vegetatiuis quam in sensibilibus
- 4 est ordo vitae secundum rationem. Nam temperantia et castitas insunt secundum opera vegetabilis: humilitas autem et mansuetudo similiter, et fortitudo et plures aliae virtutes insunt secundum concupiscentias et iras sensibilis: quod esse non possit, nisi et vegetabilis et sensi-

---

\*) Mant. et Veneta naturae.



bilis inessent homini secundum esse animae intellectualis: aliter enim non esset ordinis secundum honesti rationem susceptiva. Siquis autem dicat, quod temperantia et castitas et pudicitia et caeterae huiusmodi virtutes non sunt secundum vegetabilis opera, sed potius secundum concupiscibilem, quae est sensibilis animae: hoc stare non potest: quia nutrire et generare non sunt nisi vegetabilis: et ideo virtutes quae sunt circa haec opera, non possunt inesse nisi secundum vegetabilem: et concupiscentia quae est circa haec, et similiter sensus et motus sunt circa haec, prout vegetabilis est in sensibili, sicut trigonum in tetragono. Et hoc est quod ante diximus, quod inest secundum esse sensibilis, et hoc ulterius inest secundum esse rationalis: et ideo ordinem capit opus a ratione, concupiscentiam a sensibilis animae esse: opus tamen semper est vegetativae potentiae.

Ex his ergo patet, non posse esse perfectius animal 5 homine: quoniam animae quae est actus ultimus non potest esse perfectior, quam quod sit esse aliorum et ratio sit separatum, et quod est potentia naturalis ipsius, sit coniunctum organo. Ante talem enim substantiam nihil omnino est, nisi separatum in esse et potentia: et hoc non habet animae rationem: et ideo non constituit animal. Potentia namque non potest comparari nisi ad duo, ad obiectum videlicet et ad subiectum siue substantiam, cuius ipsa est potentia naturalis. Ex parte autem obiecti non habet nisi quod a tali obiecto patitur secundum naturam, aut circa tale obiectum \*) secundum naturam operatur: et haec non elargant et exaltant posse suum vel modum sui posse: sed ex natura subiecti a quo ipsa potentia oritur, sicut omnis naturalis potentia oritur, a victoria formae subiecti habebit absque dubio tanto magis posse, quanto altior et nobilior et primae causae vicinior

---

\*) Veneta et Mant. *subiectum*.

fuerit forma subiecti, secundum cuius esse est et inest potentia naturalis: et ideo vegetabilis in sensibilibus elargatam habet potentiam, et sensibilis et vegetabilis in rationabili largissimae quae secundum naturam esse possunt sunt potentiae. Et hoc est quod quidem a multis dicitur, sed forte non a multis intelligitur, quod quicquid potest potentia inferior, potest et superior excellenter et eminenter. Patet igitur ex omnibus praedictis non solum in adiectione rationis esse hominem perfectissimum, sed etiam in omnibus potentiis et modo operationis omnium

6 potentiarum tam sensibilis quam rationalis. Ex dictis tamen oritur quaestio: quoniam visus et odoratus et auditus et caetera huiusmodi sunt potentiae quaedam sensibilis animae: et scimus lince melius videre, quam hominem, vultures autem melioris esse odoratus, et similiter canes et quaedam animalia forte melius audiunt. Hoc autem quod inductum est, non obstat. Videre enim melius, et odorare et audire melius, dupliciter dicuntur. Melius enim videtur quod acutius visu accipitur: et talis potentia visus est ex complexione organi corporalis, in quo est visus: et hoc modo nihil prohibet quaedam animalia acutiores quosdam sensus habere, quam homo habeat. Dicitur item melius videre nobiliori uti visu, siue quod est largioris potentiae super quodlibet obiectum: et hoc modo largior est visus disciplinabiliter differentias rei nuntians, quam ille qui sensibilibus tantum nuntiat easdem: et sic homo habet visum et similiter auditum et alios sensus, qui in ipso sunt principium et experimentum memoriae et vniuersalis et artis et scientiae: secundum quem modum animalia nulla praeter hominem sensibus vtuntur. Patet ergo quod diximus, quod videlicet perfectissimum animalium est, cuius omnis animae potentia est secundum esse naturae separatae, et ideo diximus in antehabitis huius scientiae, quod homo non solum specifica differentia differt ab aliis animalibus, sed etiam



secundum esse generis proximi, et secundum esse generis remoti. Genus enim proximum est sensibile, et remotum est viuum: et nos ostendimus, quod tam sensibile quam viuum participant aliquantulum rationem, licet ipsae potentiae de natura sua sint irrationabiles. Eodem autem modo etiam vegetantium in sensibili secundum esse alterum et aliud est, quam sit ex natura sua in se ipso. Et ideo dictum est, quod ratio animalis vniuscuiusque generis secundum vnumquodque animalium in esse accepta est altera et altera, et alterius potentiae, sicut determinatum est a nobis in primo de anima.

Amplius autem est adhuc alia perfectio hominis supra 7  
alia animalia omnia: primus enim sensuum, propter quem animal est animal, et quo nullum omnino caret animal, est tactus: et hic, si ad terminos et organa sensibilia respiciamus, fundamentum est omnium sensuum aliorum, et obiectum suum omnes nervos relaxat et soluit ad sentiendum: quia calor complexionalis laxat sensum, et frigus ligat omnem sensum; sicut patet per ea, quae in libro de somno et vigilia subtiliter et per causam, propter quid dicentem, determinata sunt. Si ergo tactus est, in quo omnis fundatur sensus; oportebit necessario omnem sensum inesse animalibus secundum virtutem et potentiam tactus. Quaecunque enim formae sunt in aliquo sicut in fundamento subiecto, sunt in ipso secundum potentiam subiecti et non secundum potentiam propriam formae aut efficientis, sicut a nobis saepe probatum est. Videmus enim lumen solis in sereno aëre et nubo et in nube variari tantum propter diuersum posse et diuersam virtutem susipientis ipsum. Sensus ergo omnis inest omnibus secundum potentiam et virtutem. Tactum autem habet homo et subtilissimum et certissimum, sicut a nobis in libro de anima dictum est. Igitur in homine sunt etiam caeteri sensus nobiliores, et aliqua certitudine certiores et subtiliores, quam sint in

- aliquo aliorum animalium. Cum igitur a perfectione sensuum dicatur et sit animal perfectum, erit homo perfectissimum omnium animalium, eo quod perfectius et certius sensus participat. Amplius in organis sensuum et virium animae participat homo manum solus inter animalia, quae sola est organum organorum et organum intellectus operatiui, sicut in praecedentibus istius scientiae determinatum est. Nullum autem omnino animalium praeter hominem in corpore suo habet organum organorum: sed potius habent omne organum ad vnum actum tantum: quia omnia quadrupedia habent anteriores pedes ad ambulandum tantum, et volatilia bipedia habent anteriora membra ad volatum. Homo autem huiusmodi membris superioribus non utitur ad motum, sed potius vniuersaliter in usu artis et officii aliorum membrorum. Patet igitur, quod ipse participat quaedam organa supra modum participandi omnium aliorum animalium; et sic etiam in compositione organica corporis perfectior est omnibus corporibus animalium et animalibus ipsis.
- 9 Amplius hoc ipsum ostendit figura corporis. Cum enim diametri tres constituent omne corpus, perfectius et naturalius erit corpus, quod diametrorum mensuram naturalium participat. Diameter autem longitudinis mensurat a sursum in deorsum, et in solo homine idem est sursum quod est sursum mundi, et idem deorsum quod est deorsum mundi. Similiter autem est de diametro latitudinis. Solus enim homo inter omnia animalia latum habet corpus secundum mensuram suae quantitatis latitudine proportionata: quoniam etsi quidam vermes lati sunt, non habent latitudinem longitudini proportionatam. Longitudo enim in corpore naturali semper vincere debet latitudinem, si non sit vitium naturae. Quadrupedia autem spissiora habent corpora quam lata. Homo autem solus diametrum profunditatis minorem habet ceteris diametris. Cum igitur sensus organa ponantur secundum longitudinem descendendo, et motus organa se-



cundum latitudinem, perfectionem distinctionis maiorem habent organa corporis in homine, quam in aliquo animalium aliorum. Amplius solus homo, vt superius probatum 10 est, est imago et similitudo mundi tam secundum animam quam secundum corpus: omne autem aliud animal deficit secundum plus vel minus, et defectus est ex carentia aliquius ad perfectionem pertinentis. Patet igitur etiam ex isto, quod solus homo perfectissimum est omnium aliorum. In eo enim in quo quodcunque animalium non habet symbolum cum his quae vniuersaliter causant mundum, in hoc non imprimitur ab illo: propter quod non imprimitur ab intelligentia nisi homo: nec est aliquod animalium quod ita a coelo imprimatur sicut homo: propter quod aequalitas complexionis eius magis inter omnia animalia accedit ad naturam coeli et aequalitatem.

Amplius motor secundus in omnibus in quibus est motor 11 secundi ordinis, imperfectus est, nisi coniungatur motori primo eiusdem ordinis. Motor enim primus solus est, qui a se ipso mouet, et est causa motus in omnibus, sicut patet per antedicta. Constat nobis ex his quae de motibus animalium bene determinata sunt, quod phantasia mouens se habet ad intellectum mouentem, sicut motor secundi ordinis se habet ad motorem primum. Nullum autem animalium perfecte, et ordinatum habet motum, nisi in quo motus procedit secundum rationem motoris primi qui rectus est. Solus igitur homo cum per intellectum moueatur, perfectionem habet principiorum motiuorum. His ergo modis perfectionis solus homo est perfectissimus omnium animalium.

## CAP. II.

*De modis perfectionis animalium in communi, quot sint, et quae sint secundum animam, et secundum corpus, ex quibus cognoscitur natura pigmei.*

De aliorum autem animalium perfectione dupliciter dicit esse loquendum Theophrastus. Sunt enim quaedam

illorum aliis perfectiora secundum corpus, et quaedam aliis perfectiora sunt secundum animae potentias. Et vtraque istarum perfectionum est duplex: quoniam ea quae est secundum corpus, aut est secundum corporis quantitatem, aut secundum qualitatem aequalitatis siue complexionis. Et ea quidem quae est secundum corporis quantitatem, adhuc in duas distribuitur: quoniam perfectio quantitatis, aut est secundum magnitudinem continuae quantitatis, aut est secundum numerum organorum, qui numerus est discretæ quantitatis; sicut promuscidem habet elephas, qua loco manus vtitur in multis vsibus, quam non habent alia animalia. Adhuc et ea, quae est secundum animam, diuiditur et efficitur duplex. Aut enim est in participando plures vires animae interiores, aut in participando plures vires exteriores in numero sensuum. Et secundum participationem quidem potentiarum interius apprehendentium adhuc sunt duo modi, quorum vnus est secundum numerum potentiarum, et alter secundum modum et qualitatem. Quaedam enim animalium videntur de interioribus potentiis paucas aut nullas habere. Adhuc autem ea, quae habent huiusmodi virtutes et potentias, quaedam habent in eis quandam subtilitatem, sicut apes, quam alia maiora in quantitate non habent. Et omnem modum perfectionis et imperfectionis animalium oportet nos determinare: quia ex modis perfectionis et imperfectionis ipsorum maior pars cognoscitur naturae et operum ipsorum.

2 Loquemur autem primo de modis perfectionis secundum animam. Et de animae perfectione tractantes primo inuestigabimus eam quae est secundum numerum potentiarum et virtutum animae. Vtatur autem arte quam tradidit Aristoteles in principio primae philosophiae, dicens, quod nos videmus, quod omnia animalia habent sensum aliquem et sensibilem acceptionem. Ex sensu autem quibusdam fit memoria, quibusdam autem non. Et quod non fiat memoria quibusdam ex sensu, ex hoc scimus, quod



memoria est, quae facit ex prius per sensum accepto redire in absens sensibile; sicut videmus vultures saturatos recedere a loco cadaueris, et postea iterum redire ex memoria loci et cadaueris: et hoc modo ad caulas reuertuntur greges, et aues ad nidos, et huiusmodi. Quaecunque autem animalium non persequuntur nisi praesens sensibile, et ex prius accepto non reuertuntur ad absens sensibile, scimus memoriam nullam prius acceptorum habere; sicut sunt muscae, quae cum abiguntur, reuolant immemores ictus prius accepti. Videmus etiam quod certum domicilium non custodiunt, et videmus quod non nisi praesens sensibile persequuntur. Amplius videmus quaedam animalia quandam habentia prudentiam circa res sibi conferentes, et tamen indisciplinabilia; sicut patet in apibus, quae prudentiam habent magnam in rebus conferentibus, et tamen non disciplinantur; et similiter formicae; ex prudentia enim contingit quod prouident sibi thesauros: sed quod non veniunt ad voces hominum, et non timent minas ipsorum, nec videntur fugere terribiles sonos, signum est quod sint indisciplinabilia per magisterium hominum: propter quod etiam quidam dicunt, quod sonos non audiunt: hoc autem in antehabitis improbatum est, quia videntur sonos audire. Sed quicquid sit de auditu, hoc absque dubio verum est, quod sonos non audiunt ad disciplinam, vt per nomina vocari possint et instrui, sicut instruuntur animalia multa, sicut canes et simiae et alia quaedam. Dupliciter enim habetur auditus ab animalibus: 3  
a quibusdam enim habetur, in quantum est sensus tantum; et a quibusdam habetur, in quantum est disciplinalis sensus. Et hoc secundo modo adhuc dupliciter participatur ab animalibus: quoniam hic sensus est disciplinabilis, secundum quod per sonos et voces accipitur notitia intentionum sonantis aut vocantis. Hoc enim modo soni et voces faciunt disciplinam. Hoc autem dupliciter fit. Faciunt enim soni et voces aliquando signum intentionis

confusum et aliquando determinatum. Confusum autem signum faciunt in brutis, et determinatum faciunt in homine. Et ideo quaecunque animalia auditum habent, pro-  
 vt est sensus disciplinalis, et cum hoc memoriam, qua re-  
 tinent signa disciplinae perceptae, confuse vel determi-  
 nate sunt disciplinabilia, et percipiunt disciplinam con-  
 fusam aut determinatam. Et ideo multa animalia ad voces  
 hominum multa faciunt, et elephas flectit genua coram  
 rege ad vocem indicantis, et canes multa talia faciunt.  
 Sed apes et alia minuta animalia sonos et voces nequaquam  
 disciplinabiliter percipiunt, licet magna vigeant memoria.  
 Haec ergo in quibusdam animalibus est causa disciplina-  
 bilitatis. Priuatio autem huius disciplinabilitatis est ma-  
 xime in minutis valde animalibus, sicut in apibus, et ve-  
 spis, et achatis\*), et pulicibus, et aliis huiusmodi ver-  
 4 mibus. Quaedam autem animalium videntur aliquid licet  
 parum experimenti participare. Experimentum namque  
 ex multis nascitur memoriis: quia eiusdem rei multae me-  
 moriae faciunt potentiam et facultatem experimenti: et nos  
 videmus quod multa animalia praeter hominem aliquid ex-  
 perimentalis habent cognitionis in singularibus; sicut quod  
 mustela pugnans cum serpente vulnerata contra venenum  
 accipit folium endiuiae, quae a quibusdam rostrum por-  
 cinum vocatur: et alia talia multa induximus in praece-  
 dentibus quae faciunt animalia. SuffICIENTER autem non  
 participant experimento: quia non veniunt per experi-  
 mentum ad vniuersale et artem et rationem: sed tamen  
 secundum aliquid participant experimento, vt iam dixi-  
 5 mus. Quaedam autem in tantum eleuantur in his potentiis,  
 vt artis quandam habeant imitationem, licet artem non  
 attingant. Et hoc dupliciter videmus fieri in animalibus:  
 quoniam quaedam et visu et auditu videntur esse discipli-  
 nabilia: quia faciunt quae vident, et reseruant quae au-

---

\*) achatis] *ἡχέαι*, cicadae mares.



diunt, sicut simia. Quaedam autem in tantum vigent in disciplina auditus, quod etiam sibi mutuo suas intentiones significant, sicut pigmeus, qui loquitur, cum tamen sit irrationabile animal: et ideo quantum ad animales virtutes, post hominem videtur pigmeus perfectius esse animal: et videtur, quod inter omnia animalia plus confert memorias suas, et plus percipit de signis auditus, ita quod videtur aliquid habere imitans rationem, sed ratione caret. Ratio enim est vis animae discurrendo per experta ex memoriis accepta per habitudinem localem aut syllogisticam vniuersale eliciens, et ex illo principia artium et scientiarum et similes habitudines conferens. Hoc autem non facit pigmeus, sed ea quae accipit cum auditu, non separat a sensibilibus intentionibus; et prout sunt sensibilibus intentiones, memoriae commendat, et hoc modo confert, et collata alii significat per locutionem. Et ideo pigmeus licet loquatur, tamen non disputat, nec loquitur de vniuersalibus rerum, sed potius suae voces diriguntur ad res particulares, de quibus loquitur. Causatur enim locutio sua ex vmbra resultante in occasu rationis. Ratio 6 enim duo habet, quorum vnum est ex reflexione sua ad sensum et memoriam, et ibi est perceptio experimenti. Secundum autem est quod habet secundum quod exaltatur versus intellectum simplicem: et sic est elicitiva vniuersalis, quod est principium artis et scientiae. Pigmeus autem non habet nisi primum istorum: et ideo non habet nisi vmbra rationis, quia totum lumen rationis est in secundo. Dico autem vmbra idem quod resultationem obscuram, a sensibilibus materia et appendiciis materiae non separatam. Et ideo pigmeus nihil omnino percipit de rerum quidditatibus, nec vnquam percipit habitudines argumentorum: et sua locutio est sicut locutio morionum, qui naturaliter stulti sunt, eo quod non perceptibiles sunt rationum. Sed in hoc est differentia, quod pigmeus habet rationis priuationem ex natura, morio autem habet per

accidens ex melancholia, vel alio accidente, non ex privatione rationis, sed potius propter priuationem vsus rationis. Huiusmodi autem perfectio proxima est sub homine: propter quod etiam pigmeus ciuilitatem perfectam et leges non custodit, sed potius in talibus sequitur naturae  
 7 impetum, sicut et alia bruta animalia. Sed erectus incedit, manu\*) vtitur non prout manus est instrumentum intellectus et species quaedam instrumentorum siue organorum, sed potius prout quaedam animalium vtuntur pede anteriori ad multos vsus, sicut genera muris plurima anteriori pede cibum accipiunt, et ad os porrigunt: ita etiam pigmeus vtitur manu in pluribus vsibus, sed non ad artis opera: et ideo etiam sua manus non plenam habet manus rationem. Quod autem erigitur semper, facit in eo spirituum animalium maior claritas: et ideo melioris apprehensionis est inter caetera bruta: sed verecundiam de turpi et gloriam de honesto non attendit. Et hoc signum est, quod nihil habet de iudicio rationis: propter quod etiam rhetoricis persuasionibus in loquendo aut poëticis non vtitur, quae tamen imperfectiores sunt omnium rationum: et ideo semper syluestris manet, nullam prorsus ciuilitatem custodiens. Virtus autem illa animae, quam vmbram rationis quandam vocauimus superius, innominata\*\*) quidem est a Philosophis, sed circumloquendo cognoscimus, quod haec vis aliquid potentiae addit super aestimatiuam. Cum enim aestimatiua brutorum iudicet de intentionibus, quae cum sensibilibus accipiuntur, ista plus facit, quam referunt huiusmodi intentiones ad memoriam, et elicit expertum, et vtitur illo postea ad quae  
 8 confert. Est autem hic non praetermittendum, quod aestimatum et expertum dupliciter referuntur ad vniuersale.

---

\*) incedit, manu] Videtur repetenda phrasis ita: *incedit et manu vtitur. Sed manu vtitur non prout etc.*

\*\*) innominata] Instinctus nomine comprehendunt etiam latini scriptores, nostri partem *Kunsttriebe* vocant.



Vno quidem modo contemplatiue, prout ex expertis et memoratis in sensu acceptis quidditas rerum, quod est rerum veritas, accipitur per se vel in signo communi: et hoc modo memoratum et expertum non est in pigmeo. Alio modo inest memoratum et expertum, prout in ipso est conferens ad appetitum vel fugam: et hoc modo expertum et memoratum accipiuntur a pigmeo. Et ideo diximus superius, quod experimento parum participat pigmeus. Pigmeus enim non accipit nisi referens ad conferens vel nocens in re extra: sicut et alia animalia bruta omnes intentiones quas apprehendunt, ad eos referunt et ideo nunquam separant eas a particularibus, sed potius componunt eas cum ipsis: et ideo etiam bruta et muta animalia vocantur: quia conceptus sui nihil veritatis loquuntur de rebus. Pigmeus ergo secundum praeinducta quasi medius est inter hominem diuinum intellectum habentem, et alia muta animalia, in quibus nihil diuinae lucis esse deprehenditur, in quantum experimentali cognitione vtitur per vmbram rationis, quam prae caeteris accipit animalibus: magis tamen secundum naturam vicinus est bruto, quam homini, vt patet per antedicta: quoniam expertum magis est ad vniuersale et contemplationem, quam ad particulare et motum.

## C A P. III.

*Qualiter animalia sunt disciplinabilia ex aliqua participatione virtutum animae, et praecipue qualiter hoc fit in generibus simiarum.*

Reliquarum autem simiarum genera quae multa sunt valde, in tertio gradu potestatum animae et virtutum videntur participare animam. Cum enim disciplina fiat in homine, qui solus secundum naturam est animal disciplinae susceptibile per doctrinam videlicet et per inuentionem: ea autem quae per doctrinam est, duplex est, intellectiua videlicet et sensibilis: videntur simiae prae

caeteris animalibus sagacitatem habere eam, quod disciplinabiles sunt sensibilibus. Propter quod etiam simiae Graeco nomine dictae sunt a ludo, eo quod ludicra in sensibilibus eis adhibita imitantur plus caeteris animalibus. Propter quod etiam quidam sapientes tradiderunt haec animalia ad ludum esse facta, et hac sagacitate quodlibet quod vident imitantur, et ex auditu colligunt intentiones vocantium ad sensibiles ludos ordinatas: et hic est primus gradus disciplinabilitatis. Primum enim oportet eum qui disciplinae est perceptibilis, ea quae videt et audit, diligenter attendere et conferre, et ex collatis memoria retentis experta sumere, et ex illis vniuersale depuratum accipere, prout est principium scientiae vel artis vel prudentiae vel alicuius huiusmodi intellectualis

2 virtutis. De his autem tribus gradibus perfecte non attingit simia. Simia enim inde primum, et hunc secundum non attingit nisi imaginabiliter et memoriter: sed ulterius experientia non participat, neque multum neque parum vtens experientia: et in hoc deficit a pigmeo. Imitatio autem tanto facilius est in ea, quanto rem visam vel sensam non refert ad experimentalem cognitionem: referens enim ad experimentalem cognitionem detinetur in collatione memoriarum siue per memoriam acceptorum: non conferens autem statim fertur in sensibile. Et ex hoc est, quod simia primam facultatem disciplinae habens, statim imitatur hoc quod videt: sed pigmeus et homo non statim imitantur. Habet enim simia, sicut diximus, non nisi primam disciplinabilitatis facultatem. Cuius signum est quod non discernit in quo vel quem

3 imitetur. Est autem praeter omnia, quae inducta sunt, observandum, quod nullum omnino animal disciplinabile est cum instinctu naturae. Ex disciplina enim ad tria proficit homo, ad scientias videlicet contemplatiuas, et ad artes mechanicas, et ad virtutes morales, et ad nullum horum proficit sine ratione et intellectu. Et hoc



patet per se de scientia speculatiua. De arte autem actiua constat: quoniam ars est cum ratione factiua eorum quae facit. In virtute autem attingitur medium, quod determinata ratione est medium, prout sapiens determinat. Propter quod nullum omnino animalium disciplinatur ad aliquod istorum trium. Sed cum homo habeat sensus disciplinales duos, visum videlicet, et auditum, sicut determinatum est in libro de sensu et sensato, visus deseruit inuentioni disciplinae: et cum huius inuentio non fiat nisi ratione conferente memorias et sensata, non est aliquod animal disciplinabile visu: quia non habet facultatem inuentiuae ex collatione sensibilium. Auditus autem sensus est disciplinalis ex signis rerum, et ex alio. Et ideo animalia quaedam possunt disciplinari per auditum, et nulla per solum visum. Et ex hoc cognoscitur simia maioris esse facultatis, quam aliud animal: quoniam disciplinam recipit per auditum, et imitationem repraesentatiuam operum per visum: quod non facit aliud animal, nisi homo et pigmeus, et simia. Et ideo patet, quod ista tria animalia continuis descendunt gradibus. Homo quidem particeps sensus disciplinalis omni modo, et memoriae, et experimenti, et rationis, et scientiae et artis. Pigmeus autem particeps sensus disciplinalis, et memoriae, et parum experimenti, et nihil rationis, scientiae et artis. Simia autem participans sensum disciplinae, auditum, et in visu aliquid percipiens ordinatum ad disciplinam, imitationem videlicet, et memoriam habens sensibilium, sed ex ipsa nihil omnino experimenti eliciens. Alia autem bruta in visu nihil disciplinabile accipiendo, solum auditu aliquid disciplinae percipiunt. Amplius cum, 4 sicut constat ex supra habitis, formae mouentes sint in homine, et formae speculatiuae, non recipit disciplinam simia, neque etiam aliud animal nisi formarum mouentium: propter quod etiam animalia disciplinabiliora sunt multorum valde motuum. Et ideo ad ambulandum vel

standum vel quaerendum aliquid disciplinantur animalia bruta et non ad artem vel scientiam. Et ideo nullum omnino animalium disciplinatur nisi motuum, et secundum appetitum operabilibus\*): eo quod haec sunt particularia etiam in particularibus accepta, quorum perceptiva sunt animalia huiusmodi. Videtur autem genus simiarum prae caeteris animalibus brutis aestimare de nociuo, et conferente, ex sensu et imaginatione et memoria. Aliis enim aestimationem habentibus de sibi conferentibus, et nocentibus, et illa persequentibus vel fugientibus, simia aestimat de conferentibus sibi et aliis animalibus: et ideo videns paruulum, exhibet paruulo vbera, non propria, sed matris quae peperit eum, si permittatur: puero enim exhibet vbera foeminarum, si permittatur: et hoc non alia faciunt animalia: et in hoc cognoscitur simia melioris esse aestimationis quam aliud animal. Sed in omnibus his non mouetur nisi phantasmate: et ideo frequenter errat, sicut et alia animalia: quia, sicut diximus in antehabitis, ubi phantasticum intellectui non coniungitur, frequens incidit error: et est in talibus animalibus non syllogismus operis, sed argumentatio imperfecta. Et sicut in contemplatiuis enthymema et exemplum sunt argumentationes imperfectae, quarum tamen imperfectio perficitur et reducitur ad syllogismum: ita in istis animalibus imperfecti sunt syllogismi operum, quae non habent nisi phantasticam aestimationem de operabili vel appetibili, et habent appetitum facientem impetum ad opus. Sed in hoc differentia est, quod enthymema procedit ex ea, quae est sub vniuersali, prout est in pluribus vel in omnibus: phantastica autem aestimatio non est nisi ex eo, quod videtur tantum: et ideo frequenter decipitur, sicut ex sophismate accidentis: quia non procedit nisi ex his, quae hic et nunc videntur, reputans similiter fugienda

---

\*) operabilibus] ἐνεργητικοῖς.



vel persequenda, quibus idem accidit accidens secundum hic et tunc. Inductionis autem aliquid videtur participare pigmeus in hoc, quod experimenti parum participat secundum syllogismum operatiuum, quem practicum Graeci vocant, sed perfecte non inducit, quando non progreditur vsque ad vniuersalis acceptionem. Exemplo autem haec animalia nullo modo vtuntur: eo quod exemplum fieri non potest sine aliqua rationis collatione. Haec 6 ergo duo genera animalium secundum omnia quae continentur sub ipsis, prae omnibus aliis animalibus accedunt ad hominis similitudinem, non in contemplatiuis, sed potius in motiuis: et ideo pro certo aestimatiuum haec animalia habent lucidiorem omnibus aliis animalibus: propter quod melius aestimant de phantasmatibus quam alia animalia, et melius eliciunt intentiones acceptas cum phantasmatibus quam aliqua aliorum animalium, ita quod videntur aliquid habere rationi simile, et praecipue illi actui rationis aliquid simile habere videntur, qui confert de intentionibus in ipsis sensibilibus et phantasmatibus acceptis et non separatis ab eis. Et haec est causa, quod haec genera animalium similitudines hominis vocantur: cuius signum est: quia capita habent rotunda, quasi sit sphaera compressa, per tres cellulas distincta, et aures semicirculares et immobiles, sicut homo; manus cum longis digitis, et flexuram brachii in cubito versus domesticum pectoris, et vtuntur manibus in multis vsibus sicut homo, licet non vtantur eis in vsibus artis; et sunt lati corporis et non profundi sicut homo, et habent paruum collum et latos humeros sicut homo: et foeminae eorum mamillas habent pendentes in pectore sicut foemina hominis, et habent vuluas magnas respectu suae quantitatis, et sunt positae in fine ventris, ita quod fissura vulvae ascendit versus vmbilicum, sicut disponitur vulua mulieris: et coeunt haec animalia, foemina in dorso posita, et masculo incumbente ei, sicut coeunt

homines. Et haec in exterioribus conuenientia, etiam interiorē significat conuenientiam: quia, sicut diximus, aestimatiua ipsorum similior est rationi, quam aestimatiua aliquorum aliorum animalium. Sic ergo et aliis his similibus modis insunt vires animae his animalibus, quae magis ad similitudinem accedunt hominis inter bruta animalia.

## C A P. IV.

*De his quae attenduntur circa disciplinabilitatem animalium quadrupedum.*

Quaecunque autem animalia sunt quadrupedia, minus discretionis in operabilibus habere videntur quam dicta. Et est in omnibus consideratio habenda penes tria, auditum videlicet, et aestimationem et memoriam: quia sicut in praecedentibus diximus, auditus est in homine secundum tres differentias virtutis sensitiuae per auditum. Est enim primo secundum sonorum iudicium: et hoc conuenit omnibus auditum habentibus. Est etiam in homine hic sensus disciplinae, prout ex auditu accipiuntur voces, secundum quod sunt signa conceptuum et passionum quae sunt in anima proferentium, et secundum quod referuntur ad res per nomina significatas. Et hoc dupliciter. Vno quidem modo, prout in nominibus significantur quidditates rerum contemplatiuae. Et alio modo, prout in nominibus innotescit forma operabilis, circa quam est aut effectus proferentis, aut res in quam est appetitus animalis; sicut canes ad voces vel sonos mouentur ceruorum. Et primum quidem istorum conuenit sensui auditus, in quantum est sensus particularis, ortus ex communi sensu qui est fons sensuum. Secundum autem conuenit sensui auditus, in quantum reflectitur ad ipsum ratio: et ideo hic omnino nulli irrationali conuenit animali. Tertium autem conuenit sensui, in quantum vis dicens fugere vel persequi vel operari, coniungitur ei, quae est phantasia et aestimatio: et ideo animalia quaedam tam quadrupedia



quam bipedia percipiunt hoc modo sonos et voces utroque modo. Plurima enim animalia percipiunt voces secundum quod sunt indicia vocantis, et mouentur persequendo, aut fugiendo ad illud, sicut agnus audiens lupos fugit, et audiens pastores sequitur. Hoc autem modo, quo voces sunt 2  
notae affectus et voluntatis eius, qui profert voces, dupliciter contingit percipere voces. Vno quidem modo distincte, et alio modo confuse: et quaecunque distinctae aestimant volitum quod intendit qui profert voces, disciplinabilia sunt; et haec sunt multa, et non habent hoc nisi ex instructione, et non e natura. Quaecunque autem non percipiunt volitum, sed circa volitum percipiunt aliquid irae vel beneuolentiae, fugiunt quidem a vocante, vel accedunt ad ipsum, sed non sunt disciplinabilia, nisi forte secundum valde parum: et ideo videmus canes et quaedam animalia muta\*) discere. Equus autem et mulus et asinus in hoc magis inueniuntur stolidi, licet iam viderimus equos et asinos et anseres, qui quaedam ludicra et minuta didicerant. Parua autem animalia in his minus perceptiua et disciplinabilia sunt quam magna: [tamen iam visus est mus, qui rattus vocatur, et magnus est, qui candelam ad mensam tenuit sedens erectus.] In aestima- 3  
tione autem animalium est praecipue, quia aestimatio componitur ex apprehensione phantasiae et appetitu desiderii; et habet se in sensibili anima, sicut prohaeresis in rationalibus; et quando bene pura est et boni organi, tunc efficitur boni iudicii de intentionibus rerum. Dico autem puram, quando spiritus eius est purus et clarus, et calidum eius est purum temperatum, neque pigrum ex frigido, neque commiscens operationes ex nimis calido. Organum autem bonum est, non melancholicum, quod bene suscipit spiritus in eadem claritate, qua deferuntur ad ipsum in spiritu. Haec enim animalia generaliter sunt

---

\*) muta] Edd. omnes multa.

melius discernentia sonos qui fiunt per auditum: propter quod terrestria melancholica quasi lucis expertia interioris, non bene iudicant de intentionibus quae in sensibilibus accipiuntur. Alia autem de quibus diximus opposito modo se habent ad ista: et ideo melius iudicant. Et cum soni et voces sint signa affectuum in animalibus sonantibus et sicut signa rerum, ea animalia quae lucidiores habent aestimationes, iudicant tam de rebus quam de voluntatibus sonantium per auditum. Quae autem minus bene aestimant, non iudicant de rebus, sed de sonantibus tantum et confuse. 4 Similiter autem multum considerandum est in memoriis animalium. Et homini quidem huiusmodi potentiam secundum quatuor videmus inesse virtutes, quarum prima est secundum tenere bene formas in sensu acceptas. Et alia est secundum bene tenere intentiones ex sensibilibus per aestimationem elicitas. Et tertia est secundum bene redire per recordationem ad sensibilia accepta. Et quarta est secundum bene redire ad intentiones ex sensibilibus elicitas. Et quodcumque animalium memoriam secundum omnia [quae\*)] bene participat, si cum hoc participat disciplinabiliter auditum, et est bonae aestimationis, illud bene est disciplinabile. Et quodcumque male haec omnia participat, illud non est disciplinabile. Et quodcumque quaedam horum bene, quaedam autem male participat: aut si omnia quidem, sed non secundum omnes potentias omnium haec participat, erit mediocriter quidem disciplinabile. Quatuor autem quae diximus de memoria, ad duas vires in communi reducuntur: quia duo prima fiunt sicco et frigido in temperante\*\*): alia autem duo fiunt calido et humido temperatis: et ideo dicuntur esse recordationis potius, quam memoriae. De his autem diximus in

---

\*) [quae]] Videtur delendum, aut excidit verbum *diximus* vel simile.

\*\*) Veneta *sicco frigido temperate*. Scribendum videtur *sicco et frigido temperatis*.



libro de memoria et recordatione. Et saepe contingit, quod animalia bonae memoriae sunt malae recordationis, et e conuerso. Disciplinabilitas tamen animalium magis 5 attenditur in recordatione, quam in memoria, et praecipue secundum eam partem quae est recordatiua intentionum. Cuius signum est, quod animalia disciplinata ad ludos, ad nutus et sermones magistrorum suorum percipiunt voluntates eorum, et faciunt ea quae sibi imperantur ad intentionem suorum magistrorum. Quod autem in auditu et recordatione potius apprehendant voluntatem et affectum, quam conceptum magistrorum suorum, ex hoc significatur, quod aliquando non faciunt ea, ad quae disciplinata sunt, nisi cum minis, vel blanditiis, vel aliquo signo terroris vel blanditiei: propter quod operantur ad affectum proferentis significatum in voce, et non ad conceptum: et ideo articulationem vocis non apprehendunt, et tamen recte perficiunt sibi imperata, et mouentur ex disciplina potius, modo quo mouet natura, quam modo quo mouet apprehensa et concepta intentio rerum aliquarum: quia moueri ex huiusmodi concepto est rationis: moueri autem ex habitu in modum naturae mouente, est etiam cuiuslibet potentiae bruti sensibilis. Simile autem 6 huic videmus in artibus mechanicis, quarum opera optime exercent habitum habentes ex consuetudine, et nescientes operis sui rationem: et citharizant, vel viellant, vel aliquid aliud faciunt ex solo habitu consuetudinis, nullam prorsus scientes sui operis rationem. Similis est differentia inter homines et bruta ex habitu mota disciplinae. Mouentur enim bruta sicut ex natura, non attendentia voces, nisi prout sunt signa voluntatis eius qui vocat, nihil penitus percipiendo de articulatione sermonum, quibus alloquitur ea magister, qui imperat opera. Homo autem facit imperata sibi secundum intentionem articulationis, quae est in sermone imperantis. Superius autem determinatum est, quod animalia aliquando ex ipso sensu statim obediunt ad ea, ad quae disciplinata sunt, propter

facilem facultatem, quam habent ex habitu disciplinae. In omni tamen disciplina, licet in tribus dictis consistat, potissimum est recordatio intentionum: quia illa bene redeunte omnia fient imperata; ita quod etiam quaedam animalia in talibus aliquid rationis habere videntur, cum tamen in veritate non habeant, eo quod intentiones, ad quas mouentur, non separantur a sensibilibus in sensu acceptis. Secundum haec ergo et huiusmodi et secundum gradus, qui sunt in istis, maior et minor et mediocris animalium attenditur disciplinabilitas.

## C A P. V.

*De disciplinabilitate et loquela et garrulitate auium.*

In omnibus tamen his aues alia videntur excellere animalia, quae aues multum ab hominibus disciplinantur etiam ad loquela et sermonis pronuntiationem: et hoc fit non in vno genere, sed in multis generibus auium, in quibus tamen omnibus in hac disciplinabilitate antecedit psittacus, et post eum sturnus, et pica, et monedula, et coruus, et quaedam aliae aues frequenter huiusmodi inveniuntur disciplinae, et videntur in his omnes inesse vires animae sensibilis tam exteriores, quam interiores. Et praeterea fere omnes aues pluris sunt vociferationis quam alia animalia: et in\*) hac vociferatione et garrulitate et disciplinabilitate minus videntur habere aquaticae aues quam aliae, et minus disciplinabilitatis inuenitur in ipsis. Amplius magnae aues minus garrulitatis et minus disciplinabilitatis habent quam paruae. Ex his autem quae in antecedentibus huius scientiae libris dicta sunt de auibus, scimus, quod aues sunt leuioris carnis et naturae, quam alia animalia, et abundat in eis natura aëris. Propter quod etiam leniorum et subtiliorum spirituum conuenit esse aues caeteris animalibus secundum suum genus. In leuioribus autem et subtilioribus spiritibus lucidius formae re-

---

\*) Videtur postulari *ex* aut *de*.



praesentantur: et cum huiusmodi spiritus facile imprimantur et immutentur a quibuslibet formis, sequitur aues secundum suum genus multarum esse imaginationum et aestimationis multiplicis. Iam autem in praehabitis ostendimus, quod bruta non accipiunt formas sensus et imaginationis nisi practice et contemplatiue. Sequitur ergo aues esse ex multiplicibus formis aestimationis multorum desideriorum: et ex multis desideriis causatur multa auium garrulitas. Prolatio autem sermonis non est nisi ex fracta ad figuram determinatam voce prolata. Id autem quod ex natura multos habet garritus, potest imitari multos sonos: et inde est, quod huiusmodi aues imitantur fere quicquid audiunt: et quando habent instrumenta apta, sicut linguam latam et longam et tenuem siue flexibilem, frangunt garritum suae vocis ad imitationem locutionis: et tamen in loquendo non concipiunt vocis articulationem, sed tantum garriunt imitando in figura vocis proferente. Aues autem 3  
aquaticae fere vniuersaliter sunt pigrae et grauis carnis et melancholicae, et praecipue quae inter eas sunt magnae: et consequitur, quod spiritus istarum auium proportionaliter tales sint, et ideo minus impressibiles a formis aestimationis: et propter humorem aquae, qui est locus earum, et abundat in cibis earum, sunt reumaticae et ideo impeditae vocis, eo quod abundat in eis catharrica superfluitas, quae quando auibus accidit, pituita vocatur: et hoc ostendunt soni, quos emittunt natantes in aquis. Saepe enim emittunt sonum per nares defluente catharro: a cuius soni imitatione ipsa etiam infirmitas pituita vocatur, eo quod pisonare videantur. Propter quod ergo sunt paucae et non clarae vocis: magnae autem aquaticae minus natantes sunt quam paruae, eo quod ipsae grauiiores et magis terrestres sunt quam paruae. Ex infusione autem cerebri talium auium sequitur eas non esse bene disciplinabiles. Frigidus enim et humidus humor et spiritus grossus est et fluidus sicut phlegma vitreum, et hic nec recipit bene, nec bene tenet: et in his quae receperit et tenuerit, pi-

grum est et non bene mobile: et consequitur vires animae proportionaliter se habere. Quapropter huiusmodi aues malae sunt disciplinae fere vniuersaliter: et aliquando etiam vt in pluribus sunt paucae garrulitatis, nec vociferant, et praecipue quando sunt magnae, nisi ex magnis accidentibus, sicut cignus voces quasdam emittit in doloribus mortis. Huius autem signum est, quod aues huiusmodi raucae sunt: et cum irascuntur, potius videntur sufflare quam vocare, sicut facit cignus, et anser, et aliae

4 quaedam huiusmodi aues. Aues autem agrestes et syluestres, sicut diximus, leuiorum et clariorum sunt spirituum et habent rostrum longum, sicut duae mandibulae prolongatae: et clauditur superius rostrum super inferius, sicut vna mandibula super aliam: et durities est eis pro dentibus, et longitudo linguae proportionatur rostro: et latitudo amplitudini rostri est proportionata: propter quod mouetur lingua ad rostri duritiem, sicut mouetur lingua hominis ad dentes figurando voces: et ideo quando retinent modum vocis in sono loquelaе, figurant voces naturales et imitantur loquentes: propter quod etiam aues non

5 omnes formant voces, sed quasdam tantum. Est autem adhuc in his notandum, quod ad formationem loquelaе multum facit palati durities; et palatum inter animalia duriores habent aues: et ideo melius quam quadrupedia loquuntur. In genere autem auium videmus quasdam esse musicas, et quasdam non musicas, et inter musicas quasdam videmus facere valde diuersos sonos et vocum fractiones, sicut calandra\*), et alauda, et philomena: quasdam autem videmus facere quasi cantilenam vnā tantum: et hoc iam in antehabitis huius scientiae determinauimus: hoc enim non prouenit ex disciplinabilitate horum animalium, sed potius ex multiformitate desiderii, et leuitate sanguinis et spirituum: et ideo maxime cantant aues tempore veris et coitus, quando huiusmodi humidum et

---

\*) Veneta galandra.



calidum abundat in eis, quod quidem cum euacuatum fuerit per coitum et maciem, quae contingit eis ex solitudine cubandi et cibandi pullos, tunc cessant a cantu, nisi sunt abundantes in cibo, sicut alauda, et aliae quaedam. Et quia domesticae in caueis positae non macerantur per coitum et huiusmodi solitudinem, ideo fere cantant per totum annum, si abundet eis cibus. Sed nidificatio auium signum est, quod sunt maioris artificiositatis, quam sint alia animalia. Nulla enim omnino alia animalia ita artificiose videmus construere casas, sicut aues. Haec ergo sunt ex quibus cognosci potest auium artificiositas et disciplinabilitas.

## C A P. VI.

*De astutiis et sagacitate aquaticorum animalium siue natatiliū.*

In natatilibus autem videmus insidias, quibus insidiantur ad inuicem, sicut polipus insidiatur ostreis, et dentatus piscis insidiatur tibiis polipi, et quaedam alia mirabili sagacitate insidiantur sibi inuicem, ita vt ipsae\*) insidiae proditio mixtae esse videantur, et proditio virtutem habet magnae aestimationis, et memoriae, et etiam aliquid prouidentiae in futurum videtur habere ipsa insidiosa proditio. Nisi enim polipus prouideret ostreum concham aperturum, non insidiaretur: non enim longe ab ostreo clauso se abscondit, et in vna tibiis suarum lapidem inuoluit, et illum intra concham ponit, postquam ostreum concham aperuerit: et quia tunc concha claudi propter lapidem non poterit, sugit polipus ostreum et deuorat. Si-  
2  
militer autem piscis dentatus\*\*) latet in insidiis, vbi polipus natat, et subito prorumpens tibiam amputat. Quae non

---

\*) Male Veneta et Mantuensis habent *tempore*.

\*\*) Albertus libro 24. *Dentrix vel peagrus piscis est ex re nomen habens. Multos enim dentes habet et magnos, quibus grassatur in ostrea. Hunc piscem moderni dentatum vocant. Vbi fortasse pagrus vel phagrus scribi debuit.*

videntur posse fieri sine prouidentia et memoria et sagacitate magnae aestimationis. Et similia videmus in aliis natatilibus. Videmus etiam pisces domesticari, ita quod ad sonum campanae conueniunt, et annonam accipiunt: quod sine disciplina videtur non posse fieri. Constat ergo, quod etiam ista animalia eam habent perfectionem, quae ex participatione est virium motiuarum, quae sunt sensus: imaginatio, memoria, aestimatio et prouidentia et sagacitas cuiusdam coniecturationis. In his tamen viribus natatilia et volatilia multum differunt et secundum genus et secundum speciem: secundum genus quidem: quia generaliter pigrioris sunt coniecturationis, et aestimationis, quam aues vel caetera quadrupedia. Et sunt natatilia magis stolidi in operationibus animae et sensuum: et hoc patet: quia nec visus oculi, nec auditus auris clausae, nec odoratus elementi spissi, nec tactus frigidi duri et squamosi possunt esse subtiles sensus secundum agere sensibilibiter: et cum phantasia et caeterae vires animae sicut motus quidam a sensu factae procedant, non possunt haec animalia multam habere perspicacitatem in actibus virium istarum: et ideo stolidi ea esse necesse est in genere: propter quod parum disciplinantur et in paucis. Animalia autem terrestria et praecipue aues habent sensus omnino contrario modo dispositos: et ideo in genere subtiliora sunt natatilibus, et per consequens sunt in viribus animae motiuis perfectiora, et in multis disciplinabilia, in quibus non disciplinantur aquatica. In se autem habent differentias secundum industrias naturales, sicut iam ante dictum est. Quaedam enim aquaticorum quasi nullius sunt astutiae: quaedam autem multam habere videntur astutiam, sicut superius in exemplis induximus. Et ideo generaliter quidem facilius decipiuntur aquatica a piscatoribus quam volatilia ab aucupibus: et specialiter vnum genus piscium facilius quam aliud decipitur. In hac autem differentia videntur aquatica parientia et spirantia, sicut est delphinus, et balena, et hoc quod vocatur Koki, quod Latini



vitulum marinum dicunt, et caetera his similia magis habere astutiae quam alia: et ea quae simpliciter sunt aquatica, propter abundans phlegma viscosum in eis, sunt magis stolidi. Similiter autem in generibus eorum sunt 5 differentiae astutiae naturalis et industriae: quoniam in quorundam sensuum participatione videtur esse quaedam aequalitas, eo quod omnia ista durorum videntur esse organorum, et ex hoc videntur malam et hebetem habere sensuum perceptionem. Tamen pro certo videmus quaedam ipsorum secundum omnia genera sua moueri, et quaedam esse immobilia a locis suis, sicut quaedam ostreorum genera. Scimus autem per antehabita, quod non inest motus localis, nisi insint motus principia mouentia et organa, per quae motus ille exercetur: et iterum ex quo natura non abundat superfluis, relinquitur, non esse organa motus et principia mouentia in his, quae non mouentur a locis suis. Propter quod perfectiora sunt secundum industriam ea quae mouentur aquaticorum, quam ea quae non mouentur. Amplius distinctio ordinata organorum 6 sensus est propter ordinatam sensibilibus apprehensionum. Et ideo scimus, quod ea quae ordinate distincta habent membra, in quibus est sensus, ordinatius et melius apprehendunt sensibilia, quam ea quae inordinate habent ea distincta. Et ideo dicimus pisces secundum suum genus ordinatius apprehendere sensibilia, quam ea quae sunt de genere malachie\*), sicut sepia et polipus. Probatum est autem in antehabitis, quod sensus mouet, et quod motus incipit a sensu: et item probatum est, quod inordinatio sensus inordinationem facit phantasiae et aestimationis. Et ex his sequitur, pisces vniuersaliter secundum suum genus esse perfectiores in virtutibus animae, quam ea quae sunt de genere malachie. Anima quippe non habet conuenientem spiritum et humorem, quibus influat vires suas in duris et quasi cartilaginosus cor-

---

\*) *Malákia*, mollusca dicit.

poribus, sicut habet in mollioribus ad similitudinem carnis accedentibus: et cum corpora omnium eorum, quae sunt de genere malachie, sint dura et ad naturam cartilaginis accedentia, non erit in eis vitae vehiculum, quod est spiritus, nobiliter vehiens formas et virtutes animae: et non erit in eis humidum, quod subiectum est vitae, obediens ad nobiles virtutes et formarum animae susceptiones.

7 Cuius signum est diuersa compositio piscium et malachie. Corpus enim piscium et in similibus\*) partibus et in compositione dissimilium partium contrario modo se habet ad corpus eorum quae sunt de genere malachie. In simili enim parte, quae est caro vel id quod est loco carnis existens, crescit et augetur piscis secundum diametrum longitudinis, secundum quod procedit a corde ad totam corporis longitudinem. In malachie autem speciebus est augmentum circulariter ex centro, quasi corpus suum secundum totam longitudinem non extendatur ex quodam vno, sed potius congregetur ex additione superficialium sibi ad inuicem appositarum, sicut si superficies vna super aliam poneretur: et hoc signum est imperfecti caloris, qui non potest subiectum, in quo est, ex vno aliquo extendere.

8 Similiter autem humidum, quod est in genere piscium, magis est fluens et mollicans ea, quae nutrit: sed in generibus malachie videtur esse terrestre ad naturam ossis declinans. Calidum ergo imperfectum non bene mouet, et humidum grossum non bene est mobile: propter quod necesse est, quod in astutia animae proportionaliter se habeant ista animalia: et ideo sagaciores sunt pisces in genere quam ea, quae sunt in genere malachie: in compositione enim pisces componuntur ex spinis quae sunt loco ossium, et ex carne, et neruis: et habent caput et cor et stomachum et caeteras huiusmodi partes proportionatas animalibus sagacitatem habentibus et perfectionem virtutum sensibilium. Malachie autem totum corpus intus

---

\*) similibus — dissimilium. Graece ὁμοιομετῶν et ἀνομοιομετῶν.



est durum sicut cartilago, licet extra sit molle: nec habet ad rectam figuram distinctum caput et intestina, et cor: et hoc signum est, quod etiam deficit in modo participationis virtutum sensibilium interiorum, et ideo in participatione mouentium non potest esse multum ordinatum. Licet ergo 9 quaedam ipsorum insidiosa sint, et aliquam habeant providentiam circa conferentia ad esum, sicut polipus: aut etiam circa euasionem periculi, sicut sepia, quae in tempestate se alligat lapidibus, ne vi vndarum proiciatur, et in timore emittit humorem nigrum, per quem turbat aquam, ne videatur: istae tamen providentiae sunt omnium animalium, et causantur a sensu conferentis aut nociui potius quam a praecogitatione aestimationis. Haec enim animalia propter rationem inductam in talibus viribus necesse est imperfecta esse et stolidia. Prouisio autem, quae est a sensu conferentis aut nocentis vicini, non negatur alicui animali. Omnia enim animalia visu vel auditu aut certe odoratu aut gustu aut tactu nociua vicina fugiunt, et conferentia vicina prosequuntur. Stolidia tamen et imprudentia animalia citius 10 praesentiunt talia, quam animalia sagacia et prudentia. Et causa huius est: quia quanto animalia minus occupantur circa propria, tanto facilius manifestantur in eis impressiones alienorum, sicut saepe diximus. Et ideo vapores, qui sunt causa tempestatis in ipsa sui eleuatione, sentit sepia: et ideo se alligando lapidibus prognosticum facit tempestatis. Similiter polipus ex aliqua immutatione ab ostreo facta in aqua cognoscit vicinum esse ostreum, et tunc insidiatur. Omnibus autem his sunt imperfectiora 11 in participatione virium animae ea, quae vocantur mollis testae; et adhuc imperfectiora sunt, quae durae testae sunt vocata: quoniam illa sunt stolidia, et parum cognitionis et prudentiae habentia, licet habeant organa sensuum quaedam, sicut oculos, habent tamen oculos valde duros, duriores omnibus aliis, quae duros oculos habent: et alia organa sensuum non videntur in eis, et habent valde hebetem tactum, ita quod etiam modicum et leuem tactum

non sentiunt: et membra interiora nobilia non inueniuntur in eis, sicut cor et hepar, et cerebrum. Et hoc est signum confusae animae eorum: quia sicut formatiua, quae est in seminibus eorum, confusam mobilium membrorum facit operationem, ita anima sensibilis in eis confuse influit membris vires suas, et confusam facit in eis per vires  
 12 operationem. Oportet tamen haec sensum et motum habere, secundum quod motus a sensu incipit, et habent phantasias et aestimationes et memorias valde confusas: quia sine aliqua phantasia et aestimatione et appetitu non fit motus, sicut nos multoties ostendimus. Confusio autem phantasiae et appetitus in talibus animalibus apprehenditur, quando non nisi ad sensum distinguitur: si enim in se determinationem haberet phantasma, et appetitus esset perfectus ad ipsum, mouerentur ad absens: nunc autem parum valde mouentur nisi vicino et aliquo modo sensibili per sensum percepto: et si sine huiusmodi perceptione moueantur, inordinate valde mouentur. Et hoc est signum, vt diximus, confusae aestimationis et appetitus imperfecti horum animalium: propter quod motum rectum, quem pedibus exercent, habent valde pigrum: et si motum habent fugae per natationem, sicut karabo et gammarus, illum habent velocem secundum recessum a nocumento: et cum vadunt quaerendo conferentia, vadunt quasi tentando pedibus, sicut expresse videtur in karabo, et gammaris, et cancris, et omnibus huiusmodi aquaticis. Tentatio autem, quam faciunt pedibus, signum est, quod non confidunt sibi ex mala aestimatione et cognitione eorum, ad quae vadunt. Haec ergo et his similia talem virium animae  
 13 habent participationem. Istis tamen multo inferiorem gradum habent ostrea, conchilia secundum omnia genera sua, quae quatuor in antehabitis esse diximus: haec enim pigra valde in motu sunt, et sensuum organa parum videntur in eis, nisi tactus et gustus: et ideo potius sunt circa fundum parum mota et sugentia humorem, sicut plantae: et quod in plantis facit diuisio radicum et diuaticatio, vt ex



latiori loco sugant nutrimentum, hoc facit in huiusmodi animalibus parvus motus, qui fit in eis, non per instrumenta motus, quae sunt pedes vel alae vel pinnulae, sed potius motu dilatationis vel constrictionis remouent se de loco ad locum, sicut facit testudo\*): et ideo ista animalia imperfectiora sunt omnibus superius inductis. Sed adhuc 14 imperfectiora sunt quae sunt ad modum spongiae, et sunt plantis similiora quam ea, de quibus diximus. Et sunt quasi trium generum: quoniam quaedam ex ipsis quasi media sunt inter genus malachie et plantam, sicut stincus\*\*): quaedam autem magis multo vicina sunt plantae, et videntur tamen in aliquo accedere ad sepiam, sicut spongia mobilis: quaedam autem iuxta plantam sunt parum habentia animalitatis, sicut spongia immobilis, quae non movetur de loco in locum, sed in loco suo palpitat dilatando se et constringendo. Stincus enim quoddam medium videtur inter polipum et plantam: quoniam, licet in numero tibiarum polipus excedat stincum, eo quod polipus habeat octo tibias, et stincus quinque: et polipus habet longas tibias, et stincus breues: in hoc tamen habent similitudinem, quod vterque tam polipus quam stincus sugit per totum corpus: quia per totam longitudinem omnium tibiarum polipi (siue polipedis, quod idem est,) habet poros rotundos, qui sunt quasi quaedam ora per quae sugit et est fortissimae suctionis. Cuius signum est: quia quando adhaeret alicui animali, et praecipue quando adhaeret homini, statim vt inuoluit tibias circa eum, extrahit vndique sanguinem. Stincus autem non habet huiusmodi ora 15 rotunda apta, sed per totam longitudinem omnium tibiarum suarum habet fissuram, in qua sunt quaedam venu-lae durae ad modum paruorum radicum, et per illas sugit.

\*) Videtur cochleae genus testa tectum intelligere. Et sane libro 26. habet: *Limax vermis est tardus, qui testudo vocatur*. Testudinem veram vocare solet *tortucam*.

\*\*) Stincus] Alberto pag. 245. a. dicitur *sturtus*. Est ἀστὴρ, stella marina. Conf. Gesneri histor. Aquat. pag. 1106 — 1108. qui tamen h. l. omisit, et supra in Commentariis ad V, 13, 10. pag. 322.

Adhuc autem in centro polipedis est foramen ab inferiori veniens, et super ipsum est saccus concauus, in quo est humor niger, sicut est in sepia, et in extremitate illius est caput polipi, et in ipso figurantur oculi eius, et in interiori eius est membrum quod est de substantia cornu, sed est valde tenue et molle, sicut vnguis paruorum puerorum liquefactus, et est nigri vel fuscii coloris, et est in figura sicut rostrum aquilae habens superius recuruatum super inferius, et est compositum ex duobus rostris, inferiori et superiori, sicut componitur rostrum aquilae, et non est ad mordendum et ad lacerandum aptum, eo quod est valde flexibile, nisi forte per illud capiat valde mollia: et talem formationem in medio stincus non habet, sed est figuratus ad modum radiceis habentis quinque diuisiones. Vterque tamen motum habet dilatationis et constrictionis, sed minus de animalitate, et plus de plantae natura habet stincus: e conuerso vero polipus plus de animalitate, et  
 16 minus de plantae natura. Spongia tamen quae mouetur de loco ad locum, vicinior est plantae naturae quam stincus: et spongia immobilis secundum locum adhuc vicinior, ita quod videtur planta quaedam esse aliquid participans animalitatis. Inter ostrea autem et plantas non inuenitur medium ex nimia eorum vicinitate ad plantas: et ideo sugunt nutrimentum, sicut plantae, et non habent loca exitus superfluitatum, sicut nec plantae habent.

[Propter quod etiam quidam Philosophi dicebant, talia animalia nullam omnino habere phantasiam: eo quod sensus quos participant, magis participant naturaliter quam animaliter. Isaac enim, Israëlitica Philosophus, dixit gustum et tactum inesse plantis, eo quod sunt sensus naturales magis quam animae: quia non fiunt per medium extrinsecum, nec etiam apprehendunt speciem separatam a materia, sed in materia coniunctam semper.] Haec igitur et his similia imperfecta sunt animalia: eo quod imperfecte participant vires animae tam interiores quam exteriores. Per haec autem quae diximus etiam in aliis nata-



tilibus et aquaticis modi imperfectionis et gradus facie possunt cognosci.

## C A P. VII.

*De prudentia et sagacitate serpentium et reptantium animalium et de perfectione et imperfectione ipsorum.*

Dicamus igitur nunc de reptantibus tam aquaticis quam agrestibus, et videamus, qualiter et ipsa perfecta sunt aut imperfecta. Reptantia autem et serpentina simul ponemus: eo quod natura eorum videtur esse vicina. Reptantia autem vocamus ea, quae licet pedes habeant, his tamen potius repunt quam ambulent: eo quod tam pedes eorum quam crura et coxae iacent super terram, quando ambulant, sicut patet in lacerta et stellione et tortuca et salamandra, et crocodilorum generibus, et huiusmodi animalibus quadrupedibus. Serpentina autem dicimus, quae nullos omnino pedes habentia serpunt motu corporis per inflexuras aut per motum costarum, sicut faciunt serpentum genera secundum omnes suas diuersitates, quae multae sunt valde. Omnia enim haec inueniuntur aliquam 2 habentia prudentiam et sagacitatem. Et inter ea videntur in his astutiis excellere serpentes: et huius signum est insidiae quas faciunt. Disciplinae autem parum sunt perceptibiles, quamuis Plinius narret, quendam patremfamilias in Aegypto immanem aspidem domasse, quae quotidie de cauerna egrediens solitam ante mensam acciperet\*) annonam. Ex superius autem inductis constat, omnes huiusmodi astutias causari ex humido subtili horum animalium. Frigida enim existentia calidum non habent commiscens operationes eorum, sed complexionale calidum digerens: et ideo lucidi sunt spiritus ipsorum animalium: propter quod sagacia fiunt in astutiis: propter quod etiam perfecta oportet esse huiusmodi secundum quod participant potestatibus animae sensibilis interioribus et exterioribus. Omnes enim sensus habent et exte-

---

\*) accepit Mant. accipit Veneta.

riores et interiores et aestimationem valde lucidam, hoc  
 est lucidi spiritus. Et ideo quorundam opinio est talia  
 astutiora esse aliis maioribus. Quaecunque tamen horum  
 aquatica sunt, propter frigidum congelans spiritum et hu-  
 3 midum minus sunt astuta. Ea autem quae repunt, sic-  
 vt quadrupedia, quamuis omnes habeant sensus, minus  
 tamen serpentibus vigent aestimatione et memoriis propter  
 ipsorum maiorem terrestreitatem et minus subtile humi-  
 dum. Omnia tamen haec et huiusmodi animalia imper-  
 fectionem hanc habere videntur, quod non habent perfecta  
 motus processui organa. Mobilitas enim costarum est ex  
 hoc, quod immediate in serpentibus costae nuchae spon-  
 dilium infiguntur: a nucha autem est vis processui mo-  
 tus a corpore ad nervos inde exortos directa, quae si adeo  
 perfecta esset in his, sicut in gressibilibus vel volatilibus,  
 non confortaretur tantum immediate coniunctis, sed for-  
 maret etiam organa pedum et influeret his motum, sicut  
 4 facit in aliis. Huius autem et alia causa est, quae est pro-  
 pter melius. Longa enim valde huiusmodi animalia cor-  
 pora habentia, paucis pedibus ad portandum corpus iuuari  
 non possunt: propter quod etiam quaecunque ex his bre-  
 viora sunt, vt lacerta et crocodili, et stellio, quatuor re-  
 punt pedibus: et vt maior pars corporis fulciatur, totam  
 cruris longitudinem trahunt super terram: quia si tantum  
 extremitatem pedis terrae infigerent haec animalia, longa  
 inter anteriores et posteriores pedes protensa pars cor-  
 poris ad impedimentum motus dependeret. Natura autem  
 5 semper meliori modo procedit. Differunt autem serpentina  
 ab huiusmodi repentibus in hoc, quod serpentina sui cor-  
 poris, quando volunt, erigunt partem anteriorem, quod non  
 faciunt repentia. Sed in hoc conueniunt, quod rotato et  
 circumducto capite tam haec quam illa longum suum cor-  
 pus retro respiciunt: quod tamen non conuenit breuibus  
 horum, sicut ranis, et bufoni, et huiusmodi generibus  
 repentium. Adhuc autem quaecunque longa sunt, diu  
 viuunt abscissa propter sui corporis similem fere per om-



nia compositionem et complexionem: propter quod etiam caudae abscissae recrescunt aliquantulum. Haec autem et huiusmodi squamosa propter duritiem squamarum, quando antiquantur, frequenter mutant pelles, et deponunt eas, sicut gammari mutant testas, et aues plumas, et tunc maioris efficiuntur sensibilitatis. Et hoc contingit propter similitudinem humidi nutrimentalis cum humido eorum radicali vel seminali: sicut etiam in arboribus contingit: et ideo sicut in plantis redit ad talia animalia iuuentus ipsorum secundum dictum modum. Haec igitur et huiusmodi animalia tales habent perfectiones et motus.

## C A P. VIII.

*De sagacitate et perfectione anulosorum.*

Animalia autem anulosa propterea, quod extra dura sunt et terrestria valde, et praecipue apum genera, sensus quidem omnes participant et aestimatione et memoria praeter genera muscarum: et in his circumuoluitur spiritus ex subtili humido procreatus: et ideo sagacia sunt valde: non autem disciplinabilia per doctrinam, eo quod sonos secundum quod sunt nomina rerum per modum conceptus non possunt audire, quamuis rerum percipiant intentiones. Sonus enim auditur dupliciter, scilicet simpliciter secundum quod facit signum sonantis, et secundum quod est impositus ad rem per nomen designandam. Et primo quidem modo huiusmodi animalia sonos percipiunt, sed non secundo. Causa autem est: quia nomen rei est ab intellectu cuiusdam nomen rei imponentis, et simplicius est ipsa forma rei; et propter hoc ab huiusmodi animalibus frigidis in illa notione soni non percipiuntur, licet ab aliis percipiantur animalibus. Et ideo huiusmodi animalia prudentia sunt in aestimatione et memoria conferentium ad vitam et vitae commodum, sed non sunt disciplinae perceptibilia, sicut canes et simiae, et quaedam alia talia. Quantum autem ad motum processuum, fere omnia talia conueniunt cum testeis animalibus

in ambulando, et in habendo multos pedes, et etiam in hoc quod omnes illi radican- tur sub- tus in pectore suo sub loco membri quod est eis loco cordis. Causa autem huius, sicut ostendimus in libro de principiis motus animalium, quod motus est a corde, sicut a motore primo, per calorem et spiritum diffusos in totum corpus. Cum igitur frigida sint omnia talia, sicut et testea, si longinque a corde radicaretur organa procedendi, efficerentur immobilia et inutilia ad motum: quia vis omnis motoris fortior est in propinquo, quam in remoto: propter quod etiam in talibus frequenter forti compressione coniungitur radicatio crurium, ut ad fontem caloris appropinquent. Et ut frequenter ista omnia succincta sunt, et posterior pars eorum non habet aliquam cruris infixionem, sicut patet in apibus parvis et magnis et in vespis et in araneis et lacertis\*) et muscis et in omnibus huiusmodi, et in testeis tam mollis testae quam durae similiter est, sicut patet in gammaris secundum suum genus et karabis et conchilibus

3 ostreis ambulanti- bus omnibus. Sed mirabile est in eruca et erucacae simili- bus vermibus anulosis: haec enim duplicem habent generationem, sicut in praehabitis determinatum est, et in prima quidem generatione duplicem habent motum: ad loca enim remota filo, quod de viscosa sui oris humiditate extrahunt, perveniunt tracta vel suspensa per filum illud; in quo differunt ab aranea, quae hoc trahit filum de ano. Adhuc autem haec animalia telis de suis filis contextis non videntur uti nisi ad nidum\*\*), in quo est ouorum custodia. Aranea autem utitur tela de suis filis contexta ad venationem. Habent autem haec animalia in prima sui generatione motum pedibus valde breuibus per totam sui corporis longitudinem infixis, quibus ambulant ad loca vicina propter pastum. In secunda vero generatione, qua ex ouali quadam natura

---

\*) lacertis] locustis?

\*\*) Nidum] Agnoscis speciem ex familia, quae deprædatur pometa nostra, per hiemem etiam in nido latitans.



generantur iterum ad volatilia, tela et filo non nisi parum vti videntur: quoniam a principio fermentationis suae, quando calor naturalis primum sui corporis humidum mouere et commiscere incipit ad oqualem naturam declinando, quaedam eorum, sicut erucacae quaedam [et vniuersaliter bombices,] spisse contextam inuoluto filo circa se filant materiam, [ex qua fit sericum,] et in illa calor fermentat humidum in volatilis naturam; quae cum nata fuerit, per foramen quod ore facit, egressa volat: et tunc pedes accipit longos omnes sub pectore radicanos, eo quod tunc tandem ad suae speciei perfectionem est reuersa species haec animalis. Omnia 4  
autem haec et huiusmodi videntur habere sensus: quoniam tactum habent debilem inter plura animalia, et debiliorem quam sanguinem habentia. [Et ideo mentitur Origenes dicens araneam in tactu excellere.] Gustum autem omnia talia habent per longum instrumentum, quod egreditur sicut promuscis quaedam de ore ipsorum. In odoratu autem propter siccitatem capitis et membri, quod loco cerebri est, valde excellunt: odores namque talibus in aëre occurrunt, et longe mouentur volantia ad florum odores: et hoc praecipue conuenit eis, quando secunda generatione ad speciei suae perfectionem sunt conuersa: tunc enim colligunt rores floribus infusos: et ante hoc in prima generatione plura eorum foliis arborum et herbarum nutriuntur. Auditus autem instrumenta in eis per 5  
anatomiam non videntur: percipiunt tamen sonos per poros anterioris partis corporis, sicut probatur, quia fugiunt quibusdam sonantibus, et plura eorum terminis metallorum compercussorum alliciuntur. Instrumenta autem visus per anatomiam inueniuntur in eis: et sunt oculi eorum duri non cooperti, quia molles laederentur, quando impetu per aërem feruntur volantia: et ideo etiam ista animalia perfecta dicuntur quoad sensuum participationem. Cum autem duobus, quae sunt manifestae vitae 6

potentiae, animatum ab inanimato differre dicatur, sentire videlicet, et moueri, motu multiplici participant, quoniam in vltima generatione sua volant membranalibus alis pluribus quam duabus, et ambulant pluribus quam quatuor pedibus: et plura eorum post primam generationem suam et trahuntur filo et ambulant multipedia existentia, quod significat in eis virtutis motiuae imperfectiorem, quae per vnius figurae membrum, sicut sunt pedes in gressibilibus et pinnae in natatilibus, aut duarum tantum figurarum, sicut sunt alae et pedes in auibus, motum complere non potest: sed facit vnum crus longius alio, et vnum grossius alio: et similiter facit in aliis quorundam eorum, quae non habent alas complicatas super dorsum, sed extendunt eas desuper vnam ad alteram appodiando, sicut facit eruca volans et omne genus bombicum. Et haec omnia crura quaedam longiora habent, posterius ad impingendum, cum ad volatum eleuantur: et quaedam post haec longiora habent ante quasi ad tentandum et palpan- dum, vbi resideant et cibum inueniant: mediae autem longitudinis crura habent in medio, quae simpliciter sunt ad corpus sustentandum. Et per omnia in tali dispositione conueniunt cum his muscarum et muscilionum\*) genera, quae tamen alas habent duas super dorsum applicatas. Haec igitur et huiusmodi talem habent perfectionem.

## C A P. IX.

*De imperfectis animalibus et ratione et distinctione imperfectionis eorum.*

Ea autem quae secundum suum genus imperfecta esse videntur tam in membris quam in sensus et motus participatione, sunt vermium quaedam genera, sicut ea quae lumbrici terrae vocantur, quae magis ex vaporibus inclusis sub terra vel putredine radicum nasci videntur, quam

---

\*) muscilionum] *μυσκιωνων*.



per semen maris et foeminae. In his enim nullius omnino sensus organa videntur distincta nisi tactus. Gustus enim in eis non perficitur nisi sugendo, sicut radices plantarum sugunt humores: et ideo in talibus non inuenitur nisi vna via cibi per medium distenta longitudinis, sicut est via succi per radices: nec inuenitur in eis diuersa digestio, nec membra digerentia, nec aliquid loco ipsorum, nec aliquid vasorum siue intestinorum vestigium: sed totum corpus per longitudinem ex anulis componitur: et est in medio anulus maioris quam alii spissitudinis, ad quem anteriores et posteriores in motu colliguntur: nec mouentur pede vel ala, sed potius alteram partem extremae medietatis secundum longitudinem corporis ad medium anulum contrahendo, et alteram ex eodem anulo protendendo: nec semper protendunt vnam et eandem, sed modo vnam, et modo aliam: quia ad vtramque sui corporis extremitatem mouentur. Nec vident nec audiunt, nisi forte <sup>2</sup> soni fiant cum concussionem: tunc tactu, non auditu, sentiunt concussionem\*). Haec etiam odorare nihil omnino videntur, nec gustum habere, secundum quod iudicium saporum est, sed secundum quod est sensus alimenti, et sic est quidam tactus: propter quod etiam sugendo sumunt alimentum. Nec egestionem videntur emittere, sicut neque plantae; sed aliquando inuenitur vnum talium ad alterum extendi in anteriori medietate corporis super terram, et aptari sibi directa extensione, ac si vnum calorem quaerat ex altero: quod quidam putant esse talium animalium coitum: quod tamen nulla ratione verum est: quia viae seminis in eis nullae prorsus inueniuntur, nec humescunt in tali coniunctione, sicut inuenitur fieri in serpentibus, quando coeuntes complicantur. [Ex his autem aestimat Auicenna, cum iuxta aquas limosas sunt,

---

\*) concussionem] Homines autemque genera varia, quae lumbricis victitant, eosdem terra pedibus concussa euocant.

anguillas generari: et hoc si verum est, tunc oportet ista quasi materialia semina et oua esse ad anguillarum generationem.] Haec igitur et his similia talem suae imperfectionis habent modum. Imperfectiora vero his sunt spongiarum genera, quae de omnibus sensibus non nisi confusum valde tactum acceperunt: nec motum habent nisi contractionis et dilatationis, et hoc motu de loco ad locum non feruntur, nisi in aqua et per accidens. A se enim siue per se mouetur animal, quod organum habet, quo vehit se ipsum in gradibus processui motus. Contractione autem tali et dilatatione non fit processio, nisi in aqua, vbi impingitur aqua per dilatationem: et tunc vi aquae\*) vehitur animal ad alium locum, sicut etiam lignum natans, et sicut homo nauim impingens, et in ea se per accidens vehens ad loca diuersa: propter quod huiusmodi in terra manentia terrae infiguntur immobilia secundum locum, licet sub terra dilatentur ad succos convenientes, et contrahantur ab inconuenientibus: vnde et haec non vera ratione animalia sunt, sed media inter animalia existunt et plantas. In complexione aliquid habent de tactus medietate, licet parum: et ideo per modum somni habent tactum, et non per vitam manifestam, sicut est tactus in vigilia. In compositione autem nihil penitus habent animalibus simile: quia nec in interioribus nec in exterioribus membrorum animalium praetendunt figuram vel operationem: imperfectionis igitur maximae sunt et extremam naturae animalium habent participationem. [In his ad finem vsque scientia de corporibus animalium producta est: et per ea, licet imperfecta sint, tota auxiliante Deo perfecta est scientia naturalis.]

---

\*) *vi animae aquae Mant. et Veneta, via aquae Lugd.*

---



















